

L'Odyssée d'Homère... de la version de Salomon Certon,...

■ L'Odyssée d'Homère... de la version de Salomon Certon,... 1604.

1/ Les contenus accessibles sur le site Gallica sont pour la plupart des reproductions numériques d'oeuvres tombées dans le domaine public provenant des collections de la BnF. Leur réutilisation s'inscrit dans le cadre de la loi n°78-753 du 17 juillet 1978 :

- La réutilisation non commerciale de ces contenus est libre et gratuite dans le respect de la législation en vigueur et notamment du maintien de la mention de source.
- La réutilisation commerciale de ces contenus est payante et fait l'objet d'une licence. Est entendue par réutilisation commerciale la revente de contenus sous forme de produits élaborés ou de fourniture de service.

[CLIQUER ICI POUR ACCÉDER AUX TARIFS ET À LA LICENCE](#)

2/ Les contenus de Gallica sont la propriété de la BnF au sens de l'article L.2112-1 du code général de la propriété des personnes publiques.

3/ Quelques contenus sont soumis à un régime de réutilisation particulier. Il s'agit :

- des reproductions de documents protégés par un droit d'auteur appartenant à un tiers. Ces documents ne peuvent être réutilisés, sauf dans le cadre de la copie privée, sans l'autorisation préalable du titulaire des droits.
- des reproductions de documents conservés dans les bibliothèques ou autres institutions partenaires. Ceux-ci sont signalés par la mention Source gallica.BnF.fr / Bibliothèque municipale de ... (ou autre partenaire). L'utilisateur est invité à s'informer auprès de ces bibliothèques de leurs conditions de réutilisation.

4/ Gallica constitue une base de données, dont la BnF est le producteur, protégée au sens des articles L341-1 et suivants du code de la propriété intellectuelle.

5/ Les présentes conditions d'utilisation des contenus de Gallica sont régies par la loi française. En cas de réutilisation prévue dans un autre pays, il appartient à chaque utilisateur de vérifier la conformité de son projet avec le droit de ce pays.

6/ L'utilisateur s'engage à respecter les présentes conditions d'utilisation ainsi que la législation en vigueur, notamment en matière de propriété intellectuelle. En cas de non respect de ces dispositions, il est notamment passible d'une amende prévue par la loi du 17 juillet 1978.

7/ Pour obtenir un document de Gallica en haute définition, contacter reutilisationcommerciale@bnf.fr.



Joanenbros

~~scribbled text~~

Y

Y. ~~217~~.



Yl

10624

4119

L'ODYSSEE D'HOMERE

Av Roy.

*De la version de Salomon Certon. Conseiller et Secretaire
des finances de sa Maiesté en sa maison et couronne de
Navarre, et Secretaire de sa chambre.*



A PARIS.


*Chez ABEL L'ANGELIER au premier pillier
de la grand Salle du pallas*

1604.

Avec Privilège du Roy.

BIBL. DE L'ACONET

DON.





· A V R O Y ·

GRAND Roy, sorti des Rois tes genereux
ayeux,
Branche illustre de Loys, sang de ce tige
vieux

Qui tes peres assit sur le royal degré,
O ma force, ma gloire, & mon apuy sacré,
Grand Roy dont le bon-heur, & l'épée & le bras
Ont tes lis redressez presque cheans à bas,
Dont la vertu remet ton redoutable état
En son lustre premier, dont le Soleil rabat
Noz brouillars nuageux, & de rayons nouveaux
Enfantez de la paix rend vigoureux & beaux
Tous les coins de la France: Or que Mars ne bruit,
Qu'on n'entend la rumeur ny l'efroyable bruit
Destambours & clerons, or qu'aplanis & coix
Sont les flots de la mer, vien eouter la voix
Du grand chantre de Grace, oy fauorablement
Ses vers tant celebrez, qu'offre presentement
A tes pieds sacrosaincts l'humble deuotion
D'un tien serf qui se met sous ta protection.

Cest Heros Ithaquois (Prince couuert d'honneur)
Dont les faits genereux chante ce grand soneur
Bien qu'il change de langue & de pais natal,

A V R O Y.

Qu'au premier vetement n'ayt le second egal,
 N'eut moins brave le cœur, moins le courage fort,
 Qu'il fut fin, delié, sage, prudent, accort,
 Des premiers il alloit aux perilleux hazards,
 Son front il coronoit des glorieux feuillars
 Qu'aux combats on acquiert: entreprenoit le fait
 D'un sage & meur auis, puis y donoit l'effect,
 Par l'ardeur du Soleil, par la rigueur du froid
 Inuincible de peine & de mal, il souffroit
 Le risque & le hazard d'un peril entrepris.
 Neptune onc ne le vit parmi l'orage, pris
 Des horreurs de la mort: Bien qu'à diuerse fois
 Son flot ait fracassé son temeraire bois.
 Moins sur terre l'assault d'une couarde peur
 Esbranler ne put onc son magnanime cœur.
 Son ieune aage n'estoit encore consumé,
 Qu'aux ennuis, à la peine il fut acoustumé,
 Il n'eut rien que tranerse, & le seuer ciel
 Sur luy sans nul esgard versa son aspre fiel:
 Mars, Bellone, Enyon, armes, alarme sang,
 Coups, morts, feux, fer, assaults, prirent à prix le flanc
 Du guerrier genereux: Et ce cruel mal-heur
 Importun le batit d'assiduel labeur.
 Ses voisins & amis: ses naturels subiects
 Brassoient sur son estat mille liguez proiets,
 Mangeoient ses reuenus, son patrimoine cher,
 Ses thresors, & troupeaux, pour se pouuoir nicher
 Sur son throsne sacré. Mais equitablement
 Leurs complots dessus eux cheurent en vn moment.
 Car Dieu seul donne l'estre aux regnes, & soutiēt
 Les Rois ses fauoris: comme seul il retient

AV ROY.

En ses mains de ieter leur diadème à bas.
Quoy donc foibles humains, ne de fumier si bas
Osez vous violer ses souverains decretz?
Il poursuit vainement, frappe & atteint de pres
Tous auteurs de tumulte, & trouble & faction,
Tient ses oints cherement sous sa protection,
Mais les entrepreneurs traistres & coniurez,
Des grandeurs affamez, des regnes alterez,
Il renuerse, detruit, pousse sur eux la mort,
Et les vient ruyner d'un violent effort.

Ainsi nostre Ithaquois victorieusement
Deffit ces ennemis, les punit asprement,
Les mit sur le pavé, fit le rebelle sang
En grands flots decouler, comme de quelque estang,
Sur son throsne paisible il se rassit soudain,
Et son sceptre reprit dans sa vaillante main.

Grand Roy, quel paralelle est-ce que i'entreuoy.
Non beaucoup different, entre ce Prince & toy?
Rois tous deux genereux, forts de courage, grands
D'esprit, pleins de prudence, & de superbes francs,
Nourrissons de Bellone, & rejettons de Mars
Des vos plus ieunes ans, sans peur à tous hazars,
Affermis à la peine, & qui avez tousiours
En vos ans eprouuez mille travaux rebours.
Tes voisins, comme à luy, tes naturels subiets
Ont fait sur ton etat mille mechans proiets,
Ont tasché d'erañir ton patrimoine cher
Et ton sceptre sacré par lignes arracher.
Quoy plus? de vipereaux ingratement mechants,
Creus dans ton propre sein, d'ambition sechants,
Ont voulu déchirer ton debonnaire flanc,

AV ROY.

Et remplir ta famille & de deuil & de sang.


*Mais Dieu les soumetant sous ta royallè main,
Plus qu'Ulysse ne fut, Prince tu fus humain,
Sans sang tes ennemis sont ramenez à toy
Tant es fait de vaillance & de clemence Roy.
Sans grand meurtre tu as eu le louable prix,
As conquis ta couronne, & ton état repris.*

*Reste un point seulement, ô magnanime Roy,
Qu'un grand Poëte revine, & sone mieux que moy
Tes exploits valeureux, chante superbement
Ton los & ton honneur. Tant celebre argument
Un stile autre requiert, & de si grave faits
Pour cent tels que ie suis trop penible est le fais:
Dans tes mers & dessus tes spacieuses eaux
Ils perdroient, etonnez, leurs vacillans bateaux,
Aux rayons du Soleil dont ton honneur reluit
Leurs yeux trop delicats plus que hybous de nuit
Ils clorroient esblouis, leur suputation
D'erreur pleine seroit & de presumption,
S'ils pensoient un à un des glorieux lauriers
Dont ton front se reuest par fere les milliers
Et leur plume de plomb foible reboucheroit
Sur l'enclume du temps, ou ton honneur se voit
Tant bien peint & grave, qu'il ne redoute pas
Les coups ny la fureur d'un ruyneur trepas.*

*O qu'eussay-je ta grace, & seulement ton œil
Un bon coup me ietast un favorable accueil,
Fort assez ie serois pour brauement soner
Un hymne en ton honneur, pour dire & entoner
Tes exptois genereux, & d'une mer de vers
Enfantez de ma trompe, haut lever au travers*

AV ROY.

Des grands airs spacieux ton redoutable nom,
Tes vertus, ton honneur, ton glorieux renom.
Car mon bac demené d'un favorable vent
Poussé par ta faueur, ferme dorenavant
Iroit, plus de la peur il ne s'arrêteroit,
Quand ta douce faueur force me presteroit.





LE PREMIER LIVRE DE L'ODYSSEE D'HOMERE.

ARGUMENT.

LE conseil des Dieux se tient pour renvoyer Vlysses de l'Isle de Calypso en Ithaque. Pallas y va trouver Telemachus s'estant fait semblable à Mentes Roy des Taphiens, elle l'exhorde de s'en aller à la recherche de son pere Vlysses vers Nestor à Pyle & à Sparte vers Menelaüs. Puis elle s'euanoüit en l'air, luy laissant à penser qu'elle estoit Deesse. Les poursuyuants de Penelope dressent leur festin.

AUTRE SOMMAIRE.

*Les Dieux sont au conseil. Pallas vient en Ithaque:
D'aller chercher son pere exhorte Telemaque.*

MUSE raconte moy l'homme fin & rusé
Qui si long tēps erra, depuis qu'il eut rasé
Le sacré mur de Troye, & d'hommes &
de villes
Remarqua les façons farrouches &
ciuiles,

*Il eut en son esprit en courant sur les mers
Des douleurs en grand nombre, & des trauaux amers*

LE I. LIVRE

Pour garder plein de soin & de peyne infinie
Sa vie, & ramener ceux de sa compagnie.
Mais pourtant quoy qu'il fist pour ses gens conseruer,
Il y perdit sa peine, & ne les peut sauuer:
Car les mal aduiseZ, par leur faute perirent,
Mechans, qui au Soleil tournant la hant se prirent,
Et mangerent ses beufs. Partant de leur retour
Apollon leur osta le desirable jour.

Fille de Iuppiter, Deesse (si ie t'ose
Enquerir) conte moy de cecy quelque chose,
Ceux qui sauueZ des eaux, & du sanglant effort
De la guerre, vinoient garantis de la mort,
Estoient en leur maison. La Deesse honorable,
La nymphe Calypso sur toutes venerable,
Auoit cestuy cy seul en son Isle arresté
Dans ses sombres cachots, contre sa volonté.
Et combien qu'elle sceut qu'il bruloit en son ame
De retourner reuoir son pais & sa femme,
Elle l'auoit du tout à mary desiré.

Mais quand avec les ans le temps fut expiré,
Et qu'on vit reuenir les saisons ordonnees
Qu'il deuoit retourner suiuant les destinees
En son pais d'Ithaque, il ne luy fut permis
D'estre exempt du combat, mesme entre ses amis.

Or tous les autres Dieux, hormis le seul Neptune,
Auoient compassion de sa triste fortune,
Son depit violent ne l'auoit point quitté.
Et fut contre Ulysses fans relasche irrité
Tant que dessus sa terre il eust faict son entree.

Or il visitoit lors la lointaine contree
Des Ethiopiens eslognez, & qui sont
Distinctz, & separez: le leuant ceux cy ont,

DE L'ODYSSÉE.

Ceux là sont situeZ où le Soleil se cache:
 Et qui sont les derniers des hommes que lon sçache.
 Là, au festin assis ayse il se delectoit,
 A la mort des agneaux & toreaux assistoit
 Tuez à son honneur, dont la centaine tombe
 A l'usage sacré de la sainte Hecatombe:

Mais dessus le palais de l'Olympe estoillé
 Fut le reste des Dieux au conseil appelle.
 Là le Roy des grands Dieux & des hommes le pere
 Leur parla sur le faict d'Ægystus l'adultere
 Duquel il se souuint, & qu'auoit mis à mort
 Le gentil Orestes, fils vertueux & fort
 Du grand Agamemnon. Si fit harangue telle,
 Du faict memoratif à la troupe immortelle.

O Dieux, dont les humains taxent trop dereglez
 Les saintes deitez, & pensent aueuglez,
 Que de tous leurs malheurs la source & l'origine
 Depend, & vient de nous, veu que de leur ruyne
 Ils sont la plus part cause, & leurs mechancetez
 Les menent à leur mal, entassants efrontez
 Mainte angoisse en leur cœur, contre les destinees,
 Des fautes commettans par trop desordonnees,
 Ægiste en est tesmoin, qui d'Atreide l'aisné
 Voulut auoir la femme, ô crime forcené!
 En despit du Destin: & forfait execrable,
 Osa tuer encor le mary miserable:
 N'ignorant de sa faute & la peyne & la mort.
 Car ie luy enuoyay mon messager accort
 Qui le garde d'Io jadis priua de vie,
 Luy dire qu'il quittast ceste execrable enuye
 D'auoir Clytemnestra pour femme, & ne mist pas
 Le grand Agamemnon mechamment au trespas.

A ij

LE I. LIVRE

Car Oreste viendrait en faire la vengeance
Des qu'il auroit atteint l'age d'adolescence.
Le throsne de son pere aysement reprendrait,
A sa mechanceté le salaire rendrait.

Agistus n'escouta ceste sage parole,
Insensé ne chassa de luy ceste amour folle,
De ceste remonstrance aucun conte ne fit,
Combien qu'il l'exortast ainsi pour son profit.
C'est donc à tresbondrait que l'infame adultere
De sa deloyauté a receu le salaire.

A qui respond ainsi la Deesse aux yeux pers.
O pere, ô haut-tonant, grand Roy de l'univers,
Race Saturnienne, honneur des Dieux celestes,
Il est mort iustement. Ses actes deshonestes
Ont receu de leur train la satisfaction.
Et ie souhaitterois telle punition
A ceux qui commettront tant detestable vice.
Bien que mō plus grād soin soit pour mō pauvre Vlysse:
Mon cœur pour cela seul se ronge de pité:
Car le miserable est trop long temps tourmanté
Par ces plus grands amis, dans une isle profonde
Assise iustement dans le nombril de l'onde,
Isle pleine de bois: C'est l'habitation
De La fille d'Atlas, grand d'art, d'invention,
De scauoir, de doctrine, & de qui la science
A des profonditez de la mer cognoissance:
Il supporte, il soustient d'admirables efforts
Les immenses piliers, & les estansons forts
Où s'appuye le ciel d'où descend le tonnerre
Qui gardent de pencher le lourd poix de la terre.
Là, sa fille retient Ulysses gemissant,
Retarde son retour de propos blandissant,

L'eniolle en son amour de parole mielleuse,
 Pour luy faire passer la memoire oublieuse
 De sa chere patrie: Et ne vienne le jour
 Auquel luy est prefix d'Ithaque le retour.
 Mais tout son desir est de reuoir la fumee
 Qui sort à noirs replis de sa maison aymee:
 Ayme mieux voir la flamme allumer, & courir
 Sur sa douce patrie, & puis apres mourir
 Que de prendre d'un Dieu la semblance eternelle,
 Mary d'une Deesse, & de vie immortelle.
 Mais tes affections ne peuvent s'esmouvoir
 Grand moteur de l'Olympe, & tu te fais trop voir
 Immuable, en ton cœur. Qu'est-ce que ton courage
 S'est tourné tellement à son desaduantage?
 N'est'il pas rendu sur les vaisseaux des Grecs
 Agreeables assez d'holocaustes sacrez.
 Soubs les murs d'Ilion, qui peut dire qu'Ulysse
 N'ayt fait à Iupiter maint & maint sacrifice?
 Pourquoi donc contre luy es-tu tant indigné
 O grand moteur du ciel, de flambeaux entourné?
 Atant-se teut Pallas. Et ainsi recommance
 Celuy qui dedans l'air les nuages balance.

Ma fille, qu'as-tu dit? quels propos imprudents
 T'eschappent? & ont peu passer outre tes dents?
 Quoy, puis-je estre oublieux, & n'auoir souuenance
 Du diuin Ulysse, qui passe en excellence,
 D'entendement, tous ceux qui viennent sous les Cieux?
 Qui toujours dessus tous a fait offrande aux Dieux
 Chargeans les saints autels de presents honorables
 De nous qui habitons dans les cieux venerables?
 Mais Neptune qui va la grand terre embrassant
 Luy trouble son retour, ses eaux bouleuersant,

LE I. LIVRE

Frappe de son trident, & sans aucun relasche
 Rend la mer agitée : il s'indigne & se fasche
 A cause du Cyclops, & du vilain affront
 Que l'Ithaqueois luy fist, en creuant l'œil du front
 Au plus fort des Cyclops dans sa caverne close.
 Ce grand Dieu l'engendra de la Nymphe Thoosé
 Fille du Dieu Phorcis Roy des gouffres profonds :
 Estant amoureux d'elle, & la cognut au fond
 Des cachots de la mer. Depuis ce temps Neptune
 Luy porte dans son cœur immortelle rancune.
 Il ne l'a pas tué; mais loing de son païs
 Ille va promenant trouble de mille ennuis.

Mais prenons à la fin pitié de sa misère
 Pensons de son retour. Que Neptune modere
 Un peu de son courroux : Pourroit il résister
 Luy seul à tant de Dieux s'il vouloit contester?

Pallas ayant ouy, telle réponse donne
 Appaisée & contante, au Dieu qui au Ciel tonne.

Tresgrand pere des Rois, Divin Saturnien,
 Si c'est chose arrestée, & que le veille bien
 De tous ces Dieux heureux la troupe venerable,
 Qu'Ulysse ayt son congé, Ulysse l'admirable
 En sagesse & conseil, despechons promptement
 L'Argicide Mercur : qu'il prenne viftement
 La route d'Ogygie, & die à la Deesse
 La Nymphe aux cheveux blonds, que sans faute elle
 Aller le pauvre Ulysse, afin, qu'après avoir (laisse
 Tant souffert, son Royaume il puisse aller revoir.
 Pour moy, ie m'en iray en son isle d'Ithaque
 Exorter, donner cœur à son fils Telemaque,
 L'induire à convoquer, (sans creindre & redouter,
 Les Gregeois chevelus, les amants rebuter

Qui ne font que remplir sa maison de turie
De brebis & d'agneaux, font une boucherie
De son palais Royal, que maint toreau muglant
Mainte cheure & maint bœuf rēdent par tout sanglant.
Après ie l'enuiray à Sparte la guerriere,
A Pyle l'arenense, enquerir de son pere
L'estat & le retour. Et où il l'apprendra,
Et louange & honneur tresgrand luy en viendra.

Elle dict, & soudain elle adiance à ses plantes
Ses talonnieres d'or diuinement luy santes,
D'un ouurage immortel. Qui la portoient souvent
Soit par dessus les eaux avec l'ayde du vent,
Où par dessus la terre, ou par le nud des nues
Où vers les cieux hautains, regions incognues.
Puis sa lance elle prit, grande & pleine d'horreur
Dont un fer émoulu époincte la fureur,
De force & de roideur qui ne peut iamais rompre,
Cest de quoy elle scait mettre en route & dérompre,
Quand elle est en courroux, les bataillons plus forts,
Mettre en fuite les Rois, leur donner mille morts,
Elle de Iupiter la fille bien aymee
Et nee aux forts combats. De ceste lance armee
Elle vole du ciel en Ithaque arriva,
Et droit deuant le seuil d'Ulysse se trouua:
Prit la forme de Mente & mentit, bien que grande,
La façon de celuy qui sur Taphos commande.

Elle rencontra lors les amans orgueilleux
Gaillars deuant la porte empeschez à leurs ieux
Ils estoient estendus sur les peaux arrangees
Des bestes qu'ils auoient autrefois égorgees.
Les valets, diligens de leur charge accomplir
Les uns de vin & d'eau les pots alloient remplir,

LE I. LIVRE

Les autres essuyer les tables arrangees
Des sponges qui sont de trous toutes rongees,
Les viandes dessus trancher en quantité,
Et les appareiller en somptuosité.

Qui le vid le premier attendre sur la porte
Ce fut le fils d'Ulysse, à qui la face forte
Sembloit celle d'un Dieu. Car il estoit aussi
Entre les poursuivants, le cœur plein de souci,
Songeant, si quelque jour pouvoit venir son pere,
Quel carnage on verroit de ces galans luy faire
Et comme il reprendroit aysement son estat,
Puis iouiroit de tout sans noise ne debat.
Il pensoit à cela, comme il vid la Deesse,
Et se levant soudain sortit hors de la presse,
Alla la recevoir, se faschant grandement
De la voir demeurer de hors si longuement
Il la prend par la main, & la lance luy oste.

Soyez le bien venu, luy dit-il, mon cher hôte,
Vous logerez ceans en toute seureté,
Et puis, quand de viande aurez esté traité
S'il vous plaist nous ferez vos paroles entendre

Ayant dit, il le prend sans le plus faire attendre
Et le mene dedans. La Deesse Pallas
Contrefaisant Mentes, de l'enfant suit les pas,
Entre dans la grand salle. Et Telemac' s'advance
Pour serrer le pesant de sa guerriere lance,
Se hausse tant qu'il peut, la pend au rastelier
Qui de long temps estoit, contre un tresgrand pilier:
Armes claires, donnans blesseure & mort amere
Y pendoient, & c'estoient les armes de son pere.

Lors il la fait asseoir sur un siege apresté,
Destapis bien ouurez par dessus a ietté.

Faißt mettre sous ses pieds, afin qu'il se delasse
Un petit escabeau. Puis apres quelque espace
La meine sur un lißt peint d'un excellent art
De ceux des poursuyuans il le faißt mettre à part
De peur qu'estant battu du bruit, de la cririe,
Il ne prist en son cœur dedain & fascherie,
Et peüst soupper en paix. Mais principalement
Pour scauoir s'il auroit moins incommodement
Nouvelles de son pere, agité sur les ondes.

Lors vne belle fille aux cheuelures blondes
Prit vne aiguiere d'or où l'eau alloit nageant,
Luy apporte à lauer dans un bassin d'argent,
Puis apres vint couvrir bien proprement la table,
Apporte de Ceres le present profitable.
Et l'Escuyer seruoit de bons viures chargez,
Et de toutes façons les grands plats arrangez.
Apposoit deuant eux la vaisselle doree,
Et le Herauld versoit la boisson desirée,
Après voicy venir les rogues poursuyuans,
Qui se rangent par ordre, & les mains vont lauans.
Les filles, le beau pain des paniers d'osier tirent,
Et eux de force mets le ventre se remplirent.
Les pages à qui vent presentent le bon vin,
A grands pleins gobelets. Ayans chassé la faim
Et la soif bien loing d'eux les amoureux se leuent,
Car autres grands chagrins & soucis ne les greuent
Qu'apres auoir bien ben aller rire & sauter,
Et aux airs des chansons leurs oreilles flatter,
Ornements des festins. Or le Herauld se tire
En auant, met en main à Phemius la lire
D'un ouurage tresbeau. Ce Phemius estoit
Entre les poursuyuans, par contrainte il chantoit

LE I. LIVRE

Et par nécessité. Lors il passa son ponce
 Sur son luth, & chanta d'une voix belle & douce:
 De quoy Telemachus l'occasion prenant,
 Son chef contre celui de Minerve ioignant,
 Afin que les amans ne le peussent entendre:
 Je te supply, dit-il, mon cher hôte, de prendre
 Mes paroles en gré, & ne te fascher pas
 Si ie te veux un peu entretenir tout bas.
 Tu vois comme ces gens n'occupent leur pensée
 Qu'à rire & qu'à gausser, mon ame en est pressée
 De deuil iusqu'au mourir: Tu apperçois comment
 Tout se ruine icy: & comme impunement
 Ils consomment le bien d'un miserable Prince,
 Duquel les os, hélas, en estrange province
 Blanchissent sur la terre, ou sur la mer flottans
 Vont miserablement contre un roc se heurtans.
 Que s'il pouuoit venir, la canaille maudite
 Souhaitteroit bien plus pieds vistes pour la fuite
 Que riches paremens. Mais puis que le trespas
 Cruel nous l'a rayé: Hélas, ie ne voy pas
 D'espoir en nostre fait. Et si quelqu'un asteur
 Me disoit, Ulysses sans aucune demeure
 Sera bien tost icy, ie ne le croirois point,
 Tant m'est desesperé son retour de tout point.
 Mais dy moy d'où tu viens, si cela ne t'offence,
 De quel pays es tu, où est ta demeure,
 Quel viens tu entre nous, & quels sont tes parens,
 Qui sont les mariniers sur ceste mer courans,
 Et le vaisseau, qui t'ont mis en l'isle d'Ulyse:
 Car ie ne pense pas que venir tu y puisse
 Et par terre, & à pied. Ceste hospitalité
 Est elle de nouveau, ou d'ancienneté?

Force gens autresfois voyageans, ont pris cure
De loger chez mon pere, & ceste couuerture
Se haussait, ce logis s'ouuroit tres-volontiers
Aux amis, qui vouloient passer en ces quartiers.
Ulysses, des humains l'amour & la liesse
Gardoit bien l'amitié. A qui lors la Deesse.

Je suis Mentes, le fils d'Anchialus, ie tiens
Soubs mon commandement les rameurs Taphiens,
I'arrine tout ast eure avecque mon nauire
En ceste isle d'Ithaque, & plus outre ie tire
Avec mes compagnons la mer noire courans
Vers des gens de langage au nostre differens.
A ces gens de langage & diuers & estrange,
Je voudrois bien donner du fer en contr'eschange,
Pour du cuyure qu'ils ont. Mon nauire est ancré
Hors la ville à l'escart dedans le port Rethré
Soubs Neie l'ombrageux. Mon amitié fidelle
Avec ceste maison n'est fraische ny nouvelle,
Et le droit mutuel de l'hospitalité,
Et nos dieux maisonniers sont d'ancienneté
Amis & compagnons. Laërtes vieillard sage,
Et vertueux Heros, m'en rendra tesmoignage,
Si tu le veux sçauoir. On dit qu'entierement
Il a quitté la ville, & ne met nullement
Le pié dās la muraille, ains qu'aux champs sa retraite
Sans nulle ambition le bon vieillard a faicte,
N'ayant là qu'une vieille afin de le traitter,
Et son boire & manger luy cuire & apprestier.
Quand il est trauaillé, quand ses iambes malades
N'en peuuent quasi plus des longues promenades
Qu'il faict dans son iardin gayement verdissant,
Ou dans sa douce vigne en raisins rougissant,

LE I. LIVRE

Ou dans son beau verger quant la saison rapporte,
Et qu'on le void courbé de fruits de toute sorte,
La fidelle seruant accourt incontinent,
Et soustient le bon homme à peine se trainant,
Et restaure son cœur de viande agreable.

Or à l'occasion du vieillard honorable
I'ay ceste route pris. Pour ton pere, l'on tient
Qu'il est bien loing d'icy, que la mer le retient,
Errant par cy par là, & que les Dieux celestes
Luy troublent son retour & luy sont fort molestes:
Le diuin Ulysses que ie pense n'a pas,
Bien qu'il eust fait naufrage, encor' passé le pas,
En quelque part qu'il soit sur la mer difficile
Croy qu'il respire encor, ou s'il est en quelque Isle
Qu'il y est detenu par les flots se batans,
Ou par les gens du lieu, farouches habitans.
Ie predy, & ie sens s'enfler d'une autre sorte
Que de l'accoustumé ma poictrine plus forte
Deuine du futur: & ce qu'elle dira
Par ma bouche à present, ie croy qu'il aduiendra
Sans consulter icy precipité augure,
Ny les oyseaux deuins, ny leur vol ou figure.
Le temps viendra bien tost, & ne tardera pas
Que le fort Ulysses pressera de ses pas
Le désiré terroir de sa douce patrie,
Bien que liens de fer en toute leur furie
De durs & forts chainons le retinssent serré:
Croy qu'il inuentera son retour désiré.
Il est homme doié de longue experience
D'esprit bien delié, plein de grande prudence.
Or pource qu'il m'est pris tresgrande volonté
De sçauoir qui tu es, dy moy ta paranté,

Serois-tu bien le fils de ce grand personnage?
Car il auoit ainsi tous les traits de visage,
Et les yeux ainsi beaux. Tu luy ressemble bien:
L'amitié nous auoit ioints d'un ferme lien,
Nous nous reuisions, & mangions à la table
L'un de l'autre souuent, maint propos delectable
Se passoit entre nous, ie dy auparauant
Qu'il eust pour s'embarquer donné la voile au vent
Pour passer en Phrygie, avecques la ieunesse
Et la flotte des Rois & des Princes de Grece,
La fleur des bons soldats, l'honneur des combatans,
Car ie ne l'ay parlé ne veu depuis ce temps.

A quoy Telemachus. La verité est telle
Que ma mere tousiours m'a dit que i'estois d'elle
Et du fort Vlysses, mais i'en suis ignorant:
Car nul ne peut au vray s'aller trop assurant
Du pere d'où il vient. A la volonté mienne
Qu'un pere heureux me dist estre la race sienne
Qui peust en sa maison, hors de soucis cuisans
Contant & plein de biens acheuer ses vieux ans.
Mais on tient que ie suis le fils du miserable,
Qui va courant les mers, que la fortune accable
De mille afflictions. Voila mon hôte cher
Tout ce que ie te puis de ma race toucher.

Pallas suyuit ainsi. Les Dieux bons de nature
Ne t'ont pas faict sortir d'une lignee obscure
Et ne permettront pas qu'une telle maison
En noblesse croissant de si longue saison
Viene à se submerger, la sage Penelope
T'ayant engendré tel. Mais qui est ceste trope,
Dymoy la verité, que veut dire cecy:
D'où viennent tant de gens? Quels festins sont-icy?

LE I. LIVRE

Est-ce nopce, ou festin public, que tu veux faire?
 Ceste despence icy sent plus de l'ordinaire
 Quand on inuite amis pour s'entre-visiter.
 Ceste arrogance encor n'est point à supporter,
 Elle est trop violente: & si ne me peut plaire
 La dissipation des biens que ie voy faire
 Par toute la maison. C'est vne cruauté
 De ces beaux amoureux, de leur temerité,
 Et de leur insolence. Et qui est l'homme sage
 Qui ne detestera tel cas en son courrage?
 Ou le fidele amy qui regarder pourra
 Ceste grand' vilennie, & ne l'abhorrera?
 Car tout homme de bien qui void vne insolence,
 Et vne iniquité s'en fasche & s'en offence.

Puis que c'est ton plaisir, dit le fils d'Ulysses,
 D'entendre bien au vray d'où viennent ces excès:
 Ceste maison deuait autant qu'autre du monde
 Estre riche en grands biens, à nulle autre seconde
 En gloire & en honneur, grand renom, attendant
 Tant que le maistre y eust, sage, esté résidant.
 Mais le malheur des Dieux ores nous contrarie
 Empeschant son retour en sa douce patrie,
 Animez contre nous ils l'ont trop rigoureux,
 D'entre tous les viuans fait le plus malheureux.

Encore ma douleur seroit plus supportable,
 Et mon cœur serreroit sa plainte lamentable
 S'il fust mort deuant Troye ayant l'espee au poing,
 Ou dans sa nation. Car on eust eu le soing
 De dresser vn tombeau à Prince tant insigne,
 Ce seroit à son fils vne remarque digne
 Et de gloire & d'honneur, qui mesmes eust esté
 Pour se faire admirer à la posterité

Maintenant il est mort estendu sur la terre,
Sans aucun beau renom par les armes acquerre,
De personne entendu, de chacun incogneu
Pasture des oyseaux sur le sable menu,
Et ne nous a laissé que sujet de criries
Que matiere de deuil, de pleurs, de fascheries.

Ce n'est pas tout, car outre & la perte & la mort
D'un pere vertueux dont ie me plains si fort
Les Dieux m'ont enuoyé plusieurs autres tristesses,
Ont plongé cest estat en piteuses detresses,
Cruels ont attaqué mon ame rudement:
Car de tous les costez que le moite element
Ceint les Isles d'autour, une trouppes ennemie
De tous les plus puissants, dont l'un de Dulichie
Se vante estre sorty, de Samos l'autre vient,
Et l'autre est arriué de Zacynthe, qu'on tient
Riche en bois, il en vient mesmes de la sterile
Ithaque, à labourer plus qu'autre difficile:
Tous ceux finalement qui regnent en honneurs
Es Isles d'alentour, Princes & grands Seigneurs
Se sont amouraché de ma mere, la pressent
De se remarier, ceste maison oppressent,
Mangent ce patrimoine & le vont deuorant:
Mais ces flambeaux d'amour qu'ils vont tant desirant
Elle rejette fort, mesprise, de daigneuse,
Et la nopce, & toute autre action amoureuse.
Et n'y a pas moyen de les en déloger,
Ny d'y mettre vne fin, acheuans de ronger
Cet pauvre reuenu, & de mettre en ruine
Ceste pauvre maison qui ja trop y encline:
Encor ay-ie grand peur, que m'oyant plaindre, hélas,
Ils me mettent à mort. Lors l'ireuse Pallas:

LE I. LIVRE

Las, hélas, qu'Ulysses te fait ores grand faute,
 Qui est ores absent, errant sur la mer haute:
 Qu'il accommoderoit ces mignons proprement,
 Et qu'il les traitteroit du poignard brauement:
 Que puisse-il reuenir, & dedans ceste porte
 Un iour entrer, couuert de sa cuirasse forte,
 Bonne espee au costé, & branlant l'inhumain
 De deux forts iauelots en chaque forte main:
 Tel qu'il vint autresfois, triomphant, plein de gloire
 Loger en ma maison, sy resiouyr, y boire,
 Et faire bonne chere. Il reuenoit, exclus
 De ce qu'il demandoit au Mermeride Ilus
 Se tenant en Ephyre. Ulysse en peine grande
 Estoit allé vers luy, pour luy faire demande
 D'un venin mortifere, auquel il tremperoit
 Le bout poinctu des traits qu'en guerre il porteroit.
 Il luy en fit refus: car il auoit empreinte
 En son ame, en son cœur, la terreur & la crainte
 Des Dieux tousiours viuans: Mon pere toutesfois
 L'aima tant pour l'auoir frequenté maintesfois
 Qu'il luy en fit present, & ne laissant en peine
 Ton pere, qu'il aymoît d'amitié ancienne,
 Il l'en accommoda. Maintenant pleust aux Dieux
 Qu'Ulysses reuint tel parmi ces amoureux.
 Ils seroient arriuez à leurs heures dernieres,
 Et trouueroient sons luy des nopces fort ameres.
 Mais ce qui aduiendra, tout sera mis un iour
 Au bon vouloir des Dieux: Soit que par son retour
 Il prenne de ces gens & de leur insolence
 Dans sa propre maison la trop iuste vengeance,
 Ou ne la prenne point: le te veux aduertir
 Pourtant, comme tu dois les faire tous sortir

Dehors

Dehors de ta maison. Demain, conuoque, appelle
Tous les Grecs au conseil, & d'une façon belle
Parle à eux comme il fault. Les Dieux tousiours viuas
T'en seront à tesmoins. Dy à ces poursuyuans
Qu'ils ayent à vuidier la maison de ton pere
Et s'en aillent chez eux: que s'il plaist à ta mere
De se remarier, son pere est un grand Roy,
Fort riche, fort puissant, & qui a bien de quoy,
Elle y peut retourner: là pourront ils parfaire
Les nopces à leur gré, recevoir de son pere
Un douaire bien grand, avec tant de presens
Qu'on pourroit requérir, & propres & d'uisans
A la fille d'un Roy. Or ie te veux apprendre
Encor un bon conseil si tu me veux entendre,
Pren moy en diligence un vaisseau bon & fort
De vingt bons auirons, pour repousser l'effort
Et des flots & des vents mets la voile legere
Au vent, monte dedans & va chercher ton pere,
Quelque part que ce soit: peut estre il aduiendra
Que quelqu'un en courant nouuellest'en dira,
Ou que par Iupiter elle te soit semee,
Prodigue donateur d'honneur & renommee;
Va t'en premierement à Pyle porte-tour
Aux champs Neleïens, & visite la cour
Du bon vieillard Nestor, de sa parole bonne
Tu pourras t'enquerir. Au partir delà, donne
Iusqu'en Lacedemone à l'Atreide puisné
Le blond Menelaüs, le dernier retourné
De tous les Grecs de Troye en fortune prospere.
Si d'adventure d'eux tu apprens que ton pere
Soit encores viuant, & doine reuenir,
Là tu pourras un an tout entier te tenir,

LE I. LIVRE

Et y patienter. Si le bruit au contraire
 T'asseurant de sa mort son retour, desespere
 Reuien t'en en Ithaque, au regne paternel
 Et dresse son tombeau, qu'un honneur eternal
 Soit fait à ce tombeau par seruiques publiques,
 Par saintes oraisons, & par jeux authentiques.
 Adiouste à tout cela ce qui sera decent
 Aux ombres genereux d'un Heros si puissant,
 Puis ta mere pouruoy de mary conuenable.
 Tout cela fait, donne ordre à la mort miserable
 De ces beaux amoureux, ou soit subtilement
 Ou de combat ouuert, mets les entierement
 A mort sur les carreaux d'un genereux courage.
 Despouille tout l'enfant, plus grand de cœur que d'âge,
 Pren le sceptre en ta main, commande : de façon
 Qu'on ne te die plus que tu n'es qu'un garson.

A dui se quel honneur, combien donne de gloire
 Au petit fils d'Atreus le bien de sa victoire,
 Regarde combien a de reputation
 Le vengeur Orestes parmy sa nation?
 Braue il a fait souffrir mort honteuse & amere
 L'enuoyant aux enfers, au meurtrier de son pere,
 Le braue Agamemnon aux armes si puissant,
 Que l'insigne Égistus de Thyestes issant
 Auoit aussi tué, souillant son mariage,
 Polluant le respect du sang, du parentage.

Fais en ainsi mon fils, embrasse courageux
 L'honneur & la vertu : tu es fort & nerueux,
 Dispos, de belle taille : entre en apprentissage,
 Je ne voy rien en toy qui bon-heur ne presage.
 Aux armes donc, pren les desia victorieux,
 Et pousse ton renom iusques à nos nepueux.

Orie te dy adieu, souvien toy, ie te prie,
De ce que ie t'ay dit : i'entends ma compagnie
Gronder, d'attendre tant, ie m'en la vay trouuer,
Et prenant mon vaisseau me remettre en la mer.

Auquel Telemachus, plein de prudence accorte,
Tu me vas exhortant, me d'une amitié forte
Et de fidelité, comme ton propre fils,
Tu m'as en peu de mots de la vertu prefix
L'amour & le chemin, comme mon propre pere.
Hors de mon souuenir i'amaïs, comme i'espere,
Tes admonitions saintes ne sortiront,
Ains tant que ie viuray fermes y demourront.
Tu pouuois toutesfois faire icy dauantage
De seiour avec moy, sans hastier ton voyage:
Mais cependant au moins que tu te laueras,
Que tu prendras plaisir, & te reposeras,
Attens moy un petit ie n'arrestera y guiere,
Ie veux aller querir au thresor de mon pere
Quelque digne ioyau pour te faire un present:
Il sera riche assez mais qu'il te soit plaisant,
Et tu le garderas pour auoir souuenance
De moy, pour te remettre en ton cœur ma presence:
Les amis font cela en tel cas que cecy
Pour signe d'amitié. A qui Pallas ainsi.

Ne me retarde point mon fils, à la pareille,
I'ay haste, les presens que l'amour te conseille
De m'offrir, garde les, & quand ie reuiendra y
De tes mains de bon cœur, certes ie les prendray,
Les porteray chez moy, & recompence digne
Te rendray de bon cœur d'amitié si insigne.

Ce disant, la Deesse esuanouit en l'air
Tout ainsi que l'oïseau qui s'eschappe à voller

LE I. LIVRE

Et bat les vents de l'aïfle: au partir elle excite
Le cœur de Telemaque, au souuenir l'incite
De son pere tant plus, & luy bien estonné
La Deesse sentit. Il s'en est retourné
Trouuer les poursuyuans, entre eux a repris place
Semblable à quelque Dieu de façon & de grace.

Là le chantre excellent haussoit sa belle voix,
Et ranimoit les nerfs de son resonnant bois,
Et le silence estoit. Il chantoit l'infortune
Des Capitaines Grecs sur l'onde de Neptune
A leur retour de Troye, auxquels Pallas frappa
Les vaisseaux en son ire & loing les dissipa.

Jusqu'en la chambre en hault donna la chanson rare,
Et se fit écouter à la fille d'Icare
La sage Penelope. A donc elle descend
Non seule, auecques soy deux filles elle prend,
Deux Nymphes en beauté l'accompagnoient gentilles,
Et ses pas vertueux suyuient les ieunes filles.
Quand des femmes l'honneur vers les Princes paruint
Sur le seuil bien basti de la sale ell' se tint,
D'un voile delié se couuroit le visage,
A son costé estoit chacune Nymphes sage
En pudique maintien. Lors au Poète chantant
Ces propos elle dit pleurant & sanglotant.

Phemius, si tu veulx ie sçay que tu n'as faite
De sujet, de matiere & delectable & haute,
En chantant les exploits des hommes & des Dieux.
Chante les s'il te plaist à ces beaux amoureux
Pendant qu'ils sont beuuans & qu'ils te font silence,
Mais ne ramentoy point la triste souuenance
De ces fascheux sujets, ne vueilles raconter
Ce qui me faict pleurant, nuict & iour tourmenter,

Qui me ronge le cœur, qui l'ame me bourrelle
Larmoyant sans cesser une plainte eternelle,
A la triste pensée, au fascheux souvenir
De mon cher Ulysse qui ne peut reuenir.
La reputation duquel & la grand' gloire
Eclairant par la Grece en Argos est notoire.

Chere mere, pourquoy vous faschez vous ainsi,
Dit lors Telemachus, contre ce chantre icy?

Qui chante ce qu'il a le plus en fantasie!

Souffrez qu'il se delecte avec sa poësie

Et chante à son plaisir, puis que d'un feu puissant

La verue qui le pousse ainsi le va pressant,

Il ne luy en faut pas attribuer la faute.

La matiere du chant vient de la voute haute,

Descend de Iupiter, qui selon son desir

Aux esprits excellens suggere à son plaisir,

Le sujet tel qu'il veut. Vous n'avez donc, ma mere,

Assez d'occasion de vous mettre en colere

De ce que cestui-cy chante comme les eaux

Ont tourmente les Grecs, ont brisé leurs vaisseaux,

Comme les Princes forts ont par triste aduenture

Seruy pour la plus part aux poissons de pasture,

Vn poëme nouveau plaist avec volupté,

Et prend on grand plaisir à quelque nouveauté.

Les recentes chansons sont tousiours les plus belles.

N'ayez donc point horreur de ces chansons nouvelles,

Ulysse n'est pas seul au monde de perdu,

Auquel n'a pas bien dit son retour pretendu,

Et luy seul n'est pery sous l'onde de Neptune.

Ayant, hélas, couru trop amere fortune.

Tant de Grecs ont laissé la vie sur les champs

De Troye, & sont tombeZ sous les glaines trenchans,

LE I. LIVRE

Tant d'autres sous les eaux ont souffert mort amère.

Vous retournerez donc, s'il vous plaist, ô ma mere,
En vostre chambre, & là vostre temps passerez
A faire vostre ouvrage, & d'exemple serez
A n'estre pas oisive à tant de Damoiselles
Qui sont autour de vous, agreables & belles,
Car la parole est due aux hommes seulement,
A eux est la raison, & le commandement
A moy Telemachus qui ay toute puissance,
Et à qui ceste cour doit toute obeissance.

Sa mere à ces propos grandement s'estonna,
Et soudain en sa chambre en hault s'en retourna
Ses filles avec elle, & la parole sage
De son fils engravoit au fonds de son courage.
Pleuroit toujours pourtant l'absence où le trépas
D'Ulysses son mari, iusqu'à tant que Pallas
Lui enuoya le sommeil, afin de donner trêve,
Et un peu de relasche à l'ennui qui la greue.

Mais de ces poursuivans la bande sans raison
Ne faict que tempester par toute la maison
Querander, que crier de voix forte & haut aine,
Desireux que soudain qu'en la chambre on les meine
Afin de se coucher. Lors à eux s'adressa
Le sage Telemachus, & ainsi les tansa.

Amans, qui recerchez ma mere en mariage,
Remplis de violence, & de tort & d'outrage,
Et trop enorgueillis : traittons nous ie vous pri
Avec ioye & plaisir sans faire un si grand cri,
Sans tant tumultuer. C'est chose bien plaisante
D'oïr les airs diuins que ce bon Poëte chante,
Et dont le chant peut estre aux Dieux comparé,
Demain, dès que le iour nous aura réclairé,

Qu'il aura ramenè sa lampe iournaliere,
Je vous appellerai au conseil ordinaire.
Là de tout ce país & le maistre & le Roy,
Je vous commanderai de sortir de cheZ moy
Cercher d'autres festins, aller à d'autres tables.
Mais que ne mangeZ vous, messieurs les venerables,
Vos biens, vos reuenus, & dans vostre maison
Que ne vous traittez vous comme veut la raison?
Mais si vous persisteZ, resolu en vostre ame
De déchirer ainsi par vostre train infame,
De démembrer ainsi parmi vos volupteZ,
D'un miserable estat toutes les faculteZ
A ma veuë, à mon sceu: & qu'il n'y ait plus d'ordre
De voir faire une fin à ce piteux desordre,
J'inuoyerai les Dieux humblement tous les iours,
Qu'ils vueillent m'enuoyer à la fin leur secours,
Ma clameur iusqu'à eux ira ie m'en assure,
Et Iupiter viendra sur vous en la malheure:
Qui me fera venger de vos meschanceteZ:
Je vous feray tomber lourdement, écarteZ
Parmi ceste maison, & de main inhumaine
Vous en feray porter en vostre sang la peine.

Ainsi leur parloit-il. Eux indigneZ mordans
Leurs leures de despit grondoient entre leurs dents,
Bien estonnez d'ouir de telle hardiesse
Telemachus parler à leur folle ieunesse.

Auquel Antinous fils d'Eupitheë, entre eux
Respondit le premier: Certainement les Dieux
T'ont aujourd'huy rendu eloquent à merueille,
Et hardi harangueur. Iupiter ne le vueille
Te rendre Roy d'Ithaque enceinte entierement
De mers, & ne t'y doint entier commandement,

LE I. LIVRE

Encores que te soit paternel heritage.

Auquel Telemachus de responce bien sage,
Te fâcheras-tu point Antinous? Ouy,
Ie le voudrois, & tant Iupiter m'eust ouy
Que ie vinsse à porter en main ce braue sceptre.
Penses-tu que regner soit un crime commettre?
Regner est bonne chose, & Roy est reueré
Comme un Dieu en sa cour: de tous est honoré,
De tous est enrichy, & à luy sa couronne
Sur villes, sur sujets toute puissance donne.
Il y a toutesfois autour de ceste mer
Plusieurs, ieunes & vieux, qui peuvent gouverner
Ithaque enceinte d'eaux, soit que l'un d'eux se prenne
A supporter le poix onereux de ce regne,
Puis qu'est mort, comme on dit, le diuin Ulysses.
Mais, des biens qui me sont escheus par son decès
I'en seray le vray Roy, j'en auray la puissance,
Et de tous ses tresors prendray la iouissance,
Sur ses esclaves mesme auray commandement
Que par guerre il m'acquit combatant vaillamment.

Lors respondit le fils de Polybe Eurimaque:
Les Dieux y pouruoyront, cela est, Telemaque,
Soubs leur entier pouuoir. Cil que leur Deite
Ordonnera pour Prince aural'authorité,
Aura commandement, & regnera sans doute
Sur la sterile Ithaque enceinte de mers toute,
Il y dominera. Mais ce qui t'appartient
Iouys en à ton ayse, & nul ne te retient
De t'en dire seigneur. Commande, pren, ordonne:
Que nul empeschement par force ne t'y donne,
Ne te face la guerre, ou par occision,
Ou par fen denorant ne face inuasion

Sur tes biens paternels, tant qu'Ithaque vantée
On verra de maisons remplie & habitée.

Mais dy moy ie te pry qui est cest estra ger
Qui est si hardiment ceans venu loger,
D'où est il, d'où vient il, de quel pais, & quelle
Sa gente, sa nation, sa race & parentelle,
Dit il point que ton pere en bref doine aprocher:
Ou est il point venu quelque debie chercher?
Il s'est bien engardé qu'on eust sa cognoissance,
Ny qu'on l'ouist parler: mais en grand diligence
Il a gaigné au pied. Si n'a til pas pourtant
La face d'un lour daut, mais en se presentant
D'un visage riant il s'est faict apparoir
D'une braue façon: si ie l'ay peu cognoistre
Il est venu sentir quelque chose de grand.

Auquelle fils d'Ulysse à respondre se prend.
L'attente d'Ulysses tousiours tant desirée
Est maintenant, dit il, du tout desespérée.
Ie ne me firay plus à ce que me diront
Ces porteurs de nouvelle. Ils m'admonesteront
Tout leur soul. Car la mort m'a priue de creance
Par les oyseaux trompé: ie n'ay plus desperance
Aux responce des Dieux, à l'oracle menteur
D'un augure incertain, d'un deuin rapporteur.
Si ma mere a vouloir encor de les entendre
Les amenant ceans, taschant toujours d'apprendre
Des nouvelles du Roy. Or, si tu ne le scais
Cest icy est Mentes, vieil hoste d'Ulysses:
Anchialus, qui a reputation grande
Aux armes, est son pere: Aux Paphois il commande:
Il vient de Taphe icy, pais enceint de flots,
Et dont les habitans sont braves matelots,

LE II. LIVRE

*Industrieux en l'art de guyder dessus l'onde
Les hâz ardeux vaisseaux, s'il y en a au monde.*

*Ainsi luy respondit l'Ulysside. Combien
Qu'il l'eust pris pour un Dieu, & qu'il le sceust fort biẽ,
En soy mesmes en son cœur. Alors on recommance
A chanter de plus belle, à reprendre la dance,
A rire, à folastrer. Car c'est tout leur soucy.
Plaisirs des ieunes gens. Continuent ainsi,
Tant que vesper au soir la nuict au ciel attire:
Chacun d'eux en sa chambre adonques se retire
Las de rire & sauter: pour prendre doucement
Le delassant sommeil. Le filz semblablement
D'Ulysses, se retire en sa chambre dresseẽ,
Ayant l'esprit remply de soing & de pensee,
Et des affaires grands en son cœur proiettoit.*

*Sa chambre sur le haut du beau chasteau estoit,
Magnifique, esleuee, où l'air plus favorable
S'estendoit, & des vents la frescheur agreable.
Euryclea portoit deuant luy le flambeau
Chassant l'obscurité d'un feu gaillard & beau;
Euryclea fidelle & loyale à son maistre:
Ops la Pesenoride autresfois la fit naistre,
Et Laërtes, ce corps excellent en beauté
En la fleur de ses ans auoit bien achetie
Dix bons couples de beufs, pres sa chaste Anticlee
Le vieillard esteu a la gentille Euriclee
Presque en pareil degre. Il ne la pressa point
De son bonheur, & onc à elle ne fut ioint
Par amour, il craignoit le depit de sa femme.
Deuant le Prince donc elle portoit la flamme
De l'eclairant flambeau, comme il se retireroit
Au repos de son liẽt. Car elle l'honoroit*

Et l'aymoit par dessus les femmes de sa mere:
Elle l'auoit traicté soigneuse nourriciere
En ses plus ieunes ans: lors luy mesme a poussé
La porte de la chambre, & s'estant aduancé
S'est ietté sur son liét. A la sage seruante
Tend ses accoustremens d'une estoffe excellante:
Elle les prend soudain, les plie proprement,
Et pres du riche liét les met bien nettement.
Puis de la chambre sort la vicillote fidelle,
Ferme la porte à clef, & latire apres elle
Par la boucle d'argent; luy conuert mollement
D'une mante legere ouuree gentiment
Passa toute la nuit, pensif en son courage,
En soy mesme songeant sur le prochain voyage
Que Pallas luy auoit enioint vn peu deuant:
Et fut en cest estat iusqu'au Soleil leuant.

Fin du premier Liure.



LE SECOND LIVRE
DE L'ODYSSEE D'HOMERE.

ARGUMENT.

Elemaclus denonce en pleine assemblee aux poursui-
uants de sortir de la maison de son pere Vlysses. Et
ayant pris d'Euryclea sa nourrice ce qui faisoit besoing
pour son voyage, & de Pallas des hommes & vn vaisseau, il
s'embarque sur le soir.

AUTRE SOMMAIRE.

*Le conseil en Ithaque est plein de trouble amer,
Et le fils d'Vlysses se met dessus la mer.*

DEs qu'on a veu l'Aurore à la main rougis-
sante
Et aux beaux doigts de rose' au ciel resplen-
dissante,

Le preux fils d'Vlysses hors du lit s'est jetté,
S'est vestu, à pendu son espee au costé.
Sitost qu'il est sorty, (son apparence belle
Estoit comme d'un Dieu) les herauts il appelle,
Leur commande d'aller chez les plus apparans
Qui sont dedans les murs d'Ithaque demeurans,

Qu'ils viennent au conseil. Ils vont en diligence,
Et à son mandement rendent obeissance.

Ils viennent à la foule, accourent viftement,
Et dedans le palais entrent ensemblement.

Chascun selon son rang s'estoit mis en sa place,
Quant on vid arriver l'Ulyssienne race,
Un espieu bien ferré en sa main il tenoit
Le branlant brauement. Seul il ne cheminoit.
Car deux dogues puissants venoient apres leur maistre
D'effroyable regard. Pallas le fit paroistre
Orné de Majesté. Le peuple se leva
Et autrosne ancien paternel l'esleva,
Des vieillards luy ceda la troupe venerable
Et des vieux seigneurs Grecs le senat honorable.

Entre eux Egiptius pour l'heure se trouuoit
Plein de parler facond, que la vieillesse auoit
Là rendu tout courbé, mais remply de prudence,
De bon sens, & pourueu de grande experience,
Le guerroyeur vaillant Antiphus son aîné
Compagnon d'Ulysses s'estoit acheminé
En la guerre de Troie, en la plaine d'Ilie
Qui florissoit alors en grand' cheualerie:
Antiphus qui sur mer combattoit asprement.
C'est luy que le Cyclops mangea cruellement
Le barbare Cyclops, dominant le riuage
De la sicile mer: Dans son antre sauvage
Couché, membre apres membre, ô pitié, deschira
Le pauvre, & cruel entier le deuora.
Il le prit le dernier pour son soupper infame
Des compagnons d'Ulysses, & luy aualla l'ame.
Il eut encor trois fils. Entre les poursuivants
Estoit Eurynomus, les deux autres, suiuants

LE II. LIVRE

De leur pere le train, semblables en leur vie
Imittoient son honneur, & n'auoient autre enuie.
Car il auoit uescu en reputation.
Et l'oubly n'auoit pas esteint l'affection
Qu'il portoit à son Prince, ains regretoit sans feinte
L'absence d'Ulysses d'une eternelle plainte.

Il commença, ses yeux de larmes degouttans.
Oyez, seigneurs d'Ithaque; il y a fort long temps
Qu'on n'auoit fait aucune assemblee de ville
Pour voir & consulter des affaires de l'Isle:
Mesme depuis qu'on vid Ulysses s'en aller.
Qui nous fait donc ainsi si soudain appeller?
Quel en est le sujet? Si cest par le message
Ou des vieux, ou de ceux qui sont en plus ieune aage;
Qu'il nous die si c'est qu'il ayt point entendu
Quelque vaisseau armé estre icy descendu,
L'ayant sceu le premier: ou bien qu'il nous explique
S'il veut metre en auant quelque affaire publique:
Il me ressemble auoir beaucoup de probité,
Et prie, que cela qu'il aura proietté
En son entendement, Iupiter l'autorise
Et conduise à bon heur toute son entreprise:

Telemachus, aiant à sa louange oui
Vntel propos, en sent son cœur tout resioüi,
Il ne demoura plus assis, bouillant d'enuie
De parler en public en telle compagnie.
Il setint donc debout: & soudain Pisenor
Herant sage & discret, lui tend le sceptre d'or
Et lui met en la main. Lors tournant le visage
Vers le vieillard, il dit. Vieillard prudent & sage
Celui la que tu dis n'est pas fort loing d'ici,
Tu le verras. C'est moi que touche ce souci.

*Ie n'ai point veu venir de vaisseaux Argoliques,
Ie ne parlerai point des affaires publiques:
Mais en particulier un dommage privé.
Un malheur domestique est sur moi arrivé:
Un double ennui m'accable, aiant trop misérable
Mon cher pere perdu, dont le sceptre honorable
Vous gouvernoit si bien, homme plein de douceur,
Insigne en pieté. Puis un autre malheur
Qui sappe cest estat, qui le mine & le perse,
Qui perd ceste maison, la met à la renuerse,
Ruine ses moiens les plus beaux & meilleurs:
Nombre de poursuivants, enfans de ces seigneurs
Que vous voiez ici, d'honneur & de courage
Veulent outre son gré ma mere en mariage,
Ils ne veulent aller à Sparte, en la maison
D'Icarus, l'amener à la fin à raison
De lui donner un dot, & prendre au prealable
Celui qui lui sera de tous plus agreable,
Pour en faire son gendre. Et ce pendant ils sont
Tousiours en ma maison, où sans respect ils font
Dix mille indignitez, ils mangent, ils ravagent,
Tuent brebis, moutons, tous nos troupeaux saccagent,
Et dedans la maison du vaillant Ulysses
En magnifique train commettent mille excès.
Ils boient tous nos vins, les furettent, les persent,
Et parmi la maison les gastent & renuersent.
Et ie n'ai pres de moi personne assez puissant
Qui hors de ma maison les aille dechassant:
Tel que fut autrefois mon genereux de pere.
Mais mes debiles mains ne le peuvent pas faire.
Si nous l'entreprenons par les armes, hélas
A ce faict nous deffiant & la force & le bras,*

LE II. LIVRE

Et nous ne sommes pas encore grands gendarmes:

En fin, si nous auions vn peu d'adresse aux armes

Coniointe avec la force, hà, nous essayerions

De repousser l'iniure, & nous nous deffendrions:

Car on commet icy vn cas intolerable:

Et du grand Vlysses la maison honorable

Certe on la traicte icy par trop indignement,

Elle est par ces excez perdue entierement.

Et vous n'en estes point esmeuez, en vos courages

N'auetz peur du caquet des proches voisinages:

Craignez au moins les Dieux: qu'en fin trop irritez

Ils n'enuoyent la peine à vos meschancetez.

Or, par le hault-tonnant qui sur l'Olympe habite

Et par Themis encor' qui assemble & excite

Le conseil des humains, ou leur donne congé,

Abstenez vous amis, & me laissez rongé

De douleur & de mal: & si iamais Vlysses

Mon pere, homme de bien, a faict quelque iniustice

Aux magnanimes Grecs, faictes m'en repentir,

Vengez vous en sur moy: faictes en ressentir

Ceux icy contre moy; il me seroit sans doute

Meilleur, que de manger mon bien, ma maison toute.

Mais si vous perdez tout, possible qu'à son tour

La vengeance pour moy s'en fera quel que iour.

Ie redemanderay mes facultez perdues,

Et criray, iusqu'à tant qu'elles me soient rendues

Par toute la cité. Car de me contrister,

De m'affliger ainsi, de me persecuter

C'est grand folie à vous, en vain vostre pensee

Rend mon ame, d'ennuis & de maux oppressee.

Il finit indigné: puis son sceptre ietta

En terre: & son visage en larmes degouta

Chascun

Chacun en eut pitié, le peuple en son offence
Fut grandement esmeu: mais chacun tint silence,
Et personne n'osa respondre seulement

A ce qu'il auoit dit parlant si brauement:

Le seul Antinous de colere & de rage.

Grand orateur, dit il, indompté de couragé,

Tu tonne de discours, & tu vas esleuant

Ta superbe pensee & la mets en auant.

T'est il donc eschappé parole si mechante?

Nous deshonores tu par ta langue tranchante?

Nous viens tu donc blasmer ainsi amerement,

Et nous calomnier si malheureusement?

La faute de cecy, ce mal, ceste misere

Ne doit tumber sur nous, mais plustost sur ta mere:

Dont nous vont decenant les feintes actions,

Et qui nous va tissant cent mille fictions.

Voicy le troisieme an, que Titan de son coche

A ramené sur nous, & le quatriesme approche

Quelle nous nourrit tous d'un vain espoir, paissant

Nostre ame d'un amour qu'elle vint accroissant.

Car elle nous promet, nous enuoye messages

Pour nous faire esperer enflamme nos courages

Et à chacun de nous promet tacitement.

Mais en son cœur secret elle pense autrement,

Feint des retardements, inuente des excuses,

Et nous ourdit sans fin la toile de ses ruses.

Elle a donc commencé sur son mestier gentil

Dedans sa chambre à part vn ouurage subtil,

Et nous a dit ainsi. Amis, pour assurance

Mes nopces attendez, vinez en esperance,

Ne bougez de ceans, & me pressez iousiours,

Tant que i'auray finy, sera dans peu de jours,

C

LE II. LIVRE

*Ces funebres linceux au bon homme Laërte.
Cest œuvre demourroit, & ce seroit grand perte,
De peur que si la Parque au ciseau bien tranchant
L'enuoyoit au sepulchre, on ne fust reprochant
A la fille d'Icare, ou l'une des Gregeoises,
Ou quelque fiere bru, ne me fissent des noises
Si Laërtes estoit estendu au cercueil
Sans le riche ornement d'un funebre linceuil,
Veu qu'il a tant de biens, un si grand labourage,
Un domaine si riche, un si bel heritage.
A ces propos tant doux nostre cœur a cédé,
Il a fort aysement esté persuadé.*

*Or de jour pour le vray s'advanceoit son ouvrage,
Mais elle en deffaisoit toute nuit davantage.
Durant trois ans entiers sa ruse nous trompa,
Et iusques au quatriesme elle nous atrapa.
Mais une qui scauoit toute son entreprise
Nous en vint aduertir. Puis elle fut surprise
Sur le fait, deffaisant son ouvrage gentil.
Et plus ne luy seruit son esprit tant subtil
Car il luy a fallu à la fin malgré elle
Acheuer le tissu de ceste toile belle,
Et l'aller iusqu'au bout par contrainte suiuant.*

*Voicy, ce que chacun amoureux poursuivant
Te dit, ô Telemaque, afin que tu ne tienne,
Le cœur des Achæens en pensèe incertaine
Auec ton ordonnance & ta belle oraison,
Renuoye, & au plustost, ta mere en sa maison,
Conseille luy d'en prendre un le plus conuenable
D'entre nous pour mary, & à elle agreable
Et à son pere aussi. Si par ses tours secrets
Elle pensoit tousiours beffler ainsi les Grecs,*

Elle se trompe fort bien qu'elle soit fort sage
Qu'elle pratique bien en son ruzé courage
Ce dont luy a fait don Pallas abondamment,
Ses ouvrages ouvreZ industriusement,
Quelle' ayt l'esprit posé, plus subtil en finesse
Que ne l'eurent jadis les Princesses de Grece
Reynes aux beaux cheueux: comme fut Alcmené,
Et Tyro, & encor la blonde Mycené,
Dont nulle ne scent onc n'art ne finesse telle
Que les scait auourd'huy Penelope la belle,
Elle verra pourtant que sa subtilité
N'aura comme elle croit grandement proffité.

Car c'est un poinct conclu contre elle, Telemaque,
Nous ne sortirons point hors du chasteau d'Ithaque
Qui fut à son mary, mais nous consumerons
Tous les biens de ceans, nous tuons, mangerons
Tout le bestail d'icy, tant & tant que trompees
Nostre attente sera par ta Penelopee:
Qu'elle continuera sa resolution.

Que pour certain les Dieux pour ton affliction
Ont mise dans son cœur, & pour ta grande oppresse
Ont ainsi son esprit trauersé de finesse:
Elle s'acquiert par là grand bruit, grande clarté
De renom, mais à toy grande calamité,
Ruynes, detriments, pertes continuelles.

Nous ne verrons donc point nos maisons paternelles,
Nos affaires lairrons plus presseZ & meilleurs,
Ne bougerons d'icy & n'irons point ailleurs,
Qu'elle ne se resolue à choisir, & à prendre
L'un de nous pour mary, qu'elle ne veille entendre
A se remarier. Adonc Telemachus.

Il ne me seroit pas seant, Antinoüs,

LE II. LIVRE

De chasser de ceans, d'enuoyer malgré elle
 Celle qui m'engendra, m'a mis au monde, celle
 Qui m'a nourry ceans. Car mon pere Vlysses
 Soit qu'il soit ià pery d'un defastreux decez,
 Soit qu'il respire encor cest air frais & humide
 En quelque coin du monde, a pris de l'Oebalide
 Jcarus, de grands biens, lesquels, ô dur ennuy!
 Il luy faut rendre tous, en renuoyant chez luy
 Penelopé, ma mere. Et puis, si mon cher pere
 Vit encor, en aura marrisson tres-amere,
 Et m'en fera patir. Comme feront les Dieux,
 Si tant est que ma mere en partant des ces lieux
 Inuoque dessus moy Erynnis l'infernale,
 Et ses seurs les fureurs qui sont en l'enfer palle.
 Que ie n'enconre encor' la malediction,
 Et la hayne du monde, & de la nation.

Vostre opinion donc, tant que i'auray de vie,
 O Achiens, par moy ne sera point suinie,
 Ains i'en fay peu de conte: encores que vous tous
 En soyez indignes, en entriez en courroux.
 Mais plustost deslogeZ messieurs les venerables
 Cherchez autres festins, allez à d'autrestables,
 MangeZ voZ reuenus & de nuict & de iour,
 Et vous reuisuez l'un l'autre tour à tour.

Mais s'il vous est meilleur de consumer sans cesse
 Le reuenue d'un seul, son bien & sa richesse,
 Sans nulle impunité dans sa propre maison:
 Perdez, perdez, cruelZ, sans aucune raison
 L'estat de vostre Roy, rompez, ietteZ par terre
 Cestours, ce sceptre antique, & luy faictes la guerre:
 I'inuoqueray les Dieux pour mon dernier recours,
 Humble i'appelleray leur ayde & leur secours,

Tant que de Iupiter la dextre souverayne
 Vous enuoye la mort, le merite & la peyne
 De vos meschancetez, tant que vous empeschiez
 Les carreaux de vos corps, tant que vous trebuchiez,
 Veantrez en vostre sang, seul & digne salaire
 Destorts, que vous auiez entrepris de me faire.

A peyne auoit il dit, que Iupiter transmet
 Deux grands aigles volants du plus haut du sommet
 D'un mont proche de là, qui d'ayles estendues
 Batoient d'un vol egal les vents dedans les nues,
 L'un contre l'autre ioint : puis aprochants du lieu
 Où l'assemblée estoit, & fondans au milieu
 Du peuple là seant, se prirent à combattre
 Donnans l'un contre l'autre, & des ayles se battre.
 Ils designoient un mal plus grand que tout cela,
 Car regardans, hagards, de ceux qui estoient là
 Les testes, en faisant par dessus eux les roües
 Vindrent à deschirer & leurs cols & leurs roües:
 Puis à la droite main volerent à la fois
 Par dessus les maisons & par dessus les toits.

Chacun des assistants admire & considere,
 Le vol de ces oyseaux, & ce qu'ils doivent faire
 Les tenoit en suspens : quand le fils de Mastor
 Halitherses, prudent d'aage & d'usage encor,
 (Qui sur ses compagnons auoit en sa notice
 Scauoit & deuinoit, tout cela quel' Auspice
 Pouuoit coniecturer des oyseaux deuissant,
 Ou des fatalitez le futur predissant,)
 Se leuant, dit ainsi. Oyez ie vous supplie
 Vous citoyens d'Ithaque, & sur tous, ie vous prie
 Poursuiuans, escoutez. Ces prodiges puissants,
 Ces oyseaux vont grand mal & malheur menaçans,

LE II. LIVRE

Et sur tout à ceux cy : Dommage & mort sanglante
Menacent grandement leur ruyne imminente.

Le heros Vlysses n'est pas loing du pais,
Fort proche est son retour : Il vient rendre esbahis
Force gens, il est pres, il vient, & sa main forte
A messieurs les amans mal & malheur apporte.

Et à d'autres encor. Nous donc qui habitons
Dans la fameuse Ithaque, & qui y frequentons,
Aduisons de cesser en fin tout ce desordre :

Considerons comment nous y pourrons mettre ordre,
Que ceux cy mettent fin aussi à ce malheur,

Car le plustost pour eux leur sera le meilleur.

Je ne suis ignorant, ny sans experience

De ce qui doit venir, ie parle en assurance,

Et ie croy fermement que tout soit accompli :

Je m'en souuiens fort bien, & n'ay mis en oubly

Ce que ie luy predy, d'une bouche sacree

Parauant que sa nef fust encor' desencree

Qu'il eust laissé la terre, & que les Grecs en mer

Eussent mis leurs vaisseaux pour Troye consumer

Qu'il souffriroit beaucoup sur la mer animee,

Que ses amis perdus, & sa flotte abismee

Il reuiendrait tout seul incogneu, sur les champs

De sa patrie, au bout du terme de vint ans.

Et voicy, de son point la chose presque approche,

Auquel Eurymachus usa de ce reproche.

Vieillard tout courbé d'ans, insensé, sans raison

Chante cela sur toy, tes enfans, ta maison,

Va t'en viste d'icy que quelque grand ruyne

N'arrive dessus toy. Ce que ie te deuine

Meilleur deuin que toy. Certes beaucoup d'oyseaux

Au desous du Soleil exercent leur cerceaux,

Et tous ne monstrent pas ce qui est veritable,
Ny des Dieux tout puissants la pensee inscrutable.
Quant au reste, Vlysses est mort bien loing d'icy
En la guerre, aux combats. Le fussestu aussi,
Et des oiseaux du Ciel comme luy, la pasture,
Tu ne me viendrois pas chanter mal aduanture
Deuin malencontreux, & brulant de courroux
Tu n'inciterois pas Telemaque sur nous,
Esperant dons de luy & quelque recompense.
Mais ie te dy aussi, & prens en asseurance,
Si tu persistes plus d'esmouuoir, d'inciter
Ce ieune Prince icy, de le plus exhorter
Par tes mots ennuyeux, & si plus tu abuses,
Eguillonnant son cœur, de tes fraudes & ruses
Dont tu te fais si fort ô faux vieillard pipeur,
Et d'ancienneté rué fin & trompeur,
Pour faire que tant plus il hausse son courage,
L'enfle de vanité, l'esleue dauantage,
Il tumbera encor' en vn plus grand malheur,
Et ne parferas point ce que pense ton cœur,
Et le mal mesme, dont les autres tu menaces
Le mesme chastiment que malin tu leur brasses
Tumbera dessus toy de par les amoureux
En porteras la peyne en ton cœur douloureux.

Mais ie conseilleray Telemachus de prendre
Sa mere en bonne humeur, la faire condescendre
De retourner bientost chez son pere puissant,
Afin qu'il la marie, & la soit fournissant
De ce qu'il faut donner à vne honeste fille
De si riche maison, & si grande famille.
Et ie ne pense pas que iamais autrement
Les Gregeois mettent fin de poursuiure asprement

LE II. LIVRE

De ses nopces l'effect. Nous n'avons point affaire
 De tant d'oracles vains auxquels tu te veux plaire,
 O futile imposteur, nous ne nous soucions
 Du vol de tes oyseaux, ny de tes fictions,
 Vieux courbé, que d'un cœur aussi plein de mensonges
 Comme de mauvaistié sot resueur tu nous songes
 D'Eloquencetonnant, n'ayant rien remporté
 Qu'enuye & hayne, deuz à ta meschanceté:
 Nous ne craignons icy ny sceptre ny empire
 Qui querre velle parler, nous n'en ferons que rire,
 Nous n'en avons soucy, moins de ce grand parleur
 De ce filz d'Ulysses avons nous de frayeur.
 Que tout soit deuoré ce regne lamentable
 S'en aille renuersé, n'atten rien d'equitable
 Tant que Penelope partant & tant de fois
 Remet son mariage, & trompe les Gregois,
 Nous demourrons icy à tous les jours attendre,
 Et pour sa grand vertu ne ferons que contendre:
 A d'autre n'irons point, dont seante seroit
 L'amour & la poursuite à qui l'entreprendroit.
 Telemachus adonc, plein de jages paroles.
 Eurymachus, & vous pris de ces amours folles,
 Je ne vous priray plus, & plus dorenavant
 Par exhortations vous iray poursuivant.
 Mais i'en pren tous les Grecs & la puissance grande
 Des hauts Dieux à tesmoin. Aumoins ie vous demande
 Vne bonne fregate, & vingt bons compagnons
 Qui facent bien sur mer aller les aurons,
 Qui me facent chemin sur les glissantes ondes
 Qui m'entrouurent des eaux les plissures profondes,
 Qui viennent avec moy iusqu'en Lacedemon
 Ou à Pyle areneuse à l'excellent renom.

Car ie veux d'Ulysses par tout m'aller enquerre,
Mon intention est de tracasser la terre,
Subir mille travaux, maint labeur, maint ennuy,
Pour voir si ie pourray rien apprendre de luy,
Par les hommes, ou bien du grand Iupiter mesme,
De qui vient le renom & la gloire suprême.
Que si i'appren qu'il viue encores au doux iour,
Qu'il soit au monde encor, & i'ay de son retour
Quelque espoir assésuré: i'ay mis en ma pensee
D'attendre qu'une annee entiere soit passee,
Confit en amertume, en deuil & en soucy,
Autant qu'on peut penser. Mais si i'entens aussi
Qu'Ulysses ne soit plus au monde, & que ses ombres
Errent là bas, parmy les diuinitez sombres,
Ie m'en retourneray, bien qu'en aduersité,
Au pays gratieux de ma natiuité,
Et luy feray bastir un sepulchre honorable,
Rendray à son tombeau un honneur conuenable,
Ainsi qu'il est decent, ma mere mariray,
Et en un stable estat ie la colloqueray.

Il fit fin, & apres se rassit en sa place.
Lors Mentor, que l'amour estroittement enlace
A l'absent Ulysses, & qui semblablement
Fut aimé d'Ulysses affectueusement,
(Auquel, comme il partit pour faire son voyage,
Et iettoit hors ses nefes du paternel riuage:
Il auoit par expres le soing, l'autorité
De son regne & son train fidelement transporté,
Commandant de luy rendre entiere obeissance,
Et que chacun fist ioug dessouz son ordonnance,
Dit ainsi: Oyez moy citoyens Ithaquois,
Que personne n'ait plus aucun soucy des loix,

LE II. LIVRE

Ne prenne plus le sceptre, & que nul Roy placable
 Et doux, ne regne plus sur ce lieu honorable,
 Que nul n'ait plus le soing de regner iustement.
 Mais qui est d'un courage & dur & inclement,
 Quiconque est de nature & cruelle & barbare,
 Qui est iniuste, fier, voluptueux, auare,
 Que celuy là soit Roy. Le souvenir, bons Dieux,
 D'Ulysse est bien perdu, & comme gracieux
 Il a sceu commander iadis sur ceste place,
 Comme il a gouverné toute vne populace
 Avec grande douceur, & comme entierement
 Tel qu'un pere, en son regne il s'est monstré clement,
 Je ne me fâsche point quand ie voy ceste bande
 De superbes amans, qui deuore & gourmande
 La maison d'Ulysses, croyans qu'il perira
 S'il ne l'est, & de Troye onc ne retournera.
 C'est pourquoy s'esgayans tant en leurs arrogances
 Ils font à leur malheur toutes ces insolences:
 Trop bien contre le peuple, indigné iustement,
 Je brusle de colere. A quoy si longuement
 Ce silence muet? Pourquoy dessous silence,
 Citoyens, souffrez-vous vne telle insolence?
 Pourquoy à les reprendre estes vous negligens?
 Et pourquoy quand ils sont sur tout si peu de gens,
 Vous plusieurs, & armés, ô lasche populace!
 Ne venez-vous au moins reprimer leur audace?
 Alors Leocritus qui fut fils d'Euenor,
 Tu parles donc ainsi, ô bauard de Mentor,
 Et fol d'entendement? Ainsi donc tu opine,
 Ou que nous desistions, ou qu'on nous extermine.
 Il sera difficile à tout tant de mutins
 Que soyez de chasser ainsi de leurs festins

Des gens si bien repeus. Non, quant Ulysse mesme
Y seroit, y viendroit, bien que de force extreme,
Il y succomberoit, s'il auoit seulement
Pensé de nous chasser, bien qu'inopinément
Il nous trouuast ceans: Nous pleins en abondance
De viures & de vins frians par excellence,
Et combien que sa femme en ait vn grand desir,
Elle n'auroit pourtant longuement le plaisir
De son soudain retour, mais son & nostre main forte
Il trouueroit la mort sur le seuil de sa porte
Ineuitablement, s'il nous entreprenoit
En tel nombre au combat, & seul s'y haZardoit.
Mais vous, peuple, chacun s'en aille en son ouurage,
Et quant à cestui-cy, que Mentor l'accourage
Auec Halitherses au chemin qu'il a mis
En son entendement, car ils sont ses amis
Paternels de tout temps. Mais certes Telemaque
Setenant à reçoÿ aura dedans Ithaque
Messagers de son pere, & son retour sçaura:
Mais iamais ce chemin ne parachenera.

Ayant de la façon parachené de dire,
Le peuple il licentie, & chacun se retire.
La troupe des amans au chasteau demoura,
Et Telemachus seul deuers la mer tira:
Et s'arrosant les mains de l'onde marinier
Il fit de grand' ardeur à Pallas sa priere.

Toy Dieu qui voulus bien me venir visiter
Hier en ma maison, vueilles moy escouter,
Et qui me commandas de me mettre sur l'onde,
Pour chercher d'Ulysses errant par tout le monde
Nouvelles quelque part. Les Grecs entierement
A ce voyage mien donnent empeschement

LE II. LIVRE

Et principalement des gens pleins d'insolence
Qui pourchassent ma mere, & me font violence.

Comme il disoit ainsi : Pallas qui emprunta
De Mentor le parler & l'œil, se presenta
Sur le lieu mesme à lui, & lui dit : Fils d'Ulysse,
Situ peux faire tant que dedans toy fleurisse
La vertu de ton pere, & te monstres pareil
Qu'il estoit à la main & au prudent conseil,
Tu ne seras iamais ny lasche de courage,
Ny d'esprit estourdi : & si cetien voyage
A souhait te viendra. Mais aussi si tu n'es
Et de Penelopé & du fort Ulysses
Le germe vigoureux, & leurs costes puissantes
N'ont point engendré : C'est en vain que tu tentes
Entreprise si haute, & si ie ne croy point
Que la puisses conduire à favorable poinct.
Car certes peu de fils ressemblent à leurs peres
En vertu, fort souvent ils naissent degeneres
Et pires, mais meilleurs on les void rarement.
Mais puis que tu te porte & bien & dignement
Successeur de ton pere, & ta pensee esmeüe
N'est point d'aucune doute, ains d'ame resoluë
Tu oses entreprendre, & ie ne te voy pas
Abiect en ta pensee & d'un courage bas:
Au contraire, pourueu de vertu, de prudence
Telle que l'eut ton pere, Heros plein d'excellence
Ie me tiens assure qu'emporteras le prix
Du vertueux exploict que tu as entrepris.

Donc genereux enfant, dédaigne les parolles
De ces beaux poursuiuans & leurs vanitez folles,
Ils sont priuez d'esprit, forclos d'entendement,
Aueugles en prudence, & lourds entierement.

Ils n'apperçoient pas leur ruine imminente,
Ils ne voient leur mort prochainement venante,
Leur vie est à la fin, leur mort hastive vient,
Et ja desja le glaive à la gorge lestient.

Or croi que tu n'auras faute de compagnie,
Moi, qui te viens fournir d'une nef bien garnie,
Moi qui fus par ton pere au regne associé
Te suiuray, compagnon de peine & d'amitié.

Or sus, retourne t'en & parmi eux te iette,
Mais fay provision sagement en cachette
De viures, pain & vin, qui appellent au cœur
Et aux moëllles des os la force & la vigueur,
Et fay bien reserrer le tout dans le navire:
Moi-mesme ie m'en vay entre le peuple eslire
Force bons compagnons, qui sçachent bien ramer,
Et pleins de volonté, pour se mettre sur mer.
I'ay des vaisseaux au port, tous neufs pour la matiere,
Mais pour l'usage vieux, qu'Ithaque marinere
Qu'enuironne la mer, me garde dans son port.
Ie prendray le meilleur, le plus vifte, & plus fort,
D'armes l'equiperay, & puis dès que l'estoille
Luira, nous sortirons & hausserons la voile.

Au ieune Prince ainsi la Deesse parla.
Soudain qu'il eut ouy sa voix, il s'en alla
Droit au chasteau, l'esprit plein de grande pensée:
Où il vid des amans la ieunesse insensee
Poursuiure leur desordre, assommer les Taureaux,
Les Cheures escorcher, & brusler les pourceaux.

Antinoüs lui vint au denant, le visage
Riant, & l'embrassant il lui tint ce langage,
Lui touchant en la main. Superbe harangneur
Telemaque, & encor innincible de cœur,

LE II. LIVRE

Tu ne dois plus auoir tant à cœur cet affaire,
 Modere à la parfin toute ceste colere.
 Ie te conseille aussi de ne plus disputer
 De parole, & d'effect ne plus tant resister:
 Plustost fay bonne chere, & nous tien bonne table,
 Traitte toi de bon viure & de bon vin delectable,
 Ainsi qu'au parauant. Les Gregeois, & me croi,
 Feront ta volonté, assure t'en sur moi.
 Ils te feront fournir de gens & de nauire
 Pour te mettre sur mer, afin de te conduire
 A Pyle vers Nestor, pour voir si tu auras
 Nouuelles d'Ulysses, & si le trouueras.

Auquel le prudent fils d'Ulysses, Prince sage,
 Vous estes trop fascheux pour viure dauantage
 Parmi vous, lui dit-il, i'en ay trop, ô beueurs,
 Jusqu'ici supporté, i'ay trop, plaisants causeurs,
 Craintif patienté: ie n'ai que trop encore
 Regarde ma ruine, & comme on me deuore:
 Sera-ce point tantost assez m'auoir mangé,
 Sera-ce point tantost assez auoir rongé
 Vn enfant? Ie le fus enfant, mais le meur aage
 Me rend maintenant homme, & i'ay le conseil sage,
 Et l'aduis des aagez. I'appren les frequentant
 La vertu, comme il fault que i'aille supportant
 La rude aduersité, l'ars en la belle flamme
 De la forte vertu, mon courage s'enflamme
 Contre mes ennemis, & ceux qui m'ont fait tort.
 Et pour bastir plustost l'arrest de vostre mort,
 Pour me rendre tant plus vostre perte facile,
 Soit que i'aille trouuer le vieux Nestor à Pyle,
 Soit que ie sois ici, i'y emploiray le tout,
 Et n'entreprendrai rien dont ie ne vienne à bout.

Et ie prendrai plustost vn nauire à loüage
(Car ie ne suis encor' expert au nauigage)
Pour selon vostre aduis aller commodement.

Il dit, & retira sa main facilement
Qu' Antinoüs tenoit. Mais comme à l'ordinaire
Les poursuiuans, leans ne laissent pas de faire
Et festins & banquets, chacun d'eux attaquans
Telemaque de mots offensifs & piquans.

Car ils lui vouloient mal, & d'enuie notoire
Malins ils médisoient hault & clair de sa gloire,
Comme fit l'un d'entr'eux à table ainsi parlant.

Helas, Telemachus, nous brasse violent,
Quelque bien grand malheur, ou la mort effroyable,
Car à Pyle il s'en va qui est ceinte de sable,
Ou vers Sparte, chercher gens, armes & secours
Pour nous faire finir dans peu de temps nos iours:
Puis que si courroucé il va prendre nauire.
N'iroit-il point aussi, fol qu'il est, en Ephire,
Terroir fertile & gras, afin d'en rapporter
Quelque mortel poison, & le nous presenter
Méslé dans nostre viure, ou dans nostre breuuage
Pour nous faire mourir de douleur & de rage?

Puis vn autre adiousta: Que si sorti du port
Il estoit agité de vent contraire & fort,
Estoit poussé en mer, couroit tant de fortune
Comme a faict Ulysses sur l'onde de Neptune,
Qu'il perist à la fin: il nous donneroit bien
De la peine & du mal, nous laissant tant de bien.
Nous les partagerions ces richesses si belles,
Et ces possessions & rentes paternelles
Nous les separerions, & les mettrions à part,
Et de ses portions chacun auroit sa part.

LE II. LIVRE

Mais à sa mere alors tant belle & tant aimable,
Et à celui aussi qu'elle auroit agreable,
En qui elle auroit mis son cœur & son amour,
Nous lairrons la maison & ce plaisant seiour.

Voila comme ils passoient le temps, & Telemaque
Entre dans l'arsenac du sage Roy d'Ithaque,
Proche des hautes tours du palais orgueilleux.
Là, d'or, d'argent, estoient des monceaux merueilleux,
Riches accoustremens es armoires serrantes,
Grandes prouisions d'huiles bien odorantes:
Et de l'autre costé les tonneaux arrangez
Estoient d'excellens vins, & remplis & chargez,
Si le maistre venoit apres tant de souffrance,
Pour le moins qu'il y prist quelque resionissance.
Cel lieu à doubles clefs fermoit bien seurement,
Et la chaste Euryclee auoit entierement
La charge de cela, elle estoit nee fille
D'Opis Pesenoride, & fidelle & habille.
Telemachus l'appelle, & lui dit: Tire moy
Icy du meilleur vin que tu gardasse au Roy,
Si quelque iour, possible, il reuenoit de Troye:
Sans estre de la mer & des Parques la proye.
Rempli m'en douze muids, cours moy bien en apres
Dans de bons sacs de peaux, des bons fruits de Ceres,
Force blanche farine, estreinte sous la mente,
Fais en douze bichets. Toy ma nourrice seule
En as la cognoissance, & seule as le pouuoir
De mes bleds, de mes vins, & puis dès que le soir
Sombre ramenera la nuit, & que ma mere
Triste s'ira coucher au liét veuf de mon pere,
Je monteray sur mer, guidant mon auiron
Vers Pile, dont maint sable enceint tout l'environ,

Et vers

Et vers Lacedemon : si Dieu m'est tant propice
Que ie puisse trouuer du genereux Vlysse
Nouvelle en quelque part. Mais si tost qu'il eut dit
La maison de clameurs la nourrice remplit.

Que penses-tu, dit-elle, ô nourriture chere,
Où veux-tu seul aller en contree estrangere?
Ta mere, qui ne peut durer vn iour sans toy,
Tu la feras mourir de tristesse & a'esmay,
Cruel que veux-tu voir les prouinces lointaines?
A quoi vas-tu cerchant la mer de tant de peines?
Ulysses loing d'icy en pais incogneu
Sans espoir de retour, est de mort retenu
Parmi gens esloignez estendu au riuage:
Et voila, des amans la trouppes qui enrage
De courroux, de dépit, sans doute dressera
Embusches contre toi, & mourir te fera,
Te iettant en la mer. Demeure, ie te prie,
Gouuerne ton royaume, & ta douce patrie
Te donnant du repos, il n'est ja de besoin
De te mettre sur mer & t'en aller si loing,
Courir mille dangers, ô estrange misere!
Tandis on mangera tout le bien de ton pere.
Rompts donc ceste entreprise & ne te commets point
Aux dangers de la mer. Elle dit en ce point:
Et Telemach' respond. Ma nourrice fidele
Ceci ne se fait point, sans qu'un grand Dieu s'en mesle.
Iure moi seulement que tu n'aduertiras
De ce depart ma mere, & point ne lui diras
Iusqu'à tant que l'Aurore au carrosse de roses
En terre ait deux fois six matinees écloses,
Et que Titan passé n'ait fourni iustement
Ou vnze ou douze iours. N'en dy rien mesmemens

LE II. LIVRE

Qu'elle n'ait apperceu mon absence elle mesme,
Et que l'amitié grande & le regret extreme
Ne la face gemir, & qu'ainsi gemissant
Elle n'aille par trop sa beauté flestrissant.

La vieille lui iura prise de ses prieres
Par les autels des Dieux & leurs sacrez mysteres,
Puis remplit les vaisseaux & les sacs bien cousus,
Et de bonne farine & de friand Bacchus,
Et descendant en bas le prudent fils d'Ulysse
Entre les poursuivans tout doucement se glisse.

Pallas cetempendant comme elle eut emprunté
Du gentil Telemach la taille & la beauté,
Court parmi la cité, commande de voix forte
Que si tost que Vesper aura fermé la porte
Du Ciel, les compagnons se rendent diligens
Au port dans le navire avecques tous leurs gens,
Et qu'ils l'attendent là: Il demande à Phronie
Le fils de Néemon vne nef bien fournie,
Des plus vistes sur tout, lequel luy presenta
Tant son parler courtois doucement le flatta.

Tandis Titan voulant visiter l'autre monde
Pour reuoir le Leuant, se plonge a dedans l'onde,
Et des ombres l'espais par tout se respandit.
Son vaisseau dans la mer lors elle descendit,
L'apprest a bellement: les compagnons assemble,
Les armes accommode, & tout le reste ensemble
Qu'il faut auoir sur mer. Ils viennent vistement,
Et elle les exhorte à ramer galamment:
Puis s'encourt au chasteau, & iette sur la teste
Des beuueurs poursuivans vne eau qui les arreste
D'enuie de dormir. Ils errent chancelans,
Ont la teste pesante, & les genoux branlans

De sommeil & de vin. Toute la maison rouë,
Pensent-ils, sous leurs pieds, car elle leur secouë
Les verres hors des mains, & les envoie au lit.
Et puis allant trouver Telemachus, lui dit,
Toute à Mentor semblable: A lerte, Telemaque,
On n'attend plus que toy, sus viste, hors d'Ithaque,
Donnons la voile au vent, & vollons sur la mer:
Il n'est plus de besoin icy de consumer
Le temps en grands propos, chassons toute paresse.
Elle se met devant, & il suit la Deesse
Pas à pas, & soudain qu'ils furent arrivez
Ils ont les compagnons sur le vaisseau trouvez,
Auxquels Telemachus à dire ainsi commence.
Sus vistes compagnons, allons en diligence
Querir ce qu'il nous faut là hault dans ce chasteau,
Pain & vin, & mettons le tout dans le bateau,
Paravant que quelqu'un l'aille dire à ma mere.
Personne n'en sçait rien que ma nourrice chere,
Mais elle m'est fidelle. Il chemine devant
Ayant ainsi parlé, & eux le vont suivant,
Chargent le tout sans bruit, portent en diligence
Au bateau: cela fait Telemaque s'advance
Et se iette dedans. Pallas le suit soudain,
Se met aupres, & prend le gouvernail en main.
Les autres par la nef se mettent en besongne,
Le cordage deffont, la terre les eslogne,
Et Neptune les prend. Pallas leur donne à dos
Un Zephir favorable, & le vent à propos.
Armes & avirons les uns les autres prennent,
D'autres levent le voile & oblique le tiennent
Pour mieux prendre le vêt. Mais tout en premier lieu
Ils haussent le grand mast, le posent au milieu
D'y

LE II. LIVRE DE L'ODYSSEE.

*Du vaisseau, l'asseurans avec force cordage.
Puis ils ouurent le voile, & Zephire faict rage
De l'emplir de son souffle : alors a l'entour d'eux
Sonne le flot rougeastre au battement hideux,
Et le vaisseau gaillard pousse de mains rameuses
Fend & coupe leger les ondes escumeuses.
Ils vont apres, de vin les tasses remplissans,
Pour sainte effusion aux grands Dieux les versans,
Sur tout à toi Pallas. qui d'eux as soin & cure.
Elle tient le timon, & tant que la nuit dure
Les guide en leur chemin, & du verd element
Les routes sans hazard leur ouvre seurement:
Tant que du vieux Tithon la femme claire & belle
Le iour & la lumiere au monde renouvelle.*

Fin du deuxiesme Liure.



LE TROISIÈME LIVRE DE L'ODYSSÉE D'HOMÈRE.

ARGUMENT.

Nestor reçoit Telemachus arriuant avec Pallas, luy conte ce qui aduint aux Grecs au departir de Troye, & ayant ouy ce qu'il luy auoit dit touchant les poursuy- uans, & recognoissant Pallas à son depart, il faict vn sacrifice Telemachus ayant eu de luy vn chariot s'en va à Spar- te avec Pisistratus. l'un des fils de Nestor, & la nuit les sur- prenant ils logent chez Diocles à Phæres.

AUTRE SOMMAIRE.

*Telemac vient à Pyle ayant le vent prospere,
Et là Nestor luy dit ce qu'il sçait de son pere.*

Et Andis le beau Soleil hors des ondes sortant
Quitte les flots moitteux, & dans les cieux
montant,
Aux hommes & aux Dieux sa claire tor-
che apporte,
Et sur la terre aussi feconde en toute sorte.
Or desia touchoient-ils aux champs Neleïens,
Et leur nef approchoit des murs des Peliens,
Qui de gras Toreaux bruns faisoient lors sur le sable,
Au cheuen-pers Neptun' sacrifice honorable,

LE III. LIVRE

Neuf sieges ils auoient sur le riuage mis,
Où cinq cens citoyens par ordre estoient assis,
Et là chacun d'entr'eux pour le seruice iettent
Neuf bonueaux égorgez, en pieces ils les mettent
Escorchez, estrippez. Les cuisots qu'à leur Dieu
Ils font au feu bruler petillent sur le feu,
Et des morceaux iettez sur la braise enflammee,
Le sang tout tiede encor rendoit mainte fumee.

Les Ithaquois à bord le vaisseau vont poussant,
Plient le voile blanc, & lors chacun descend:
Aussi fait Telemach, lequel en ceste sorte
Pallas, qui se rendoit son conducteur, exhorte.

C'est maintenant qu'il fault, ô Prince, prendre cœur,
Dechasser toute honte, & n'auoir point de peur,
Va doncques sans trembler trouuer le vieillard sage
Pour ceste occasion as tu fait ton voyage.

As tu passé la mer, as tu voulu courir
L'Empire de Neptune, afin de t'enquerir
De ton pere Ulysse: quelle terre, quel monde,
Quel coing tant reculé, ou quelle Isle profonde
Le cache & le retient, ou s'il n'est plus, comment
Il a esté tué. Va doncques hardiment

Trouuer le Roy Nestor, canalier d'excellence
Voyons, si dans son cœur de nous celer il pense
Ce qu'il y a caché: s'il voudra rendre ouuert
Ce qu'il pourroit tenir & douteux & couuert.
Humble tu le prias instamment qu'il te die
Toute la verité, fraude ne menterie

Onc il ne te dira: car le sage vieillard
A de beaucoup de faicts l'experience & l'art.

Adonc Telemachus respond à la Deesse,
Où iray-ie, Mentor, de quelle hardiesse

Puis-ie le saluër? le suis en verité
 A parler prudemment peu experimenté,
 Je n'ay iamais encor acquis l'art de bien dire,
 Un ieune homme est honteux, & sans peur n'ose induire
 Un plus vieux à parler. Auquel adiouste ainsi,
 Pallas aux beaux yeux vers. Non, n'aye aucun soucy,
 Encore qu'autrement tu tienne en ta pensee,
 Ta bouche par un Dieu se sentira dressée
 Pour parler comme il fault, ie ne croy nullement
 Que ta meret ait faict en son enfantement,
 Les Dieux y repugnans, & qu'en ta nourriture
 Ils n'ayent eu, benins, de toy soucy & cure.

Elle eut dit, & soudains'en va trouuer les Grees
 Ayant tourné ses pas, & Telemaque apres
 Le suit au mesme temps. Alors Nestor le sage
 Avec tous ses enfans estoit sur le riuage:
 Les compagnons autour le banquet conduisoient
 Dignement appresté, les chairs rostir faisoient:
 En la broche mettoient les grands pieces tremblantes,
 Et les membres posoient sur les braises flambantes.
 Mais dès qu'ils eurent veu les Grecs approcher d'eux,
 Soudain ils laissent tout, accourent, gracieux,
 Et les vont recueillir. Se leuent hors de table,
 Les prient de propos courtois & amiable
 De s'asseoir avec eux, & agreablement
 Prendre part du festin qu'ils font ensemblement.
 Mais le premier de tous, & encor le plus proche,
 Pisistratus vaillant aux armes, les approche,
 Pren les mains de tous deux, les embrasse serré,
 Pour manger les faict soir sur ie sable doré
 Couuert de belles peaux, entre Nestor son pere
 Pres de Thrasimedes, & leur faisant grand chere

LE III. LIVRE

Leur sert de la viande, & fait remplir encor
 Du doux fruit de Bacchus de grands pleins vases d'or
 Puis regardant Pallas Egidiene, fille
 Du puissant Iupiter, d'une grace gentille
 Commence à dire ainsi. Amy fay humblement
 Ta priere à Neptun, puis qu'opportunement
 En ce iour solemnel venus icy vous estes,
 Celebrez avec nous ces annuelles festes:
 Puis quand tu auras fait, tu donneras aussi
 Ce vase de vin doux tout plein, à cestui-ci,
 Afin que comme toy il face le semblable:
 Je croy que ce lui est aussi chose agreable
 De faire offrande aux Dieux. Il nous faut tous auoir
 En eux nostre fiance, & vous pouuez scauoir
 Que leur aide en tout temps nous est tres-necessaire,
 Or voyant cestui-ci le plus ieune, & ne faire
 Encores que fleurir, semblable d'aage à moy,
 Ce pot d'or, plein de vin ie tens premier à toi.
 Ce disant il le met en main à la Deesse,
 Et son cœur elle sent tenté d'une allegresse,
 De se voir honorer d'un hoste homme de bien,
 De se voir resiouir d'un honneste entretien,
 Et de ce que premier, de façon si humaine
 Il lui a mis en main la couppe de vin pleine.
 Lors respendant le vin hors des dorez vaisseaux
 Elle fit sa priere ainsi au Roy des eaux.
 Neptune, qui enceins toutes les riués molles
 De la terre habitable, esconte mes paroles,
 Et ne te faschant point que nous t'offrions icy
 Offertes & presens, benin assiste icy,
 Mes prieres & vœus accepte fauorable,
 Et les ratifiant, donne honneur desirable

Au Nelide Nestor, enuoye à ses enfans
Qui sont si gens de bien. d'estre tous triumpans
En louange & vertu, & donne recompense
Aux Pyliens qui sont pleins de beneficence
Pour leur belle hecatumbe, & puis finalement
Que Telemaque & moy puissions prosperement
Retourner au pais. Bien acheuë l'affaire
Pour lequel, ô Neptun nostre barque legere
Nous a heureusement portez dessus ton dos.

Pallas ayant ainsi acheuë ses propos
A Telemaque tend la grand coupe doree
D'un grand cercle tout d'or richement entouree,
Et la plus belle encor. Luy semblablement fit
Ses prieres & vœux & l'offerte par fit.

Comme il eut acheuë les compagnons rostirent
Les chairs, & puis apres en pieces les partirent,
Firent le festin beau, mangerent plainement,
Et passerent le temps fort agreablement.

Estans rassasiez de vin & de viande
Nestor Geremien leur fit lors sa demande
Il fait beau maintenant deuiser à plaisir,
C'est ast eure qu'il faut s'enquerir à loisir
Qui vous amene icy, quand la table est leuee,
Et qu'on a bien repen. Enfans, vostre arriuee
D'où est elle en ce lieu, de quelle nation,
Qui estes vous, quelle est vostre condition,
Pour quelle occasion prenez vous cester routte
Estans venuz par mer? mettez m'en hors de doubte,
Ou si vous traffiquez chargeans vostre vaisseau
De mainte marchandise, ou si vous courez l'eau
Comme font aujourd'hui pyrates en grand nombre,
Portans aux passagers menaces & encombre.

LE III. LIVRE

*Trauersans en la mer, courans de toutes parts
I'nfortunes, dangers, miseres & hazards.*

*Auquel Telemachus respond de sage sorte,
Car Pallas luy donnoit cœur & faconde forte,
Afin d'acquérir gloire, & aussi s'informer
D'Ulysses vagabond & miserable en mer.*

*Neleïde Nestor, digne honneur de la Grece
Ce que tu veux sçauoir, de quelle contree est-ce
Que nous sommes partis, ie t'en informeray
Et nostre vray pais au vray ie te diray.*

*Nous venons donc d'Ithaque, où le iette-fontaine
Le mont Neïus s'estend. L'affaire qui nous meine
Nous est particulier: Rien du tout du public,
Ny le bien general de l'estat Argolic
Ne nous a faict venir. Plein d'amour paternelle
Ie viens sçauoir icy quel bruit, quelle nouvelle
Court du fort Ulysses, qu'on dit avecques toy
Avoir razé les murs de Priam le grand Roy.
Des autres qui estoient à Troie la guerriere
Combatans, nous scauons leur mort, & la maniere.
Mais Iupiter, hélas, nous cache rigoureux
Qu'est deuenu depuis ce Prince malheureux.
Nous n'en pouuons sçauoir chose au monde certaine
Où & quant il est mort, si en terre lointaine
Ou si proche d'icy, si c'est en combatant
Contre vn fort ennemy, ou si c'est en flottant
Qu'il ayt esté noyé sous l'onde impitoyable
Quelque sable couurant de son tronc miserable.*

*Où ay recours à toy, & humble suppliant
Ie viens à tes genoux mes deux genoux pliant,
Dy moy, Prince remply de louange immortelle
Du Roy Dulichien la funeste nouvelle,*

Si de ces grands malheurs as esté spectateur,
Où si n'en as esté seulement qu'auditeur.
Ma mere, non heureuse en enfans, m'a faict naistre
En mere non heureux : & si tu crains peut estre
De m'atrister par trop, non, ne fais aucun cas
De pitié, de douceur, & ne me flatte pas,
Mais dy moy clairement tout ce qu'en ta notice
Il peut estre arriué du miserable Ulysse.
Par, si iamais il a de toy rien merité,
Si encor agreable il t'ai iamais esté
Soit en dits, soit en faicts, sous les hautes murailles
De Troye, où vous auez donné maintes batailles
Contre les Dardanois, ou tant que vous estiez
De Grecs, mille traux au siege suportiez,
Battus du fort destin, souvien toy de quel Zele
Il t'ayma, grand Nestor, & rien ne me recele.
Auquel le vieux Nestor curieux de cheuaux.
Tu me presses mon filste conter nos traux
Me les renouellant. Traux grands au possible
Que nous auons portez de courage invincible
Nous les enfans des Grecs, entre les peuples fiers
De la puissante Troye, aux Phrygiens cartiers,
Nation genereuse incomparable en force,
Que si point apres point de conter ie m'efforce
Tout ce qui s'y passa, soit lors que nos vaisseaux
Pour rauager couroient la campagne des eaux
Sous le fort Achilles general de l'armee:
Soit lors que sous les murs de Troye renommee
Sous les puissantes tours du demy Dien Priam,
Sous les roides remparts de la haute Pergam
Nous sommes tant de fois des cris venuz aux armes,
Où nous ont tant de fois mis aux mains les alarmes,

L E III. L I V R E

Où tant de caualiers grands en guerre sont morts,
 Où dort le grand *Aiax* fort entre les plus forts,
 Ou le brave *Achilles*, ou *Patroclus*, semblable
 En conseil aux grands Dieux, à nul comparable
 Gisent, de dure mort atterrez & vaincu,
 Où le fort, hélas ou mon pauvre *Antilochus*
 Enfant sans nulle tare, ores les accompagne,
 Brave, soit qu'il fallust sur la raze campagne
 Des pieds vaincre à la course, ou soubz l'habit de *Mars*
 Vaillamment combatant ne craindre nuls hazard,
 Digne & puissant guerrier & remply de proïesse:
 Et tant d'autres travaux que les Princes de Grece
 En ce siege ont paty, qu'il les pourroit narrer?
 Non, quand expressement tu voudrois demeurer
 Icy cinq ou six ans, & n'aurois autre affaire
 Qu'à tousiours t'enquerir ie ne le pourrois faire:
 Et t'en retournerois en ton pais natal
 En regret, plein d'ennuy, de tristesse & de mal.
 Car en neuf ans entiers, soit par ruse couuerte
 Bastissans nos desseins, ou soit en guerre ouuerte
 Attaquans les *Troyens*, nous les auons mis bas,
 Nous les auons à force atterrez de combats,
 Nous *Dorienne* gent en force incomparable:
 Et siege ne fut onc si beau ne si notable.
 Et si à toute peyne à bout nous en a mis
Iupiter, & la fin presque en a permis
 Là, personne ne peut en langue bien diserte,
 En esprit, en conseil, au preux fils de *Laërte*
 S'egaler tant soit peu. Tous il les surpassoit,
 Et loing tant qu'ils estoient derriere il les laissoit,
 Cetien pere *Ulysses*, en ruses, en prudence,
 En astuce de *Mars* seul grand par excellence:

Je le dy si tu es son fils certainement.
Car ie te diray bien, plus attentifvement
Je te regarde, & plus ie te trouue admirable
Et certes ton langage est tout en tout semblable.
Et ne te dirois point estre plus ieune d'ans,
Tant vous estes fort peu de parler differens.

Or tout le temps du siege, onques en nuls affaires
Quand le conseil tenoit, nous ne fumes contraires
Le fort Vlysse & moy, & ce que nous sentions
Estre du bien public: Tonsiours nous consentions
En nos opinions: soit qu'il fust necessaire
D'euitier quelque mal, ou d'obtenir victoire,
Et trophées d'honneur dessus nos ennemis.

Mais quand Ilion fut à destruction mis,
Que Priam fut tumbé sous nos fortes batailles,
Que nous eusmes à l'herbe égalé ses murailles,
Nous montasmes sur mer. Et Dieu se courrouça,
Et les Grecs par les vents ça & là dispersa.
Iupiter de long temps nous auoit destinee
Nostre route au pais triste & infortunee.
Certes tous n'auoient pas cheminé droittement
Et tous ne s'estoient pas comporteZ prudemment.
C'est pourquoy la plus part des Princes de la Grece
Perirent, accableZ de misere & detresse
Et tout pour le despit de la Deesse, ayant
Pour pere Iuppiter horrible & foudroyant.
Elle rendit les cœurs des Pelopides freres
En fureur, en discord l'un à l'autre contraires,
Car comme ils eussent fait publier hautement,
Assez mal apropos, que les Grecs vistement
S'assemblassent en vn, quand le flambeau du monde
Se noyeroit au soir dans l'occidentale onde.

LE III. LIVRE

Eux ennyuréz de boire, appesantis de vin,
 Pour tenir le conseil s'assemblerent en vain.
 Menelaüs vouloit que les Grecs s'embarquassent,
 Et que diligemment en Grece ils retournassent,
 Missent les naus au vent sur le grand flot ondeux:
 Mais au grand Atrides, qui commandoit bien mieux,
 Son conseil ne pleust pas, soustenant de courage
 Qu'on ne deuoit bouger, tant que sur le riuage,
 Une sainte hecatumbe aux dieux il eust dressé,
 Et sur tout appaisé le pouuoir courroucé
 De la Tritonnienne. Imprudent par trop certes
 Qui ne cogneut iamais que toutes ses offertes
 N'estoient pour appaiser les Dieux aucunement:
 Les Dieux ne changent pas ainsi legerement.
 Donc, cependant qu'on void se courrousser les freres,
 Debatre follement en leurs aduis contraires,
 Le reste est my party, & chacun de trauers
 Suit son affection. Vn bruit s'esment diuers
 Parmy les Achiens, le murmure se double,
 La discorde s'accroist, tout le monde est en trouble,
 Nous eusmes ceste nuit vn sommeil bien amer
 Tristement esbanduz sur le bord de la mer:
 Là mediterent bien noz pensees profondes
 Le mal dont menaçoient nostre retour les ondes,
 Et Iupiter deuoit, (tels estoient ses secrets)
 Donner mille trauaux aux miserables Grecs.
 Des que l'Aurore vint à la coche doree
 Nous mismes noz vaisseaux dessus l'onde azuree,
 Ayant chargé dedans de biens vn million
 Que nous auions gaignez par le sac d'Ilion:
 Nymphes de grand beauté, filles, femmes Troyennes,
 Mais plus de la moitié des troupes Doriennes

Avec Agamemnon se trouuerent au port:
L'autre part monte en mer, hors du riuage sort,
Pousse à beaux auirons l'onde Neptunienne,
Et la nef couppel l'eau de sa course soudaine.
Neptune alors aysé, son marbre hazardeux
Où se vont egayant les balenes hydeux,
Nous rendit aplaný. Dans le port nous entraýmes
Portez en Tenedos, & là sacrifiáýmes
Aux hauts Dieux immortels pour nostre partement.
Là Jupiter encor' empesche ouuertement
Nostre entrepris retour, iettant en nos courages
Et de toute la flotte, ires, discords, & rages.
Ceux qui suiuoient Vlysse, aux batailles ardent
D'esprit bien cultiué, d'entendement prudent
Remonterent en mer, & retournerent bride
Pour retourner trouuer le camp du grand Atride.
Moy ayant assemblé vistement mes vaisseaux
Et tous mes compagnons, ie pren l'áýur des eaux
Hausse tacitement la voile: Ainsi i'euite
Le naufrage cruel que Neptune nous medite,
De mesme en faict Tydide exhortant ses soldars,
(Tydide genereux vray nourrisson de Mars.)
Aprés nous, entamant le sein marbreux de l'onde
S'en vint Menelaüs à la perruque blonde,
Qui nous trouue en Lesbos, comme nous consultations
Nos routtes en la mer, & en suspens estions
Où nous debuions surgir, s'il nous failloit reprendre
Encor' la haute mer: ainsi le dessus prendre
De Chio la pierreuse, obliquement tournans
A gauche, ou Phýria ses costaux eminens,
Faict paroistre en la mer, la laissant à senestre.
Ou si nous hausserions nos voiles sur la dextre

LE III. LIVRE

*Au dessous de Chio, iouxte les rocs venteux
 De l'esuente Mimas, nous demandons aux Dieux
 Que favorablement leur bouche nous responde,
 Quel chemin nous debuons eslire dessus l'onde:
 Ils respondent. Vos naus instement garderont
 Le milieu de la mer, la rade razeront
 D'Eubee, à celle fin qu'enliez la fortune
 Des tristes accidents qu'on court dessus Neptune!
 Donc, si tost que le vent eut esmeu en soufflant
 Son aleine sifflante, & son souffle ronflant:
 Nous nous ietons en mer, & le bon vent nous porte
 Dessus le viste appuy de son aleine forte.
 Tant que nous arriuons au cap vulgairement
 Appellé Gerestus, mais de nuit seulement:
 Là nous sacrifions au puissant Roy Neptune
 Force bestail cornu, toreaux à la peau brune,
 Desia par quatrefois à nostre heureux retour
 L'Aurore iaunissante auoit donné le jour,
 Lors que les compagnons du genereux Tydide
 Auoient surgy heureux en Argos inachide;
 Je m'en venois aussi, & le prospere vent
 Auoit tousiours esté son doux souffle esleuant;
 Et tant plus que le Dieu nous enuoye esperance
 Du vent, tant plus, mon fils, ie me haste & m'aduance.
 Je vins donc incertain, & n'ay depuis appris
 Quels des Princes des Grecs se trouuerent surpris
 Et perirent en mer, ou ceux qui eschapperent
 Les dangers de Thetis & d'elle se sauuerent.
 Or depuis mon retour, ie te veux raconter
 Ce que i'en ay ouy si tu veux m'esconter:
 Les Myrmidons conduits du fameux fils d'Achille
 Qui d'ennemis Troyens tuerent tant de mille,*

Retour-

Retournerent, dit-on, comme semblablement
Avec ses compagnons repassa seurement
Le fort Idomenee au riuage de Crete,
Et le Fils de Pæan le fameux Philoctete
Garantis du danger des combats hazardeux:
Ils vindrent sans peril & sans que pas vn d'eux
Ayt esté emporté des vagues furieuses,
Noyé soubz le cruel des plisseures ondeuses.
Et pour Agamemnon, bien qu'eslognez d'icy
Au regne de Laërte & d'Ulysses aussi,
Peut estre scauez vous sa fin par trop cruelle,
Comme le mit à mort Egystus l'infidelle
Chez luy, en trahison, par le fer violent
Vne espee sur luy fierement ebranlant.
Mais il a bien payé la traison machinee:
Tant il faiet bon laisser apres sa mort lignee,
Car le gentil Oreste a dignement vengé
Le tort dont il auoit esté tant outragé,
Massacrant Egystus le traistre parricide
Du grand Agamemnon le genereux Atride.

A l'imitation de ce Prince gentil
Il te faut allumer ton courage, au fusil
Des actes vertueux, afin que de ta gloire
Nos enfants à venir ayent vn jour memoire,
Et portent dans le Ciel le fameux de ton nom.
Ie te voy bien formé, d'esprit gentil & bon,
Dont ie mesiois fort. Auquel alors s'adresse
Telemachus disant: Grand honneur de la Grece
Neleïde Nestor, le grand contentement
Qu'Orestes doit auoir, d'auoir si brauement
Vengé Agamemnon: dont sa gentille gloire
Doit receuoir des Grecs vn honneur meritoire

LE III. LIVRE

De louange eternelle, & doiuent nos nepueux
Exalter à iamais un acte si fameux.

O que les Dieux ainsi me pourueussent asteure
De force suffisante, afin que sans demeure
Ie m'allasse venger des forfaits malheureux
Qui me sont faits chez moy par vntas d'amoureux,
Et leur faire payer & le tort & l'iniure
Que meschamment me faict la canaille pariure.
Mais les Dieux ne m'ont point à tel bien destiné,
N'ont point tant honoré le fils infortuné
D'un pere si vaillant, qu'il acquist tant de gloire
Car il me faut souffrir ceste honte notoire.

Lors Nestor, de cheuaux le domteur excellent,
Puis que tu ramentoy, mon fils, en me parlant
Ces affaires, dit-il, ils disent qu'une bande
D'amoureux en ta court, importune demande
Ta mere en mariage, & qu'en despit de toy
Ils font là mille maux. Or' ie te pry, dy moy,
Cedes-tu, de ton gré, à leur force inhumaine,
Où, le peuple meschant t'a il en quelque hayne?
Qui se fortifiant des oracles des Dieux
Poursuit encontre toy ses faits malicieux?
Qui sçait si Vlysses raporté par fortune
En son pais natal, & sauné de Neptune
La vengeance en prendra, les percera de traits
Soit tout seul, soit suivy d'une troupe de Grecs?
Que si Pallas t'aymoit d'affection semblable
Qu'elle faisoit ton pere, au siege incomparable.
De Troye, où nous anons faict de si braues faicts,
Et pati tant de mal (car ie ne vy jamais
A quelqu'un tant a gré l'assistance celeste,
Qu'à ton pere Pallas se rendoit manifeste)

Si son affection t'estoit telle, croy moy
Que tous ces amoureux s'enfuïroient deuant toy
Laisants les nopces là. Vieillard sur tous aymable
Dit le fils d'Ulysses, chose tant favorable
Ne m'aduiendra iamais. Tu parles brauement,
Ton discours me raut : ie ne puis nullement
Toutesfois l'esperer, non pas si les Dieux mesme
Puissans l'entreprendoient en leur pouuoir supresme.

La Tritonide alors Pallas aux beaux yeux vers
Luy couppant son propos. Quel mot tant de trauers
T'est, dit elle, eschappé : Quelle rage te touche
De blasphemier ainsi de ta prophane bouche ?
Car Dieu peut preseruer la personne en tous lieux
Quelque esloigné qu'il soit. Et i'aymeroïs bien mieux
Après beaucoup de mal de trauail & de peyne
Reuenir, bien que tard, ma vie sauue & saine,
Et voir le iour heureux qui fauorablement
Merameneroit tel : qu'arriuant vistement
Des ondes sousleué, mourir de mort cruelle
Ainsi qu'Agamemnon par la ruzé & cautelle
Du fils de Thyestes, & la meschanceté
De sa femme mauditte, a pauurement esté
Roide mort estendu dedans sa maison mesme :

Or les Dieux de qui est le pouuoir tressupreme
N'osteront à la mort l'homme de qui les seurs
Ont rompu le filet, bien que pleins de douceurs
Ils l'aymassent d'amour cher & recommandable.

A donc respond le fils d'Ulysses miserable
Helas, nous nauons pas occasion, Mentor,
De nous respaistre en vain de tels discours, encor
Qu'il m'en face bien mal, le malheur trop contraire
Son retour luy denie en sa patrie chere :

LE III. LIVRE

La mort noire l'a pris : & ses destins sont tels :
Ils luy furent donnez par les Dieux immortels.
Mais j'interroguera Nestor d'une autre chose
Dedans le cœur de qui grand' sagesse repose,
Plein d'équité, d'honneur. Tout le monde est vaincu
De ses grandes vertus : on tient qu'il a vescu
Trois generations, & sa vieillesse grande
Par trois siècles entiers sur les hommes commande :
A son regard aussi on le diroit semblant
Aux grāds Dieux dessous quiles hōmes vōt trēblāt.
Or nous raconte au vray, ô Nestor Neleïde,
La façon que mourut le genereux Atride,
Dont le Royaume beau largement s'estendoit
Par les plaines de Grece : & où pour lors estoit
Menelaüs son frere, & quelle mort cruelle
Osa luy machiner Egistus l'infidelle.
Car l'autre estoit beaucoup plus puissant & plus fort
Un plus foible la mis ceneanmoins à mort.
Où estoit en ce temps le beau mary d'Heleine,
En Achaïe, ou bien en l'Argolique pleine,
Où s'il estoit de hors en voyage lointain,
Quand le lasche adultere avec ceste putain
Firent de ce grand Prince un si piteux carnage ?
Sur cela luy respond Nestor le vieillard sage.
Tu scauras tout de moy ; Tu soubçannes cela
Que la fortune alors sur luy ammoncela,
Je le voy bien, mon fils : Sois donc seur ie te prie
Que si Menelaüs eust rencontré en vye
L'infidelle Egistus, alors qu'il retourna
De Troye, & que la mer chez luy le ramena,
Il n'eust pas seulement sur luy daigné respandre
De la terre en l'honneur de sa parjure cendre,

Mais les chiens, les oyseaux l'eussent finalement
 De leurs dents, de leurs becs, mangé cruellement,
 Sur la terre estendu, sans honneur & sans gloire
 Dehors de sa cité, loin de son territoire.
 Et si jamais son corps n'eust esté désiré
 Des femmes d'Achaïe, & par elles pleuré,
 Tant il auoit rendu ce vice abominable
 A tous les Pelasgois horrible & detestable.

Durant donques le temps qu'à Troye nous estions,
 Que sous le dur harnois la fatigue portions,
 Il estoit en Argos l'excellente nourrice
 Des cheuaux viste-pieds, tout-plongé en delice,
 Enjoiant au chasteau, de doux propos pressant
 La femme toute belle, & l'honneur flestrissant
 Du grand Agamemnon. Combien qu'elle rejette
 Le sale accouplement, la couche deshonneste
 Dont-il l'importunoit (car au commencement
 Elle auoit le renom de viure chastement)
 Car son mary montant sur la campagne large
 Pour aller à Pergam, il la mit sous la charge
 D'un poete qu'il auoit, homme docte & prudent
 La luy donnant en garde & luy recommandant.
 Mais quand, Destin des Dieux, ceste Princesse belle
 Vaincuë se rendit, elle deuint cruelle,
 Et par l'aduis meschant d'Ægistus son mignon
 Relega des neuf seurs le docte compagnon
 Dans vne Isle deserte en la mer effroyable:
 Barbare delaisant le pauvre miserable
 Aux aigles, aux oyseaux pour proye à deuorer.
 Ægistus cela faiet la faisant retirer,
 La meine en sa maison, où, selon la coustume
 Ægistus des grands Dieux les saints autels parfume,

LE III. LIVRE

D'offertes leur fait dons, d'or, d'habits precieux,
Dresse force tableaux, force images des Dieux,
Ayant conduit vn faict de tresgrande importance,
Et qu'il n'eust onc osé concevoir d'esperance.

Or estans demarez du riuage Troyen
Nous venions à plein voile, & par mesme moyen
Gagnions la haute mer. Alors le ieune Atride
Et moy voguions ensemble, ouurants la pleine humide,
Vniz de volonté, de mesme opinion,
Tant que nous fusmes pres du sacré sunion,
Qui sur l'Athenien son grand ombrage iette.
Là Phæbus mit à mort d'un fier coup de sa jette
Le jettant en la mer, le pilote prudent
Du Roy Menelaüs, comme il alloit guidant
Le timon de la nef, Phrontis Onetoride,
Qui seul auoit l'honneur sur la plaine liquide
Entre tous les mortels de scauoir sagement
Gouuerner vn vaisseau, le mener dextrement,
Autemps plus orageux. Menelaüs demeure
Pour rendre l'honneur deub dessus la sepulture
De son amy perdu, bien qu'il fust fort pressé.
Mais comme il eust encor le voile rehaussé
Retenant plein d'espoir la campagne salee,
Comme il doubloit le cap de l'eminent Malæe,
Vn trespiteux chemin Jupiter luy trama:
Les vents horriblement sifflants il anima,
Les orages esment, les eaux rendit enflees,
Des montagnes en fit hautes & boursouflees
Comme monstres nageans: les barques dispersa
Errantes par les eaux, en Crete les poussa
Vers les Cydoniens, à l'emboucheure estroitte
De Iardan. Or est là vne roche assez droite

Mais petite en la mer, aux confins de Gortin,
Là le vent orageux pousse le flot mutin
A gauche, vers le cap à Phaste, & le flot proche
Bien que grand, est rompu de la petite roche:
La flotte là portée avec horrible effort
Les hommes à grand peyne eurent la mort.
Mais les flots irrités les barques enfoncèrent
Sous les antres hideux, les orages froissèrent
Les vaisseaux peints, & sous les noires eaux
Entre les creux rochers les mirent par morceaux.
La tourmente pourtant & la tempeste viste
En contraignirent cinq de lascher en Egypte,
Où se trouvant porté l'Atride, diligent
Il fit un grand amas de trésors, & d'argent
Cependant qu'il erroit en étranger riuage
Par nation à luy diverse de langage
Cependant Egisthus tramoit en sa maison
Le malencontre fier d'une grand trahyson
Tuant Agamemnon: & regea nouveau prince
Sous son commandement le peuple & la province.
Tout luy fut subiugué, & tout luy deffera,
Il prit le sceptre en main, le peuple obtempéra:
Et se vid parvenu à la septiesme année
Que Mycenes par luy fut tousiours gouvernée.
Or l'an d'après arriva à son tresgrand malheur
Le divin Orestes, le furieux vengeur:
Qui d'Athenes partit pour donner mort amere
Au perfide Egisthus le meurtrier de son pere,
Et fit en le tuant, le sepulchral festin,
Aux citoyens d'Argos, de la traistre putin
Sa mere, & du ruffien. Or en ce iour la mesme
Reuint Menelaüs plein de richesse extremes

LE III. LIVRE

Et d'autant que sa floite en pouuoit apporter.

Mais toy, mon cher amy, ne veilles t'absenter
Long temps de ta maison & si riche & si bonne,
Ne rescarte point trop, & de loin n'abandonne
Tans de biens, & chez toy ces superbes amans
Qui les deuoreront, sans respect consumans
Ton bien, ton reuenu. cependant que sur l'onde
Trotteroit pour neant ta barque vagabonde.

Trop bien ie suis d'aduis que tu vois es trouuer
Le Roy Menelaus, qui ne faiet qu'arriner
D'un pais eslogne, des regions lointaines
Où il a tant souffert de perils & de peynes
Qu'il n'en pensoit iamais reuenir en seurie:
Ayant par la tourmente esté tant agité
Et destourné si loing par les cruels orages,
Que les oyseaux volants sur leurs vistes plumages
A peyne passeroient en vn an sans danger
Une telle estendue, une si large mer.

Va donc que iusques là sur le mobile verre.
Si ta commodité t'est meilleure par terre,
I'ay coches, i'ay cheuaux les vents des pieds gaignants
Et mes enfans encor' t'iront accompagnans.
Iusqu'à tant que tu sois dedans Lacedemone
Où le ieune Atrides porte Sceptre & couronne.
Florissant en honneur. Là tu le supliras
Te dire verité, & fort l'en presseras,
Il ne te mentira. Car son gentil courage
Est orné de prudence & de parole sage

Il eut dit, & le soir s'en vint en moins de rien
Titan plongeant son coche au flot Iberien.
Lors Pallas aux yeux pers Deesse venerable
Respondant dit ainsi: ô vieillard honorable

Tu parles en amy, tu fais auioird'huy voir
Que tu veux t'acquitter au vray de ton deuoir.
Or des langues tranchez vn peu, & dans les tasses
Venez verser le vin, puis auoir rendu graces
A Neptune, & aux Dieux consecutiuent,
Nous irons dans les lits preparez mollement.
L'heure du sommeil vient, l'obscurité s'approche,
La lumiere s'enfuit. Phœbus pousse son coche
Dans la sombre espaisseur, & son esseil ardent
Est desia tout plongé dans les eaux d'Occident.
C'est vn festin des Dieux: il seroit mal honnesté
De le plus prolonger sans faire la retraite.

La fille à Iuppiter parla de la façon,
Et l'on vid tout soudain porter à maint garson
Aiguieres pour lauer, les tasses ils remplissent,
Et versans le bon vin à tous le departissent.
Lors ils prennent leur vin, & apres auoir beu
Ils iettent le couppé des langues dans le feu,
Puis ils se leuent tous, & derechef respandent
Le doux vin aux grās Dieux, ausquels graces ils rēdēt.
Cela faict, & chacun ayant beu tout autant
Que portoit son desir: Telemaque sortant
Auec Pallas vouloit retourner au nauire,
Quand Nestor s'escriant se prit ainsi à dire:
Or il les retenoit, & les alloit tensant
De propos gracieux: O Iupiter puissant
Qui tiens le foudre au ciel, & vous grās Dieux encore
Chassez loin ce méchef, qu'on ne me deshonore
En la façon, dit-il, qu'ils ne s'en aillent pas
Ainsi dans leurs vaisseaux, faisans si peu de cas
De moy, de ma maison: Comme si, miserable,
Ie n'auois lits, linçeux, ny maison honorable,

LE III. LIVRE

Ny riches vestemens, ny rideaux precieux,
Couuertes, ny matlas mols & delicieux
Pour les accommoder & leur faire seruice.
Tant que seray viuant iamaïs le fils d'Ulysse
N'ira de ma maison coucher dans vn batteau
Sur vn ais, appuyant sa teste à vn potteau:
Mesmes apres ma mort, dans ceste forteresse
Ie lairray des enfans, qui de franche allaigresse
Receuront mes amis, & tous ceux qui encor
Daigneront visiter la maison de Nestor.

Auquel Minerve dit: O vieillard Neleïde,
Certes tu as bien dit. Retien donc l'Ulysside
Et le meine chez toy, pour moy ie m'en iray
Trouuer les compagnons, & les aduertiray,
Auray soin du nauire & de tout l'equipage,
Car ie suis seul de nous le plus aduancé d'aage,
Les autres sont encor & florissans & vers,
N'ont presque les mentons de poil tendre couuers:
Tous pour l'amour de moy, en aage tous semblables
Vont volontairement sur les eaux nauigables.
Donc ie coucheray là, & puis dès que le iour
Au chariot de rose, aura fait son retour,
Il me faudra donner vn peu iusqu'en Caucone,
Quelque argent m'y est deu, la somme est assez bonne
Pour ne la mespriser. Quant à toy, ô Nestor,
Tu peux d'un de tes fils, & de cheuaux encor
Pouruoir ce ieune Prince, & qu'ils soient en vistesse
Excellens, & choisis de courage & d'adresse,
Puis qu'il t'est venu voir. Pallas ainsi parla,
Puis comme vne grande aigle en volant s'en alla.

Un estourdissement les surprit admirable,
Nestor demeura court, voyant l'emerveillable.

Departir de Pallas. Puis la main saisissant
Du ieune Ulyssien, dit ces mots prononçant.

Amy, tu ne seras onc de lasche courage,
Ny de cœur trop craintif, puis qu'en un si ieune aage
Tant fauorablement t'accompagnent les Dieux,
Et si ce n'est aucun des Olympiques lieux:
C'est l'heureuse aux butins Pallas Tritonienne,
Qui deuant tous les Rois de la gent Argienne
Au siege d'Illion à ton pere porta
Un admirable amour, qui tousiours l'assista
Et luy firent auoir ses aides secourables
Sur villes & citez maints triphz honorables.

Deesse, ie te pry donne honneurs triomphans,
Et reputation à moy & mes enfans,
Et à ma femme aussi. Sois nous douce & propice,
Et nous t'immollerons vne haute genisse
Sur ton autel sacré, ayant les cornes d'or,
Et que le ioug pesant n'a point domtée encor:
Que le dur laboureur encores n'a trainee
Dans le motteux gueret. elle t'est ordonnée
Pour victime, ô Pallas, hault elle portera
Le front, & riche d'or sa double corne aura.

Comme il faisoit ainsi de bon cœur sa priere
La Deesse aux yeux pers l'entendit debonnere:
Puis delaisant la mer & le rinage bas
Il se prit à marcher. Ses fils suinoient ses pas
Et ses gendres aussi, & comme ils arriuerent
Au superbe chasteau, les Rois se reposerent
Sur les sieges & liets: Nestor les honora,
Et dans les coupes d'or le doux vin mesura,
Vin, qu'une fille auoit sommeliere fidelle
Serré depuis vnze ans, & maintenant c'est elle.

LE III. LIVRE

Qui de la tonne antique ainsi le va tirant,
Et Nestor le versoit, la Deesse adorant
Sur l'autel, le cœur plein d'aise & d'esjouissance,
Puis ils s'en vont coucher repens à suffisance,
Chacun dedans son liēt. Mais le bon Cheualier
Nestor Gerenien eut en soing singulier
De faire aller coucher dans un liēt magnifique
Le cher fils d'Ulysses, sous le sonnant portique
Sa chambre estoit dressée, où la fraischeur du vent
Alloit sans fin le doux de son soufle eslevant:
Pres de luy Pisistrat dormoit, plein de courage,
Qui n'estoit mis encor au ioug de mariage.

Mais la chambre du Roy sur le haut d'une tour
Se tiroit hors du bruit, là faisoit son seiour,
Là prenoit son sommeil le vieillard honorable,
Au liēt que luy dressoit sa femme venerable.

Mais l'aube aux doigts rofins, fille du iour naissant,
N'eut si tost estellé son coche rougissant
Que le Gerenien Nestor du liēt se iette,
Sort dehors, & se sied sur vne pierre nette,
Qui pour un siege estoit mise anciennement:
Deuant le grand portail, polie extremement,
D'admirable blancheur, de liqueurs reluisante,
Et de rare onction, plus que respendissante:
Iadis s'assit dessus le grand Neleus, pareil
Aux Olympiques Dieux de cœur & de conseil,
Mais par la mort dompté, dans l'espaisse tenebre
Il estoit descendu de l'Erebe funebre.

Or Nestor porte-sceptre Heros brave & puissant,
Et plein d'aage, pour lors en estoit iouissant:
Pres duquel, de ses fils la brigade leuee
S'assemblant vistement est son dain arrinee,

Stratius, Echephron, Perseus, Aretus,
Le fort Thrasimedes, auxquels Pisistratus
Aux armes renommé des enfans le sixiesme
En nombre s'adioignit d'une vitesse extresme,
Conduisans avec eux Telemachus, le soing
Et le soucy des Dieux. Ausquels Nestor de loing:
Enfans, ie vous supply executez la chose
Que de tout mon desir ores ie vous propose
Pour auoir la faueur de Pallas, que ie veux
Me rendre fauorable entre les autres Dieux,
Car elle a bien daigné, manifeste & prospere,
Assister au festin que i'ay faiët de n'aguere.
Or que l'un coure tost par les champs florissans
Où nostre troupeaux errans les herbes sont paissans,
Face que le bouuier vne genisse ameine.
L'autre haste ses pas à la barque prochaine,
Et tous les compagnons appelle vistemment
Pour s'en venir icy, fors que deux seulement
Qui demeureront là, & du long du rinage
Garderont l'attirail & tout le nanigage.
Qu'un autre aille querir Laërtes le doreur,
Au mestier de Vulcan plein de gloire & d'honneur,
Et qu'il se haste, afin qu'il dore & qu'il brunisse
Les cornes & le front de la belle genisse.
Vous autres donnez ordre au dedans promptement,
Faiëtes que le banquet s'appreste vistemment.
Les filles ayent soing que les chambres soient nettes,
Les liëts soient bien dressez, que les tables soiët prestes,
Que le vin soit tiré, l'eau fraische & nette avec,
Ne nous defaille point, & que le bois soit sec,
Ce disant, tout le monde obeit, & la tore
Vient cependant des champs, viennent des nefes encore

LE III. LIVRE

Les compagnons du fils du diuin Ulysses,
Vient au mesme moment le doreur Laerces,
Les armes du mestier quant & quant soy apporte,
Outils d'un si digne art, & la tenaille forte,
L'enclume & le marteau, desquels il induit l'or
De faire son vouloir. Pallas y vient encor
Au vœu du Neleide, & veut estre presente
Pour iouyr de l'offerte & de l'odeur plaisante.
Nestor l'or reluisant fournit suffisamment,
Et l'orfeure enrichit les cornes proprement,
Pour faire que Pallas regardant la genisse
En triomphe de ioye, & son cœur rejouisse.

Stratie & Echephron la victime menoient
Les bras entortillez aux cornes qu'ils tenoient,
Aretus portoit l'eau fraische, & nette à merueille,
Dedans un chauderon & dans une corbeille,
Huile, farine, & sel. Apres qui l'excellent
Thrasymedes alloit la grand hache esbranlant,
Pour dessus le sablon roide morte l'estendre.
Dessus portoit le vase, auquel il deuoit prendre
Le sang tiede coulant. Quand Nestor le puissant,
Dompteur des forts cheuaux, les brins du poil naissant
Sur le front luy couppa, les brulant pour premice,
Fit les aspersions du diuin sacrifice,
Priant beaucoup Pallas. Le vœu parfait ainsi
Les fruits sont espanchez, & tout le reste aussi.
Et lors Thrasymedes tout prest, bouillant d'enuie,
Oste de la genisse & le col & la vie
Auec le fer luisant : ses forces à l'instant
La quittent, & à terre elle chet tremblottant.
Filles & brus alors font un cry pitoyable,
Et Euridice aussi la Reyne venerable,

Qui fut iointe à Nestor d'un bien-heureux hymen,
Et la plus vieille d'ans les filles de Clymen.
Eux doncques la tenans ferme dessus l'arene
Le grand Pisistratus des hommes capitaine,
Pres de l'autel sacré l'égorgeant l'immoloit,
Et le sang noir espais des veines decouloit:
L'esprit quitte les os, & la chaleur les laisse.
Or en grand diligence un chacun la depeffe,
Detranche les cuissots, les partissent tous crus
En deux parts, vont iettant force gresse dessus,
Et puis les vont grillans. Le vieillard s'en approche,
Et verse le vin noir, on void tourner la broche
Par ordre, & à cinq rancs, que les ieunes tenoient,
Et tant que tout fust cuit sur le feu la menoient.
Les cuissots estans cuits, des entrailles tasterent,
Le reste de la tore apres ils apprestèrent,
Le mirent par morceaux, & puis le rembrochans
Ils le vont derechef à la flamme approchans,
Et rostissans tenoient en main le pointu haste
Pour le faire bien cuire. A doncques Polycaste
La moins aagée d'ans des filles de Nestor
Excellente en beauté, non mariee encor,
Laue Telemachus en eau delicieuse,
Et l'oint, laué qu'il est de liqueur precieuse,
Puis iette dessus luy vestemens precieux.
Lors il sort hors du baing, semblable à l'un des Dieux
De corps, de majesté, de maintien, & de force,
Puis aupres de Nestor s'assied de bonne grace.
Lors on couure la table, & pour le saint banquet
Un chacun prend sa place, & sur les lits se met,
Et les forts compagnons à l'entour de la table
Seruent à qui a soif le bon vin delectable.

LE III. LIVRE

Mais quand la soif finit & l'appetit cessa
Nestor ouvrant la bouche à ses fils s'adressa.
Mes chers enfans, dit-il, qu'au carrosse on attelle
Vistement les cheuaux, dont la criniere belle
Sur le col va battant, afin de desloger
Et porter Telemach, d'un pied viste & leger.

Ils obeissent prompts, courent en diligence
Lier au chariot doré par excellence.
Les cheuaux pieds de vent, & la seruante apres
Leur fournit largement & Bacchus & Ceres,
Force fruiets sanoureux, & viures delectables
Que l'on appreste aux Rois, & qu'on met sur leurs tables.

L'heritier d'Ulysses sante dispostement
Sur le carrosse hault, si faiet semblablement
Le gentil Pisistrat pour luy seruir de guide,
Il fouët les cheuaux & leur baille la bride:
Les roussins pieds d'airain de ces deux excitez
S'allongent sur le champ, vollent precipitez,
Le legier chariot par leur prompte carriere,
Tourne d'un viste effort, laisse Pyle derriere
Et ses monts orgueilleux, & son tournoyant tour
Exerce, est ant porté tant que dure le iour,
Et tant qu'il dure encor les roussins n'ont relasche
De branler le collier. Sa iournaliere tasche
La Titan achenoit, & les ombres cachoient
Presque tous les chemins, ainsi qu'ils approchoient
Pheres, & la maison Diocles, qui te treuve
Issu d'Ortilochus, sorty d'Alphe Dieu-fleuve.
Là leur couchee ils font, apres s'estre repens
Des dons de Diocles, qui les a bien recens.

Mais si tost qu'il fut iour, quand l'aube matinere
Apparoissant au ciel eut rendu la lumiere,

Ils

Ils reprennent le coche & font le fouet sonner,
Retouchent les cheneaux, hastez de leur donner
Les resnes & la main, le chemin ils reprennent,
Et les roussins courans tout le iour les amènent
Dans les champs porte-fruits, & puis finalement
Ils parfont leur chemin, tant courageusement
Galopoient ces cheneaux. Titan cependant baigne
Le feu de sa lumiere és ondes de l'Espagne,
Sur les larges chemins on void s'obscurcir l'air,
Et des costaux hautains les ombres deualler.

Fin du troisieme Liure.

E



LE QUATRIESME LIVRE DE L'ODYSSEE D'HOMERE.

ARGUMENT.

Elemachus & Pisistratus arriuent chez Menelaüs, auquel Telemachus raconte le desordre que les pour-
suiuans faisoient en Ithaque, & Menelaüs à luy le re-
tour des Grecs, de Troye, & la prophetie de Protheus
Dieu marin, par laquelle il sceut la mort d'Agamemnon,
& entendit comme Vlysses estoit en l'isle de Calypso. Les
poursuyuans tiennent conseil pour faire mourir Telema-
chus. Pallas apparoit en songe à Penelopé, & la console de
la tristesse qu'elle auoit du depart de son fils.

AUTRE SOMMAIRE.

*A Sparte le surplus d'Ulysses il entend,
Antinois sur mer pour le tuer l'attend.*

Les Princes approchoiēt la muraille embellie
De Sparte, ayant atteint le pays d'Oebalie,
Aborderent ensemble au palais somptueux
Du puis-né fils d'Atree, & noble & ver-
Arriuerent à heure & propre & fortunee, (tueux:
Et comme il celebroit le ioyeux Hymenee
D'une fille & d'un fils: force gens assistoient,
Forces Princes encor' assemblez y estoient

Par son commandement : La pucelle gentille
Auoit esté promise au fils du fort Achille
Dés le siege de Troye, & lors les puissans Dieux
Paracheuoient l'effet de l'Hymeneioeux,
Il la luy enuoyoit pour parfaire les nopces,
Auec force cheneaux & force beaux carrosses,
Aux champs des Mirmidons, où pour lors il regnoit,
Et d'Achille heritier les peuples gouuernoit.

A son fils d'autre-part pour espouse on ameine,
Vne fille de Sparte en beauté souveraine,
La fille d'Alector, & ce fils auoit nom
Megapenthé, vaillant, & plein de grand renom.
Au temps de sa vieillesse & grisonne & dernière
Cet enfant luy estoit ne d'une chambrière.
Car les Dieux qui au ciel habitent triomphans
Ne permirent qu'Helene eust de luy plus d'enfans
Depuis l'heure & le iour qu'elle auoit mise au monde
La gentille Ermione, à Venus non seconde,
En beauté singuliere, & qui eust emporté
Fort aisement le prix de grace & de beauté.

Ainsi donc celebrent ces nopces magnifiques,
Ainsi faisoient festins somptueux & publiques,
Ainsi fortifioient le regne en bons accorts,
Les citoyens ensemble & les seigneurs plus forts
Qui possedoient les champs assis en Laconie.
Là le chancre resonne une douce harmonie,
Le bal ment de sa voix, & parmy les beaux airs
Où se bat la ieunesse, accorde les doux nerfs
De son luth doucereux. Deux sauteurs à la dance
Se mettent bien disposés, & battent la cadence,
Dressent le bal Royal, & tournans & sautans
Force belles chansons à l'enuy vont chantans.

LE IIII. LIVRE

D'Ulysse & de Nestor la race braue & forte
Arresterent leur char à la premiere porte,
Et furent apperceus par l'un des fauoris
Du Prince, sur tous ceux qu'il eust encor chers
Le mieux aimé du Roy, qui promptement s'aduance,
Les nouvelles en veut porter en diligence:
Et le Pasteur du peuple ainsi vint accoster.

Puissant Menelaüs, nourry de Iupiter,
Deux estrangers sont là dans un carrosse ensemble
Arrestez à la porte: & si, comme il me semble,
Ils sont de fort bon lieu, dignes d'estre tenus
Enfans de Iupiter, on les diroit venus
De la race des Dieux. Te plaist-il qu'on délie
Leurs cheuaux du carrosse? Où veux-tu qu'on leur die
De prendre alors chemin, & chercher doucement
Logis où on les aime? Auquel amerement
Le Roy dit indigné: Cy deuant, Eteone
Enfant de Boëthes, il n'y auoit personne
Ainsi prudent que toy, ne si civilisé,
Mais ores tu es bien autant mal-aduisé.
I'ay par l'esprenue, appris d'aider aux miserables
En mes erreurs diuers & presque intolerables
Par estrange pays, par un peuple enragé
I'ay receu des plaisirs de ceux qui m'ont logé.
I'ay mangé, i'ay vescu aux despens, à la table
Des estrangers, errant par la terre habitable
Jusqu'à ce que ie sois ariué en ce lieu,
Sans naufrage & malheur. si le plaisir de Dieu
Soubs qui le monde entier fléchit & obtempere,
Vient que ce soit icy la fin de ma misere.
Va cours, detache & char & cheuaux pieds legers,
Ameine, fais entrer ces Princes estrangers,

Pour faire bonne chere. Il le leue luy-mesme,
 S'encourt au deuant d'eux en diligence extrefme,
 Commande qu'on le suiue. On oste les cheuaux
 Vistement du carosse, & l'eau comme à ruisseaux
 Leur chet de tous costez, la sueur les consume,
 L'encouleure & les flancs sont tous couuerts d'escume.
 On les meine à l'estable, on leur donne à manger
 Orge blanc & auoiz, apres on va loger
 Le peinturé carrosse au dedans de la porte
 Du chasteau, à l'endroit de la muraille forte,
 Les deux Princes apres estre conduits dedans
 Demeurent tous ravis, admirent regardans
 L'apparence Royale & la belle structure
 Du grand palais, du Roy de Iupin nourriture.
 Telle que du Soleil est la nette clarté
 Et de sa sœur, semblable en claire netteté
 De l'Atride luy soit la maison venerable,
 A part soy chaque chose ils trouuent admirable,
 Cà & là par la court ils vont les yeux iettans,
 Et admirent le tout aises & fort contans.
 Ils sont tresbien recens, & du Prince leur hoste
 Ils ont tresbon visage. En apres on leur oste
 Leurs beaux accoustremens, ils entrent dans le bain
 Et les filles apres les lauent de leur main,
 Les oignent de liqueurs plus que delicieuses,
 Puis leur iettent dessus les robes precieuses.

Quand ils sont introduits grand honneur leur est fait,
 Sont assis pres du Roy, contemplent à souhait
 Sa court & sa maison. La garse bien apprise
 Leur presente à lauer, une aiguiere elle a prise
 D'or entier & massif, & son bras net & gent
 Verse Thetis, qui chet dans vn bassin d'argent.

LE IIII. LIVRE

Puis par la sale dresse excellemment les tables,
 Une autre de Ceres les presens profitables
 Porte dans vn papier : car la charge elle auoit
 De faire la despence, & les tables deuoit
 De bons viures charger & de force delices.
 Le cuisinier apres ordonnoit les seruices,
 Les grands plats portoit pleins de tous viures chargez,
 Qui sont premierement sur les tables rangez.
 Puis on verse le vin plaisant & delectable
 Dans des grands coupes d'or. Lors du hant de la table
 Le Roy Menelaus d'un visage gaillard
 Dit au fils genereux du Pylien vieillard,
 Et à Telemachus : Rejouissez vous ores,
 Prenez en gré ce pain & ces viures encores:
 Puis quand aurez repen, d'un propos gratieux
 Nous vous demanderons vos noms, & de quels lieux
 Vous pouuez estre issus : la souche n'est pas morte
 Dont vous estes sortis, & de la race forte
 Des Rois vous procedez, & les Princes sceptrez:
 Car tels, peres couhards ne vous ont engendrez.
 Apres qu'il eut parlé, il prend de sa fourchette
 Le gras filet d'un bœuf, le met sur leur assiette
 De façon gratieuse : & bien qu'un present tel
 Luy auoit esté faict par honneur solemnel
 Il les en veut orner, & eux dessus se iettent,
 Les mains dedans les plats les plus proches d'eux mettēt,
 Puis quand la soif finit & l'appetit cessa,
 Telemachus au fils de Nestor s'adressa,
 Et se baissant vers luy, luy dit bas à l'oreille
 De peur qu'on ne l'ouyst : Nestoride à merueille
 Agreable à mon cœur, des Pyliens l'honneur,
 Regarde ie te pry l'admirable splendeur

De ce riche palais, comme en or il abonde
En argent, en yvoire, autant qu'autre du monde,
En cuyure elabouré. Les magnifiques lieux
Où le grand Iupiter, où les celestes Dieux
Sur l'Olympe estoillé habitent venerables,
Si ie ne suis trompé, sont à cecy semblables:
Par ainsi, regardant ceste perfection
Ie ne puis que ie n'entre en admiration.

Menelaüs l'ouyt, & en ceste maniere
Leur parla doucement: Race de Rois treschere,
Certes nul des mortels n'oseroit contester
En biens, avec le Roy trespuissant Iupiter,
Car de Iupiter est la maison eternelle,
Eternels les palais: sa richesse immortelle,
Et qui n'a point de fin. Des hommes, qui pourra,
Ou qui ne pourra pas à moy s'esgallera,
En splendide maison, en richesse, en cheuance,
En or ou en argent, ou en autre abondance.
I'ay merueilleusement paty dessus les eaux,
Par maint & maint danger ont passé mes vaisseaux,
I'ay esté tourmenté sur la terre & les ondes,
Errant deçà delà sur les vagues profondes.
En fin au huitiesme an nous sommes paruenus
En Cypre renommee, où s'adore Venus,
Puis nous fusmes portez iusques dans la contree
De Phenicie, & puis nostre nef fut encree
Errante çà & là par le pays fertile
Que de ses grasses eaux arrose le grand Nil.
Nous passasmes Sidon, & puis l'Æthiopie,
Les Erembes cruels, & vinsmes en Libye:
Par estranges pays errans & tracassans.
C'est en ceste Libye, où les agneaux naissans

LE IIII. LIVRE

Portent cornes au front, la brebis camusette
 Porte là trois fois l'an, là n'ont nulle disette
 Le Roy ny le berger de fromage, de lait,
 Ny de chairs, ce pays donne tout à souhait:
 Pays riche, abondant sur tous autres du monde,
 Où tout le long de l'an le lait coule & abonde.
 Helas, ce-temps pendant que i'erre & que ie cours
 Par les champs Libyens, y amassant tousiours
 Richesses en grand nombre, on massacre mon frere,
 On luy passe en traison luy donnant mort amere
 Un glaive dans le cœur, ainsi qu'il reuenoit
 Victorieux de Troye, & chez luy retournoit,
 A l'impourueu, le tout par la cautelle infame,
 Et par la trahison de sa meschante femme.
 Entre tant de thresors ie regne voirement,
 Mais mon frere estant mort, ce n'est que tristement.
 Si vos peres vous ont ces choses racontees,
 Quels qu'ils soient, & de vous ont esté écontees,
 Vous verrez combien i'ay receu d'affliction,
 Comme est cheute en ruine & en perdition
 Ceste mienne maison, autresfois tant heureuse,
 En richesse & en or iadis tant plantureuse,
 Et où ie demeuroid en grand prosperité.
 Pleust aux Dieux que de tant il ne m'en fust resté
 Que la tierce partie, & que les bons gendarmes
 Qui à Troye sont morts sous la fureur des armes,
 Et qu'a pris le destin rigoureux & fatal:
 Helas si loing d'Argos leur cher pays natal
 Fussent viuans encor, mais durant ma tristesse
 Pour pleurer leur malheur ie m'oste de la presse
 Et me retire seul, & comblé de douleurs
 L'arrose pour eux tous mon visage de pleurs.

Et certes quelquesfois ie tasche à me complaire
En mes pleurs & regrets & ne m'en veux distraire:
Et quelquesfois mon pleur se finit arresté.
Car combien que pleurer soit quelque volupté
Toutesfois elle est courte, & bien tost on se soule
De l'ennuy triste & noir qui vistement s'ecoule
I'estens en general mes pleints & mes regrets
Sur tous les Argiens, sur tous les princes Grecs,
Mais principalement ie respans ma tristesse
Sur un dont entre tous ie regrette sans cesse
La perte & le malheur. Je pers entierement
Le dormir, le manger, tant ie l'ayme ardemment,
A son seul souvenir. Je n'excepte personne
Qui ayt tant esprouvé la fortune felonnie
D'entre les Princes Grecs, & qui ayt tant esté,
Tenté par le destin, par le mal agité,
Qu'Ulysses le diuin, qui par tant de traueses
Constant a soustenu les fortunes diuerses.
Mais son malheur un iour possible cessera,
Et de luy faire ennuy le sort se lassera
Mais moy ie n'auray rien que tristesse eternelle,
Et mon affliction durera perennelle
Pour luy, d'autant qu'il est absent trop longuement.
Encores ne scait on s'il vit certainement,
Ou s'il est alle voir la region deserte.
A son occasion le bon viellard Laërte
Lamente incessamment, le sceptre mesprisant
Qui va donnant les loix, qui va tout maistrisant.
Sa chere Penelope & pudique & discrete
Femme de grand conseil de mesme le regrette,
Et d'un pere si grand Telemaque sorty
Qu'autrefois il laissa, depuis qu'il fut party

LE III. LIVRE

De sa douce maison. A ces tristes parolles
 Il esment de l'enfant les affections molles,
 L'amour & le desir : il le fit souuenir
 De son pere trescher, & ne se peut tenir
 A ce nom precieux, nom remply d'efficace,
 D'emplir son cœur de deuil & de larmes sa face.
 Ou soudain il porta la main & le mouchoir
 Car on voyoit ses pleurs à grosses gouttes choir.
 Menelaüs le vid, & songeoit en luy mesme
 S'il l'interrogeroit, plein de desir extresme,
 Ou s'il le laisseroit de son pere enquerir.

Ainsi que dans son cœur il est à discourir
 Voicy venir vers eux Heleine l'admirable
 En beauté, qui sortoit de sa chambre, semblable
 A Diane, marchant à la chasse, & encor
 Portant sa trouffe à dos pleine de flesches d'or.
 Son musc embaumoit tout. La bien aprise Adraste
 Suivant ses pas diuins soudainement se haste
 Pour son siege aprestier : les doux tapis portoit
 La gentille Alcippé, puis se diligentoit
 La tresbelle Phylo pour son mestier luy tendre
 Ou ses fuseaux & layne estoient present d'Alcande
 Femme de Polybus, qui Thebes habitoit
 Thebes Egyptiaque, opulent il estoit
 Riche & rempli de biens : A son mary naguieres
 Il fit de beaux presents, luy donna deux aiguieres
 D'argent, & deux trepieds, & puis dix talents dor.
 Sa femme fit à part force beaux dons encor
 A Heleine, luy fit vn present honorable
 D'une quenaille d'or & riche & admirable,
 Et d'un mestier d'argent, dont les bords precieux
 Estoitent tous garnis d'or. La pucelle aux beaux yeux

Phylo luy apportoit, & pres d'elle a posée
Pleine d'excellent fil la Royale fusée:
De la quenaille autour la layne s'estendoit,
Dont la couleur de prix un beau lustre rendoit.

La reyne en vne chaire alors sa place a prise
On mit un escabeau sous ses pieds: puis assise
Se prit à demander & dire à son espoux.
O Roy Menelaüs, ie te pry, scauons nous
Qui sont ces deux seigneurs qui sont venus descendre
Ceans, & leur logis ont bien daigné y prendre;
Diray ie tout cela que i'en ay sur le cœur,
Où puisie prononcer propos vain & menteur?
Le cœur me dit pourtant presage veritable
Que ie n'ay iamas veu personne si semblable
De visage & de corps l'un à l'autre, fust il
Homme ou femme, en regard excellent & gentil,
(En le considerant toute ie m'esmerueille,
Sa gaye venusté, sa beauté nompareille)
Que cestuicy rapporte au fils entierement
D'Vlysses, qu'il laissa lors que premierement
Il partit de chez luy, que les Grecs s'embarquerent,
Et la guerre cruelle à Pergame porterent
Pour moy malencontreuse. A laquelle respond
Sans la faire tarder Menelaüs le blond.

Ma femme, mon aduis est au vostre semblable,
C'est Vlysses tout fait, son visage admirable
Tel estoit, sa main telle, & ses yeux radieux
Et ses pieds & sa teste & ses crespus cheueux
Sur le haut de son front. Ayant de luy memoire,
Je parlois tout asteure & de sa viue gloire
Et de sa grand' vertu: & pour l'amour de moy
Combien il a souffert de tristesse & d'esmoy.

LE III. LIVRE

Ce qu'oyant ce Seigneur, il arrose, il humecte
 Son visage de pleurs qu'en abondance il iette,
 Et que de son mouchoir il cache tant qu'il peut
 Adonc Pisistratus au Roy dire ainsi veut:
 Fils d'Atreus, nourrisson de Iupiter, qui guides
 Les peuples habitans es plaines Achæides
 Soubst ton sceptre puissant, tout ainsi que tu dis
 Cestuicy, d'Ulysses est le tresdigne fils,
 Mais prudent & discret il n'ose te semondre
 Et se vantant par trop te presser de respondre,
 De crainte d'est aller rien de futile, à toy
 Qui es de tous les Roix le plus excellent Roy.
 Car le plaisir qu'on prend à tes propos honnestes
 Est comme le plaisir qu'on prend aux Dieux celestes.
 Or le vieillard Nestor, des cheuaux curieux
 M'a fait son compagnon pour venir en ces lieux.
 Telemachus bruloit d'ardeur inestimable
 D'auoir ta cognoissance, espris de l'admirable
 Douceur de ton renom: plein d'ennuy nompareil
 Ie te prie en son mal de luy donner conseil,
 O Roy Menelaüs, le consoler, & telles
 Que les as d'Ulysses luy dire des nouvelles,
 Il est fort affligé, denué tout à plat
 D'hommes pour conseruer sa maison, son estat,
 Son regne paternel: son deplorable pere
 Tempesté sur les eaux en grand peyne & misere,
 Mesmes pour luy perdu: nul n'est qui de chez luy
 Tasche de denicher vne peste, un ennuy
 Une gent enragee. Adonc le redoutable
 Atride, le couppant: ô que i'ay à ma table
 Le fils d'un grand amy, qui pour l'amour de moy
 A suby maints dangers & porté maint esmoy.

Je m'estois resolu l'aymer d'amour extrefme
Sur tous les autres Grecs, si Iupiter suprefme
Nous donnoit de nous voir ensemble de retour
En nos champs patriaux, iouir de l'heureux iour
De reuoir nos foyers & nos Dieux tutelaires.
Portez dans nos vaisseaux sur les ondes legeres.
Je luy eusse donné place dedans Argos
Je luy eusse basti maison pour son repos,
Et faisant apporter ses richesses d'Ithaque
Sa femme, Laërtes, & son fils Telemaque
Je luy eusse choisi vne cité apart
Dont i'eusse les bourgeois enuoyez autre part
Entre celles qui sont de mon obeissance.
Là conioints & meslez d'eternelle alliance
Pleins de ioye & plaisir, eussions ensemblement
Acheue nostre vie & nos iours doucement.
Si fermement liez & d'amitié si forte
Nulle heure ne nous eust iamais en nulle sorte
De ioints & separez, que le moment dernier,
Ne nous eust desunis que le trepas meurtrier
Iamais nulle fortune & cruelle & fascheuse
N'eust trouble nostre paix eternelle & heureuse.
Je croy que quelque Dieu de nostre ayse enuieux
Nous a tramé cecy, l'esloignant de ces lieux,
Le priuant des douceurs de sa patrie chere
Et le retenant seul plein de peyne & misere.

L'Atride dit ainsi: aux autres les douleurs
Du regret qu'ils portoient ramenerent les pleurs.
La fille à Iupiter Helene l'Argolide
Le pleura tendrement, si fit le blond Atride
Telemachus sur tous le pleuroit, & encor
Le preux Pisistratus fils du vieillard Nestor.

LE III. LIVRE

Car au cœur luy reuint la douce souvenance
 D'Antilochus son frere, en armes, en vaillance
 Excellant & parfait. Memnon mourir le fit,
 Memnon fils de l'Aurore, au combat le deffit;
 Donc il s'adresse à luy de parole semblable.
 Fils d'Atreus, luy dit il, le vieillard honorable
 Nestor parlant de toy t'exaltoit bien souvent
 Et te louant, disoit, que tu marchois deuant
 Tous hommes en prudence & vertu non petite.
 Si que memoratifs de ton digne merite
 Force discours diuers de toy nous commencions
 Et ta grande vertu iusqu'au ciel nous poussions.
 Or permets moy cecy s'il te plaist de me croire,
 Iamais apres soupper, rarement apres boire
 On me voit delecter au regret ny au pleur,
 J'ay, ayant bien repeu les larmes en horreur.
 Mais demain, quand viendra la matiniere Aurore
 Ie n'auray nul regret de repleurer encore
 Quiconque des mortels aura passé le pas
 Soubs le destin cruel, proye du fier trespas,
 Donner à leur honneur & à leur souvenance
 Regrets en quantité, & pleurs en abondance
 Car c'est le seul de noir des pauvres malheureux
 Que de pleurer leurs morts, s'arracher les cheueux
 De jetter vne mer de larmes distillantes,
 Et de leurs yeux verser des riuieres coulantes.
 I'ay perdu vn mien frere, & lequel n'estoit pas
 Le moins fameux des Grecs, braue & fort aux cōbats
 Et que tu cognoissois, ô grand Roy, que ie pense,
 Ie n'ay de l'auoir veu aucune souvenance:
 Mais on tient qu'Antiloque, autresfois fraploit droit,
 Entre tous combattans, qu'il estoit fort adroit

A manier cheuaux, prompt aux soudains alarmes,
De pied viste & leger & vaillant homme aux armes.

Auquel Menelaüs blond merueilleusement:
Certes mon grand amy tu parles prudemment
Autant que pourroit faire vn, dont l'experience
Auroit rendu les ans accompliz en prudence,
Mesmes plus vieil que toy: comme si tu estois
Le fils d'un pere, auquel Iupiter autresfois
Auroit donné honneur & prudence & richesse
Des sa tendre naissance. & depuis sa iuuesse
Iusqu'à son mariage: ainsi qu'il a faict or
A ton pere prudent le bon vieillard Nestor,
Qui vit heureusement, à qui longues annees
Pleines de tout bonheur ont esté ordonnees
Sans trauerse ne mal, que l'heur par tant de temps
N'a point abandonné, qui passe ses vieux ans
En sa douce maison, voyant pleins de prudence
Ses enfants en bon nombre & douez de vaillance.

Mais faisons bonne chere & beuons. C'est assez
Lamenté nos trauaux & nos malheurs passez,
Qu'on nous donne à manger, & qu'on apporte encore
A lauer. Et demain au leuer de l'Aurore
Des qu'elle aura monstre son rayonnant charroy
Nous parlerons assez Telemachus & moy
Et nous demanderons à l'enuy des nouuelles.
Il acheuoit de dire, & dessus les mains belles
Asphalion versa l'eau fresche: or estoit il
Page du Roy, discret, seruiable & gentil,
Et sur tous bien appris. Les Princes alors prennent
Leur repas à souhait, & ioyeux s'entretiennent
De bons viures exquis. La fille à Iupiter
Heleine s'aduisa lors de leur apprester

LE IIII. LIVRE

Un breuvage excellent. Doncques elle distille
 La riche infusion, la potion gentille
 Qui peut faire oublier & l'ire & le courroux,
 Et le mal qui pourroit estre tombé sur nous:
 Si quelqu'un en a beu de toute la iournee
 Ne sera nulle larme en ses yeux promenee,
 Non quand le fier trespas son perer auiroit,
 Non quand la dure mort sa mere entraineroit,
 Non pas quand il verroit la terre au sang trempée
 De son fils, de son frere estendus par l'espee
 De son fier ennemy. La Tyndaride ainsi
 Avec elle portoit ce charme oste-soucy.
 La Reyne Polydamne experte en medecine,
 Espouse du Roy Tbon, qui vers le Nil domine
 Luy en fit vn present. Le champ Egyptien
 Fertile, portoit lors au Roy Pelusien
 Force simples diuers, dont les vns en partie
 Seruent de bon remede à mainte maladie,
 Les autres plus mauuais ont le suc venimeux:
 De ce pays fertile le peuple est fort fameux
 De sçauoir les vertus des simples & racines,
 Et de les preparer en bonnes medecines
 Aussi bien que Pæon, duquel ils sont venus,
 Et fort bons medecins d'un chacun sont tenus.
 Comme la Reyne ent donc secrettement fait signe,
 Qu'on meslast dans le vin la mixtion insigne,
 Et qu'on versast à boire, elle parla ainsi.
 Atride, entre les Roix excellent, vous aussi
 Fils de Princes gentils & branches generenses,
 Dieu mesle bien souuent les fortunes heureuses
 Avecques le malheur, l'amer avec le doux,
 Car son pouuoir puissant s'estend dessus nous tous,

De tous

De tous & maistre & Roy. Or faictes bonne chere
Et vous resjouissez. Choses qui peuuent plaire
Je vous veux raconter : ie ne vous diray pas
Tous les faits hazardueux, les exploits, les combats
D'Ulysses, sur lequel mal & douleur redonde,
Et patient autant que nul homme du monde.
Car ie ne pourrois pas de tout me souuenir.
Vn acte maintenant seul me vient de venir
En memoire duquel ie vous diray l'histoire:
Et qui aduint à Troye, où l'heur de la victoire
Fut si long temps douteux : où tant auez pati
Pauvres princes de Grece, où tant auez senti
De trauerse & de mal. Là, pour faire vn service
Signalé aux Gregeois, l'inimitable Ulysse
Se blessa, s'escorcha la face estrangement.
Se couvrit de haillons rompus entierement:
Entra dedans la ville, & se rendit semblable
D'habits, d'acoustrements du tout comparable
A vn pauvre vallet, nul quaymand, nul facquin.
Par la flotte estoit si gueux ne si coquin,
En ce bel equippage il entra dans la ville
Et nul ne le cognut tant il estoit habille,
Moy seule l'apperceus, comme ie l'appellois
Il ne respondoit point, & fuyoit de ma voix,
Plein d'astuce, ala fin ce bon prince d'esclau
Se fia sur ma foy, ie le reçoys, le laue,
Je l'oins, ie mets sur luy vn bon acoustrement,
Et luy iure & promets sur mon plus grand serment
De ne le decourir, ne dire son entree
Aux Troyens, que plustost ie ne fusse asseuree
Qu'il eust atteint le camp en toute seureté,
Qu'il ne fust dans les naus venu à sauueté?

LE III. LIVRE

Lors il me decouvrit le secret de la Grece
 L'entreprise des Roys, & toute sa finesse.
 Quand il eust fait son cas, il mit Troyens à mort,
 A ses gens retourna victorieux & fort,
 Remportant en sa tente & honneur & louange
 D'homme plein de valeur & de finesse estrange.
 Mais au dedans des murs les Troyennes pleuroient,
 Et tristes sur leurs mortz leurs cheueux dechiroient.
 Seule i'en du plaisir, en ma reioissance
 Tenant ce temp pendant tres-bonne contenance.
 Car i'estois reuenue à moy, & me bruloit
 L'amour de ma patrie, & mon espoir alloit
 Toujours en augmentant, de recouurer la ioye
 D'un bien heureux retour, & de laisser là Troye.
 Je souffirois souuent du profond de mon cœur,
 Et pleurant regrettois mon desastre mal-heur:
 Je me rememorois ma renommee ostee,
 Et la honte où Venus m'auoit precipitee
 Quand hors de mon país elle fit m'enleuer
 D'entre mes chers parents, & me voulut priuer
 De reputation, en defraudant ma fille,
 Delaisant mon mary, mon lit & ma famille,
 N'ayant faute de biens, de beauté, ny d'esprit.

Lors le blond filz d'Atreus à dire ainsi se prit.
 Tu as bien dit de vray femme agreable & belle,
 I'en ay cogneu beaucoup dont estoit la ceruelle
 Bien faicte, qui n'auoient faute d'entendement
 I'ay veu force país, & curieusement
 Frequenté force gens, mais ie n'ay veu personne
 D'esprit si delié, de ceruelle si bonne
 Comme estoit Vlysses. Le bel acte qu'il fit
 Estant dans le cheual qui Troye en fin deffit,

Qui basti de fortz aiz de foux, de chesne & d'orme
Haussoit deuant ses murs son apparence enorme.
Nous fismes là dedans tous Princes enfermez
Des plus braves du camp, en embuscade, armez
Portans par artifice à Troye miserable
Calamité, ruyne, & mort irreparable.
Quand tu vins pres de nous soit incitée, ou non
Des Dieux ou du destin, ie ne scay quel demon
T'auoit conduite là, mais au grand auantage
Des Troyens cependant, & non pour leur dommage.
Le fameux Deiphobe avec toy lors alloit
Qui les Dieux en vertu & prudence egalloit,
T'accompagnant pour voir la machine effroyable,
Par trois fois a l'entour de la beste admirable
Tu tournas regardant, touchas le frauduleux
Qui traistre nous cachoit ez antres cauerneux,
Appellant par leur nom tous les Gregeois gendarmes
Qui deuant Troye auoient bien faiet aller les armes,
Des matrosnes d'Argos contrefaisant la voix,
Comme celles de ceux qui estoient dans le bois,
Dont ilz pouuoient auoir cognoissance & notice,
Diomedes & moy & le diuin Vlysse
Armez estions dedans, ouysmes clairement
Comme tu appellois, desirions ardemment
Plustost sauter dehors de ces prisons obscures,
Que du fondz recullé des entrailles tres-dures
T'ouir encor vn coup. Arrestez à cela
Vlysses nous retint sagement & voila
Que tous les Grecz fort bien garderent le silence,
Mais du seul Anticlus telle fut l'imprudence
Qu'il vouloit sermonner. Vlysses l'arresta
Sur les leures sa main vistement luy porta

LE IIII. LIVRE

Et luy ferma la bouche. Ainsi sa grand sagesse
Garantit du danger la force de la Grece.
Quand pour un peu de temps sa voix il destourna,
Tant que hors du cheual Pallas te remmena.

Quand il eut acheué, le prudent Vlysside
Se prit à dire ainsi : ô genereux Atride.
Cet acte est bien prudent. Mais mon pere tresfort
Ne s'est pour tout cela racheté de la mort.
Non pas quand tout de fer eust esté son courage.
Mais c'est assez parlé fils d'Atreus grand & sage
Permetts que nous allions reposer maintenant.

A ses filles alors la Roïne incontinent
Commande d'apprester la chambre, & qu'on les mette
Reposer doucement sur la plume mollete,
Dresser les lits dorez, & ses riches tapis
Et que sous le portal ils soient soudain conduits.

Les filles pource faire accourent diligentes,
Portent dedans leurs mains les chandelles ardantes,
Dressent les lits bien blancs : le herant les conduit.
Les princes vont passer le reste de la nuit,
Soubs le Royal portal, leurs corps lassez estendent
Soubs les doux mattelas & au sommeil se rendent :

Menelaüs apres se retire à l'escart
Pour s'aller reposer, en la plus haute part
Du superbe palais pres de luy l'heroïne,
Des femmes la splendeur Heleine la diuine
Dormoit à ses costez. Or ainsi que sortoit
L'Aurore aux doigts de rose, & le iour apportoit
Le Roy Menelaüs saute du lit, se leue
Prend son accoustrement, & son affilé glaive,
Pend à ses forts costez accommode à ses piés
Le beau ruban noué de ses riches souliés,

Sort viste de sa chābre, aux grāds Dieux tout sēblable,
Et de corps bien formé & d'esprit admirable:

Rencontra Telemaque, & luy dit en ces mots.

Dy moy ie te suply braue & gentil heros
Vaillant fils d'Vlysses, dy moi quelle fortune
Te faict ainsi courir les sillons de Neptune?
Est ce charge publique, ou chose concernant
Ton estat paternel qui te va promenant?

Il se tent. A cela respond le fils d'Vlysse.

Fils d'Atreus, ô grand Duc de la greque milice,
Illustre nourrisson du puissant Iupiter,
Je suis venu ici d'Vlysses m'enquester.

Si tu en as appris quelque cas veritable

Dyle moi ie te pri. Nostre estat miserable

Nostre maison, nos biens perissent pauurement.

Tout nostre reuenu se mange entierement,

Nostresors sont rafflez, ce que nos champs fertiles

Le labour de nos beufs nous rapportent utiles

Tout est là consumé. Nostre pauvre maison

Est pleine d'ennemis, egorgeans sans raison

Beufs, toreaux & brebis, en fin tout se consomme,

Et sans aucun repect, nostre bestail s'assomme.

Vntas de poursuiuans, d'amans luxurieux

Dans ma propre maison logent iniurieux,

M'assaillent trop hautains, me forcēt & m'oppressent,

Et de se marier, ma mere, à l'un deux, pressent,

Voila l'occasion qui m'ameine vers toy,

Regarde la misere, ô pitoyable Roy,

D'un humble supliant & qui la main te touche.

Narre moi ie te pri de veritable bouche,

Les erreurs, la fortune, & le triste deces

Du pauvre vagabond & fuitif d'Vlysses,

LE IIII. LIVRE

Issu certainement de mere miserable.
 Voy me donc suppliant & me sois secourable,
 Ne crains point ie te prie & ne sois arresté
 Pour ma condition de dire verité,
 Si tu l'as veu sur mer. Iet'en pry, par la gloire
 De son braue renom, par, s'il eut onc victoire
 Par son bras martial, par, s'il a onc esté
 Faisant, disant pour toy, s'il a bien merité
 De toy, sous les rempars de Troye, ores destruite,
 Parmi les forts Troyens qu'il renuersoit en fuite,
 Ou vous Princes Gregeois aueZ tant enduré
 Dessous le cruel Mars. Que i'en sois assuré
 Par ta bouche, ô Grand Roy, & tant me fauorise
 Que de ce qui en est rien tu ne me deguise.
 A ces tristes propos Menelaüs le blond
 Sousspire grandement & ainsi luy respond.
 Las, qu'une nation molle & effeminee
 De poltrons amoureux cherche bien, effrenee,
 Le liët d'un fort guerrier & Prince genereux.
 La biche tout ainsi loge ses fans peureux
 Dans l'antre du Lyon & fier & redoutable,
 Laisse di-ie ses fans la pauvre miserable
 Baillans de malle faim, quelle auoit faict bessons
 Et s'en va par les bois, les costaux, les buissons,
 Cherchant à pasturer la pauvrete craitifue
 Pour bien remplir son pis: Lors le Lyon arrine
 Des champs à l'improuiste, entre legerement
 Dans l'horrible cano son vieil hebergement
 Il doute sur lequel sa patte violente
 Il jettera premier, lequel rendra sanglante
 Sa bouche de ces deux: Il fremit, il rugit,
 Ensin tout à la fois il estrangle, il raut

Et leur donne la mort de son gosier horrible,
Il est anche en leur sang sa cruauté terrible,
Il lasse sa machoire, & lèche fierement
Son muffle, d'un sang noir souillé cruellement:
Il regarde, & se deult de n'auoir dauantage
De faim, & de sujet de demener sa rage.
Le courageux Ulysse ainsi les deffera
Tous ces beaux amoureux, & leur sang versera.
O que pleust à Pallas à Phœbus, & encores
Au pere haultonant, qu'Ulysse fust tel ores
Qu'il estoit à Lesbos à l'heure qu'il tua
Contre Philomelede, & à bas le ietta.
Dont les Pelasgiens grand ioye demenerent
Ayses de sa vertu, & tout hault le louerent.
Il seroit maintenant plein d'honneur & de biens
Au beau milieu d'Ithaque, entre ces musiciens
Ces danseurs, d'amoureux ses mains rudes seueres
Certes leur donneroient des nopces bien ameres,
Leur feroit allumer de fort tristes flambeaux
Pour luyre dans le creux de leurs fatals tombeaux.
Quant à ce que tu veu x ie n'vseray de feintes
Et ne te tayrray point les responce contraintes
Que Protheus, Dieu marin, m'a faictes cy deuant.
Au pais que le Nil de ses eaux va lauuant
Les Dieux, m'en reuenant fort long-temps me lierent
Et au fertile terroir d'Ægypte m'arrestèrent
Force di-ie me fut encor d'y demeurer,
Comme ie me hastois de l'Isle demarer,
Pour n'auoir pas payé la solemnelle offrande
De cent bœufs immolez, que ma haste trop grande
M'auoit faict oublier, & que ie leur debuois
Immoler en sortant du terroir Dardanois:

LE III. LIVRE

Tant les Dieux ont à cœur que lon se rememore
 Ce qu'ils ont commandé, tant ils veulent encore
 Que l'on ne le mesprise. Une Isle est en la mer
 Contre Égypte, Pharos on la voulu nommer,
 De la terre distante autant qu'un bon nauire
 Quand le vent à propos dans son voile respire
 Peut faire de chemin en un jour. Or le port
 Y est large & fort bon, d'où les vaisseaux en sortent
 De l'onde noire embuë. Là les Dieux m'arrestèrent
 Par vingt jours tous entiers, nuls vents ne se leuerent,
 Demeurerent tous coïx, & retindrent leurs cours,
 Et les souffles, lesquels accompagnent tousiours
 Les barques sur la mer, perdirent leur usage.
 Nos viures deffailloient, & nous perdions courage,
 Sans l'opportun secours que voulut m'apporter
 Eidothea, la fille au vieux Dieux de la mer.
 Elle eut pitié de nous, & mon pleur lamentable
 Esmeut son humeur douce & son cœur pitoyable:
 Car en me promenant pensif & reffrogné
 Sur le rinage sec, de mes gens estogné,
 Elle s'offrit à moy d'un visage tranquille.
 Car mes gens plus lointains où se voit courber l'Isle
 S'estoient tous ecartez, & leur vie cerchants
 Mouuoient toute la mer & s'en alloient peschants,
 De la fin attaquez, qui leur faiët dure guerre
 Mauuaise conseillere, & le ventre leur serre,
 Et genne les boyaux. Lors elle s'approcha,
 Et m'ostant mon ennuy ces propos me toucha.

A quoy pauvre d'esprit est ce ainsi que tu pense?
 Astu perdu le cœur? T'est-ce resiouissance
 De souffrir tant d'ennuy, astu donc arresté
 D'user icy le temps en toute oisifueté?

Prends-tu donc grand plaisir à ton mal, à ta peine?
Est-ce de ton bon gré qu'ainsi tu te promeine
Paresseux en ceste Isle, & ne recherches point
De mettre à ta misere à la fin quelque point?
Cependant de tes gens les courages languissent
Defaillent de travail, & de sang desfinissent.

Et ie luy respondy. Nymphes qui que tu sois
Des Deesses des eaux, écoute un peu ma voix,
Et ie ne te tiendray longuement incertaine,
Ie te diray mon mal, & conteray ma peine,
C'est bien contre mon gré que tu me vois icy,
Ie ne m'en puis aller: Par aventure aussi
Que ce sont les hauts Dieux qui sur l'Olympe habitent,
Qui me font de la peine, & contre moy s'irritent.
Dy moy donc ie te pry, les Dieux peuvent auoir
Cognoissance de tout, & grand est leur pouuoir.
Quel Dieu me colle icy, m'encordelle, m'engarde
De partir, me retient, & mon retour retarde?
Ie te donray, dit-elle, un fidelle conseil,
Si tu veux m'escouter. Vn Dieu marin fort vieil
Hante ces enuiron, un prognostiqueur sage,
Et souuent se promeine au long de ce riuage.
C'est Prothé l'immortel, Egyptien, & Dieu
Il cognoist de la mer le profond, le milieu:
On tient qu'il est mon pere, il est dessous Neptune.
Si vous pouuiez auoir l'heure si opportune
Que de le pouuoir prendre, il vous enseigneroit
Le temps pour desloger, il vous declareroit
Le chemin que tiendriez sur les eaux azurées,
Et quand vous reuerriez vos maisons desirées.
Que si en ta famille il estoit suruenu
Quelque mal, quelque bien qui te fust incogneu

LE IIII. LIVRE

Cependant que tu cours esloigné de la terre
Avec mille dangers sur le mobile verre,
Il te dira le tout sans en rien t'en flatter.

Nymphe de grand honneur, vins-ie lors adiouster,
Que cecy, s'il te plaist, encor de toy ie sçache
Comme il fault m'embuscher, où le vieillard se cache,
En quel antre il se met quand il sort de la mer,
Car s'il nous découvroit il pourroit s'éuader:
C'est beaucoup d'entreprendre à un homme imbecille,
De vouloir vaincre un Dieu, c'est chose difficile.

Lors la Nymphe des Dieux. Amy, ie te diray,
Et ta requeste vaine estre ne laisseray.

Quand le Soleil aura aduancé sa charrete
Sur le milieu du iour: lors le sage Prophete
Le Dieu vieillard marin hors de l'eau se coulant
Sort au frais du Zephir, d'eau noire distillant,
Et de vagues couuert. Sorty qu'il est de l'onde
Il se prend à dormir dans sa grotte profonde:
De force veaux marins il est environné,
Et que luy a donné la belle Halocydné,
Veaux qui n'ont point de pieds, qui à luy se conformēt,
Et sortis de la mer sur le sable s'endorment,
Remplis d'infection, puamment odorans,
Et la forte senteur de la mer respirans.

Or ie t'y conduiray moi-mesme, & quand l'Aurore
Aux cheueux de safran qui nostre Orison dore
Sortira hors des eaux, sans faute ie seray
Sur le bord de la mer, & illec t'attendray.
Choisi trois de tes gens, & de force indomptee,
Et de fidelité bien experimentee:
Mais ie te veux encor raconter du vieillard
Alors qu'il se transforme & la finesse & l'art.

Dès qu'il est hors de l'eau par cinq son peuple il nôbre,
Et se couche au milieu, comme le pastre en l'ombre
Aupres de ses brebis, comme vous le verrez
Accablé de sommeil, vous vous esclancerez
Sur luy: lors bon courage, & force & hardiesse.
Ne luy permets point, bien que plein de vieillesse,
Lors de se recognoistre, ains liez, garrottez,
Et cables bien serrans sur ses membres iettez,
Combien qu'il se courrouce & se mette en cent sortes
Pour en quelque façon fortir de vos mains fortes:
Maintes illusions il vous presentera,
En tout ce qui se rampe aux champs se changera,
Tantost feu, tantost eau, de flamme violente
Un son il donnera, de riviére coulante
Il prendra la façon, ainsi s'escoulera.
Mais tant plus vous verrez qu'il se transformera,
Pressez plus, seerez plus: mais le voyant reprendre
La forme qu'il avoit quand tu l'allas surprendre,
Et te parler, déli-le, & ne le presse plus:
Demandes lui quel Dieu t'empesche, & faict refus
De te laisser aller, qui ce malheur t'enuoye,
S'oppose à tes desseins, & te trouble en la voye:
Et puis il te dira comme tu monteras
En mer, & seurement chez toy retourneras.
Ce disant, sous le flot viste elle se retire,
Et ie m'en vois au port trouver nostre navire
Qui m'attendoit à l'ancre, & en m'en retournant
J'allois en mon esprit grands choses ruminant.
Comme ie fus au port aussi tost ie commande
Qu'on nous face soupper, & qu'on porte la viande
Sur le mesme giron de Ceres, & la nuit
Arrive cependant que le sommeil conduit.

LE IIII. LIVRE

Nous nous couchons à terre, & sur le frais herbage
Nos liets accommodons, tout le long du rivage
Nous sommes estendus, & le somme nous prend.
Mais si tost que le iour la belle aube nous rend,
Je m'en retourne encor, plein de tristesse amere
Sur le bord de la mer. Là ie fais ma priere
De tout mon cœur aux Dieux : au reste ie menoïs
Trois de mes compagnons dont i' auois fait le chois,
De la force desquels contre quelque puissance
Que ce fust, ie prenois entiere confiance.

Alors Eidothea qui auoit sous les eaux
Quatre veaux escorchez, & apporté les peaux:
Pour mieux tromper son pere, ordonne à tous nos places
Et iette dessus nous ces vilaines peaux grasses.
Chacun ressembloit là son vilain animal,
Et à ceste embuscade eusmes tout plain de mal.
De ces monstres vilains & l'odeur & l'ordure
Nous incommodoit fort, la sale couuerture
De ces puantes peaux nous alloit infecter.
Mais qui pourroit long temps tel poison supporter?
La Nymphe toutesfois nous y donna remede
Par un contre-poison qui vint bien à nostre aide:
Piteuse nous faisant odorier vistement
Un suc ambrosien suauie extremement,
Par qui l'odeur mauuaise entierement chassée,
Nostre incommodité se vid un peu passée.

Depuis le point du iour iusqu'au Soleil plus hault
Vers le Midy, au temps qu'on sent le plus grand chaud,
Nous demeurâmes là, endurans sur le sable
D'un courage constant ce mal intolerable.

Lors voicy le bestail de la mer par troupeaux,
Vilains monstres marins monter du creux des eaux,

Se coucher au riuage, & le vieillard prophete
Sortir comme un plongeon de sa moitte retraitte:
Ses ionnes & sa barbe en ruisseaux distilloient,
Et ses cheueux mouilleZ sur son dos deualloient.
Il conte son troupeau, & nous de prime face,
Il nous pensoit chacun vne baléne grasse
Ne se mesfiant point. A grand peine estoit-il
Encor bien endormy sur le sable subtil,
Nous nous ruons sur luy, & de voix menassantes
Ietton sur luy nos mains & nos cordes puissantes,
Et l'enferrons fort bien. Mais luy memoratif
De son art cauteleux, se transforme inuentif
En toutes les façons, chose miraculeuse,
Il se faiet un lion à la peau rousse affreuse,
Un escaillé dragon, puis un pard moucheté,
Vn horrible sanglier, puis un tigre irrité,
Un arbre en l'air iettant son hault plaisant feüillage,
Puis un fleuve courant. Nous serrons dauantage
Le pressons de plus fort, mais combien que rusé,
Voyant qu'il perd son temps, & ne treuve, abusé,
De chemin pour fuir. Il reprend en fin, comme
Vaincu sa forme mesme, & nous parle en voix d'höme.
Qui t'a si bien appris Atride fils des Dieux,
Le moyen de me prendre, & qu'est-ce que tu veux?
Tu le sçais bien Prothé, luy di-ie, il t'est facile:
Tu sçais qui me retient arresté dans ceste Isle,
Et comme ie ne puis trouuer, matté de maux,
D'issue, ny de borne à mes tristes trauaux:
Ie seche là dedans de douleur miserable,
Et ie viens recercher à mon mal secourable
Ton oracle certain, respons moy donc cecy,
Car les Dieux sçauent tout. Quel Dieu me tient icy

LE IIII. LIVRE

*Courroucé contre moy? me garrotte, m'engarde
De me mettre sur mer, & mon retour retarde?*

*Je luy disois ainsi. Lors il reprit sa voix
Me respondant encor: Pour le vrai tu devois
Payer à Iupiter tes offrandes exquises,
Et rendre aux autres Dieux vœus & choses promises:
Après ietter en mer les vaisseaux hardiment,
Pour cheſ toy par la mer retourner aisement:
Car tu ne verras point les citez delaissees,
Ny ton pays natal, ny les maisons haussees,
Ny tes dieux domestics, ains que de remonter
Le contremont du Nil qui vient de Iupiter
Renoir les eaux d'Egypte, & faire un sacrifice
A la troupe des Dieux pour la rendre propice
De cent bœufs immolez. Lors il s'accorderont
Ton retour, & benins chez toy te conduiront.*

*Il dit, & ie senty mon ame terrassée
Me languir là dedans de douleur oppressee,
De ce qu'il nous falloit remonter dans le Nil,
Retourner voir l'Egypte & son pays fertile.*

*Lors me tournât vers luy: Vieillard que tât i'honoré
Ie t'obeiray donc, mais respon moy encore
Et me dy pour le vray: les Gregeois sont-ils tous
Arrivez sans malheur dedans leur pays doux
Avecques leurs vaisseaux, de ceux que nous laissasmes
Nestor & moy, alors que nos voiles haussasmes
En partant d'Ilion? Et quelqu'un entre tant
D'inopineſ trespas est-il mort en flottant,
Ou bien entre les mains de ses amis, sur terre,
Après avoir du tout parachevé la guerre?*

*Ne sois point curieux, ce n'est pas ton meilleur
De rechercher, dit-il, au secret de mon cœur:*

Certes tu ne sçais pas que c'est que tu demandes:
Tes consolations n'en seront gueres grandes
Quand tu m'auras ouy. Beaucoup de Princes forts
Des guerriers Argiens sont peris & sont morts,
Beaucoup restent encor. Deux seulement perirent
Soubs les eaux, & les flots cruels les engloutirent:
Pour Troye, tu sçais tout, y ayant ta vertu
Auec les autres chefs dignement combatu.
Un est encor sur mer retenu de Neree,
Ajax fut englouty des eaux pres de Gyree,
Où Neptune, en pitié, comme il alloit donner
Au trauers des rochers qui faisoient resonner
Les grands flots courroucéz, l'auoit mis secourable
Al'abry, & l'auoit exempté pitoyable
De naufrage & de mort, combien qu'il sceust, hélas,
Qu'il auoit offencé la guerriere Pallas:
Quand inconsideré il se prit aux Dieux mesmes
En colere, iettant des blasphemés extremes,
Et en l'air abbayant des motz trop odieux:
Disant qu'il voguerait, voire en dépit des Dieux,
Et qu'il eschapperait sain & sauf par les ondes.
Neptune l'entendit de ses grottes profondes
Parlant si fierement, demanda promptement
Des traitz pour la vengeance, empoigna brusquement
Son trident furieux, le poussa en son ire
Contre vn cruel escueil, attachas son nauire
Sur le roc Gyrean, en deux partz le fendit,
L'une demeura là, & l'autre descendit
Au creux milieu des eaux: où le fils d'Oïlee
Estoit, qu'elle emporta dessoubs l'onde salee.
Ainsi luy qui recent dans la mer son tombeau
Fut vaincu par le feu, par la terre, & par l'eau.

LE IIII. LIVRE

Mais ton frere eschappa les Nymphes Nereïdes,
Et seurement fuit les campagnes liquides,
Iuno le preserva. Or comme il se promet
De toucher tost Malæe & son haut ain sommet,
Une bourasque vient qui le iette moleste
Au bord auparavant habité de Thieste,
Et où pour lors son fils Egysthus demouroit:
Mais comme son retour desia se preparoit
Sans infortune aucun, les Dieux le vent tournerent,
Et dedans sa maison contraires l'admenerent.

Il met donc pied à terre, & comblé de plaisir
Se prit à la baiser, iouissant du desir
De renoir son pays, & en grande abondance
Ruisselant de ses yeux larmes d'esjouissance,
De ioye qu'il auoit de se voir de retour.

Or un guette estoit lors sur le hault d'une tour
Lequel le descourrit: Depar le Thiestide
Il estoit posé là, sur la campagne humide.
Il lui auoit promis deux talents de fin or:
Il auoit faict le guet tout vn an, & encor
Y estoit-il alors, faisoit garde soigneuse,
Que le Roi n'arriuaist en main victoriense,
Ne vint couuertement en armes se venger.
Comme donc il le vid il s'en courut leger
En aduertir Egyste, Egyste qui coniure
De long temps de le mettre à mort cruelle & dure,
Choisit vingt de ses gens, pleins de force & vigneur,
Et d'entre tout le peuple accomplis en vigneur,
Et les cache au chasteau. D'autre part il appreste
Le beau festin Roial en solemnelle feste,
Puis il s'en va lui-mesme en personne inuiter
Sur coches & chenaux où il le fit monter,

Le grand Agamemnon. En son ame méchante
Trouvant ce-tempendant trahison indecente.
Il le meine à la mort de rien ne se doutant,
Cruel il le massacre en sang tout degouttant,
L'appellant au festin pour faire bonne chere,
Sans armes, sans defence, il luy passe, ô misere,
Le glaive dans le corps: comme qui meinerait
Un bœuf devant l'estau, & là l'esgorgeroit,
Et nul ne fut exempt de ce fier homicide
De tous les compagnons du miserable Atride,
Ny de ceux d'Agystus: car transpercez de coups
Dans le palais Royal ils se tuerent tous.

Mon cœur lors se rompit à ces tristes nouvelles,
Et d'horreur & de dueil, larmes continuelles
Sortirent de mes yeux: en terre me iettay,
Et de mes pleurs coulans mon visage humectay.
J'euy regret de plus voir la lumiere amiable,
Et de plus prolonger ma vie miserable
Après si grande playe. Ayant prou lamenté
Tousiours couche par terre, & assez tourmenté
Ma bouche de hurler mes plaintes infinies,
Il me vint consoler en paroles amies.

Cesse tes pleurs en fin, & principalement
Puis qu'il n'y a remede aucun en ton tourment.
Plustost pense au moyen, ô genereux Atride,
De mettre ton vaisseau sur la plaine liquide,
Et d'arriver chez toy, vif encor il sera,
Où le vengeur Oreste en armes suruiendra,
Lequel le preuenant luy donnera mort amere.
Ainsi le faineant & méchant adultere
Enyuré d'amour folle aura son payement,
Et tu viendras à temps pour son enterrement.

LE IIII. LIVRE

Après qu'il eut parlé mon ame recommence
A reprendre courage, & de resjouissance
Mon cœur refleurit tout, bien que la marrisson
Letint tout abbatu. Puis en ceste façon
Ieretourne, & luy dis : Ayant en cognoissance
De ceux que tu m'as dit, vieillard plein de science
Dy moy qui est cet tiers, que la mer, que le vent
Retiennent loing d'icy, Est-il encor viuant,
Où s'il est mort, de toy ie le voudrois apprendre.

Lors'il vint son discours en ces termes reprendre.
Le fils de Laërte qui tant va desirant
Ithaque son pays, las, ie l'ay veu pleurant
Baignant son sein de pleurs, or' au lon d'un riuage,
Or' en vn antre creux : de son Isle sauuage
La Nymphe Calypso l'empesche de partir :
L'y retient malgré lui, & n'en peut pas sortir,
N'ayant rames ny gens, ny nauires voilees
Qui le puissent mener sur les ondes salees.

Or ie reniens à toi & aux fatales loix
De ta derniere fin, ô le plus grand des Rois
Braue Menelaüs. Les destins ne permettent,
Race de Iupiter, que tes amis te mettent
Auecques tes ayeux en ton dernier repos :
Et tu ne mourras point en la cité d'Argos
Où le terroir fertile se couure tout de gerbes,
Où naist la fleur encor' des cheuaux plus superbes.
Les Dieux t'introduiront aux champs Elysiens,
Chāps tonsours verdoians, chāps remplis de tous biens :
Là la fin de la terre est des eaux terminee,
Ceste region là heureuse est gouvernee
Par Rhadamant le roux, là volontairement
La terre porte tout, là vid-on aisement,

Là la glace n'est point, là les neiges frilleuses,
Et là on ne void point les pluies ennuyeuses,
Ny les tristes brouillats, ni les fascheux hyuers.
Les Zephirs doucereux y respirent ouuerts
Du costé d'Occident, leurs haleines mollettes
Recreables aux corps, & fraisches & doucettes:
Tout cela t'aduiendra, & tout pour te vanter
Estre mari d'Helene & gendre à Iupiter.

Protheus me dit cela. Puis d'un grand sault se iette
Dans la mer, & l'escume environna sa teste:

Alors ie m'en retourne à ma barque, à mes gens,
Et beaucoup de soucis mon cœur alloient rongeans.
Nous souppasmes sur l'herbe à l'entour de la rive
Tout contre nos vaisseaux, & puis la nuit arrine
Au suc ambrosien, au gracieux sommeil
Qui nos corps assoupit, & nous enchante l'œil.

Mais si tost que l'Aurore eut chassé les estoilles
Nous dressons nostre mast, nous estendons nos voiles;
Nos gens montent en nef, s'asscent sur les bancs,
A force d'avirons rendent les flots tous blancs,
Ils baloient Thetis, frappent les mers profondes,
Et nos voiles nous font voler dessus les ondes.
En Egypte arrivée ie monte nos vaisseaux,
Les loge dans le fleuve aux engraisantes eaux,
Qui vient de Iupiter: A luy sur le rivage
L'offre de cent Toreaux le sacrosainct hommage,
Et paye en son honneur le deu de mes saints vœux:
Puis appaisé que fut le courroux des grands Dieux
Qui avoient retardé le retour de ma flotte,
Je fay de force terre vne eminente motte,
Afin de décorer du grand Agamemnon
Mon frere, la memoire, afin que son renom

LE IIII. LIVRE

*Fust par ce monument d'éternelle durée,
Et sa gloire par moy dignement honorée
Le tout parachevé, nous des-encrons ioyeux
Du Pharien riuage, & les tres-bénins Dieux
Donnerent à nos naufs un vent si favorable,
Qu'heureusement ie vins au séjour agreable
De ma chere patrie, & sans aucun destour
Arrinay seurement en mon heureux séjour.*

*Or toy Telemachus, ie te suppli seiourne
Mon cher hoste ceans, tant que l'Aurore adiourne
Deux fois, six fois la terre, ou que son chariot
Elle sorte vnze fois hors du Nerien flot.*

*Alors tu t'en iras, & pour presens honnestes
Tu recevras de moy trois des plus belles bestes
Qu'on scauroit regarder. Cheuaux au pied ferrés,
Avec vn chariot parfaictement doré.*

*Tu recevras encor maints vases honorables
Pour faire effusions aux grands Dieux venerables,
Et pour auoir aussi souuenance de moy,
Tant que le ciel luira, & que le clair charroy
De Titan tournera sur le hault edifice.*

*Auquel ainsi respond le prudent fils d'Ulysse:
Ne me retien point tant, ô le meilleur des Rois,
Certe vn an tout entier avec toy ie serois
Sans iamais regretter ny ma patrie chere,
Non pas l'esloignement de ma tresdouce mere,
Tant ie prens grand plaisir d'escouter tes propos.
I'y emploirois le iour, & perdrois le repos
De la nuit, mais mes gens seroient pour moy en peine,
Et moi pour eux aussi. Ils sont dessus l'arene
De Pyles de Nestor, attendent mon retour,
Et languissent faschéz de mon trop long seiour.*

Pour les dons que tu veux qu'en Ithaque i' emporte,
Ie te veux supplier qu'ils soient de telle sorte
Qu'on les puisse cacher, & porter aisement,
Mais pour tes beaux cheuaux, ie n'en veux nullement,
Et ie te les lairray pour tes delices grandes,
Ils te conuiennent mieux, pource que tu commandes
Sur un spacieux regne, où croist abondamment
Le delicat fourrage, où eternellement
Fructifient tous grains, où se peuuent tousiours prēdre
La vesse, & où l'on void le beau froment estendre
Ses blonds dorez espics, l'orge tant foisonner
Que presque on le peut en tout temps moissonner.

Mais nous ne scauons pas en Ithaque la mode
De manier cheuaux, elle est fort incommode
Pour les entretenir: prez n'y sont verdissans,
Les Cheures seulement sur ces rocs vont paissans,
Non desirable à ceux qui des cheuaux ont cure.
Nulle Isle n'est en mer propre à la nourriture
Des cheuaux, ne qui ait les prez assez herbus,
Ny champs competamment en espace estendus,
Ie dy tant que la mer aux dangereuses routes
Enceint & circuit. Or encor plus que toutes
Ithaque est miserable en prez, en bois, en vaux,
Et n'estend point ses champs assez pour les cheuaux.

Menelaüs l'oyant soubfrit de bonne grace
Lui touche dans la main & doucement l'embrasse:
Tu es mon cher enfant d'un sang braue & gentil
Parlant si librement: Or ie te veux, dit-il,
Changer donc tout cela, car i'en ay la puissance,
Ayant en ma maison threfors en abondance:
Tu auras du plus beau & du meilleur encor,
I'ay un vase d'argent, ses bords sont de fin or,

LE IIII. LIVRE

C'est le plus précieux de toute ma vaisselle,
Et mieux elabouré. C'est de la façon belle
De l'artiste Vulcan, dont iadis me fit don
Le Prince iusticier qui regnoit en Sidon,
Après qu'il m'eut donné dans sa maison entree,
Reuenant de courir mainte estrange contree,
Ce present donc que i'en de ce gracieux Roy
Enrichy de pourtraits est appresté pour toy.

Se promenant ainsi tant long temps deuilerent
Que tous les conuiez au logis arriuerent
Du grand Menelaüs. Là dedans ils touchoient
Brebis pour le festin, & les pots remplissoient
De bon vin genereux: les Damoiselles mesmes
Ceintes les beaux cheueux de riches diademes,
Femmes de la maison, les viures apportoint,
Et de belle façon deuant eux les mettoient.
Les Rois ainsi, de mets exquis par excellence
Peinoient à se traitter en toute esionissance.

Les poursuuans passoient le temps de l'autre part,
Soit à ietter la barre, ou à darder le dard
Dens vne belle cour pres du chasteau d'Ulyse,
Lieu où ces insolens prenoient leur exercice
Tousiours d'accoustumé. Là seoit arresté
Antinoüs, avec Eurymaque, en beauté
Accõparable aux Dieux, d'eux les plus remarquables,
Les autres surpassans en merites louables,
Et chefs des poursuuans plus dignes de renom.
Or là comme ils iouoient arriua Noëmon
Le fils de Phronius, adressant sa parole
Au grand Antinoüs: ô ieunesse trop folle,
Que scauons nous, dit-il, si point ne reuiendra
Telemachus, & quand icy retournera?

Car il est allé voir la cité Pelienne
Enceinte de sablons, a pris la barque mienne
Où ie deuois passer en Elyde au terroir
Et large & spacieux : I'y voulois aller voir
Douze iuments que i'ay, & de mes mulets prendre
Quelqu'un pour les dompter, & souz le ioug le rendre.

A ces mots chacun d'eux fut grandement piqué,
Car ils n'auoient pas sceu qu'il se fust embarqué,
Pour aller deuers Pyle: ils le tenoient pour estre
Allé voir les troupeaux & le bouuier champestre.

Alors Antinoüs. Mes amis, qu'est-ce cy,
Quand s'en est-il allé de ce pais icy,
Des ieunes gens d'Ithaque a-t'il pris compagnie,
Ou si de ses vallets ta nauire est fournie
Sur lesquels se fiant sur la mer il s'est mis,
A eu le cœur si grand que de s'estre promis
De bien venir à bout d'une telle entreprise?
Ta Nauire, d'y moy, l'a til par force prise,
Ou si tu luy donnas de ton gré librement?

A cela Noëmon respondit breuement:
Ma Nauire, ie l'ay de mon bon gré donnee,
Et dès le mesme iour qu'il me la demandee,
Qui de le reffuser eust seulement pensé?
Voyant un Prince tel encor' si angoissé
S'en venir le prier? Il est fort difficile.
Les principaux au reste, & plus forts de la ville
Sont allez avec lui, & i'y ay veu encor'
Mentor, plustost un Dieu ressemblant à Mentor.
Ie dy sans me tromper: il auoit son visage,
Sa parole, son teint, sa forme, son corsage.
Toutesfois, cas estrange, hier matin encor'
Par la ville ie vy se promener Mentor:

LE IIII. LIVRE

Et si sur le vaisseau ils monterent ensemble
Telemachus & lui pour voguer ce me semble.

Après qu'il eut parlé soudain il s'en partit
Pour aller chez son pere, & du chasteau sortit.

A ces mots les amans tous confus demurerent,
Quitterent là le ieu, au conseil s'assemblerent,
Et puis Antinoüs fils du riche Eupithé,
Leur parle brefuement. Il est fort dépité,
Son cœur noir de courroux & s'allume & s'enflamme,
Et ses deux yeux brillans sont rouges comme flamme.

O pitie, qu'un enfant soit si presomptueux
Que d'auoir entrepris un fait si haZ ardeux!
Quoy? l'auions nous pensé si hardi, que sur l'onde
Il eust osé ietter sa barque vagabonde?
Quoy? Doncques le premier il nous entreprendra?
Contre nous le premier les armes il prendra?
Choisissant les meilleurs pour nous venir combattre,
Et en despit de nous nous rompre & nous abbattre?
S'il vient pour exercer telle méchanceté
Par Iupiter, plustost puisse-il estre arresté,
Qui lui brise sa force, & de pouuoir suprefme
Son outrage tomber face dessus lui-mefme,
Qu'à ce qu'il nous aduienne aucun malheur icy.

Mais vous, fourniffeZ moi & barque & gens auffi
Iusqu'au nombre de vingt, dont la valeur surmonte
Les plus braues & forts: que la barque soit prompte
Pour les flots dangereux legerement scier.
Sur la mer ie l'iray en embusche espier,
Et ie le surprindray dessus l'onde escumeuse,
Vers l'endroit proprement où Samos la pierreuse,
Et Ithaque nostre Isle, estre cissent les eaux.
Que ce soit à son damp qu'il ait pris des vaisseaux,

Qu'il recoine à ce coup la peyne & le salaire
D'estre allé rechercher nouvelles de son pere.

Il achena de dire, eux d'un consentement
Aprouvent son aduis, se leuent viftement
Pour accomplir soudain l'effect de leur malice
Et prennent leur chemin vers la maison d'Ulysse.

Mais de Penelope leur complot ne fut pas
Longuement ignoré, ny le forcé trespas
Qu'ilz machinoient cruelz à son fils Telemaque
Ainsi quil reuiendrait de Pyles en Ithaque.

Car Medon qui s'estoit approché bellement
Du lieu où ilz auoient tenu couuertement
Leur secret, leur conseil, auoit toute entendue
Leur conspiration, & n'en auoit perdue
Vne seule parolle. Adonques il s'encourt
Entoute diligence, & entre dans la court,
Affin de rapporter à la pudique Reyne
De leur cruel complot la nouvelle certaine.

Auquel, deuant quil eust penetré plus auant:

Pour quelle occasion t'ont renuoyé deuant
Les braves poursuiuans, ô heraut tres fidelle.
Est-ce pour commander aux seruantes, dit elle,
Du diuin Ulysse, qu'ilz ayent à quitter
Leur besogne, & soudain aillent leur appresten
A boire & à manger? fust cela derniere heure
Que ne faisans ailleurs que ceans leur demeure,
Qu'ilz prissent leurs repas? & vous qui avec eux
Deuorez tout le bien du bon Telemachus.

N'auons iamais ouy raconter à vosperes
Quel leur fut Ulysse, vers eux & vers leurs freres
Et vers tous leurs parentz, comme il les embrassoit
De bonne affection, & comme il caressoit

LE IIII. LIVRE

*Iusques au peuple bas : auquel il ne fut onques
Superbe ne cruel, & ne fit tort quelconques?
Encores que ce soit l'ordinaire des Rois
D'en haïr à la mort les vns souuentes fois,
Les autres caresser d'amour trop debonnaire:
Mais iamais il ne fut à personne seuer,
Combien qu'il eust passé les bornes de raison.*

*Mais vous le ruynez en sa propre maison,
Oublieux vous portez contre luy des courages
Insolents & cruelz, vous exercez vos rages
Et vos mechancetez sur ce qu'il a plus cher,
Vous estes, tres-ingratz, & ne faut point chercher
En vous qu'ingratitude. A qui le heraut sage.
Après qu'elle eut parlé, tint ce prudent langage.*

*Grande est certainement ceste calamité,
Mais un plus grand malheur nous est bien apresté
Malheur reformidable & que les Dieux destournent
Et dessus les auteurs le renuersent & tournent
Las, ilz ont coniuré d'aller prendre le vent,
De se mettre sur mer, & d'aller au devant
Du pauvre Telemach, ilz le veulent surprendre
Retournant sur les eaux: car il est allé prendre
Langue du fort Vlysse au terroir Pylien,
Et en Lacedemon au port Oebalien.*

*Il n'eut pas acheué que ses genoux tremblèrent,
Les forces & le poux de son cœur s'en allerent.
Elle fut un long-temps sans qu'elle peust parler,
On vid de ses deux yeux grosses larmes couler:
Puis dit, pourquoy mon filz a til eu tant d'enuie
De se mettre sur mer, & commettre sa vie
A des nauz, à du bois? Qu'estoit il de besoing
De monter sur des aiz & tracasser si loing.*

Sur un vaisseau, qui est aux gens de la marine
Comme un leger cheual, qui galoppe & chemine
Dessus les bleux glacons? estoit-ce point affin
Que son nom tout à faict sur la terre prist fin.

A qui Medon, voyant la peur qui la tourmente
Respondit comme il peut de parole prudente.

Reyne, ie ne te puis acertener au vray
Si ton filz entreprend cela de son plein gré,
Ou poussé de quelqu'un, mais son cœur l'espoingonne
D'aller apprendre à Pyle, ou à Lace demone
Nouvelles de son pere & scauoir de quel sort
Ou sur terre ou sur mer Vlysses sera mort.

Il dit & laissa là ceste triste assemblée
Mais la Roynere resta de douleur accablée,
La tristesse & l'ennuy la rongeoient la dedans
Elle ne peut durer sur chaires ne sur bancz
Bien qu'il y en eust force: en terre elle demeure,
Et au pied de son liét miserablement pleure.
De tous costez aussi ses femmes lamentoient
Tout tant qu'elle en auoit, tant celles qui estoient
En leur plus ieunes ans, que les autres, dont l'aage
Estoit vieil & passé. Lors mouillant son visage
De pleurs sans nulle fin, Penelope aduisoit
Ses femmes autour d'elle, & ainsi leur disoit.

Filles escoutez moy. Les puissans Dieux celestes
Tousiours m'ont affligée estrangement molestes.
Car tout premierement, par un triste malheur
Iay perdu mon mary, lequel portoit un cœur
Et magnanime & fort, puissant en eloquence
Par dessus tous les Grecs. Il a plein d'excellence
En honneur resplendy, son honneur & son los
Vollent tout au trauers de la fameuse Argos:

LE IIII. LIVRE

Et voicy de nouveau par l'orageux Neptune
 Mon filz m'est enlené, sans renommee aucune
 Hors de ma maison propre, & ne sçay quelle part
 Mesmes n'ay peu scauoir l'heure de son depart,
 Pourquoy ne vintes vous ô femmes mal-heureuses
 M'en aduertir? Pourquoy de mon bien enuieuses
 Ne m'eueillastes vous? puis que vous scauez bien
 Qu'il s'en alloit commettre au flos Neptunien.
 O que si i'eusse sceu quelle estoit son enuye
 Qu'il voulust hazarder sur ces ondes sa vye,
 Ie l'eusse furieuse arresté, le cruel,
 Et n'eust ainsi quitté le logis paternel,
 Voire tout embarqué, & ia donnant ses voiles
 Aux souffles delaschez des Zephirs enfle-toiles
 Ou bien ie fusse morte en la peyne, & ainsi
 Le fuyard m'eust laissée exempte de soucy.

Mais faictes que quelcun s'en aille en diligence
 M'appeller Dolius, il sera que ie pense
 Maintenant au verger, c'est ce seruiteur vieux
 Que me donna mon pere en venant en ces lieux.

Qu'il coure viftement dire ceste entreprise
 Au vieillard Laertes, auant qu'elle soit mise
 A execution: s'il me peut departir
 Quelque aduis en cecy: & qu'il veille sortir
 Vers le peuple, criant, deplorant la malice
 Qui veut perdre sa race, & du diuin Ulysse.

Mais la sage Euriclee au contraire parla,
 Et de tout son pouuoir douce la consola.

Royne, le seul plaisir de ma triste pensée
 Mon honneur, & mon bien. Ne sois point courroucée,
 Car ie te diray tout. Ie te confesseray
 Tout ce qui s'est passé, & rien n'en celeray,

M'aduienne qui pourra soit la mort soit la vie.

I'ay sceu tout le complot, & contre mon enuie

Ie luy ay deliuré viures abondamment,

Car il me le fit faire, & prit de moy serment

Que ie n'en dirois rien, quel'aube iournaliere,

N'eust monstré douze fois aux hommes sa lumiere,

Ou que tu n'eusses sceu sa fuite par la mer,

De peur quel'on ne vist ta beauté consumer

En l'armes: Mais va t'en te baigner, ma Princesse,

Trentes accoustremens les plus beaux en richesse

Et tes femmes & toy, montez ensemblement

La haut en vostre chambre, inuoquez humblement

Et de tout vostre cœur Minerue l'immortelle

La fille à Iupiter, que iadis la mammelle

D'une cheure alaita, elle preservera

Ton filz, & en seurté te le ramenera.

Mais, las n'afflige point ie te pry d'auantage

Le pauvre Laertes, que la douleur, quel'aage

Ont ià trop affligé: ie ne croy nullement

Que les Dieux immortels hayssent tellement

Le sang d'Arcefus, qu'irritez ilz permettent,

Qu'ilz vueillent consentir, que ces mechants le mettent

A totale ruyne, & ne puisse rester

De ceste race vn seul, lequel vienne à porter

Le Sceptre paternel, represente & soustienne

L'honneur de la maison, la Couronne reprenne,

Et dessus ceste tour haute superbement

Sur ces champs, sur ces prez regne paisiblement.

Ce propos diuertit de la Royne pudique

Le triste desespoir qui la ronge & la pique,

Ses larmes esuya, assoupit ses clameurs

Et plus qu'on n'eut pensé modera ses douleurs.

L E IIII. L I V R E

Elle entra dans le baing, prit les plus belles robes
Que serrassent pour lors ses riches garde-robes,
Monta dedans sa chambre, & aux lieux plus secrets
Elle s'agenouilla, & ses femmes aupres
Fit les effusions & les offrandes saintes.
Et versa à Pallas ses piteuses complaints,

Je te prie humblement, Deesse, esconté moy,
Assiste à mes ennuis, console mon esmoy,
O grand Tritonienne, ô Pallas, fille chere
Du puissant Iupiter alaité d'une cheure
Si iamais Ulysses sacrifice te fit
Qui te reuint à gré, si iamais il t'offrit
Brebis sur ton autel, & beufs en abondance
Souvien t'en ie te pri' & fay nous assistance;
Preferue mon enfant, ô pleine de bonté.
Destourne le trespas que luy ont projeté
Ces meschans enragez, que leur cruauté fiere
Ne m'ost en le tuant ma geniture chere.
A la Deesse ainsi ces cris elle adressoit
Et de ses hurlements la maison remplissoit.
Et Pallas l'exauce. Mais une rumeur grande
Se fait dans le chasteau par l'insolente bande
Des amans importuns, fierement fremissans
Et sans aucun repos ça & la tracassans.
Entre lesquels quelcun vint tenir ce langage.
La Reyne maintenant pense en son mariage
C'est un cas tres certain, ne veut plus nous fascher,
Et ne se fera plus si long temps rechercher.
Mais elle ne scait rien du malheur qui talonne
Son fils, prest de mourir. Ainsi les arraisonne
L'un deux. Mais toutesfois ce n'estoit pas cela
Qu'il pensoit, lors le fils d'Eupithe luy parla.

Malheureux taisez vous, que vostre incontinence
Ne nous descouvre en fin. Mais faisons diligence
Et sans plus differer hardiment besognons.

Ce disant, il choisit vingt fort bons compagnons,
Se haste de gagner vistement le riuage,
Et va sans plus tarder mettre ordre à son voyage.

En premier, son vaisseau en mer il descendit,
Dressa son mast hautin, ses voiles espendit,
Autour de son bac noir dressa tout son cordage
Et fit accommoder dedans tout l'equippage.

Puis fit armer ses gens, apprester à manger
En attendant le soir qu'il faudra deloger:

La Reyne cependant de tristesse assiegee
Accablee d'ennuis, gist en son liét couchee,
Elle ne mange point, le pain luy est douleur
Et le goust de Baccus luy vient à contre cœur.
Elle songe tousiours si son fils incoupable
Se pourra reschapper de la mort effroyable,
Où s'il succumbera deffoubs la cruauté
Des traistres poursuiuants. Telle en perplexité
Qu'est souuent le lion quant les veneurs l'estonnent
Craignant qu'à la parfin leurs lacs ne l'environnent.

En ces diuers pensers le sommeil gratieux
Ses membres assoupit & abbaisse ses yeux,
Elle est dessus son liét. Alors Pallas qui pense
Autre chose en son cœur, descend en diligence,
Empruntant le semblant & la face & la voix
De la nymphe Iphitimé, qu'il carus autrefois
Magnanime engendra, femme depuis nagueres
Du gentil Eumelus qui habitoit à Pheres,
Laquelle elle ennoya au chasteau d'Ulysses
Pour destourner du cœur de la Reyne, l'exces

LE IIII. LIVRE

De ses afflictions moderer ses destresses
Et de sa chere seur amollir les oppresses.

Transformée en ce poinct dans la chābre elle entra,
Et les huis bien fermeZ & les murs penetra,
Donna iusqu'à son liēt, & de splendeur remplie
Aupres de son cheuet ces propos luy deplie.
Penelopé peux tu dormir en cest estat.
Le mal certes par trop t'attenué & t'abbat.

Les Dieux tousiours heureux ne souffrirōt plus gueres
Que tu viues ainsi la butte des miseres,
Que tu mattes ton corps de si griefues douleurs
Hurlant par la maison te consumant en pleurs.
Ton fils retournera dedans vn peu d'espace
Seurement: il n'est pas en la mauuaise grace
Des Dieux, & n'a failly contre eux aucunement.

A qui Penelopé qui dormoit doucement
Que pressoit du sommeil la puissance sublime,
Et qui pensoit ouyr la propre voix d'Iphitime
Respondit, chere seur, qui ta conduite icy
De Pheres en ce lieu? que viens tu faire icy
Dy moy, ma bonne seur: ce n'est chose ordinaire,
Que de te voir ceans, tant loing d'icy est Phere
Où se tient ton mary, Tu dis ma chere seur
Que ie chasse de moy l'ennuy & la douleur,
Que i'oste de mon cœur mille tristes pensees
Dont mes affections sans cesse sont blessees:
I'ay perdu mon espoux, il est de moy pleuré
Ce Prince genereux, ce guerrier assuré
Qui ne trembla iamais, plein de toute proüesse,
Ceint de toute vertu, celebre par la Grece,
Renommé par Argos, qui son nom glorieux
Poussoit iusqu'au dessus des estoilles des Cieux.

Or ie

Orie pleure un enfant, mon cher filz, le seul reste
Du sang de ses ayeux, ô fortune moleste!
Trop enfant pour si tost se metre sur les eaux
Et sa vie haZarder sur les foibles vaisseaux,
Trop foible pour porter des fatigues si grosses,
Non experimenté pour de si grands negoces.
Las, miserable moy, i'en porte plus d'ennuy
Que pour son pere mesme, effrayee pour luy
Je tremble incessamment, que mal ne luy aduienne
Entre les nations, ou sur l'onde inhumaine.
Miserable où est il allé si vistemment?
On l'attend, on le veut tuer cruellement,
Avant que delivré de la mer rigoureuse
Il puisse helas revoir sa maison douce reuse.

A qui la sombre image adiousta sur ce point,
Vy pleine d'assurance, ô Reyne, & ne crain point:
Tel guide est avec luy, que plusieurs en leur voye
En voudroient bien un tel, & c'est luy qui m'enuoye:
Pallas qui peut beaucoup, pour t'oster ton esmoy
T'enuoye ce message, ayant pitié de toy.

Pallas se tent alors. Et la Reyne ennuiee:
A bonne heure sois tu devers moy enuoyee
Qui que tu sois qui viens soulager ma douleur,
Soit que tu sois Deesse, ou qu'ayes ce bon heur
D'anoir ouï sa voix, & lui faire service.
Las di moi, ie te pri où est le pauvre Ulysse
Est il encor' vivant au monde, à til encor
Ce bien de regarder Phœbus aux cheueux d'or
Et son char reluisant? où, les destins iniques,
L'ont ils faict d'enaller aux ombres Plutoniques?

Alors l'image sombre: il n'est en mon pouuoir
De te dire cela que ie n'ai peu scavoir,

LE III. LIVRE DE L'ODYSSEE.

*S'il est encor vivant, ou s'il n'est plus au monde.
Il n'est pas bien seant que personne responde
Chose qu'il ne sçait pas. Puis finit son parler
Et comme un petit vent s'esvanouit en l'air,
Voleant au trauers la porte verrouillee.*

*Et la fille d'Icare en sursaut eueillee
De soudaine allegresse encouragea son cœur.*

*Mais tandis que le songe annonçant ce bon heur
La retient sur la nuit, luy rendant manifeste
De la bonne Pallas l'assistance celeste,
La trouppete meraire allongeoit dessus l'eau
Ses rames & ses bras, & portoit son vaisseau
Sur Neptune leger, machinant homicide
Mort & cruelle fin au petit Laërtide.*

*Une islette, non grande est venue des nochers
Au milieu de la mer, pleine de hauts rochers,
Appelée Asteris, où plus le vent attaque
Les destroits estressis de la sterile Ithaque
Et de Samos pierreuse: elle n'a pas grand tour,
Mais elle ouure ses ports fort ayse & tout autour.
Là tourne leur nauire, & au long de la rade
La bande des amans dresse son embuscade.*

Fin du quatriesme Livre.



LE CINQVIESME LIVRE
DE L'ODYSSEE D'HOMERE.

ARGUMENT.

Es Dieux au conseil pour la seconde fois. Iupiter en-
voye Mercure à Calypso luy commander de laisser al-
ler Vlysses. Elle obeit, à grand regret. Il se met sur mer,
ou sur le dixhuietieme iour Neptune l'ayant apperceu en-
tre en colere, & brize son vaisseau. Ino l'aduertit, & luy
donne son bandeau, l'admonestant de le reietter en mer
des qu'il seroit sur terre: en fin apres auoir nagé longuement
& en grand hazard, il se sauue en Phæacie.

AUTRE SOMMAIRE.

Calypso laisse aller Vlysse: il faict naufrage;
Ino l'assiste: en terre il se sauue à la nage.



L'Aube nouvelle alloit son beau chef es-
levant
Et radieux & clair hors des eaux du le-
uant
Laisant son lit doré, ioyeux messagere
Du retour attendu du Dieu donne-lumiere
Portant le iour aux Dieux & aux hommes mortelz
Mais sur le haut Olympe ez sieges supernelz

LE V. LIVRE

*Au veuil de Iupiter qui l'auoit assemblee
 La troupe se trouua des haults Dieux appellee.
 Au milieu de la sale assis fut Iupiter
 Qui de sa dextre peut tonner & tempester,
 Qui domine le monde en son pouuoir immense.
 La Pallas assistoit ayant en souuenance,
 Les peines, les traux & le mal d'Vlysses.
 Car aiant en sur mer ses vaisseaux d'especẽ
 Il seiournoit forcẽ chez Calypso la blonde
 Denuẽ de moyens pour se mettre sur l'onde:
 Laquelle aux Dieux s'adresse & leur tint propos tels.
 O pere altitonant, & vous Dieux immortels
 Qui habitez du ciel la voute bien-heureuse
 Il ne faut que personne ait plus l'ame amoureuse
 De droit ny d'equitẽ, n'ait souci nullement
 De plus porter son sceptre & bien & droitement,
 N'ayt cure de seruir la sainte vierge Astræe,
 Que par nul ne soit plus iustice administree
 Chassant toute douceur, son peuple rudoyant,
 Et à nous immortels plus ne sacrifiant:
 A bon droit desormais quiconque aura puissance,
 S'applique impunement à outrage & nuisance,
 Soit iniuste & cruel, dechasse l'equitẽ
 Et se plait à la fin en toute impietẽ
 Puis qu'on n'a nul souci du patient Vlyse,
 Et comme il a regnẽ en douceur & iustice
 Et dessus son Royaume & sur le peuple sien,
 L'Isle d'une nymphe est augoulphe Ogygien,
 Là ce Roy malheureux souffre peine cruelle
 Retenu au palais de Calypso la belle
 Qui ne luy permet pas de se metre sur mer,
 Et comme il voudroit bien à la fin retourner*

Voir sa douce maison, & ses Dieux tutelaires,
Il n'a ny matelotz ny nauires legeres,
Voiles ny auirons pour retenter les ventz.
Ce n'est pas tout encor, des mauditz poursuiuans
La coniuration, veut arracher la vye
A son filz Telemaque, et sur la mer l'espie
Comme il retournera. Car l'enfant pour scauoir
Nouvelles de son pere à Pyle est allé voir,
Et à Lacedæmon s'il en pourroit apprendre.

Alors celuy qui pent les nuages espandre
Et serrer quand il veut, ainsi luy respondit
Quet'est il eschappé, ô fille, qu'as tu dict?
Ne fut il pas conclu, & tu fus l'inuentrice
T'oy mesmes du conseil & arresté qu'Ulysse
En seurte retourné les amans rengeroit
T'uroit les poursuiuans, & d'eux se vengeroit?
Quant à toy, prend le soing de rendre Telemaque
(Car Pallas, tu le peux) sans danger en Itaque,
Conduy le seurement sur la flotante mer,
Fay le prosperement & voguer & ramer,
Si qu'il puisse arriuer en sa douce patrie
Et reuoir sa maison & sa mere chérie.
Et quant aux poursuiuans tu les peux destourner,
Et par autre chemin les faire retourner:
Ren failly leur conseil, vayne leur embuscade.

Il dit, puis se tournant au filz de la Pleiade
L'agreable Maja, Mercure ce dit il
Qui mes commandemens porte par l'air subtil,
Cher filz va vistement, appelle à toy Zephire,
Descen, & fais siffler tes ailes, & va dire
De ma part à la nymphe aux blondoyans cheueux
La belle Calypson, que i'enten, que ie veux

LE V. LIVRE

Qu'elle n'arreste plus le Nerite chez elle,
 Et qu'il retourne voir sa maison paternelle,
 Dy lui comme il fera : nul Dieu, nul homme aussi
 N'aura de son retour ne peine ne souci.
 Je veux qu'il entre en mer tout seul dans un navire,
 Et des qu'on aura veu vingt iours le Soleil luire
 Et Scherie il viendra, pais fort fructueux,
 Où les Phaëciens qui sont sortis des Dieux
 Habitent de long temps, ils lui feront au reste
 Tout l'honneur qu'ils feroient à quelque Dieu celeste,
 D'un navire équipé, courtois, le fourniront,
 Sur son propre terroir en seurté le rendront,
 Ils luy donneront argent & or en abondance,
 Ils lui feront presens de robes d'excellence,
 Plus qu'il n'en eut iamaïs de Troie rapporté
 Pour sa part, quoy qu'il fust sans incommodité
 Et sans perte arrivé. Ainsi ses destinees
 Sont de reuoir en fin l'air de ses cheminees
 Fumer sur ses maisons, sur le haut de ses tours
 Reuoir plisser l'obscur de leur sombres retours,
 Et iouir à la fin de la douce presence
 De ses plus chers amis comble d'esjouissance.

Il eut dict & soudain le Dieu va s'apprester
 Pour rendre obeissance au puissant Iupiter.
 Il mit premierement aux pieds ses talonnières
 D'Ambrosie & d'or fin reluisantes & claires,
 Qui le portent en haut comme le vent leger,
 Soit que dessus les mers il veille deloger
 Soit sur la terre, en l'air & portée & penchante.
 Apres, il prend sa verge : avec elle il enchante
 Les uns quand il lui plaist pour les faire dormir,
 Les autres, il les faict du sommeil reuenir.

*La tenant en sa main de l'olympé il se roule,
Sur le mont Pierus il tombe, puis s'escoule
Dessus le plein des eaux, de ses ailes batant
L'air marin, & léger sur l'onde voletant.
Ressemblant au plongeon qui autour des riuages
Et sur les flots moitteux humecte ses plumages
Pour prendre des poissons, le Dieu pareillement
Dessus maint & maint flot coule legerement.
Mais estant paruenue dans l'Isle loing plantee
Sortant hors de la mer, sa plante il a ietee
Sur le ferme terroir, tant qu'il fut arriué
En cheminant tousiours dedans l'ancre caué
Où demeueroit la nymphe à la tresse tresbelle.
La dedans au foier un grand feu estincelle
Vne flamme iettoit vne viue splendeur,
La fumee en estoit de merueilleuse odeur,
Le cedre espendoit là ses senteurs plus doucettes,
Et l'encens y haussait ses flammes violettes:
L'odorante vapeur toute l'Isle sentoit,
Et le feu pris aux bois par tous les champs montoit
Elle au dedans chantoit de sa voix doucereuse,
Et sur son mestier d'or tissoit industrieuse
Un ouurage gentil, meslant ainsi ses chants
Pour tromper son travail. Là verdissent les champs,
Et les hautes forests le bel antre environnent,
Et leur feuille plaisante eternelles y donnent:
Le peuplier noir feuillu, & l'odorant Cypres,
Et les aulnes hautains s'esleuent tout aupres.
Là les oyseaux faisoient leurs nids & leurs logettes.
Là voloient à l'entour les nocturnes choüettes,
Le hydeux chat-huant, & l'esperuier gentil,
Et la noire corneille à l'important babil*

LE V. LIVRE

D'autres oyseaux encor une quantité grande
 Voloit le long des eaux, rauissante & gourmande,
 Ses ayles allongeant, & courant goulument
 Aux poissons ecaillez. Là rampoit doucement
 A l'entour de la grotte au fondz du roc cauee
 La vigne douce reuse, & la feuille esleuee
 Sur le rocher moussieux gaiement verdissoit
 Et le raisin pendant soubs elle florissoit.
 Quatre plaisans ruisseaux leurs ondes argentees
 Au trauers la forest rouloient precipitees
 Et par diuers endroits, & comme ils deualloient
 D'un meslange plaisant leur murmure mesloient:
 Les prez estoient parez d'œillets & violettes,
 Les belles fleurs, paignoient les plaisantes herbettes
 Et les chāps s'esmailloient. Tel Dieu mesme y viendrait
 Voyant un lieu si beau qui plaisir y prendrait.

Or le fils de Maja touchoit desia l'entree
 Admirant grandement la plaisante contree,
 Un temps il fut ravi, & ses ieux ne depart
 De dessus, regardant chascune chose à part,
 Puis entre dans la grotte. Et Calypson la belle
 Scait bien que c'est quelcun de la troupe immortelle,
 Le cogneut approchant plus pres d'elle ses pas.
 Car d'elle les haults Dieux incogneuZ ne sont pas:
 Donc à celle Deesse il estoit fort facile
 De recognoistre un Dieu: encore que son Isle
 Soit beaucoup à l'escart, & ses palais doreZ
 Soient des lieux frequenteZ grandement separez.

Il ne trouua dedans le preux fils de Laërte,
 Il pleuroit affligé sur la riuie deserte
 Ses continuZ malheurs: souvent il s'y portoit
 Et seul aupres des eaux ses ennuis lamentoit,

Plein de cris, plein de pleurs souvent iettoit sa veüe
Sur les sillons lointains de la campagne bleüe
Tant qu'il pouuoit l'estendre, en sanglots sousspirant,
Et de cuisans soucis son ame martirant.

La Nymphé le fit soir dans vn siege honorable,
Riche & resplendissant, de façon admirable
Qu'elle luy fit porter soudain qu'elle le vit,
Et puis tout doucement le sonda & l'enquit.

L'amy, pourquoy viens-tu? ceste verge doree
Qu'apporte-elle de bon de la voulte azurée?
Tu ne viens pas du ciel icy pour ton plaisir,
Bien que de tout mon cœur & de tout mon desir
Ie t'y voye arriuer. C'est chose bien fort rare
Toutesfois, qu'Ogygie & son antre barbare
Voye vn Dieu si disert. Qui t'ameine en ce lieu?
Pour quel sujet, dy moi des Dieux le plus beau Dieu?
Ie t'obtempereray, octroye à ma semonce
Si tu veux, si tu peux premierement responce:
Afin que ie te traite & te reçoie ainsi
Qu'il conuient, cependant que tu seras ici.

La Nymphé dit ainsi, puis fit couvrir la table
De viure Ambrosien, & de mets delectable,
Et faict remplir les pots de Nectar saoureux
Qui rougissant dedans escume douceux.
Quand elle l'eut semond, le gentil Atlantide
Se repaist d'Ambrosie, & le doux Nectar vuide:
Mais quand la soif finit & l'appetit cessa
Mercure en tels propos à parler commença.

Puis que tu m'as enquis, ô Nymphé venerable,
Ie te diray le tout messager veritable,
Et rien ne t'en tairay. Iupiter tout puissant
M'a commandé voler sur Neptune glissant,

LE V. LIVRE

*Malgré moy toutesfois, & contre mon enuie,
Car qui pour son plaisir hazarderoit sa vie
A passer tant de mers, & ses legers cerceaux
Feroit combattre aux vents bouleuersans les eaux,
Pour venir en ce lieu tant loing de bonnes villes,
Des conuersations honnestes & ciuiles
Des pieux citoyens, qui aux Dieux immortels
Brulent le doux encens sur leurs sacréz autels,
Et les vont appaisans d'une sainte hecatumbe.
Mais iamais vainement la volonté ne tombe
De Iupiter l'Egide, & ne faut point penser
Que ses commandemens ainsi soient à laisser,
Ny le vouloir des Dieux: & la seurte n'est grande
De penser le tromper és choses qu'il commande.*

*Or belle Calypso, certain homme est ici,
A ce que l'on m'a dit, triste & plein de souci,
Renommé pour ses maux, & le plus miserable
Des Princes & des chefs de la Grece honorable,
Qui ont durant neuf ans fait la guerre à Priam,
Et combattu deuant les hauts murs de Pergam,
Mais en fin au dixiesme ont fait egaux aux herbes
Ses palais somptueux & ses rempars superbes:
Mais en s'en retournant ils destournerent d'eux
La faueur de Pallas, tirerent, malheureux,
Sur eux son fier courroux, dont elle sur leurs testes
Esmeut l'ire des vents, excita les tempestes,
Les ondes agita, & les Austres plus fiers
A l'abandon lascha de la mer au trauers.
La flotte fait naufrage, & les eaux inhumaines
Coururent, ô pitié, tous les bons Capitaines
Si braues aux combats, soit qu'il fallust s'armer,
Ou avec auirons sur les ondes ramer:*

Mais cestui-cy, les flots, l'orage, la fortune
L'ont poussé iusqu'icy sur le hautain Neptune.

Or il fault l'enuoyer, ie le dy de la part
Du pere Iupiter. Ce n'est point par hazard,
Mais c'est par le destin que si long temps il erre,
Loing de tous ses amis, & d'Ithaque sa terre.
Le destin est aussi qu'il aille en son pays
Renoir ses champs Gregeois, ses Dieux & ses amis,
Sa maison & ses tours, & son espouse chere,
Et le natal terroir de Laërtes son pere.

Il dit, & Calypso de dépit se fronça,
Et se tournant à luy ces propos prononça.
Que vous estes, ô Dieux. pleins d'estrange malice!
Que vous auez en vous d'enuie & d'iniustice!
Pourquoy enuiez vous qu'une Deesse ait mis
Son amour en un homme, & qu'elle l'ait permis
De coucher avec elle. Et pour mary l'accepte?
Comme lors que l'Aurore à la rouge charrette
Ravit son Orion vous fustes enuieux
De son contentement, ô trop iniques Dieux,
Vous en fustes esmeus & de haine & d'enuie,
Combien que vous viuiez en bien-heureuse vie,
N'eustes malicieux iamaïs aucun repos,
Iusqu'à ce que Diane eust transpercé ses os
En l'Isle d'Ortigie, & faict en son cœur breche
Ainsi comme il chassoit, à coups d'arc & de fleche.
Comme lors que Ceres mit son affection
Et se mesla d'amour au bel Iasion,
Le recent en son lit, ell' ne se cachaguiere
Au puissant foudroyeur n'a sa colere fiere,
Car bien tost de son foudre au formidable son
A la mort il frappa le pauvre Iasion.

LE V. LIVRE

De mesmes Dieux ialoux vostre haine cruelle
 A le cœur de se prendre à moi simple femelle,
 Pource que i'aime vn homme, & brulante d'ardeur
 A ce pauvre fuitif ay fait part de mon cœur:
 Ie l'ay receu ceans eschappé du naufrage,
 L'ay sauué, guaranty, errant sur le rinage,
 Delaisé, vagabond: car Iupiter auoit
 De son foudre brisé la nef qui le sauoit,
 Ainsi qu'elle flotloit sur la plaine profonde
 Il submergea ses gens dans les gouffres de l'onde:
 Ulysses ie receu seulet & dejetté,
 Que la vague en ceste Isle auoit ainsi porté,
 Et demi-mort de faim, benigne, secourable,
 De pain le consolay: ie le mis à ma table,
 Le traittay dans ma grotte, & sur le mesme lieu,
 Sans qu'il vieillist iamais le voulois faire Dieu.

Mais puis qu'il ne fault pas estre contentiense,
 Qu'il ne faut transgresser l'ordonnance fascheuse
 De celui qui dardant son tonnerre odieux
 Son agide brandit, & que non plus les Dieux
 Il ne conuient tromper, qu'il voise à la bonne heure
 Si Iupiter ne veult que ceans il demeure,
 S'il le presse si fort de partir vistement
 De ce fier encor à ce traistre element,
 De retenter encor le tourment & la peine
 Où sans doute il va choir. Pour moy iamais n'aduiene
 Que ie l'enuoye plus sur l'incertain des flots.
 Avec cela ie n'ay barques ny matelots
 Pour le passer la mer: Que s'il fault qu'il se garde
 Des escueils, où ie voy qu'il se iette & hazarde,
 Ie l'en aduertiray toutesfois de bon cœur,
 A fin qu'en sa maison il arrine en bon heur.

Mais tout presentement il faut que tu le quitte,
Dit le Cyllenien, Pren garde à toy, enite
L'ire de Iupiter, & fay sa volonté,
Qu'il ne te chastiaſt, à bon droit irrité.
Il dit, & s'en-volant fendit l'air de ſes aiſles.

Mais la Nymphe entendant ces faſcheuſes nouvelles
Et du hault Iupiter l'arrest determiné,
Vers le fort Ulyſſes ſon chemin a tourné.
Elle le rencontra couché ſur le rinage,
De larmes n'eſt iamais deſeché ſon viſage,
Mais il eſt humecté ſans fin de moittes pleurs:
Il paſſe la douceur de ſes ans en douleurs,
Pleurant pour ſon retour, & ſon beau temps eſcoule,
Tandis que de ſes yeux mainte larme ſe roule,
Car plus ne lui plaiſoit l'ennuyante beauté
De la Nymphe. Contraint il dort à ſon coſté,
Contre ſa volonté maintenant il l'embrasse,
Et la nuit avec elle à contre-cœur il paſſe,
Puis quand le iour reuient, entre les rochers durs
Sur le bord de la mer il rentre en ſes douleurs,
Seant triſte & penſif, de cris ſon ame il geine,
Son ſein de pleurs abbreuve, & remaſche ſa peine.
Il contemple, attriſté, les Nereïdes eaux,
Et ſur ſa face eſpand larmes à grands ruiſſeaux.
La Nymphe le trouuant lui dit en ceſte ſorte:
Ne te conſume plus en triſteſſe ſi forte,
Ne ſcoule plus ainſi ton aage en ſon eſté
Terniſſant ton beau luſtre, & paſſant ta beauté.
Ie te lairray aller (ne vy plus miſerable)
Et de tous mes moyens t'aideray ſecourable.
Va donc que te couper de grands, longs & forts ais
Pour te faire vn vaiſſeau, ioint les aſſemble les

LE V. LIVRE

*Afin que seurement sur la mer il te porte.
 Moi-mesme y porteray viures de toute sorte,
 Eau, pain, habillemens, & bon vin rougissant,
 Quit aille sur la mer le cœur ressonnant.
 Je t'enuoiray les vents, afin que secourables
 Ils te puissent porter en tes champs desirables.
 Si les diuins destins sur toy trop enuieux,
 Si les Dieux habitans, de l'Olympe & des Cieux,
 Dont l'esprit, celuy là de Calypso surpasse,
 N'empeschent ton retour, & te donnent la grace
 De reuoir ton pays. Ayant dit, Vlysses
 Sentit à ces propos ses os comme glacez,
 Et puis luy respondit. Ce que tu dis, Deesse,
 Est bien vn autre fait que mon retour en Grece,
 Tu penses autrement : me commandant ainsi
 Que ie m'aille commettre aux ondes sans mercy,
 Sur vn foible nauire, & du flot effroyable
 Je tente encor l'effort sur vn ais miserable,
 Qu'un fort vaisseau pourroit à peine transfréter
 Quand il seroit poussé du vent de Iupiter.
 Puis, iamais de la mer ne courray l'auenture,
 Deesse, outre ton gré, si premier tu ne iure
 Les noirs palus d'enfer, & ne prens pour le moins
 De ton serment iuré les grands Dieux à tesmoins:
 Que tu ne me feras sur les ondes nuisance,
 Et m'en donras encor quelque bonne assurance.
 La Nymphe à ce propos en soi-mesme sourit,
 Lui prit la main, l'embrasse, ainsi lui respondit.
 Certes tu es madré, cault, & prudent & sage,
 Mais quel mal commets-tu de tenir ce langage?
 Qu'oses-tu proferer? l'atteste les hauts Cieux,
 La terre d'au deffou l'Olympe spacieux,*

Je te iure par Stix (le grand fleuve que iurent
Les Dieux, quand quelque cas d'importance ils assurent)
Que jamais sur la mer en rien ne te nuiray,
Trouble ne déplaisir ie ne te donneray,
Plustost que ie prendrois le conseil pour moi-mesme,
Que ie te donneroie en ceste peine extremesme,
S'il falloit que i'y fusse. Hé, ie suy la raison,
Ie n'ay le cœur de fer, & le gratieux nom
D'amour, aux Nymphes est en tout temps venerable,
La douceur loge en moi, i'ay le cœur exorable,
Misericordieux, i'escoute doucement,
Me paye de raison, souffre patiemment
Ce qui est d'équité. Ainsi disoit la belle
S'en retourne à la Grotte, & lui vient apres elle:
Et tout ensemblement vindrent au roc caueux
Ulysse & la Deesse aux blondissans cheveux.
Mais sur le mesme siege où s'assit le message
Des Dieux, elle fit soir le Dulichien sage,
Et puis lui fit servir breuvage & viures tels
Comme ont accoustumé de manger les mortels,
Et se mit vis à vis : ses filles deuant elle
Apportèrent apres l'Ambrosie immortelle
Auecques le Nectar. Ils mangent à plaisir,
Des mets delicieux emplissent leur desir:
Après, quand du manger rassasiés ils furent
Pour resjouir leur cœur le doux breuvage ils beurent,
Puis quand auoir bien beu de manger furent las,
Tels furent les propos de la fille d'Atlas.

Laërtide, remply de sagesse profonde,
Estu si fort hasté de te mettre sur l'onde,
Pour gaigner ton pays & t'estranger de moy?
Pour ce que ie t'en dy, pourtant resiouy toy.

LE V. LIVRE

*Mais, las, si tu sçauois quels dangers te menacent
 Sur l'inconstante mer, quels hazards te pourchassent,
 Et combien il te fault encor' souffrir d'es moy,
 Certes tu demourrois icy avecques moy:
 Tu ferois, dis-ie, icy ta demeure eternelle,
 Tu deviendrois vn Dieu, & de vie immortelle,
 Combien que de ta femme vn extresme desir,
 Et d'elle vn grand amour ton cœur vienne saisir,
 Sans cesse regrettant ceste belle amoureuse,
 Et n'ait fin ne repos ceste amour furieuse.
 Si ne suis-ie pourtant de rien moindre en beauté
 Que ta femme, dont grande est la pudicité
 Par la Grece vrayment, meilleure n'est sa grace,
 Et son entendement le nostre ne surpasse.
 Une femme iamais ne se doit egaller
 Avec vne Deesse, elle ne peut aller
 Pair à pair avec elle, & iamais les mortelles
 Ne sont à comparer aux Nymphes immortelles.
 A laquelle Ulysses, Que ton visage doux
 Ne soit, belle Deesse, agité de courroux:
 Je sçay que Penelope est en forme, en visage,
 En grace, en maiesté, en taille, & en corsage
 Inferieure à toy, & n'y auroit raison
 De vouloir faire d'elle à toi comparaison.
 Elle est femme mortelle, & tu es, ô Deesse,
 Immortelle sans fin, non sujette à vieillesse,
 La victoire est à toy, & grand tort te feroit
 Ayant veu ta beauté, quiconque en douteroit.
 Toutesfois ie desire avec impatience
 De voir cet heureux iour, qui en toute assurance
 Me rendra le retour de mon aimé pays,
 Et la veüe d'Ithaque & de tous mes amis.*

Si quelqu'un toutesfois de la bande celeste
M'est encores sur mer aduersaire & moleste:
Je fourniray encor, & ce nouveau tourment,
Ce mal renouuelé, seront pour complement
A mes aduersitez, ie prendrai patience,
Je supporterai tout, il est en ma puissance.
Car i'ay de longue main accoustumé les maux,
Je suis fort aux malheurs, endurci aux trauaux,
I'ay couru vagabond, & la mer & la terre,
Et pati, tracassant l'une & l'autre en la guerre.
Il acheua de dire, & Titan qui deuoit
Faire place à la nuit, dans la mer se lauoit.
Vlysses & la Nympe adonc s'en retournerent
Dans la Grotte écartee, & là se recréerent
L'un l'autre en leurs amours, d'un embrassement cher
Iouirent à plaisir, & s'allerent coucher.

Mais comme se leua l'aube au saffrané coche,
Vlysses prompt se vest, sa manteline accroche,
Et de la chambre sort. Et la Nympe au corps genz
Prend son ample manteau faict de gase d'argent
Et sen vest proprement, dessus ses reins s'est ceint
D'une ceinture d'or, puis a sa tresse enceinte
D'un voile precieux: sort apres, pour donner
Au vaillant Vlysses moyen de retourner.
Elle mit en sa main vne hache luisante
Couppant des deux costez, grande, propre & duisante
A fabriquer vaisseaux, tresbeau le manche estoit
Faict de bois d'olurier qui luisant éclatoit.
Elle lui fit present encore d'une scie
Pour coupper arbres hauts, bien luisante & polie.
A grands pas & hastez ainsi elle menoit
Auec elle Vlysses par tout le promenoit,

LE V. LIVRE

On des arbres plus haults les hauteurs n'ont pareilles
Leurs sommets estendoient : le peuplier noires-feuilles
Nourry le long des eaux : l'aulne grand & hault ain
Et le fresne dans l'air haussant son bout lointain :
Autresfois verdoyant & chargé de feuillage,
Ores & dur & sec, sans suc & sans ombrage,
Pieça tel que cela l'auoit rendu le temps,
Plus fort pour bien courir dessus les champs flottans,
Plus leger pour voller sur la campagne ondeuse.

Comme ell' luy eust monstré la grand forest ombreuse
La Nymphé s'en alla, & le sage Ithaquois
Pour faire son nauire abbatoit force bois,
Si qu'en bien peu de temps il fit beaucoup d'ouurage.
En vingt iours il mit bas son bois sur le rinage,
Esbrancha les rameaux qui ne seruoient de rien,
Par art les accarrit, & les dressa fort bien
A la regle, au cordeau, puis y fit des mortaises
Afin que les tenons entrassent à leurs aises
Auecques le terrier, à luy par Calypson,
Donné semblablement. PerceZ en la façon,
Les arrange, & leur met mainte cheuille forté
Qui les serre & les ioint. Telle & de mesme sorté
Sa nauire il bastit, qu'un maistre ingenieux
La pourroit bien depeindre, & d'art industrieux
Descrire la voudroit, pour porter marchandises
Quelquefois sur la mer & choses plus exquises.
Telle doncques la fit Ulysses promptement,
L'entabla de ses mains ingenieusement,
De grands ais bien tailleZ, & de cheuilles dures
Dont il la voulut coudre, assembla les iointures,
D'antennes, & de mast fort & hault la fourmis
Après de gournail commode la garnit,

Qui conduire la peut sur les ondes legeres,
Fortement le lia de vimes & d'ozieres,
Pour le rendre plus fort contre les flots grondans
Et le contregarder, puis il porta dedans
Force pieces de bois, & matieres d'uisantes
Pour s'en servir au cas qu'il survint des tourmentes.
Cela fait Calypso des toilles luy donna,
Desquelles Ulysses ses voilles façonna:
En fin de cables forts & de cordes les serre,
Et dedans le flot son bacil pousse hors de terre.

Desja par quatre iours l'aube avoit éclairé
La terre, des rayons de son coche doré,
Et Ulysses avoit en diligence extresme
Tout son ceuvre achevé. Calypso au cinquiesme
Vint luy donner congé, prodigue luy faisant
De linge net & blanc maint precieux present,
Et d'habits odorans: puis la Deesse bonne
Luy fit d'un vin exquis remplir une grand tonne,
Et une autre d'eau fraische, & ces dons vont suivan
Viures en quantité, puis enuoye les vents,
Les prosperes soufflets des plus douces balenes.

Lors Ulysses ioyeux commence à voiles plenes
A se mettre sur mer, vogue de soing & d'art,
Prend en main le timon, & soigneux n'en depart:
Ne le lasche iamaïs, mais le tient tousiours ferme,
Et vigilant, ses yeux au sommeil point ne ferme,
Aux Astres il les tient, regarde diligent
Les Pleiades sœurs: le Bouvier morne & lent,
Qui se couche bientard, l'Ourse Arctos immolee
Iadis par Lycaon, des hommes appelée
Du nom de Chariot, se tournant, & chassant
Le superbe Orion qu'elle va menaçant,

LE V. LIVRE

Mais la seule, qui n'a iamais le privilege
De visiter la mer, & ne trampe son siege
Dans le creux Ocean, bruyant d'horrible son.
Ulysses avoit eu aduis de Calypson
De la laisser à gauche, & n'aller à la voile
Qu'il n'eust ainsi tousiours à costé cest' estoile.
Il avoit seurement passé deux fois huit iours,
Et l'autre vint apres, & deux fois neuf son cours,
Desia prenoit son train sur la campagne ondense
Lors que luy apparut la region ombreuse
Du terroir Phæaquois : du lieu où il estoit
Espace fort petit iusques là se iettoit
Ceste isle qui au fonds de la grand mer se cache
Sur l'eau ne paroissoit non plus qu'une rondache.

Mais le Prince des eaux qui de son fort trident
Esbranle terre & mers, reuenoit cependant
Des fins d'Ethiopie, & en iettant sa venue
Du Solyme monteux sur sa large estendue,
Vit le Dulichien derechef dessus l'eau
Qui ja gaignoit le port avecque son vaisseau.
Adoncques indigné, bouillant de flamme & d'ire,
Et branlant sa perruque ainsi se prit à dire.

Quelle honte! Les Dieux certe, ont changé d'aduis,
Et les premiers conseils ne sont pas ensuinis
Pour le faict d'Ulysses. Est-ce ainsi qu'on espie
Quand ie n'y seray pas, & qu'en Ethiopie
Ie sejourne empesché? Cependant l'Ithaquois
A presques ja gaigné le port des Phæaquois,
Où le destin a mis la fin à ses miseres,
Et rompt à son retour les fortunes contraires!
Mais ie croy que bien tost luy sera appresté
Subiect d'assez de mal & de calamité.

Ce disant il assemble en l'air tous les nuages,
Trouble toute la mer, appelle les orages,
Bouleverse les eaux, ébranle son trident,
Prend son sceptre en sa main, plein de courroux ardēt,
Mêle la mer au Ciel, & sa rude parole
Fait un seul tas des eaux, & les sujets d'Æole.
Anime forcenez : d'un nuage poisseux
Il couvre espaisement & la terre & les cieux:
Le iour est obumbré d'obscuritez funebres,
Du Ciel tombent en bas les espais tenebres,
L'onde est pleine d'horreur, Titan ne paroist plus,
Et l'antique Chaos, semble, se remet sus:
La terre s'en esmeut, & l'Amphitrite en tremble.
L'Est encontre l'oüest combat, & puis ensemble
Vont encontre le Nord, & puis entr'eux rangez
Contre le Su bouillant forcenent enragez.

Lors au pauvre Ulysses tous les membres frissonnent,
Il tremble des genoux, & ses esprits s'estonnent:

Pauvre moy, ce dit-il, quel estrange malheur
Me vient encor renoir, quel effroy, quelle horreur
De ces flots courroucez, quel orage m'entraîne,
Et pitoyablement ma barque ainsi demeine?

Calypso s'ay-ie peur, m'aura dit verité,

Elle m'a de cecy souvent admonesté,

Que devant qu'arriver en mon Ithaque chere

I'aurois bien à souffrir, & que mainte misere

M'attendoit derechef sur le cruel des eaux,

Où i'estois menacé d'un million de maux:

Voicy, c'est à ce coup. Quelles horribles nues

Iupiter maintenant en l'aer tient estendues,

Comme les vents les vont deschirans furieux,

Comme les flots troublez montent iusques aux Cieux,

LE V. LIVRE

Comme l'orage fier agite ma nauire,
 Comme les vents cruels vont vomissans leur ire,
 La mer ne varien plus que de mort menaçant,
 Et tout abbaye apres mon vaisseau perissant,
 C'est faict, ie suis perdu, ô trois fois, voire quatre
 Heureux, ceux que la mort scent deuât Troye abbatre,
 En presence des leur. O Grecs bons bataillans,
 Qui de grand cœur alliez les Troyens assaillans,
 Presens les fils d'Atreus, fussay-ie souz les armes
 En ce temps là tombé au milieu des alarmes
 Alors que les Troyens leurs iauelots branlans,
 Demenans dessus nous leurs constelas sanglans,
 Combatoient de pié ferme, & le corps mort d'Achille
 Taschoient accouragez, de tirer dans leur ville!
 Fussay-ie succombé souz leurs armes, alors!
 M'eust-on tiré la vie en ce temps là du corps,
 Dessus les champs Troyens, au milieu des batailles.
 On m'eust faict pour le moins d'honnêtes funerailles,
 On m'eust faict de l'honneur, & mes faicts vertueux
 Eussent esté louez des Grecs aux longs cheueux!
 Maintenant le destin fier & impitoyable
 Me force de perir souz les eaux miserables!
 De mourir submergé, & par les bleus glaçons
 Agité, deuenir la proye des poissons.

Comme il parloit encor, vne forte tempeste
 Sifflante luy donna tout autour de la teste,
 Qui sans-dessus-dessous la mer bouleuersa,
 Et en dépit de luy sa barque renuersa.
 Allant tomber plus loing le timon luy eschappe,
 Un vent donne cruel contre le mast, le frappe,
 Le rompt par le milieu. Ce fut un tourbillon
 Qui venoit furieux du costé d'Aquillon,

Les voiles à ce coup tomberent deiettees,
 Les antennes en mer cheurent precipitees,
 Neptune sous le flot le retint longuement,
 Et ne peut reuenir sur l'eau si vistement,
 Car il y fut poussé de grand force, & d'extresme
 Impetuosité, & si sa robe mesme
 Trempee l'empeschoit : Present dont Calypson
 Ainsi comme il montoit en barque, luy fit don :
 A la fin il reuint, & l'eau trouble & salee
 Vomissoit à grands floes, qu'il auoit auallee,
 Sa barbe & ses cheueux tous trempes en estoient,
 Et d'escume couuerts sur son sein degoutoient.
 Mais cōbien qu'il fust presque hors de vie & d'haleine
 Il ne s'oublia pas, se leue à toute peine,
 Se reiette en son bac, & fit vn grand effort,
 Et se dressant sur l'eau pour eschapper la mort.
 Il n'y fut pas si tost, que Neptune contraire
 L'attaque derechef de bourrasque plus fiere,
 L'entrenne demy mort, & le demene errant,
 Sur les flots plus irez de son viste courant :
 Comme l'on void la bise aux siffantes narines
 Demener les festus & les seches espines
 Par le trauers des champs, & si fort les rouler
 Qu'elles viennent en fin se ioindre & se mesler,
 D'embarassement fort, si long temps promenees :
 Ainsi les vents cruels, les ires mutinees
 Demenent sans mercy, & tempestent sur l'eau
 Et le pauvre Ulysses & son foible vaisseau.
 Le pluieux Auster ores cede à Boree
 Qui le vareiettant sur la plaine azuree,
 Or Euris à Zephire, & Zephire au Levant,
 Et le va chacun d'eux à son tour poursuivant.

LE V. LIVRE

En tel danger le vit une Naxade belle,
Elle auoit autresfois esté femme mortelle,
Comme elle frequentoit en ces terrestres lieux,
Or' elle s'est acquis honneur égal aux Dieux
Ino, pour la beauté de ses talons vantée,
La fille de Cadmus, la Nymphé Leucothée.

Elle vit Ulysses en ceste affliction
Se complaindre, & en prit grande compassion,
Se transforme en plongeon, en legere Alcionne,
Qui sur le bord des eaux pour la plus part s'adonne,
S'en va demy volante & mi-nageante en l'eau,
Puis approchant de lui saute sur son bateau,
Et lui dit en ces mots: Quel Neptune moleste
Sur l'onde infortuné t'agite & te moleste.
Terrible & courroucé? Et te fait si souvent
La fortune de mer & le iouët du vent?
Qu'il face, & contre toy tant qu'il voudra s'aigrisse,
Il ne scauroit pourtant faire que tu perisse,
Bien que soit son desir. Mais maintenant croi moy,
Laisse ta barque aller au vent, despoille toy
Tu feras sagement, si tu te mets à nage
Tu gaigneras Phæaque & le prochain rinage:
C'est là que le destin veut tes malheurs finir,
Et te faire en Ithaque à la fin paruenir.
Pren ce voile immortal, mets-le sur ta poitrine,
Et n'aye point de peur de mort ny de ruine:
Mais dès que tu seras en terre, souuiens toi
De ne l'emporter pas, mais renuoye le moi:
Iette le dans la mer estant dessus l'arene,
Et puis t'en va tout nud où ton destin te mene.
Ayant ainsi parlé le voile lui tendit,
Et puis comme un plongeon en la mer se rendit.

*Cela faiet hesiter Ulysses, il souspire,
De son cœur courageux de tristes sanglots tire:
Helas, que ie crain fort, que ce Dieu, qui que soit
Ne me veille tromper, ou le cœur me deçoit.
Pourquoy me feroit il si cruelle deffence
De demeurer icy. Mais i'ay bonne esperance
De ne le croire pas. Car le bord que ie voy
Certainement par trop est esloigné de moy,
Et c'est là, ce dit il, qu'il faut que i'aille à nage
Si ie veux eniter ma perte & mon dommage.
Or ie me veux tenir à mon aduis premier
Tant que sera ma barque encor' en son entier,
Que ses ais la tiendront bien iointe & bien fermee
Et qu'elle ne sera du naufrage entamee
D'un cœur entier & fort dedans ie dureray,
Puis si elle se rompt, alors ie nageray:
Quand l'onde aura brisé ma barque tempestee
Et que ie me verray toute esperance ostee
De remede de salut, il sera temps alors
De donner à la mer & mes bras & mon corps.*

*Comme il estoit ainsi brouillé d'incertitude
Promenant son esprit en grande inquietude
Soudain, voicy s'enfler plus que deuant les mers
Et le vent esmouuoir orages plus diuers
Sur les flots demenez, Neptune se courrouce
Enuoye un tourbillon & dans la mer le pousse.
Comme on voit quelquesfois un vent fort & puissant
Demener par les champs le festu iaunissant
Qui s'espard ça de là dessus le sec riuage.
Tout de mesme l'effort de ce cruel orage
Dispersa dans la mer la nauire & le bois
Et ses aiz entablez. Ulysses toutesfois*

LE V. LIVRE

T'asche monter sur vne, & de mesme qu'on saulte
 Sur le dos d'un cheual, il n'y faiet point de faulte,
 Les habits qu'en partant luy donna Calypson
 Soudain il les despoille, & le voile d'Inon
 Dessus son estomac il lie en diligence,
 Et sautant du batteau dans la mer il s'eslance,
 Il demene les bras. Comme il les eslançoit
 Des ondes au trauers Neptune l'apperçoit,
 Et branlant sa perruque ainsi se prit à dire.
 Ayant ainsi souffert sur mon puissant empire
 Nombre infiny de maux, errant tu vogueras
 Iusques au temps prefix que tu approcheras
 Des hommes nourrissons des puissans Dieux celestes.
 Tu ne te moqueras toutesfois de ces restes
 De maux & de douleurs, ny des dangers aussi
 Que tu viens d'eschapper, car ie l'espere ainsi.

Ayant ainsi parlé, plein de colere fiere
 Il pouffe ses cheuaux à la belle criniere,
 Puis en Aiges paruint sa splendide maison.

Pallas vit cependant l'opportune saison
 De faire un autre effect. Cecy donc elle pense,
 A tous les autres vents elle impose silence,
 Boucha leurs soupiraux, les flots esmeus dompta,
 Mais le seul Boreas en mer elle excita,
 Iusqu'à tant qu'Ulysses l'inclite Roy d'Ithaque
 Fust en toute seurte abordé en Phæaque
 Experte en auirons, & que de vif effort
 Eschappé du destin il eust fuy la mort.

Deux iours, autant de nuits il erre, ayant presente
 La mort deuant ses yeux sur la vague inconstante,
 Et le troisieme iour que l'aube paroissant
 Eut monstré le retour de son char iaunissant

Les vents resterent cois, la mer devint paisible,
L'obscurité cessa, tout le murmure horrible
Des tempestes tomba, & les souffles hideux
Ne renverserent plus les fondemens ondeux.
Il voit alors la terre, il regarde la greue
D'un œil vif & agu, & le flot le souleue.

Aux enfans bien appris la vie ainsi reuient
Pour celle de leur pere, hélas, que la mort tient,
Que la peste a saisi d'humeur contagieuse,
Il sent mille douleurs tant l'enfleure odieuse
Le tourmente & le bat, & sous le triste effort
D'un démon courroucé n'attend plus que la mort.
Mais les Dieux à la fin deslient leur tristesse,
Luy renuoyent la vie, & l'ostent de detresse
Luy rendant sa santé. Telle la ioye fut
Du prudent Ulysses, alors qu'il appercent
La terre & la forest, il brule en son courage
De desir de monter des pieds sur le riuage,
Il nage en grand plaisir: pour ce fait son effort
De demener les bras de plus fort en plus fort.
Il approchoit autant, comme la voix peut rendre
Ses propos entendus quand elle veut s'estendre,
Quand il ouyt des flots le son impetueux
Contre les durs rochers frappant impetueux,
Et les gémissemens hideux espouuentables,
Les vagues qui donnoient es antres effroyables.
La mer en blanchit toute, & le flot qui refuit
Le bord, l'ayant battu redonne un tresgrand bruit.
Là ne se void nul port, & là ne se decouure
Rade, ny lieu fermé qui les nauires couure:
Là ne se trouuent lieux courbez obliquement
Qu'on se puissent loger les barques seurement,

LE V. LIVRE

Qui derompent les flots, dont la fosse opposée
 Aux tourbillons venteux rende l'onde apaisée,
 On n'y voit que rochers, dont les piliers trempés
 Des eaux, sont jusqu'en hault horriblement coupés,
 Les grands costaux pierreux, & les antres qui donnent
 Horreur aux regardans hideusement resonnent.
 Alors à Ulysses tout le cœur frissonna,
 Il trembla des genoux, de l'estomac donna
 Un soupir tresprofond: Moy, dit-il, miserable,
 De ce que Iupiter m'a permis favorable
 De voir ceste contree, & le bord désiré
 Qui de moy s'enfuyoit, d'un lieu non espéré,
 J'ay trauersé tant d'eaux à nage, & leur issue
 De moy, las & recré, ne peut estre apperceüe,
 Car par delà, le roc aigu se va haussant,
 La mer impetueuse au pied va fremissant.
 Les antres sont pleins d'eau, & la pierre licée
 Tout à l'entour du bord s'estend entrelasée,
 La mer escume toute, en son gouffre profond
 On ne peut prendre pied, on ne trouue le fond
 Pour prendre un peu haleine, & que ie ne me noye,
 Et possible en sortant quelque vague m'enuoye
 Contre le dur rocher, & me donne la mort,
 D'y vouloir resister vain sera mon effort.
 Si nageant outre aussi quelque part ie rencontre
 L'ouverture d'un port qui sa bouche me monstre,
 Ou que ie voye ailleurs un riuage baissé
 Que les flots escumeux des eaux auront laissé
 Et i'y vueille donner, ie crain que quelque orage
 Ne se r'esmeue encor' me iettant dauantage
 Dans les eaux entrenné, ou que le Roy ondeux
 Ne m'enuoye au deuant quelque monstre hideux

Qui me vienne engloutir, ou quelque grand Baleine
Comme en nourrit la mer, & s'en trouue assez pleine.

Car ie voy, & ie l'ay trop experimenté,
Que contre moy Neptune est beaucoup irrité.

Comme Vlysses faisoit ces discours en lui-mesme
Voicy un grand mont d'eau qui d'une force extresme

Le pousse au bord pierreux, par tout environné

De rochers & d'escueils : où le flot mutiné

Forcene, enrage, boult. Là sa peau détranchée

Se fust piteusement sur la pierre écorchée,

Et se fussent ses os brisez horriblement,

Si Pallas ne luy eust donné le iugement

D'empoigner viftement la pointe d'une roche,

Où soudain il se iette, & gemissant l'accroche,

Attend patiemment que le flot soit passé,

Et que quelque bon vent en mer l'ait repoussé.

A grand peine s'estoit ceste vague écoulee
Qu'une autre se leua de la grand mer troublée,

Qui retombant le pousse, & se precipitant

Le frappe, & dans la mer au loing le va iettant

Comme le poulpe issant de son trou dessus terre,

Acroche de ses pieds mainte petite pierre,

Et ne les veut lascher : Vlysses se ferroit

Ainsi contre le roc ferme, & se deschiroit

Tout la peau des mains : & comme encor il tasche

De nager, un grand flot le submerge & le cache :

Nonobstant les destins s'estoit fait de ses iours

Si Minerue ne fust venue à son secours,

Et ne l'eust conseillé, deliuré de l'orage

De gagner hors de l'eau & de se mettre à nage,

En regardant la terre. Il se prit à nager,

Et cherchoit quelque endroit où il se peut ranger :

LE V. LIVRE

L'haleine luy battoit de lassitude outree
 Alors qu'il arriva dans la plaisante entree
 D'un fleuve doux coulant, fleuve delicienx
 Menant ses eaux d'un cours gentil & gracieux
 Celieu, dont l'onde estoit & calme & appaisee
 Tres-propre luy sembla. Sa riviere estoit aisee,
 Et basse tout le long, un peu élis & droit
 Muraille çà delà l'emboucheure monstroït
 A ceux qui arrivoient & plaisante & facile:
 Celieu contre les vents demouroit immobile,,
 Et les fiers tourbillons n'y avoient point d'accès,
 Auquel lors adressa sa parole Ulysses.

Qui que tu sois, ô Roy, reçois moy ie te prie,
 Moy pauvre suppliant, sauve ie te supplie
 Ce demeurant des flots, & fuyant de Neptun
 Animé contre moy le courroux importun.
 Mesme aux Dieux immortels celuy est venerable
 Qui vient à leur refuge errant & miserable,
 Ainsi qu'ores ie fais, ayant à toy recours,
 Tes genoux embrassant, me iettant dans ton cours,
 Après avoir beaucoup enduré de traverses.
 Pren moy donc à seurté dedans tes ondes perses,
 Pren, ô Roy fleuve-Dieu, compassion de moy,
 Puis qu'humble suppliant ie me prosterne à toy,
 Et viens à ton refuge. Esmeu de sa priere
 Le Dieu retint soudain le cours de sa riviere,
 Tint devant luy ses eaux en grand tranquillité,
 Si que dans l'emboucheure il vint à sauveeté.
 L'un & l'autre genouil il plie à toute force
 Et ses deux fortes mains: son cœur n'a plus de force
 Tant il est harassé. Tout le corps luy trembloït,
 De la bouche & du nez l'eau salée il souffloït.

Lors le poulx, & la voix & le cœur luy faillirent,
Et grandes lassetez ses membres assaillirent.
Mais quand il eut pris air & respiration,
Que son poulx eut repris son agitation,
Et l'esprit luy revint : le voile alors il laisse,
L'oste d'autour de luy, le rend à la Deesse,
Et le iette en la mer. Derechef s'agita
Le flot, & à la Nymphé Ino le remporta
Sur le cours de ses eaux. Elle adencques aduancé
Ses immortelles mains, le leue en diligence,
Et des coulantes eaux le retire & reçoit.

Ayant laissé le fleuve où le rozeau croissoit
Soubs le iong il se iette, humble il baise la terre,
Et puis en gemissant ces souspirs il desserre,
De son cœur genereux : Las que i'ay de soucy,
Que deuiendray-ie en fin ? Si ie demeure icy
Et veux passer la nuit dessus ceste verdure,
Ie crain que la rosée & ta lente froidure
Qui tombent le matin ne viennent m'acheuer :

Car le vent aspre souffle auant que le leuer
De l'aube soit paru : Et si mes pas i'adresse
Dedans ceste forest ainsi sombre & espaisse,
Où ie me couche au pied d'un cost au nuageux,
Et ie prens le penchant d'un vallon ombrageux,
Le sommeil là m'accable, & le froid ne m'y prenne,
Ie crain que quelque beste ou quelque Loup ne vienne,
Et me mange en dormant. Ayant bien vacillé,
L'aduis de la forest meilleure luy a semblé.
Tellement qu'il s'en va dans la forest profonde
Plantée pres du fleuve, & plus proche de l'onde,
Où l'air est le meilleur, & le bois est ouuert
En lieu bien eminent. De feüilles s'est conuert

LE V. LIVRE

Soubs de deux arbres ioints la naturelle voulte,
 L'un croist aupres de l'autre, & plaisamment arc bouté.
 L'espace estoit petit par où ils s'atteignoient,
 Et leurs rameaux feuillus les bras espais ioignoient,
 L'un est un olinier, & l'autre un oliuastre.
 Là iamais du vent froid le soufflé opiniastre,
 Ny l'humide coulis du vent ne penetra:
 Là iamais du Soleil le chaud rayon n'entra,
 La pluye n'y paruint: tant ces deux plantes belles
 Auoient ioint fortement leurs branches naturelles.
 Ulysse entre dedans, accommode son lit,
 Autant ample qu'il vent pour y passer la nuit:
 Car il y auoit là quantité si extresme
 De feuilles, qu'au plus fort d'un plus rude hyuer mesme
 Au temps que la froideur bat plus terriblement,
 Et la glace se prend le plus horriblement
 Deux hommes, voire trois, coucheZ l'un pres de l'autre
 S'en couuroient à l'aise. Ulysse là se veautre
 Allaigre & fort content, s'y pose mollement,
 Et du grand tas espais se couvre chaudement.
 Ainsi que le soigneux qui ne se veut attendre
 Au secours emprunté, couvre bien soubs la cendre
 Son tison allumé, de peur de perdre en fin
 Le lenain de son feu: Car là n'est nul voisin,
 Sa maison est assise au bout d'une grand plaine,
 Et d'en chercher ailleurs sa peine seroit vaine,
 Et ne viendrait à temps ce secours emprunté,
 En cas qu'il luy survint quelque nécessité.
 Ulysse tout ainsi de feuilles s'environne,
 S'en cache tout couuert, & le sommeil luy donne,
 Relasche à ses trauaux: car les larmes aux yeux
 Il s'estoit endormi pensif & soucieux:

Il repose

DE L'ODYSSEE.

*Il repose son mal, & Pallas secourable
A ses ennuis donna ce repos agreable.*

Fin du cinquiesme Liure.

LE SIXIESME LIVRE DE
L'ODYSSEE D'HOMERE.

ARGUMENT.

Pallas se presente en songe à Nausicaa fille d'Alcinoüs,
l'amoneste d'aller le matin à la riuiere pour faire lauer
& nettoyer ses robes, pource qu'elle deuoit bien tost
estre mariee: elle y va, & iouant avec ses damoiselles, il ad-
uient qu'à leur bruit Vlysses qui estoit endormy se reueille,
va trouuer Nausicaa, & la supplie de luy donner viures & ha-
bilement. Ce qu'elle faict, puis il la suit en la ville.

AUTRE SOMMAIRE.

*L'infante de Corfon recoit benignement
Ulysse, & le secours de viure & vestement.*

Vlysses sommeilloit sous les fueilles mussé;
Rompu de lassitude & d'ennuis oppressé:
Quand chez les Scheriës & dedans la cōtree
Des Phæaquois, Pallas auoit fait son entree:
Es champs Hyperiens ils auoient habité
Pres les felons Cyclops, orgueilleux en fierté,
Qui leur firent long temps aspre & cruelle guerre,
Dont ils furent contrains d'abandonner leur terre;
Car ils estoient plus forts, cela fit débarquer
Nausithous delà, qui puis se vint parquer

LE VI. LIVRE

*Auecques tous ses gens bannys de sa Prouince
En l'Isle de scheriz, en laquelle il fut Prince.
Il vint relascher là, & se choisit ce lieu
Loing d'hommes aduisez, assis au beau milieu
De la bruyante mer: Il y rendit fertiles
Les champs, qu'il cultiua, il y bastit des villes,
De murs les circuit, y fit de fortz chasteaux
Qui paroissoient en l'air & superbes & haultz:
Aux Dieux il fit aussi temples & maisons belles
Puis partaga les champs en portions nouvelles.*

*Or quand les Parques seurs le fil eurent couppe
Du fort Nausithoüs, que la mort l'eut frappe
L'enuoyant chez Pluton, aux bordz Phlegetontees
Visiter à son tour les lieux Acherontees,
Alcinous son filz, enfant digne & royal,
En vertu & prudence aux immortelz egal
Au regne succeda. Aux hommes il commande
Et du Sceptre iouyt. Dedans sa maison grande
La Tritonide entra: Pour au fort Vlysses
En seurte la dedans faciliter l'acces
Elle entra dans la chambre, & vint à la couchette
D'ouurage industrieux, où dormoit la filleite,
De teint & de visage en beauté ressemblant
Les immortelz qui vont sur le Ciel s'assemblant,
C'estoit Nausicaa la pucelle d'estime
Fille d'Alcinous le Prince magnanime
Aupres d'elle couchoient d'un & d'autre costé
Deux filletes, ayants, des graces la beauté.
Les portes reluysoient. Où passant la Deesse
Comme un vent aprocha du lit de la Princesse,
Se tint sur le cheuet, ayant pris le semblant
Tel que l'auoit la fille au pilote Dymant:*

Qui luy ressembloit toute & de ieunesse & d'aage.
A qui ouurant sa bouche elle tint ce langage.
T'a on donc mise au monde, ô la fille du Roy,
Pour faire ainsi tousiours si peu de cas de toy?
Aduise vn peu comment tes robes d'excellence
Demeurent sans nul lustre, & par ta negligence:
Tes nopces ce pendant sont proches, & il faut
Que tu prennes ce iour ton apparat plus hault,
T'habillant richement de tes robes plus belles,
Et les autres donnant à tant de Damoiselles
Qui t'accompagneront. Entre la nation
On acquiert ce faisant grand reputation,
D'ou grand plaisir reuient au pere & à la mere.
Demain, des que l'Aurore ouurira sa lumiere
Allons nous en lauer. ie t'y assisteray,
T'ayderay a lauer, & ne te laisseray
Que nous n'ayons tout fait: & sans que ie t'eslogne
Ne viendray que ne soit parfaite la besogne.
Car tu ne seras pas fille fort longuement:
Et ie scay que tu es desirée ardemment
Des principaux Seigneurs de toute la ieunesse
Qui soit en Phaacie, & que de la noblesse
Tous les plus apparens ne recerchent que toy,
Qui est du pais mesme & la fille du Roy.
Donques le point venu que le soleil approche
Va t'en prier le Roy qu'il te preste son coche,
Qui te puisse porter robes, habillemens
Et iuppes & manteaux & beaux accoustremens
A conuert, avec toy. Ainsi plus honorable
Te sera ce carrosse, & bien plus conuenable
Que te voir par les champs à pié trotter ainsi,
Car le lanoir est loing & la riniere aussi.

LE VI. LIVRE

Ayant ainsi parlé, legere elle se guide
 Sur le celeste Olympe au trauers de l'air vuyde
 Là le siege est des Dieux, leurs regnes supernelz
 Et le tresferme effieu des poles eternalz,
 Que n'esbranlent iamais les vents ne leur furie,
 Que ne mouillent iamais l'orage ne la pluye,
 Que ne gelent iamais la nege & le verglas,
 La gresle, ny le froid. Leur force n'atteint pas
 Iusque au ciel luyfant. Là tousiours sans nuage
 L'air clair y resplendit, le iour sans nul ombrage
 Sans fin y luit ioyeux, & iamais ne le suit
 En ces heureux quartiers la morfondante nuit.

Là donc se retira Pallas Tritonienne
 Apres qu'elle eut laissé la Nymphé Seheriennes
 Aussi tost l'aube vint au chariot vermeil
 Qui a Nausicaa excita le sommeil.
 Resueillee qu'elle est en soy mesme elle admire
 Le songe qu'elle a faiet, luy tarde de le dire
 A la Reyne sa mere & à son pere cher,
 S'encourt par la maison vistement les chercher.

Dedans leur chambre encor les trouue la pucelle,
 Sa mere estoit assise, & mainte Damoysselle
 Aupres d'elle seant, dont les vnes filloient
 Du poulce retordant le fuzeau qu'ilz rouloient,
 Assises pres du feu, & les autres, la laine
 Et le pourpre mesloient d'une agreable peyne
 Pour vn ouurage exquis: La Reyne les bastoit.

Or elle rencontra le Roy comme il sortoit
 Pour aller au conseil des Rois, où ceux de l'Isle,
 Tant Princes & Seigneurs que bourgeois de la ville
 L'auoient faiet requerir de se vouloir trouuer,
 Et les aduis meilleurs de chascun espronuer,

Elle luy parle donc & pres de luy s'approche.

Pere cher, voudriez vous m'ayder de vostre coche
Pour me mener au fleuve, & laver nettement
Mes robes, qui s'en vont sales entierement?
Car puis qu'estes assis au conseil venerable
Avec tous ces seigneurs, il est bien conuenable
Que vos habillemens soient candides & netz,
Ainsi qu'est vostre corps. Cinq enfans vous sont nez
Excellens, deux desquels sont iointz par mariage,
Les trois qui sont encor en leur premier ieune aage
N'estans pas mariez, veulent tousiours porter
Leurs accoustrementz netz, & scauent bien noter
S'ilz ne sont reblanchiz: Que si le bal se dresse,
Ilz y vont les premiers exercer leur ieunesse.
Or ceste charge là tumbe totalement
Sur moy, qui suis de vous aymee uniquement.

La pucelle rougit deuant son pere, & sage
N'osapas prononcer ces motz, de mariage,
De nopces, d'espousee, & d'aage, de desir:
Encor que le vieillard qui y prenoit plaisir
S'en apperceust assez, & de douce maniere,
Luy dit, Je le veux bien, ô ma fille tres-chere,
Mules & chariot, ie ne te les pleins pas,
Va pren les, & fais en tout ce que tu vaudras.
Je m'en vais commander à mes gens qu'on apreste
Mon chariot doré, & que l'on le te preste,
Les roues quant & quant aux retz bons & parfaitz
Et faictes de bois fort pour porter un grand fais.

Ce disant à ses gens aussi tost il commande
D'appareiller son char. Eux de vifesse grande
Courrent luy obeir, sortent diligemment
Le chariot dehors, courant legerement

LE VI. LIVRE

Par les mules tiré, qu'ils prennent, les attellent,
 Leur mettent le harnois, puis la Princesse appellent,
 Qui de sa chambre sort. Portant ses vestemens,
 Et chargent sur le char maints beaux accoustremens.
 Sa mere luy fournit grandes pleines corbeilles
 De viures & de chairs exquisés à merveilles,
 Après luy fit remplir de délicieux vin
 Vne grand peau de bouc: puis un vase d'or fin
 D'huile humide & coullant, pour soindre estant lauee
 Et ses filles aussi. elle estoit esleuee
 Desia dessus le char, prend le fouet en la main,
 Les mules sollicite. elles partent soudain
 S'entans qu'on leur donnoit dessus le colles rennes!
 Elles vont s'allongeans & galopent soudaines
 Faisans force rumeur, portent tout à la fois
 Et pucelle royale & Nymphes, plaisant poids,
 Et tous les vestemens. Tant qu'en fin paruenues
 Au fleuve au verd rinage, elles sont descendues
 Aux lieux où se ioignoient continuellement
 Les lauoirs scheniens. A l'endroit iustement
 Ou les vagues estoient & haultes & profondes,
 Le canal leur couloit belles & nettes ondes
 Pour si lauer assez: elles delient lors
 Les mules de leur char, & tout le long des bordz
 Les enuoyent du fleuve, où leur ventre elles chargent
 De l'herbage des prez, puis les Nymphes dechargent
 Les habitz hors du char, & les vont blanchissant
 Dans les lauoirs des eaux du fleuve noirçissant,
 Et lauent a l'enuy. Quand les taches frottees
 Dans l'eau a belles mains furent toutes ostees
 Leurs vestemens rangez elles vont estendant,
 Sur le granier bien net, que l'onde en descendant

Dans la mer, quelques fois sur le riuage enuoye,
 Amassé le submerge & le laue & nettoye,
 Cela fait, tout le corps au fond du fleuve fraiz
 Elles se vont lauer, & puis s'oignent apres
 D'odorant liqueur, à repaistre se mettent,
 Cependat qu'aux chaleurs, que les chaultz rayõs iettēt
 Du soleil, tout soit sec. Apres que leur desir
 De manger, fut replet, elles prennent plaisir
 De iouer à la balle, & leurs guirlandes belles
 Leurs bouquetz émaillez iettent les damoiselles
 Contre terre à leurs piedz, se vont les estre ostant.
 Mais sur toutes alloit mignardement chantant
 La royalle pucelle, aux grasses pleines branches
 Aux bras d'fuoire rondz & aux espaulles blanches.

Telle qu'on void Diane ayse se promener,
 Et faire sur son dos ses flesches resonner,
 Ores sur l'aygette, ores sur Erimante
 De courir aux cheureux & ioyeuse & contante
 Ou bien apres les cerfs. Les Nymphes tout aupres
 Race de Iupiter, sous le feuillage fraiz
 Vont iouant & dansant: une ioye enuironne,
 D'ayse tente le cœur de sa mere Latone
 Qui voit incontinant ces Nymphes accourir
 Les deesses des bois, affin de la servir:
 Et la suinent au bois, & sur le verd de l'herbe.
 Elle va cheminant le front haut & superbe,
 Les Nymphes de la teste entiere surpassant,
 Et de loing pour maistresse on la va cognoissant.
 D'elle chascune est belle, & digne d'estre aymee,
 Mais Diane seule est la plus belle estimee.

Telle Nausicaa sur toutes paroissoit
 Et de forme & beauté les autres surpassoit,

LE VI. LIVRE

Preste à s'en retourner ses filles elle appelle
Demande le carrosse & presse qu'on attelle,
Que les bardes on serre, & chaque accoustrement
Sec & net comme il est soit plié proprement.

Au mesme temps Pallas inuentive à merueille
Pour faire qu'Ulysses du Sommeil se reueille
Voie Nausicaa la belle, qu'avec soy
Elle luy donne entree en la maison du Roy,
Medita ce moyen : c'est que de vehemence
Contre une sienne fille une balle elle eslance,
Mais par cas fortuit Nausicaa faillit
Et la balle sans coup dans le fleuve saillit,
Dans le gonffre profond elle tumba perdue,
Se cacha dedans l'onde & ne fut depuis venue.

Les Nymphes à ce coup au ciel haussent leurs voix,
Et de leur cry hantain resonne tout le bois:
A ce resonnement Ulysses se reueille
Se leue en son seant, & beaucoup s'esmerueille:
Pense en beaucoup de chose, & dit en son priuè,
En quel pais, mon Dieu, pourrois-ie estre arriuè
Quel peut estre ce lieu, quelle mer, quel riuage,
Quelle humeur d'habitans? si farrouche & sauuage,
Incivil, rustaude, & fiere en cruauté:
Où bien s'ils sont benins, douez de pieté?
Mais, n'ay ie pas ouy des voix, & des criries
De Nymphes s'esleuer du costé des prairies?
Font elles leur demeure en ces ombrageux monts,
Où dans les lieux secrets de ces antres profonds,
Où dedans ces forests belles & gratieuses,
Où bien parmy ces champs & plaines spacieuses?
Où sont-ce hommes, vers qui ie suis or arriuè,
Qui ont dessus ces champs ce tumulte eslené?

Mais de les aller voir, quel danger, quel dommage?
J'iray, le tenteray, le verray davantage.

Il dit, & tout soudain par la forest s'en va,
Vn grand rameau feuillu d'un arbre il enleva,
Et en cacha sa honte. Il sort nud, miserable,
De la forest, pareil au Lyon redoutable,
De poil & de criniere, & de bouche hideux:
Nourry dans la montagne, & qu'un vallon pierreux,
Une ombreuse forest ont par beaucoup d'annees,
Maintenu, defendu: les pluyes effrenees,
Les vents l'ont combattu, de la forest il sort
Presomptueux, de quoy il se sent estre fort:
Il branle sa criniere, anime son courage,
Agite sa fureur, & demaine sa rage,
Sa bouche iette flamme, il brille de ses yeux,
Et par tout il les va promenant furieux:
Puis se darde sans peur, & sur les bergeries
Ou dessus les Toreaux empourpre ses furies,
Il déchire, il esgorge: où tantost és deserts
Il se iette animé, & sur les peureux Cerfs
Sa moustache ensanglante: Aussi la faim horrible
Et le ventre affamé l'ont faict ainsi terrible,
L'ont contrainct de donner iusques dans les rampars
Que le soigneux paysant a munis de feuillars.
De mesmes Ulysses aupres des Nymphes belles
Ainsi nud s'approchoit, ses fortunes cruelles
Et la necessité l'ont iusques là forcé:
Ainsi leur paroist-il horrible & herissé
Du froid & de la mer, les fillettes craintives
Le voyans, çà delà s'enfuirent hastives,
Où la soudaineté premiere les porta,
Et tout le long du bord chacune se ietta,

LE VI. LIVRE

Et la peur à leurs pieds leur attacha des aisles.
 Mais Nausicaa seule entre ses Damoiselles
 Fit ferme, sans trembler. Car Pallas luy poussa
 Force, courage, & cœur, & sa crainte chassa.
 Comme il la regardoit, elle demeura ferme:
 Et le Dulichien ne sçauoit en quel terme
 Il se feroit entendre, où s'il luy toucheroit,
 Se baissant, les genoux, ou s'il demeureroit
 Quelque peu esloigné, luy faisant sa requeste
 Qu'il luy pleust luy monstrier quelque demeure hõeste,
 Quelque lieu de retraite, & benigne, luy fist
 Par hospitalité present de quelque habit.

Il resolut en fin sa douteuse pensèe,
 Qu'il parleroit de loing, de peur que courroucée
 De sa presumption, elle ne le punist
 Pour luy auoir touché, qu'elle ne le bannist
 Sans l'ouyr, de sa veuë. Ainsi donc il commence.

Me voicy suppliant, Reyne, sois ma deffence,
 O comme doy- ie dire, & comme te nommer!
 Soit que tu sois du rang des Nymphes de la mer,
 Soit que tu sois Deesse, ou de mortelle race.
 Si Deesse, & de ceux que le hault Ciel embrasse,
 Certes tu es Diane, & fille grandement
 De Iupiter aimée, en forme entierement,
 Entaille & en maintien tu luy es comparable,
 Et le voyant, ie voy sa figure honorable.
 Si de race mortelle, & l'une par hazard
 Des femmes du pays habitans ceste part.
 O bien-heureux ton pere, ô heureuse ta mere,
 O trois fois bien-heureux & ta sœur & ton frere,
 Quel plaisir ce leur est, quel grand contentement,
 Et comme leur esprit fleurit all'aigrement,

Quand, comme un fruit exquis ou plante d'excellence,
Ils te voyent heureux t'en aller à la dance:

Mais tres-heureux sur tout celuy qui te donra

Son ame par amour, qui te fiancera,

Dont tu seras la femme, & de liesse pleine

Te menera peupler son paternel domaine.

Certes ie ne vy onc mortel semblable à toy,

Ou soit homme, ou soit femme: une femme ie croy

Mortelle, n'est pas telle, & tant plus ie t'admire,

Plus ie deuiens muet, & ne sçay plus que dire.

N'apas long temps ie vy reuenant de Delos

Aupres du saint autel du grand Dieu Apollos

Une palme dresser au Ciel ses branches belles,

Aux estoilles monter, disputer avec elles

A qui plus hault iroit. I'admirois grandement

Son feuillage superbe, & i'en fus longuement

Estonné & rauy (car sur la mobile onde

I'auois nauigé là, avec tout plein de monde

Qui venoit avec moy, & certes mal-heureux

Me fut fort ce voyage) & ie vy en ces lieux

L'arbre que ie te dy sur tous émerueillable,

Car ie n'en auois veu de ma vie vn semblable.

Les Estoilles du Ciel il baiçoit se haussant,

Et ie suis hors de moy seulement y pensant.

Ie t'admire de mesme, ô vierge belle & sainte,

I'en suis tout hors de moy, & ie tremble de crainte

En voulant embrasser tes genoux precieux

Affligé que ie suis. Le sort malicieux

M'a beaucoup accablé, & la fortune aduersé

Tres-pitoyablement me bat & me renuerse:

Car hier inſtement huit iours sont accomplis,

Iour déplorable à moy, que sur les creux replis

LE VI. LIVRE

M'ont agité les vents, & qu'ayant fait naufrage
 Tant le malheur m'est grand, ie me sauuy à nage,
 Les orages cruels m'ont ainsi tourmenté,
 J'ay en dessus les eaux tousiours l'obscurité
 Depuis l'isle Ogygie, & par la mer cruelle
 Misérable ay couru, tant qu'en ceste isle belle
 Le sort, ou quelque Dieu m'ayent en fin poussé,
 Pour esprouuer encor le destin courroucé,
 Et ie la pense ainsi. Car des Dieux la colere
 Ne borne point encor ma trop longue misere.

Ie me suis adressé premierement à toy
 Qu'à pas un du pays, pren donc pitié de moy,
 Car ien'ay veu personne, ou de ceux qui demeurent
 Es villes, ou de ceux qui la terre labourent.
 Monstre moy quelque ville où i'aille vistement:
 Et si tu as icy habit ou vestement
 Dans tes coffres ferme, commandes qu'on les ouvre,
 Et qu'on m'en accommode, afin que ie m'en couure.
 Et ie prie aux grands Dieux que sans te contrister
 Ils te donnent de quoy ton ame contenter,
 A quelque bon mary sois-tu bien tost donnée,
 En puisses-tu auoir vne heureuse lignee,
 Et vostre mariage ait eternellement
 Pacifique duree, appuyé iustement.
 Au monde chose n'est plus utile & plaisante
 Que quand à son mary la femme est consentante,
 Le mary à sa femme, & quand de commun pié
 Ils vont ensemblement lians leur amitié:
 Sont en pareil respect, de bonne intelligence,
 Honorent leur maison de pareille prudence,
 Sont mutuellement de s'aimer studieux,
 Et leur toict paternel frequentent curieux.

Leurs ennemis de rage & de dépit en creuent,
Leurs amis en ont ioye, & leur cœur en esleuent,
Mais eux s'oyent à tous en honneur preferer.

A luy comme il finit ces mots vint proferer
Nausicaa la blanche. Ami, ie cuide croire
Que tu n'es point possédé de sottise ou de gloire,
Et que de bon aduis tu n'as aucun deffault,
Mais plustost que tu as le cœur & bon & hault.
Or le grand Iupiter qui se sied sur la nue,
Tant aux bons qu'aux mauuais ses tresors distribue,
Partage à son plaisir à son vouloir aussi
Ses biens comme il luy plaist. S'il t'en a fait ainsi,
Et qu'il t'ait enuoyé du mal en abondance
Comme il est apparent, te fault en patience
Prendre sa volonté. Or puis que te voicy
Abordé dans nostre isle, & ceste ville icy,
Tu ne chommeras point de robes necessaires,
Et tout ce dont il fault aider à tes miseres,
Tout ce que tu requiers, & ce que requerroit
Vn qui nud, miserable & pauvre arriueroit,
Tout te sera donné, puis te diray, facile,
Et le nom de ce peuple & le nom de la ville.
Ce sont les Phæaquois qui sont les habitans
De ces lieux que tu vois fertilement portans:
Ie suis d'Alcinoüs le magnanime Prince
La fille, il est regnant dessus ceste prouince
En iustice & vertu. Ainsi elle parla,
Et ses filles soudain en maistresse appella.

Ou courez vous ainsi, dit-elle, par la pleine,
Demeurez arrestez, quelle crainte vous meine?
Quel desordre est cecy? Qu'est-ce que vous voyez?
Vn homme. Et pour vn homme ainsi donc vous fuyez?

LE VI. LIVRE

Pensez vous que ce soit quelque ennemy sauvage
 Cruel hôte des bois : quel dans nostre riuage
 Sur les champs scherrens, ennemy estranger
 Aborder osera pour venir rauager?
 Hardy nous attaquer, nous prouoquer en guerre,
 Mettre à feu nos espritz & piller nostre terre?
 Nous nos chāps sommes tous au beau milieu des eaux,
 Du monde separez : Nauires ny vaisseaux
 Pour aborder icy n'arriuent temeraires,
 N'osent sans y penser passer nos eaux ameres.
 Puis nous ne sommes pas haiz des puissantz Dieux.
 Mais ce pauvre estranger à pris pied en ces lieux,
 Eschappé du naufrage, & perdu de misere,
 Il faut resolument luy faire bonne chere.
 Les Dieux ont tousiours eu des estrangers grand soin.
 Cestuicy desolé, miserable, & de loin
 Vient de par Iupiter : Tout ce que lon luy donne
 Tant petit puisse il estre est certes grande aumosne
 Tousiours c'est belle chose aux pauvres presenter
 Quoy que peu. Or sus donc que lon aille apprestier
 A manger & a boire : & vous aultres filletes
 Allez le nettoyer deuant dans les eaux nettes
 En l'endroit ou les ventz trop grands ne donnent pas
 A ces propos ayans un peu sursis leurs pas
 Elles s'arrestent, puis d'une course legere
 En s'entr'encourageans menent à la rinier
 Le miserable Ulysse. En un lieu l'ont conduit
 A l'abry, ou les ventz ne faisoient point de bruit :
 Portent habillemens & robes precieuses,
 Et dans un vase d'or liqueurs delicieuses
 De par Nausicaa, puis d'un courtois parler
 Luy dirent qu'il se laue au fleuve net & clair.

*A doncques Vlysses. Recullez vous fillettes
Tandis que ie me laue en ces ondes molletes
Sale de l'eau de mer: & de vous ie prendray
Ceste douce liqueur, & le corps m'en oindray
Fort las & harassé. C'est tout ce qu'il demande
Vain & matté qu'il est, l'espace estant bien grande
Qu'il n'eut nulle liqueur, huile, n'ognement doux
Pour se reconforter. Doncques reculez vous:
Me lauer deuant vous, m'oindre en vostre presence
Iamais ne m'aduiendra, i'ay trop de reuerence
A vostre honnesteté, & mesme ie rougis
Qu'ainsi nud deuant vous présenté ie me suis.*

*Il dit, & loin de luy s'en vont les Damoiselles
A leur belle maistresse en porter les nouvelles:
Mais Vlysses tout seul à l'aise se laua,
Se nettoya le corps, & la crasse enleua,
Dont le limon, l'escume, & la fange & le sable
Auoient sortant de l'eau sally le miserable.
Net & laué qu'il est, la liqueur riche il prend,
Et l'huile precieux sur ses membres respand,
Se pare des habits dont la royale infante
Luy auoit faict present. Pallas encor' l'augmente,
Luy donne plus grand lustre & plus grand' maiesté,
Hausse sa taille encor' & accroist sa beauté.
Sur son col en apres ses cheueux il déploye,
Les orne tant qu'il peut, les frise, les nettoye:
Elle les fit pareils aux fleurs de l'Hyacint:
Tout ainsi que l'argent par le maistre est enceint
De riches filets d'or, maistre à qui Vulcan mesme
A de son art appris la science supresme,
Que Minerve a dressé, qui donne entierement
A l'artisan subtil la main, l'entendement*

LE VI. LIVRE

Pour faire un beau chef d'œuvre, afin qu'en toute sorte
En l'art ou en la grace, honneur il en remporte:

De mesme elle souffla sur sa teste & son corps
Et la grace & l'honneur. Il se retire alors,
Et se promene à part sur le bord du riuage,
Orné de Majesté, de grace & de corsage.

La fille qui le void si merueilleusement
En un instant changé, l'admire grandement,
Puis se tournant à coup deuers ses Damoiselles
Aux yeux estincellans, aux chevelures belles:

Escoutez moy, dit-elle, ô Nymphes mon doux miel,
Cen'est point sans l'instinct des puissans Dieux du Ciel
Qui foullent le plancher de l'Olympe immobile,
Que cet homme diuin est venu en ceste isle.

Il estoit en premier laid & desfiguré,
Et voyez maintenant comme il est decoré
De beauté, de maintien, aux Dieux presque semblable
Qui habitent le Ciel, tant il est admirable.

Pour moy ie voudrois bien qu'un tel mary me vint,
Qu'un qui luy fust semblable à m'espouser parvint,
Qui voulust avec moy demeurer chez mon pere,
J'adorerois le Ciel pour m'estre tant prospere:
Parquoy, ô mes amours, apportez luy soudain
Quelque chose à manger, & luy donnez du vin.

Le dire & l'obeir furent presque semblables;
Elles portent & vins & viures souhaittables:
Mais il ne mangeoit pas, plustost il deuoroit;
Mais il ne beuvoit pas, plustost il engouffroit:
Car il auoit long temps porté la faim cruelle,
Et son ventre souffroit inanité mortelle.

L'infante cependant desploye ses beaux bras,
Ses hardes va iettant sur le carrosse à tas,

Les mules fait venir, dont l'ongle bat & presse
Les champs reuerdissans, d'incroyable vifesse
Les met au chariot, dessus d'un pied dispos
Saulte, & à Vlysses tient semblables propos.

Sus, mon amy, debout, nous nous en allons prendre
Le chemin de la ville, & là ie te veux rendre
Moi-mesmes seurement, te montrant le chemin
De la belle maison d'un Prince tres-humain,
De mon pere, regnant dessus ceste prouince.
La tu contempleras maint grand Seigneur & Prince,
Dont par tout la vertu & la louange court,
Et qui ce-temps pendant demeurent en sa cour.
Or tu es plein d'esprit & de prudence rare,
De crainte que ton pié par les champs ne s'esgare,
Suy ces mules icy, & ce char, haste toy
Le plus que tu pourras, & t'en vien apres moy,
Car ie m'en vay deuant, & quand ie seray proche
De la ville, & qu'en hault montera nostre coche
Te laissant, ie t'en veux les enseignes donner.

Grandes & hautes tours la viennent encerner
Le port des deux costez de la ville s'entr'ouure,
L'entree estroittement aux nauires s'y ouure
Qui y sont en seurte: En lieu fort opportun
Est le marché, autour du temple de Neptun
Basti de grands cartiers de taille magnifique:
Là se fait, se bastit mainte barque aquatique,
Les cordages, les masts, auirons pour ramer
S'y recourent, s'y font, l'equipage de mer
Que doiuent auoir ceux qui sur la mer sillonnent.
Car les Phaeaciens nullement ne s'adonnent
Ny à tirer de l'arc ouuré de corne d'os,
Ny à porter vn tas de flèches sur le dos,

LE VI. LIVRE

Tout leur contentement s'estend, de bien conduire.
A voiles sur la mer un mast, une navire,
C'est leurs ambitions de voyager sur mer
Et à ce mestier là leur aage consumer.

Je fuy de ces gens là les parolles piquantes
Et que quelque indiscret de clameurs mesdisantes
Ne tache mon renom : Car ceste nation
Superbe est adonnee à la detraction.
Et si quelqu'un d'entr'eux d'adventure s'adivise
Que tu viens avec moy, ie crain qu'il n'en medise.

Voyez cest estrange qui suit Nausicaa
Qu'il est disposé & beau, & quelle taille il a!
Où elle la trouue. C'est donc qu'elle en veult faire
Pour le vray son mary : Possible, de bonnairé
Là elle rencontré errant comme estrange
Et sortant de sa nef, & le veult heberger.
Faut qu'il soit estrange : Car nul homme semblable
Ne se trouue icy pres. Ou un Dieu exorable
Qu'elle a bien inuocé, du Ciel est descendu
Et pour se marier pres d'elle s'est rendu
Pour n'en bouger iamais. Bonne rencontre à elle
Si en se promenant par la campagne belle
Elle a trouué mary d'ailleurs que du pais:
Ceux qui l'ont recerchee en seront esbahiz,
Verront que leur poursuite a pour eux este vaine,
Et quelques grâs qu'ils soiēt qu'ils ont perdu leur peine.

Voilà ce qu'ils diront, & leur detraction
Dechireroit ainsi ma reputation,
Et ie condamnerois moy mesme la premiere
La fille qui, viuant & son pere & sa mere
Voudroit se marier contre leur volonté,
Sans attendre le iour de la solennité.

Retien donc bien cecy, affin que tu obtienne
 Du Roy de retourner en la patrie tienne.
 Nous trouverons bientost une grande forest
 De peupliers ombrageux, qui tres-belle parest
 Pres du chemin, sacré à Pallas la guerriere,
 D'une fontaine sourd la petiteriniere
 Au tour de la forest les prez sont verdissans
 De mille belles fleurs gayement florissans:
 Là sont les champs fertilz, & les beaux heritages,
 Là sont les grands vergers, les plaisants iardinages
 Du Roy Alcinous au monde tant vantez,
 Et pour leur rareté d'un chacun exaltez,
 De la ville autant loing que se peut faire entendre
 La voix parmy les champs quand on la veut estendre.
 Tu demeureras là iusqu'à tant que soyons
 A la ville, & plus loing au palais arrivons
 Et quand tu penseras qu'y seront parvenues,
 Entre lors, & demande à quelqu'un par les rues
 Où demeure le Roy. Chascun te le dira
 Mesme le moindre enfant monstrier te le pourra,
 Sur toute sa maison est facile à cognoistre.
 Celles des citoyens ne se font pas paroistre
 Telles que celle là. Quand entré tu seras
 Passe diligemment plus oultre, & tu viendras
 En la chambre à ma mere: elle sera seante
 Au foyer pres du feu, à la lueur filante,
 Sa quenouille au costé, en la main le fuseau,
 Tournoyant un filet emerueillable & beau.
 Oeuvre si delicat que chascun s'en estonne,
 Son dos est appuyé contre une grand colomne
 Ses filles sont aupres, renees sagement,
 Et qui à leur besogne entendent proprement.

LE VI. LIVRE

Deuers elle est tourné le siege venerable
Du Roy, il s'assied là quand il se met à table,
Comme feroit vn Dieu. Là à son aise il boit,
Et le vin espargné nullement ne sy voit.
Il te fault passer outre, embrasser de ma mere
Vistement les genoux. Si en ta maison chere
Tu t'en veux retourner, & si tu as le soin
De reuoir ton pays, encor que soit bien loin,
Si elle te reçoit d'un gracieux visage,
Et te vient consoler : alors pren bon courage,
Espere de reuoir ton retour desireux,
Et de t'en retourner en ton pays heureux.

Ce disant elle donne à ses mules les rennes,
Et faict flisquer le fouet : Elles partent soudaines,
Laissent le fleuve arriere, & de leurs pieds ferrez
Battent les fleurs croissans dans les prez azurez.
L'Infante les retient, pour faire qu'apres elle
Viennent plus aisement sa troupe leste & belle,
Et Ulysses aussi. Le fouet rejoynt en l'air,
Et son viste carrosse aux yeux semble voler.

Ia le Soleil lauoit l'or de sa tresse blonde
Se penchant dans le bleu de l'Iberienne onde,
Et les Nymphes tandis approchoient de leur pié
Le bois delicieux à Pallas dedié:
Mais Ulysses lasse demoura là derriere,
Et luy faisoit ainsi sa deuote priere.

Fille de Iupiter, indomptable Pallas
En fin escoute moi, car tu ne soulois pas
M'escouter cy deuant, quand Neptune en son ire
Colere submergeoit mon chancelant nauire:
M'agitoit sur les eaux lançoit sur moy le vent,
Et sans mercy m'alloit à la mort poursuivant.

*Donne moy d'arriuer, combien que miserable,
Chez les Phaaciens, & d'y estre agreable.*

*Il dit, & la Deesse en vain il ne pria,
Qui l'ouyt, mais encor sur luy ne déplia
Son œil resplendissant, elle craint & reuere
Le courage offencé du frere de son pere,
Car Neptunus estoit grandement irrité
Au diuin Ulysses, insigne en pieté:
Et contre luy dura cruellement son ire
Deuant que d'estre en terre, & quitter le nauire.*

Fin du sixiesme Liure.



LE SEPTIESME LIVRE DE L'ODYSSEE D'HOMERE.

ARGUMENT.

Nausicaa retourne en la ville, & apres elle Vlysses, qui supplie Areté femme d'Alcinoüs. Apres le soupper elle l'interrogant d'où il auoit recouuré l'accoustrement qu'il portoit (car elle l'auoit recogneu:) il luy raconte toute la fortune de sa nauigation depuis son departement d'Ogygie iusques à son arriuee en Phæacie.

AUTRE SOMMAIRE.

*Receu dans le palais Areté l'importune
De luy conter au vray le cours de sa fortune.*

Vlysses sa priere à Pallas estoit,
Et l'Infate au chasteau de Scherie arriuoit,
Deuāt la porte estoient ses freres venerables
Ayās façon de Dieux, aux celestes sēblables:
Se leuent l'ayans veüe, au deuant d'elle vont
Pour luy faire seruice, & les harnois deffont
Qui les mules tenoient au carosse liees,
Et font porter dedans les robes delices
Qu'on venoit de lauer. Elle se retira
En sa chambre, où alors la vieille d'Epera

Eurymoduse, ayant de sa chambre la charge,
 Luy allumoit du feu. Par la campagne large
 Sur les vaisseaux flottans, qui par pays diuers
 Leurs voiles faisoient voir aux plus lointaines mers:
 Elle auoit autresfois esté ieune amenee,
 Et pour present au Roy Alcinoüs donnee:
 Pource qu'en Phæacie alors il commandoit,
 Et comme vn Dieu sur eux son sceptre il estendoit.
 Sa fille elle nourrit dessus le royal siege
 Nausicaa la belle, aux bras blancs comme neige.
 Elle vint sur le feu le bois sec arranger,
 Et propre & diligente apprestoit à manger.

Cependant Ulysses se releuant habille
 Achemina ses pas à la royalle ville,
 Et Pallas le couurit d'un voile nuageux
 De peur qu'on ne le vist, & que quelque outrageux
 Ne le vint enquerir, l'arrester & le prendre,
 Ne voulust le sujet de sa venue entendre:
 Que quelque curieux ne luy vint au deuant,
 Et n'allast contre luy de propos estruiant
 Luy demandant son nom, & de quelle contree,
 Et depuis quand dans l'isle il auoit faict entree.

Quand il fut bien auant entré dans la cité
 Il rencontra Pallas, qui auoit emprunté
 La forme & le semblant d'une vierge gentille
 Qui portoit vne cruche. A donc la ieune fille
 S'arresta deuant luy. Si luy dit Ulysses:
 Fille, pourriez-vous point me donner quelque acces,
 Me monstrez le palais grand en maçonnerie
 Du Roy Alcinoüs qui commande en Scharie?
 Je suis vn estrangeur venu nouuellement
 D'un pays esloigné, qui ay estrangeement

LE VII. LIVRE

Souffert dessus la mer, & paty sur Neptune:
 Je n'ay adresse icy ny cognoissance aucune
 Des habitans du lieu. A qui alors Pallas
 La Deesse aux yeux vers. Pere tu ne peux pas
 Avoir mieux rencontré, de volonté tresbonne
 Je te l'enseigneray, ie le puis, car personne
 Ne demeure plus pres que mon pere, du Roy.
 Tai-toy donc seulement, & t'en vien apres moy
 Si tu le veux sçavoir. Au reste ne t'arreste
 Pour parler à personne, en allant, ne conteste,
 Ne débats, ne t'enquiers: car les gens incogneus
 Estrangers comme toy, ne sont trop bien venus
 En ce pays icy, & est fort difficile
 Qu'ils tirent propos doux des manans de ceste isle,
 Se confians sans plus en leurs legers vaisseaux,
 Sur lesquels ils s'en vont traffiquer sur les eaux:
 Car aussi tost que vont la pensee & les aïles,
 Neptune leur a donné leurs nauires isnelles.
 Elle se mit deuant ce disant, & apres
 Ulysses cheminoit & la suynoit de pres.
 Mais les Phæaciens iamaïs ne l'apperceurent,
 Et tous, à son regard, sans yeux auégles furent.
 Couuert de la nuee, émerueillable cas,
 Au trauers de la ville il auançoit ses pas:
 Se mesle par la rue & n'est ven de personne.
 La fille à Iupiter qui point ne l'abandonne,
 Ne l'eust pas endure, car trop bien il estoit
 De la nuee enceint, son regard il iettoit
 Par tout. Or les vaisseaux grands & forts il admire,
 Il admire le port & ses yeux n'en retire.
 Il voit d'autre costé la place où tous les iours
 Les gros se promenoient, les coins, les carrefours,

Les rues, oit le bruit, voit les murs, & s'estonne
Des grands rempars munis & ne parle à personne,
Comme ils furent venus à la maison du Roy,
Estranger mon amy, luy dit Minerve, voy
Le palais que tu veux. Estant dedans la salle
Tu verras les seigneurs, race grande & Royale
Venus de Iupiter, à table banquetans,
Entresans t'estonner: l'homme fort, en tout temps
Passe par dessus tout & Dieu le favorise,
Bien qu'il vienne de loing. Tu trouueras assise
La Reine dans sa chambre: elle a nom Areté,
Femme du Roy, pourtant de mesme parenté,
Car de Nausithous Neptune fut le pere
Neptune esbranle mer, Peribæe la mere
Derniere des enfans d'Eurymédon le fort
Sur les Geans son pere eut combat plein d'effort,
Mais en les debellant, sous la deconfiture
Que cruelle il en fit, il souffrit la mort dure.
Après sa mort, Neptun Roy des flots dangereux,
Deuint de Peribæe ardamment amoureux
Le fort Nausithous sortit d'une amour telle:
Qui commandant depuis en Phæace la belle
D'Alcinoïus fut pere, & du beau Rhexenor
Qui fut tué chez luy par Phœbus aux traits d'or,
N'ayant point d'enfant masle, ains une fille unique,
La diuine Areté. Qu'estant Roy pacifique
Espouse Alcinoïus, en elle eut son desir
Et fut sur toute femme à son gré, & plaisir.
Par tout le monde entier en tout temps, en tout aage
On n'a point veu parler d'un pareil mariage,
Tant la femme ayt esté suiectée à son époux
Tant elle l'ayt aymé de cœur fidelle & doux.

LE VII. LIVRE

*Ainsi Alcinous, ainsi ses enfans mesme
Sont de tous leurs subiets aymez d'amour extreme
Et si grand est l'honneur, le los, la Majesté
De la Reyne, qu'elle est comme vne déité
Reuerée de tous s'elle va par la rue
Vn chascun la bienueigne, un chascun la salue
Frappant des mains de ioye, elle est d'esprit heureux,
D'entendement prudent. Au pauvre, au malheureux,
Elle ayde volontiers, les proces elle appaise,
Et quand elle bien faict, son cœur en tressaut d'ayse.*

*Quand d'un visage doux elle te receura,
Tien pour pour tout assuré qu'elle te donnera
Moyen de retourner metre ordre à tes affaires,
Voir ta douce maison & tes Dieux tutelaires.*

*Ce disant, dedans l'air viste elle se poussa
Delaissa Phaacie, & les champs repassa,
Champs d'escume couuerts, playnes Neptuniennes,
S'en vint à Marathon, arriva dans Athenes
Aux rues spatieuse, & dedans la Cité
Alla prendre logis au palais d'Erechthé.*

*Cependant Ulysses vers la ville s'aduançe
Du Roy Alcinous: diuerses choses pense
En son entendement, auant qu'estre arriué
Sur le cuiure poly du reluissant pané
Car de ceriche Roy la maison haute & belle
De toutes parts luisoit, d'esclat & splendeur telle
Que celle de la Lune, ou celle du Soleil
De cuiure estoit le tour de son mur nom pareil
D'un & d'autre costé des le seuil de la porte
Jusqu'au plus reculé de l'enceinte tresforte.
Le feste estoit d'azur, les portes estoient d'or
Qui fermoient la maison, d'argent estoient encor*

Les pilastres fondez sur des bases de cuiure,
D'argent estoit le haut pour tout bien faire suiure
Et les corniches d'or : Aux costez paroissoient
Chiens d'or & chiens d'argent, & semble menaceoient,
Vulcan les auoit faits d'admirable industrie
Pour garder la maison du Prince de Sherie
Ils ne pouuoient vieillir, & l'ouurage estoit tel
Que sans corruption il duroit immortel
De tous costez, le long de la muraille forte
Sieges estoient rangez des le seuil de la porte
Jusqu'au fonds du palais, & maint accoustrement
Finement ouuragé filé subtilement
Là dedans se serroit œures emerueillables
Des femmes du chasteau. Là les plus honorables
De l'Isle & de la cour d'ordinaire arriuoient,
Et tant qu'il leur plaisoit y mangeoient & beuuoient,
Y auoient bouche à court. Enfans d'or magnifiques
Estoient posez autour des autels pacifiques
Grands flambeaux en la main, qui la nuit surmontoient
Et sans cesse eclairoient à ceux qui banquettoient.
Là dedans y auoit cinquante chambrières
Ayants la charge & soin, parfaites mesnageres,
De moudre le froment, de pestir, de bluter,
Et de sauoir le lin dignement aprestier :
Manier le fuseau, & employer les laines.
Comme du haut peuplier sont les feuilles soudaines.
Et des habits on void l'huile frais distiller.

Comme ce peuple scait tous autres exceller
En l'art de nauigage, & pour courir sur l'onde
Ceux de ceste Isle là sont les primes du monde,
Leurs femmes tout ainsi en la toile, au mestier,
Pour filer, pour ourdir ont l'esprit singulier.

LE VII. LIVRE

*Car Pallas leur auoit en tres-grāde abondance
 Donn   le naturel, l'art & l'intelligence,
 De manier le lin, & dessus le fuseau
 Acheuer un ouurage & magnifique & beau.
 Or dehors, le iardin pres de la grande porte
 Estoit enuironn   de grand muraille forte,
 Contenant quatre arpens d'espace grand & beau
 Plant   d'arbres espais tous tirez au cordeau.
 Qui partout le verger & croissent & florissent.
 Les fruits delicieux sous les feuilles meurissent,
 La poire, l'abricot iaunement rougissant,
 Le sucr   courpandu, le raisin noircissant,
 L'oline au fruit amer &    la liqueur douce,
 Et le large figuier sa douce figue y pousse,
 Et dix mille bons fruits sans cesse y pendilloient.
 Iamais tant en hyuer qu'en est   ny failloient,
 Les feuilles y gardoient leur honeur perdurable,
 Et le suc doucereux n'y estoit perissable.
 Tonsiours le doux Zepbir y soufflant gracieux
 Y faict croistre & meurir le fruit delicieux:
 La poire suit la poire, & la fleurante pomme
 Qui n'y manque iamais sort soudainement, comme
 Sa compagne a meury, qui s'y tost ne meurit
 Comme tout aussi tost vne autre apres fleurit:
 Ainsi ces fruitz sans fin l'un en l'autre vieillissent.
 Les poires tout ainsi sur les poires fleurissent,
    la figue se tient la figue & le raisin
 Se vieillit, renaissant le raisin son voisin,
 Et ceux cyles derniers fleurissoient    grand peyne
 Qu'   ceux lala vieillesse estoit toute certaine.
 La vigne verdoyante, abondante y croissoit
 Ses racines sous terre estendoit & poussoit,*

Leraisin plaisamment sous la verge se range
Et sans cesse y promet eternelle vendange:
On voit l'une à l'abry se meurir viftement,
Quand son fruit est cueilly l'autre soudainement
Se laisse vendanger: fruitz en grande abondance
Croissent en ces iardins & bons par excellence,
Et tout le long de l'an on les voit à plaisir
Porter aultant de fruits comme en veut le desir.

Vne double fontaine au gratieux murmure
Part de ce lieu plaisant, y gazouille & susurre,
L'une par le iardin ses eaux va trauersant,
L'autre sous le pané de la salle passant
Au trauers des rochers va promenant iazarde
La glace de son eau froidement babillarde.
Les tuyaux au palais plus haut se conduisoient
Et dessus le grand mur les bourgeois en puisoient.

C'est le palais Royal, c'est la magnificence
Que les Dieux tresbenins donnoient en abondance
Au fort Alcinous. A ce plaisant obiet
Vlysses tout raiui fut vn long temps muet,
Puis il passa la porte, & vit dans la grand sale
Les Princes & les Roix en Majeste Royale
Qui versoient le doux vin au vigilant Mercur.
Car tousiours ils l'offroient plus excellent, plus pur
Alors qu'ils se vouloient retirer en leurs chambres
Et donner au sommeil & leurs corps & leurs membres.

Le diuin Vlysses incontinent entra
Et couuert de lanue au dedans penetra
Tout au plus pres du Roy. La Deesse guerriere
L'auoit tout couuert d'air par deuant & derriere
Afin qu'il aprochast la Reyne à seureté
Et le Roy son mary. N'eut si tost d'Arcté

LE VII. LIVRE

*Humble pris le genoux, que la nuee espesse
Se fend soudainement & visible le laisse.
Les Princes estonnez grand silence gardoient;
A l'improuiste entré cest homme regardoient,
Lors il dit en priant. Areté digne race
Du diuin Rhexenor, me voicy que terrasse
La fortune ennemye, embrassant tes genoux;
Ayant recours a toy & au Roy ton espoux
Et à tous ces seigneurs: ayant de la fortune
Enduré longuement & l'ire & la rancune.*

*Les Dieux, ô Phœaquois, grands en eternité
Vous donnent longuement richesses & santé
Et longs jours & heureux, puis après ceste vie
Puisse heriter de vous vostre race ensuiuite
Vos tresors & vos champs, en iouir longuement
Et vos Sceptres Royaux regir heureusement.
En fin tout ce qu'on peut desirer de cheuance
Et d'honneur sur vn peuple, ayez le en abondance,
Octroyez moy pour Dieu des gens & des vaisseaux
Qui me puissent chez moy remener sur les eaux,
Car i'en suis esloigné fort longue distance:
Ayant souffert long temps des maux en abondance,
Bien loin de mon pais. Il n'eüst pas si tost dit
Qu'il s'assit sur la cendre & près du feu se mit
Vn chacun se taisoit. A la fin Echeüee
Le plus aagé de tous, dont l'ame estoit ornée
De prudence & vertu, docte en l'antiquité
Le mieux parlant de tous fort experimenté
Se leue, vient au Roy, & de parolle douce
A secourir Vlyse en ces termes le pousse.*

*O Roy Alcinous, cest estranger icy
S'est fort humilié, qu'il soit tousiours ainsi*

Contre terre abaissée, n'est chose raisonnable:
Ces Princesses sont tuz, t'attendants exorable.
Fay le donque leuer & metre à ton costé,
Fay le soir sur un siege à maint clou argenté,
Commande d'apporter le vin, & qu'on espande
Souefue oblation à celui qui commande
Aux tonnerres du Ciel, Dieu d'hospitalité
Favorable à tous ceux que le sort despité
Trouble malignement souvent les accompagne,
Et ne veut pas qu'ainsi les pauvres on dedaigne.
Cela fait, qu'on le traicte & qu'il soit restauré
Des viures de ceans: Le courage assuré
Du Roy Alcinois accordant la demande
Touché de courtoisie & d'humanité grande
Fit leuer Vlysses le prudent, l'aduisé,
Le prenant par la main. Et d'un lieu mesprisé
Le fit soir sur un siege & riche & honorable,
Duquel il auoit fait leuer au préalable
Son filz Laodamas, grand d'esprit & de corps
Qui le plus pres de luy estoit assiz pour lors.
C'estoit aussi celui auquel le Roy son pere
Portoit sur tous ses filz amitié singuliere.
Vne fille aporta dessus leurs mains de l'eau
Dans une aiguiere d'or, qui couloit du tuyau
Dans un bassin d'argent. Apres dressa la table,
Et rapporta dessus le bon pain delectable,
Et ce qui se trouua de prest, gratiffiant
L'hostel, du meilleur viure & du mets plus friant.
Il mangeoit il beuvoit à pleine suffisance
Et lors Alcinois à dire ainsi commence.
Sommelier agreable & plus fidelle encor,
Gentil Pontonous, ten moy ma coupe d'or

LE VII. LIVRE.

Et verse à tous ceux cy la liqueur excellente:
 Puis nous espancherons effusion plaisante
 Autres-hault Iupiter, le grand fulminateur
 Des pauvres estrangers favorable tuteur
 Qui souvent s'adjoit d'eux, les ayme & accompagne,
 Et de son bon secours iamaïs ne les dedaigne.

Le doux vin sur l'autel porte Pontonous,
 Le verse & le presente au Roy Alcinous
 Et puis aux assistans. L'effusion parfaite
 Et chascun ayant beu tant que chascun souhaite,
 Le Roy s'adresse à eux. Princes & ducs aussi
 Escoutez mes propos quand vous aurez icy
 Banqueté à plaisir, qu'un chascun se retire,
 Et puis, quand le matin l'aube nous viendra luire,
 Tous les sages vieillars venir on me fera,
 Et nostre hoste avec eux aussi s'y trouuera:
 Nous ferons aux grandz Dieux en toute reuerance
 Saintes effusions: puis aurons souuenance
 De son retour requis, affin que vistement
 Il puisse en son pais retourner seurement,
 Que tout fascheux hazard sur la mer il euite,
 Qu'inconuenient nul n'arriue en sa conduite,
 A nos vaisseaux non plus, encor' que son pais
 Fust pardela la mer espaces infinis,
 Ny que par tant de fois il retombe en naufrage,
 Ny, plustost qu'arriuer il souffre aucun dommage,
 Et metre pié à terre au riuage connu:
 Où estant à seurté à la fin paruenü
 Il prendra gaiement ce que la Parque noire
 Luy fila, quand au monde il fut de luy memoire.

Mais si c'est quelque Dieu qui nous soit descendu
 Du Ciel, & parmynous se soit icy rendu,

C'est

C'est bien un autre cas que la troupe celeste
Veut faire. De long temps il nous est manifeste
De voir icy des Dieux les corps visiblement
Pour le moins leur image: alors que saintement
Nous faisons au grand Dieu sous qui le foudre tombe
Le celebre banquet d'une sainte hecatombe:
Les Dieux nous font l'honneur d'y venir avec nous,
Banqueter, s'asseans favorables & doux.

Si quelcun seul aussi marchant par la campagne
Le trouue, s'il est Dieu iamaïs il ne dedaigne
De se manifester. Car nous leur attonchons
De sang, de parantage, & pres d'eux aprochons,
Comme faiët des Cyclops la Gigantinerace.

Vlysses regardant Alcinous en face.
O Roy Alcinous, pense tout autrement,
Je suis mortel, dit il, & difficilement
Me pourrois ie esgaller à la troupe immortelle
Des Dieux, qui sont viuans sur la voute eternelle:
Mon naturel mortel, & mon corps vicieux
Ne tiennent nullement de qualité des Dieux,
Homme ie vins au monde. Or entre tous les hommes
Qui ont porté de maux innumerables sommes,
Que le cruel malheur à tousiours exercez,
Qui presque de douleurs ont esté terrassez,
Mettez y hardiment ce pauvre miserable
Dont l'ennuyeux travail est certes innombrable
Car seul i'ay soustenu quantité de malheurs,
Passant par mille maux & par mille douleurs
Et plus que ie ne d'y, dont ie rendrois bon compte.

C'est des Dieux tout-puissans le vouloir qui tout dote
Qui l'auoit ordonné, mais donnez moy respit
O Princes genereux, car i'ay grand appetit

N

LE VII. LIVRE

L'heure viendra commode. Asteure la tristesse
 Me nuit, d'autre costé la famine me presse.
 Mais laissez moy manger & prendre mon repas
 Bien que fort desolé. Mal au monde n'est pas
 Tel que celui du ventre, & l'odieuse panse
 Nous commande & contraint de prendre souvenance
 De ses necessitez, quelque grande douleur,
 Et quelque affliction qui soit en nostre cœur.

Or il estend sur moy son empire & sa force
 Car, bien que plein de pleurs & d'ennuis, il me force
 De demander ainsi à boire & à manger:
 Il fait tout oublier, il faiet tout deloger,
 Tout ce que j'ay passé de mal & de tristesse,
 Et, maistre, me commande & veut que ie repaisse.

Mais ie vous pry, messieurs, renuoyez moy de main
 Des que la belle Aurore aura monstre sa main,
 Bien que comblé d'ennuis: donnez moy ie vous prie
 De remonter en mer pour chercher ma patrie,
 Et mes Dieux familiers: puis, que ce souffle icy
 Laisse quand il voudra ce corps mort & transi.
 Pourueu qu'auparavant apres mainte misere
 Je voie mon pais, mes gens, ma maison chere.

A ces mots un chacun des Princes aplaudit,
 Veulent qu'on le conduise ainsi qu'il auoit dit,
 Par mer en son pays. L'effusion parfaicte
 Et ayans pris du vin chacun faiet retraite
 Au palais Ulysses pour hoste est arresté,
 Au pres de luy se sied la Princesse Areté
 Et son Alcinous, qui de Majesté belle
 Paroissoit comme l'un de la bande immortelle,

Les filles emportoient tous les dorez vaisseaux,
 Et alors Areté aux bras & blancs & beaux

Commence à luy parler d'affection extreme
Car elle auoit cognu les robes, qu'elle mesme
Fillees pour sa fille auoit au parauant.

Je metray ce propos le premier en auant,
Dit elle, & t'enquerray, qui es tu, ie te prie,
D'où es tu, d'où viens tu, & quelle est ta patrie,
D'où as tu recouru ces robes que voicy,
N'es tu venu errant en ce pays icy?

A laquelle Vlysses. Reyne, tu me commandes
De te renouveler des tristesses si grandes
Que ce seroit bien fait ne les rememorer.
Grandement difficile est helas de narrer
Tel nombre de malheurs. Les puissans Dieux celestes
Ont fait tumber sur moy mille dangers modestes
Ils m'ont depuis long temps batu cruellement,
Et beaucoup fait de mal sur le moite element.
Mais si tant de desir te possede, d'entendre
Ma fortune & mes maux, ie te les veux apprendre,
Bien que i'en aye horreur mesme au seul souuenir.
Et d'en pleurer souuent ne me pais contenir,

Vne Isle est loin d'icy Ogygie nommee
Toute enceinte de mers, Isle assez renommee,
La blonde Calypso fille du grand Atlas
Demeure la dedans: Nymphes cruelles, helas
Si Deesse, onc le fut, en astuce diuerse,
Ayant insigne bruit. Nul des Dieux ne converse
Auec elle au fascheux de ce triste sejour
Ny nul homme mortel qui voye le beau jour

Mais la fortune un iour me poussa dans son Isle,
M'eut son domestique, & la rendit facile,
Bien que ie fusse seul, à mon cruel malheur.
Pour ce que Iupiter de son foudre, ô douleur,

LE VII. LIVRE

Mit en pieces ma barque au beau milieu de l'onde,
 Apres qu'elle eut couru longuement vagabonde,
 Et noya tous mes gens. Or estant cheu dans l'eau
 Et ayant empogné quelque bois du bateau,
 En estendant les bras les vagues me porterent,
 Et par neuf iours entiers les ondes m'agiterent.
 Sur la dixiesme nuit pleine d'obscurité,
 Par le vouloir benin des Dieux, ie fus porté
 En l'Isle d'Ogygie, Isle au milieu de l'onde:
 Ou Calypso, Deesse à la perruque blonde,
 Trompeuse toutesfois, me receut cherement,
 Chez elle me logea, me nourrit longuement.

Elle me promettoit un aage sans vieillesse,
 Vne immortalité. Mais iamais la Deesse
 Ne me persuada. Car i'auois grand desir
 De reuoir mon pais, preferant le plaisir
 De Calypson, à luy. Sept anneés entières
 Force me fut d'y estre, & de pleurs les riuieres
 Mouilloient mes vestemens, que mesmes en pur don
 M'auoit daigné donner la belle Calypson
 Nereïde immortelle. Or la voute tournée
 Commanceoit à tumber sur la huitiesme année
 Quant la Nymphe des eaux me fit commandement
 De me metre sur mer: soit de son mouuement,
 Soit de par Jupiter. A donques ie m'embarque
 Tout seul, comme il luy pleut. Elle mit en ma barque
 Viures, vins, & habits, tout selon mon desir.

Les fauorables vents me pouissoient à plaisir
 Qu'elle m'enuoya lors, & mes voiles enflees
 Voloient dessus les eaux prosperement soufleees.
 I'auois ià nauigé dix & sept iours entiers,
 Puis il me sembla voir des monts grands & altiers,

Qui montoient hors des flots. Mais l'aube ensafrancee
Ayant de deux fois neuf ramené la iournee,
Et que vostre riuage à croistre commancea,
Et sa terre monstrant hors des eaux se poussa,
O combien ce iour là me parut agreable,
Et logea de plaisir en mon cœur miserable!

Certe il falloit encor que dix mille trauaux
Et autant de dangers me tinsent sur les eaux,
Et dont, Neptun qui ment de son trident la terre
Bientost me deuoit faire estrangement la guerre
Les cruels grins des vents en mer il eslanca,
La fit innauigable, & tous les flots poussa.
L'eau ne me permettoit de regir mon nauire,
Du profond de mon cœur mille sanglots ie tire,
Et voicy le cruel d'un orage hideux
Qui renuerse ma barque au fond des flots ondeux.
Alors force me fut de me metre à la nage,
Coupant les eaux des bras: tant qu'à vostre riuage
Et la vague & le vent me ietterent poussé:
Où voulant prendre pié, ie refus renuersé
D'un flot plus dangereux & des pointes mortelles
D'un perilleux rocher dans les vagues cruelles.
D'où m'estant recullé ie renage tousiours
Tant qu'en fin i'aborday le favorable cours
Du fleuve de ceste Isle: où pour lors les aproches
Faciles me sembloient, libre des dures roches,
Et non sujet aux vents. Le fleuve ie quitay
Qui vient de Iupiter & contre ment montay,
Voyant venir là nuit tenebreuse & espesse.
Adonc vers la forest mes pas doubteux i'adresse,
Soubs les rameaux feuillus des arbres me couchay,
Des feuilles qui tumboient me couury, me cachay.

LE VIL LIVRE

Je m'estendy dessous : & les Dieux m'enuoyerent
 Le gratiex sommeil & les yeux me fermerent.
 Je restay là couché iusques au point du iour
 Que l'aube ramena son iauissant retour,
 Sur les feuilles, la veue aux vers rameaux dressee
 Tourne dessus le dos plein de triste pensee
 Dormant iusqu'au matin & iusque au midy haut
 Que Titan sur les champs darde le plus grand chant.
 Mais comme le Soleil passant le haut du monde
 Venoit à s'encliner dans les gouffres de l'onde
 Je vins à m'esueillir. Je vy heureusement
 Tes Nymphes qui passoient le temps ioyusement,
 Et la fille, en beauté aux Dieux comparable
 Et de face & de corps aux Deesses semblable.
 Lors ie vins à ses pieds humblement me ietter
 La belle ne voulut rude me reietter,
 Et ne dementit point sa bonne nourriture.
 Car ie n'eusse pas cren que par grande auanture
 Vne fille voulust me venir au deuant
 Et me gratiffier. Pource que bien souuent
 La jeunesse d'asteure est pleine de sottise.
 Mais elle me receut courtoise & bien aprise,
 Elle m'accommoda de ces accoustremens,
 Me fit boire & manger à mon contentement.
 Elle me fit lauer, moy pauvre miserable
 Qui combien qu'affligé, te parle veritable.
 Auquel Alcinois se tournant dit tout haut.
 Ma fille, ô estranger, n'a pas fait comme il faut,
 Ny bien ny à propos, t'ayant laissé derriere
 Sans l'amener ceans, veu que d'humble priere
 Tu l'auois suppliee. Et le sage Ithaquois,
 Le te pry grand Heros, ne blasme à ceste fois,

Et ne taxe non plus fille tant excellente.
Car elle m'enioignit, aduisee & prudente
De faire compagnie à ses filles, venir
Avec elles ceans & les entretenir,
Ce que ie reffusay, & de honte, & de crainte
Que ton ame n'en fust de grand colere atteinte.
Car ordinairement à l'homme est la façon,
Deprendre quelque doubte & d'entrer en soupçon
Et principalement quand il y va des filles
Qui, comme celle cy, sont belles & gentilles.

Ce n'est pas mon humeur d'entrer si vistemment,
Dit lors Alcinous, ne si legerement
En colere, ô mon hoste, & tousiours ma pensee
A ce qui est seant s'est librement dressee.
Estimant le meilleur tout ce qui bien conuient
Et qui de la vertu coule, procede, & vient.

Ainsi face Pallas, Phæbus & le haut pere
Iupiter, que pareil que l'on te considere
Tel tu sois à tousiours, & l'accord mutuel
De toy avecque moy restast perpetuel.
O que si tu prenois ma fille bien aymee
A femme, & d'elle encor eusses belle lignee,
Feusses gendre du Roy, que ie te pusse voir
Propre à me succeder, inestimable espoir
De fils d'arriere fils, possessions, richesse,
Tout te seroit donné, & chasteaux à largesse,
Si dauanture au moins à mespris tu n'auois
Le pays, la maison, & tout ce que tu vois,
Et n'eusses à plaisir d'arrester dauantage.

Nul ne te retiendra trop contre ton courage,
„ Et mesme Iupiter ne prend point de plaisir
„ Qu'on retienne son hoste encontre son desir.

LE VII. LIVRE

Or des le grand matin i'iray sur le riuage,
Te donneray moyen de faire ton voyage,
Et tandis que lassez tes membres dormiront
Les Phæaquois pour toy sur mer trauailleront,
Te garderont sogneux, afin qu'en assurance
Tu gaigneston pais, ta douce souuenance:
Et si mesme plus loing sont les bords Eubaans
Car ainsi nous fut dit par nos Phæaceens
Qui furent en Eubæe, alors qu'ils y menerent
Rhadamante le roux, & là le promenerent
Pour voir le terrené Titye. En mesme iour
Ils le passerent là & furent de retour:
Non, tu t'estonneras de mes naus si agiles,
Et de mes mariniers si prompts & si habiles.

Vlysses à ces mots s'esjouit grandement,
Et puis à Iupiter requit bien humblement:
Ie te pry Iupiter fais que ceste promesse
Du Roy Alcinous, heros plein de prouesse,
Succede heureusement, qu'il aquiere renom
Par la terre habitable, & son illustre nom
Sa gloire, son honneur, son pouuoir, ses louanges.
Volent de son pais aux nations estranges
Et que ie puisse tost me voir en ma maison
Seurement arriuer en prospere saison.

Ils deuisoient ainsi quand la Reyne benigne
D'aller dresser la chambre à ses filles fait signe,
Faire le riche lit, metre à bas lestapis,
Et courrir de linceus les mattelas polis.

Les filles l'ayants veue, accourent diligentes,
Portent dedans leurs mains les chandelles flambantes
Dressent le riche lit, appellent sans arrest
L'hoste, & luy vont disant. Leuez vous s'il vous plaist

Pour vous venir coucher, ô hôte venerable.

*Et l'Ithaquois rempli de ioye inestimable
S'en va trouver le liét, & ses sens de ses yeux
Paisiblement donner au sommeil gracieux.*

*Ce fut souz le portal qu'ils menerent Ulysse,
Où le vent gracieux fraichement bat & glisse.*

*Mais pour Alcinous, se tirant à l'escart
Il s'en alla coucher en vn logis à part,
Et pres de lui la Reyne espouse chaste & rare,
Le lit pour son mary & pour elle prepare.*

Fin du septiesme Liure.



LE HVICTIESME LIVRE DE L'ODYSSEE D'HOMERE.

ARGVMENT.

Es phæaciens s'assemblent au conseil, deliberent sur leur hôte: on luy accorde vn vaisseau pour le conduire. Alcinoüs fait festin aux principaux de l'Isle. Apres les Phæaciens & Vlysses s'exercent à ietter la pierre. Demodochus chante & recite: premierement les amours de Mars & de Venus, & ce qui s'en ensuyuit, puis ce qui aduint lors du cheual de bois deuant Troye. Ce quoyant Vlysses, & ne se pouuant tenir de ietter des pleurs, il est enquis, qui, & d'où il estoit.

AUTRE SOMMAIRE.

*Exercices & jeux se mettent en auant,
Vlysse en a le prix, va les plus forts brauant.*

Belle Aube sortit en son habit vermeil,
Et ses doigts de saffran chasserent le sōmeil:
Lors se leua le Roy des campagnes fertiles
De Scherie, aussi fit le destructeur de villes
Le prudent Vlysses. Chacun s'acheminait
Au conseil, qui pour lors sur les naufs se tenoit,
Sur les pierres s'assit. Alors la portelance
Prit du Herault du Roy la face & la semblance,

S'en alla dans la ville, & en favorisant
Le retour d'Ulysses alloit ainsi disant.

Correz Phæaciens en toute diligence,
Au conseil, vous verrez l'admirable presence
D'un Heros, chez le Roy venu nouvellement,
Après avoir sur mer erré fort longuement.
Sa grace, sa façon, sa majesté Royale,
Et son maintien auguste aux puissans Dieux s'égale.

En prononçant ces mots elle les exhortoit,
Les pressoit de partir, & chacun se hastoit
Pour s'y trouver plustost. Tous les chemins rompirent
De gens qui s'assembloient, & les sieges s'emplirent:
Tous regardoient Ulysses, admiroient transportez,
La royale façon du fils de Laërtes.

Pallas lui donna grace & diuine apparence,
Et plus grande rendit sa taille & corporence:
Tellement qu'en maintien prudent il surpassoit
Tous les Phæaciens, en armes les laissoit
Bien loing derriere lui. La guerriere Deesse
Le fit expres, afin qu'il monstrast sa prouesse
Aux combats, où bien tost il se deuoit trouver,
Et où les Scheriens le vouloient esprouuer.

Comme donc le conseil fut assis, le Roy sage
Se prit à dire ainsi d'un alligre visage.

Oyez ce qu'alleguer ici ie vous pretens
Seigneurs Phæaciens: Depuis fort peu de temps
La mer nous a ietté vn certain en ceste Isle,
Qui est logé chez moi, & si m'est difficile
De vous dire qu'il est, ne s'il vient du Leuant,
Ou des lieux où le soir Titan va se lauuant,
Ny mesme son pays. Il faict humble requeste
Qu'on lui dōne secours, qu'on l'aide, & qu'on lui preste

LE VIII. LIVRE

*Vaisseaux, gens, & moyen de s'en aller chez lui.
 Tirons-le ie vous pri' de ce pressant ennuy,
 Comme nostre coustume est tousiours de bien faire,
 Donnons luy tout cela qui luy est necessaire.
 Personne insquicy n'a languy longuement
 Entre nous, qu'il n'ayt eu fort liberalement
 Tout ce qu'il demandoit, soit vaisseaux, soit escorte.
 Partant, fournissons luy d'une barque bien forte,
 Et neufue, & qui ne fut iamais dessus la mer.
 Puis de tous les meilleurs qui scauent mieux ramer
 Il nous faudra choisir cinquante & deux personnes,
 De bras roides & fortz & de volonteZ bonnes,
 Pour plustost le mener. LieZ donc seurement
 Les rames sur les bancZ, puis que diligemment
 On sorte & qu'on s'en aille aprestez à largesse
 Le festin au chasteau, ie parle à la ieunesse:
 Je fourniray de tout. Vous aultres qui portez
 Sceptre en main, & de Rois estre issus vous vantez,
 Vous vous trouuerez tous en ma maison insigne,
 Pour à nostre hoste icy faire tout honneur digne.
 Que nul ny face faulte: appelleZ au surplus
 Au festin, le diuin chantre Demodocus:
 Car Dieu luy a donné & l'art & la science
 De reciter des airs d'extreme esionissance,
 Excellent dessus tous, & de dire à plaisir
 Sur tout sujet qu'il veut sur le champ se choisir.
 Ce disant il se leue, & la bande diuine
 Des princes & Seigneurs apres luy s'achemine.
 Le herault d'autre part & diligent & prompt
 Va le chantre appeller. Les ieunes gens s'en vont
 Cinquante & deux en nombre, accourent au rinage,
 Se hastent de metre ordre à tout le nauigage.*

Ilz montent le trinquet, mettent ez environs
Du mast le voile blanc, posent les anirons
Et les attachent bien, & poussent sur l'Empire
De l'escumant Neptün le preparé nauires.
Puis au palais Royal se rendent diligens,
Le portique, la court sont tous remplis de gens,
Le pallais en regorge, & anciens & ieunes
Hommes de qualité, & les basses communes
Accourent au chasteau. Alcinous alors
Alla faire immoler douze brebis, huit porcZ
A la dent blanche & lisse, & fit tuer encores
Pour remplir le festin vne couple de tores,
On escorche, on etrippe, on dresse le banquet,
A faire bonne chere & ioyeuse on se met.
Quant voicy arriuer le herault honorable
Menant Demodocus le chancre delectable,
Qu'en amitié la muse eut merueilleusement,
Et luy donna du mal & du bien largement
Car elle le priua de la resjouissance
Des yeux, & luy donna aussi en recompense
L'art de tres-bien chanter. Le herault diligent
Le fit soier sur vn siege orné de cloux d'argent,
Aupres d'un grand pilier au meillen de la sale
Où estoit le banquet de la troupe royalle,
Le fit appuyer contre: vn fort crochet estoit
Au dessus de sa teste, où son luth il pendoit,
Luy monstrant le moyen comme il le pourroit prendre
Quand il voudroit iouer. A donc il fit estendre
La nappe aupres de luy, fit la table charger
De viures, pain & vin pour boire & pour manger,
Quand l'enprendroit l'enuie. Ainsi toute la troupe
A la table se met, mange, tranche, decoupe,

LE VIII. LIVRE

Sur les viures se iette: & quand leur fut passé
 L'appetit de manger & la soif eut cessé,
 Le chantre fut esmeu par les doctes pucelles
 De chanter des Heros les actions plus belles,
 Leurs vertuꝝ, leurs exploitꝝ, dont l'honneur penetroit
 Aux astres les plus haultꝝ, & le renom entroit
 Dedans le Ciel luyfant. Comme le Roy d'Itaque
 Au vaillant Achilles souuentefois s'attaque,
 Et Achilles à luy: comme au banquet des Dieux
 On les vit courroucer, & mots contentieux
 Furent mis en auant en leurs tressaintꝝ conuies.
 Et comme Agamemnon quand il voit les Achies
 Noiser & quereller d'un courage felon
 Grand plaisir y prenoit. Le diuin Apollon
 L'auoit ainsi predict de son saint habitacle
 Si tost qu'il fut entré pour entendre l'oracle,
 Le principe fut lors des miseres des Grecs,
 Et des Troyens. Cesont du grand Dieu les secrets.
 Le bon Demodocus chantoit en ceste sorte,
 Et Vlysses prenant sa robe en sa main fort
 La tira sur sa face, & se cacha long temps:
 Et les gros pleurs tomboient de ses yeux degoutans.
 Il voultut respecter si bonne compagnie,
 Et craignoit qu'on le vist, ce-pendant que manie
 Son lut Demodocus. Mais si tost qu'il cessoit
 De ses yeux Vlysses les larmes effaçoit,
 Et retiroit sa robe, & en prenant la coupe
 Versoit le vin aux Dieux au milieu de la troupe.
 Mais dès que ces Seigneurs luy disoient de chanter
 Prenans plaisir d'ouyr ce sujet raconter,
 Vlysses aussi tost se cachoit de sa robe
 Et respendoit ses pleurs. A tous il les desrobe.

Qui ne le virent point : le Roy seul l'apperceut
Estant aupres de luy, seul decouvrir le sceut :
Il l'ouyt soupirer, de son ame troublee,
Entendit ses sanglots. Alors à l'assemblee
A dire ainsi se prit. Derechef oyez moy,
O vous Phaaciens escoutez vostre Roy.

Nous auons tous repen à nostre suffisance,
Et auons du doux lut en la resiouyssance,
(Car aux festins, tousiours la Musique suruiens
Seante & à propos, & tresbien y conuient.)
Il nous fault aller voir la campagne, & au reste
Passer vn peu le temps à quelque ieu honneste,
Afin que ce seigneur venu en son pays
Quelquefois puisse faire entendre à ses amis
Combien nous surpassons tous autres à la lutte,
A l'escrime, à sauter, à tirer à la butte,
Et que nous excellons tous les hommes viuans.

Ce disant il marchoit, & tous l'alloient suyans,
Après qu'il fut sorty Pontonous prend charge
Du bon Demodochus, de son lut le décharge,
Et le pend au crochet, luy monstre le chemin,
Le met hors de la salle & le prend par la main.
Tous les Phaaciens renommez en vaillance
Courrent de toutes parts en grand resiouyssance,
Pleins d'admiration, pour voir l'esbatement,
Vne grand troupe apres alloit ensemblement.

Voicy les principaux de la bande Royale,
Acroné le premier, Elatra, Ocyale,
Après eux vint Nauteus, & le fort Eretmeus,
Auec Anchialus, puis Ponteus, & Prymneus,
Et Thoon, & Proteus, puis Anabesinee
Auec Amphialus le fils de Polynee,

LE VIII. LIVRE

Le fameux Tectonide, & le pareil à Mars,
 Le fort Euryalus mépriseur des hazards,
 Plein de dextérité, plein de verte jeunesse,
 Le Naubolide encor' à qui nul pour l'adresse
 Du corps, pour la beauté, la taille, n'osoit pas
 S'esgaller, excepte le beau Laodamas.
 Les trois enfans aussi du bon Roy se leuerent,
 Et les premiers de tous pour courir se trouuerent.
 Le diuin Clytonee & puis Laodamas,
 Auecques Halius. Ils aduancent leurs pas
 S'essayent les premiers, ils prennent leur carrière,
 Volent & font hausser sur le champ la poussiere.
 Mais le premier de tous Clytonee aduancoit,
 Couroit plus vistement, & les autres laissoit
 Autant derriere luy, & d'un pareil espace
 Les outrepassoit tous, comme il y a de place
 Entre le laboureur, ses mules ou ses bœufs,
 Lors qu'il les va poussant sur le gueret poudreux.
 La palme de la course estant ainsi conquise,
 La lutte luy succede & en auant est mise,
 Et chaque luiteur s'oint d'huile par tout le corps.
 Euryale à ce ieu fut vaincœur des plus forts,
 Amphiale à s'anter surpassa tout le monde,
 Elatree à ietter en l'air la boule ronde.
 Celui qui de l'escrime emporta tout l'honneur,
 Ce fut Laodamas le vaillant escrimeur.
 Les ieux paracheuez, apres que la jeunesse
 Ia s'estoit esbatue avec toute allairesse
 Le beau Laodamas, le brave fils du Roy
 Se prit à dire ainsi. Or venez avec moy
 Compagnons mes amis, si nostre hoste peut estre
 A point accoustumé de se faire paroistre,

Où

Où à quelque exercice ou à quelque autre ieu,
Nous lui demanderons. Et ie l'ay apperceu
D'assez belle façon, de belle corporence,
Les iambes, les costez, les bras forts à puissance,
Nerueuses les deux mains, le col bien ramassé,
Bref en tout & par tout le corps bien compassé.
Puis d'aage tout parfait, hors de tendre ieunesse,
Bien qu'il semble cassé de peine & de tristesse,
Du travail de la mer, & de tant de dangers
Que trop communement courent les estrangers.
La mer est un tourment qui n'a point à sa peine
En labeur, en travail vne plus inhumaine,
Les hommes elle rompt, & son cruel effort
L'homme de guerre rend imbecille & moins fort.

Auquel Euryalus ceste responce donne:
Certes Laodamas, ta penssee est fort bonne,
C'est tresbien dit à toy, va donc lui demander.
Auquel Laodamas desirant s'accorder
Se fourre dans la presse & va trouuer Ulysse.

Mon pere, si tu sçais quelque honnestes exercice
Mets l'en auant, dit-il, si le belliqueux art
De combattre tu as appris en quelque part,
Ainsi que ie le croy, & que le ieu d'escrime
Fauorisé par toy, tu tiens en grande estime.
L'homme ne peut auoir plus de gloire & d'honneur
Que celui qu'il acquiert de la course vaincœur,
Ou au combat des bras, alors qu'il faiet paroistre
Ou sa force des pieds, ou celle de sa dextre.
Amy fais en esprenue, & iette loing de toy
Toute cause de deuil, ou de crainte ou d'émoy:
Ton nauire desia les bleus sillons entame,
Nos gens sont sur la mer ayans en main la rame

LE VIII. LIVRE

Qui n'attendent que toy: Barque, escorte en nul point
Compagnie ne gens ne te defaillent point.

Lors le sage Ulysses. Qu'est-ce que tu te moques
De moy, Laodamas, au combat me prouoques,
Moy miserable & las, car plustost mon malheur,
Ma tristesse & mon mal me reuiennent au cœur,
Que ie ne prens plaisir à tous ces exercices,
Ces ieux & passe-temps, qui toutes les malices
De la mer ay souffert, & battu si souvent
Des guerres sur la terre & sur la mer du vent.
Mais, las, tant seulement, ô bon Roy, ie te prie
Tes Princes, tes sujets, donnez qu'en ma patrie
Ie puisse retourner, faictes que sur les eaux
En mes champs paternels me portent vos vaisseaux,
C'est là tout mon desir, c'est toute mon attente.

Auquel Euryalus de parole piquante.
Ie ne te pense point homme experimenté
A la lude, à la course, ou qu'ayes frequenté
Les hazards de la guerre, ou le bruit des alarmes,
Où les hommes galands paroissent souz les armes:
Mais tu ressembles mieux à quelque marinier,
Sçachant dessus la mer l'auiro manier,
Ou tenir le timon, & monter sur la hune,
Ou à quelque marchand qui va chercher fortune
Pour faire quelque gain, & le gain acquesté
Porter en sa maison, ou à la verité
Plustost à vn corsaire estant sur l'eschaugette
Du hault de son vaisseau, qui espie & qui guette
La nauire marchande, afin de l'emporter.
Non, non, tu n'es pas propre à combattre & iouster.
Auquel, le regardant de trauers en colere,
Ulysses respondit. Amy, tu me confere

Tres-mal à un brigand, & tu ressembles mieux
Un homme querelleux qu'un iuste & vertueux,
Tu es un peu trop libre. Or les Dieux à tout homme
Leurs dons tout à la fois ne prodiguent pas. Comme
Eloquence, courage, esprit, intégrité:
Cestui-cy ne sera pourueu de grand beauté,
A qui Dieu donnera la faconde eloquence,
Par elle rachetant sa laide corporence,
Et pour elle donnant la langue, & l'ornement
Du langage disert. Cestuy là voirement
Est admiré du peuple, & sa douce parole
Des beaus auditeurs les oreilles enjolle,
Les rudes en parlant ameine à la raison,
Excelle en fin sur tous par sa douce oraison.
Si quelquefois il sort & va parmy les rues,
Le bourgeois comme un Dieu l'adorent testes nues,
Ont l'œil sur luy tout seul fiché & arresté,
Et leur semble qu'il ait quelque diuinité.
Mais l'autre a la beauté du visage agreable,
En beaux lineaments, il est aux Dieux semblable,
La lieffe en son corps s'ouure de tous costez:
Mais il n'a pas aussi les propos bien dictés,
La grace luy default de l'attrayant langage,
Et de parler correct il n'a pas l'aduantage.
Tu en es tout ainsi, car certes ta beauté
Est si grande, que rien n'y peut estre adiousté,
Mesme les Dieux de qui tant grande est la puissance,
N'en scauroient former un de plus belle prestance:
Pour le reste, tu n'as n'esprit, n'entendement,
La beauté de ton corps ce n'est rien que du vent,
Tu ne peux en conseil bien dire ne bien faire,
Tu l'as monstré, m'ayant pronoué à colere

LE VIII. LIVRE

Ainsi mal à propos : Non, non, ie ne suis pas
 Ignorant ne des ieux, ne des aspres combats,
 Ainsi que tu as dit, ie m'en vante le prime,
 Et entre les vaillans le second ne m'estime,
 Entre les plus adroits des armes tireray,
 La palme de l'escrime à tous i' arracheray,
 Tant que i' auray fiance en ces mains, en cet aage,
 En mon espee au poing, & en mon bon courage:
 Encore qu'affligé, de tristesse pressé,
 Opprimé de travail, de malheurs trauersé,
 Encore que long temps & par mer & par terre
 I'aye porté sur moy les fatigues de guerre,
 Aye passé les mers à la force des bras,
 Ie me veux toutesfois esprouuer aux combats.
 La langue médisante excite, mord, anime
 Le dépit, la colere en vn cœur magnanime,
 Tu m'as par trop piqué. Or sans auoir quitté
 Sa robe, il s'est leué d'impetuosité:
 Prit la pierre pesante, & qui n'estoit iettable
 A bras quel qu'il fust là, non pas mesme ebranlable.
 Doncques il eslança dedans l'air & au vent
 Ce poids bien plus massif, plus lourd & plus pesant,
 Que celui dont se sert de tousiours la noblesse,
 Ny des Phaaciens la plus roide ieunesse.
 Lors de son bras puissant il vint à esbranler
 La pierre longuement, puis la ietta en l'air
 De toute sa puissance : vn grand son effroyable
 Se fit, & le lourd poix se cacha dans le sable,
 Et la terre marqua. Alors les assistans
 La teste contre bas baissèrent tremblottans
 De grand rauissement, combien qu'ils facent rage,
 Et qu'ils soient excellens au faiet du nauigage,

Admirent estonnez & perdent le caquet,
 A l'incroyable coup qui leur vient d'estre fait.
 La pierre vole au vent, court dessus la campagne,
 Et partant d'un tel bras, toutes les marques gaigne.
 Alors Pallas ayant vestu un corps mortel
 Marqua le coup, & puis leur tint un propos tel.

Bien aueugle seroit qui au maniment mesme
 Ne cognoistroit le coup de ceste borne extresme,
 Ce coup passe bien loing, & ne se mesle point
 A tous les autres coups: mais aduance son poinct
 Deuant quel que ce soit qui derriere demeure.
 Courage mon amy, courage: ie t'asseure
 Que nul de tous ceux-cy ton coup ne passera,
 Et quelque effort qu'il face approcher n'en pourra.

Lors Vlysses tressault de ioye incomparable
 Voyant qu'il a trouué un amy favorable:
 S'adresse aux Scheriens, & les prouoque ainsi:
 Or mettez plus auant que ceste borne icy
 Jeunesse Scherienne, ou s'il fault que i'en face
 Une autre, ie suis prest. Que ceste-cy s'efface
 Je la remarqueray, ou ietteray plus loing.
 Vous doncques, que celuy qui a tant soit peu soing
 De monstrier sa valeur paroisse magnanime,
 Car ie suis prouoqué, soit que soit à l'escrime,
 Ou au ceste pesant, ou soit à qui courra
 Plus viste, & le premier la borne touchera:
 Venez à m'esprouuer, ie dy tant que vous estes
 Icy de Scheriens, car mes iambes sont prestes:
 Venez, di-ie, approchez, ie ne reculle pas,
 Je n'en excepte nul, hormis Laodamas,
 Car il m'a bien veigné. Qui, sinon qu'il eust plaine
 La teste de folie & d'arrogance vaine

LE VIII. LIVRE

Combattray son amy, & qui provoquera

Qu'un enragé, celui lequel le logera?

Certe celui qui veut de pair à pair combattre

Celui qui le reçoit, & contre luy debatre,

Exilé dessus tout, estrange, enuayé

De fortune & de mal, merite estre hay,

Il gaste tout son fait, se rend insupportable,

Et est vilainement chassé en miserable.

Mais tout autre qui veut contre moy contracter

Je ne reculle point, ie ne veux retracter

Rien de ce que j'ay dit, ie demande rencontre,

Ferme ie l'attendray, ou iray à l'encontre:

Soit qu'il faille escrimer, le ieu j'en ay appris,

Soit qu'il faille courir j'en emporte le prix,

Soit qu'il faille de l'arc débänder les sagettes,

Soit s'ecrafer la teste au cruel ieu des cestes.

Approchent les plus forts, viennent les plus sublins,

Car ie sçay débänder l'arc de mes fortes mains,

Et ie suis le premier à rendre ensanglantée

Dessus mes ennemis ma fleche droit iettée.

Le seul Philoctetes à Troye m'emportoit

Tirant plus droit que moy, luy seul me surmontoit

Lors que nous autres Grecs mettions un prix loüable

A qui tireroit mieux de la fleche honorable.

Des autres ie me vante estre tout le premier,

De ceux qui sont viuans ie suis le singulier

En quelque lieu qu'ils soient de la terre habitable,

Et qui sçauent manger le present delectable

De la mere Ceres. Mais, ô Phæaciens,

Je n'ose m'égaller aux Heros anciens.

Qui s'accompareroit au magnanime Alcide,

Qui au braue Eurytus que la terre Occhalide

Bellicieuse a nourry, qui mesmes se prenoient
Jusqu'aux Dieux, & tirer contre eux entreprenoient?
Eurytus en recent puis apres mort amere,
Et ne vieillist iamais sous le toict de son pere,
Car Phæbus le tua, temeraire qu'il fut
De l'oser prouoquer, & souffrir ne le sceut.
Quoy? aussi droit encor le ianelot ie iette
Que quelqu'un tireroit de l'arc vne sagette.
Mais pour les pieds, ie croy qu'on me deuancerait,
De cela seulement on me surpasseroit:

I'ay trop paty sur mer, les genoux me tressaillent
N'y ayant peu suffire, & les forces m'y faillent.

Il dit, & tout le monde estonné se taisoit.

Le seul Alcinoüs en ces mots luy disoit.

Tes propos, ô mon hôte, ont eu bien grande force
En mon endroit, dit-il, par les faits tu t'efforce
De montrer ta vertu, iustement indigné
De ce que cestui-cy t'a ainsi dédaigné:
T'osant mal à propos prouoquer à combattre,
Car nul homme viuant n'entreprendroit debattre,
Et blasmer ta vertu, ayant du iugement,
Et qui auroit appris de parler sagement,
N'oseroit en plain cham éprouuer ta vaillance
Sans en porter bien tost la deuë penitence.

Mais or' écoute moy, Tu pourras quelque iour
Raconter à quelque autre, alors que de retour
Seras en ta maison, prenant dessus ta table
Auecques tes amis ton repas delectable
Ta femme & tes enfans, & t'en rememorant,
La vertu dont icy on nous va decorant,
Et les combats esquels sur la mer & la terre
Propre nous a rendus le grand dard de tonnerre.

Pour l'escrime, les poings, le ceste ensanglanté,
Ce pays cy, des plus n'est expérimenté:
Mais (qui est maigre chose, & vertu fort petite)
Pour bien courir des pieds ceste gent est fort viste,
Nous sommes excellens pour aller sur la mer,
Bien conduire un vaisseau & dignement ramer:
Nous prenons grand plaisir à faire bonne chere,
Nous aimons la Musique, & la dance, & de faire
Longue table sur tout, nous tenir nettement,
Nous baigner, & changer souvent d'acoustrement,
Et le liét blanc & mol. Or maintenant, ieunesse,
Que ceux qui ont acquis de bien danser l'adresse,
Se mettent en avant, afin que quelque iour
Nostre hoste en son pays se voyant de retour,
Raconte à ses amis, comme à regir sur l'onde
Les nauires voilez nous passons tout le monde:
Comme à courir dispos, à danser & baller,
Chanter, iouer du luth, nous pouuons exceller
Toute autre nation. Que quelqu'un donc s'aduançe,
Et s'en aille querir la lyre en diligence
Au bon Demodocus, qui est à la parroiy
Pendue à vn crochet. Ainsi dit le bon Roy
Alcinoüs, qu'on void en majesté reluire.
Et le Herault se haste & va querir la lyre
Du bon Demodocus, que le Roy veut ouyr,
Et de ces doux accords son hoste resiouyr.
Lors neuf des miieux appris de toute la ieunesse,
En disposition, en grace, & en souplesse
Plus expérimentez, ont le soing d'ordonner
L'ordre du bal suyuant, & de tout gouverner:
Disposer vn chacun, & soustiennent la charge
Du bal & des chansons dedans la salle large.

Après voicy venir le heraut, apportant
Le lut harmonieux, qui au chantre le tend:
Luy se met en avant, & toute la noblesse
Qui ieune, à de danser & l'usage & l'adresse
Se met autour de luy, & à ses diuins sons
Accorde sa cadance & ses belles chansons.
D'un art émerueillable & diuine science
Balans dedans la sale ils font valoir la dance,
Et Vlysse estonné admire grandement
Leur disposition, leur art, leur mouuement,
Leurs sauts entre-coupez, leurs passépieds volages,
Et la diuersité de leurs gentils passages.

Tandis Demodocus des beaux airs qu'il chantoit
Tout ce noble troupeau doucement enchantoit
Et touchant le boyau de sa lyre diuine
Il prend vn beau sujet de tres haute origine
De Mars & de Venus il chantoit les amours,
Et comme à Mulciber ils firent de bons tours:
De leurs embrassemens les premieres caresses,
Mille ieux, mille esbats & mille gentilleses,
Et comme mille fois Cyprine luy donna
Mille baisers secrets, son front enuironna
De bouquets & de fleurs, de daignant delicate
Les baisers d'un boiteux, dont le lit elle gaste.
Après il adionsta que Phæbus éclairant
Prompt rapporteur alla leur faulte decourant
Quant il les vid ensemble, & la tristesse grande
Qu'en eut le Roy du feu qui aux forges commande.
Comme il en fut troublé: les criz qu'il en ietta,
Et comme mainte chose en son cœur medita
Afin que se venger de l'un & l'autre il puisse:
Qu'en fin il eut recours à son grand artifice

LE VIII. LIVRE

Entra dedans sa forge, & longuement batit
Sur son horrible enclume un fer qu'il estendit,
Il en fit des chainons qui ne se pouuoient rompre,
Par la force des mains & par le temps corrompre,
Pour deffous le secret des liens incogneus
Envelopper ensemble & Mars & sa Venus.

Son cas paracheué, plein d'ire dedaigneuse
Ils'en va vers le lit de la couple amoureuse,
Ses chainons deliez il tend de toutes parts,
Car merueilleusement il en vouloit à Mars.
L'ennemie à Pallas si primement ne file
Que Vulcan auoit fait sa cordelle subtile,
Mesme à peyne les Dieux la pouuoient discerner.

Son piege bien tendu, qu'il auoit fait tourner
Tout à l'entour du lit de la Deesse aymable,
Il feint de s'en aller en l'Isle desirable.
De Lemnos son sejour, noble & belle Cité
Ceste Isle de tousiours chere luy a esté,
Et là sa Cour il tient. Mars s'estant de l'absence
De Vulcan apperceu, brulant d'impatience,
Et bouillant de l'amour de sa belle Venus
Entre dedans la chambre, où les lacs incogneus
Finement se cachotent. Là, Venus a trouuee
De deuers Iupiter freschement arriuee,
Il la prit par la main, l'embrassa doucement
Et luy dit, ô mon amour que j'ayme uniquement,
Ne veux tu pas, mon cœur, que nous couchions ensēble,
Et que l'amour au lit doucement nous assemble?
Ton mary n'y est pas, certaine ie t'en tiens,
Il est allé trouuer ses rudes sintiens
En Lemnos sa maison. Chose plus agreable
Ne pouuoit arriuer à la Deesse aymable,

Ils se mettent au liect, l'un l'autre desireux
D'accomplir la douceur de l'esbat amoureux
Avec mille plaisirs. Mais soudain qu'ils s'embrassent
Mille petits chainons autour d'eux s'embarassent:
Liens de tous costez les viennent attraper
Ils ne peuvent chetifs d'eux se desuelopper,
Ne peuvent se mouvoir, & ne peuvent pas mesme
Leuer ne mains, ne bras, tant leur peyne est extreme.
Ils recogneurent bien, mais c'estoit un peu tard,
Du boiteux forgeron & la malice & l'art:
Qui reuient tout soudain & de sa hanche grimpe
Sur le sommet astreux du reluisant Olympe,
Plustost qu'il n'eust peu estre arriué en Lemnos
Phœbus, à l'œil duquel rien ne peut estre clos
Voyant le tout d'en haut de son throsne, moleste
Vint decourrir le cas à la troupe celeste.

Vulcan va chez Venus enragé de ce tort,
Escume de colere & les leures se mort,
Brasme effroyablement, & tous les Dieux appelle
O pere Iupiter & vous troupe immortelle
Des Dieux tousiours heureux, qui iamais ne mourez,
Et qui sur le luisant du haut Ciel demourez,
Venez voir, ie vous pry l'iniure punissable,
Combien que ridicule, ordure intolerable
Aux mariz: venez voir comme me scait traiter,
Pauvre boiteux, Venus la fille a Iupiter,
Comme elle me mesprise: aimant ce pestifere
Cest enragé de Mars, malheureuse a dultere,
Pource qu'il est dispos, beau, puissant & nerueux,
Me dedaigne, d'autant qu'elle me voit boiteux
Et foible & impotent. Mais mon pere & ma mere
Sont causes decela, que iamais la lumiere

LE VIII. LIVRE.

Nem'eussent ils faict veoir, pour si abiectement
Me traicter. Voyez les coucheZ ensemblement.
O la meschanceté, auoir osé commettre
Tant indigne forfait, & dans mon liét se metre?
Hà, ie meurs de despit. Voyez le paillard pris,
Et de l'autre costé la paillarde Cypris.

Bien, leur ioye pourtant n'en sera guere grande,
Vous ne iouirez pas ô amoureuse bande
Long temps de vos amours, & des contentemens
Duplaisir desrobé de vos embrassemens.
Vous en maudirez l'heure, ô confits en malices,
Vous aurez en horreur le miel de vos delices,
Mars & Venus, i'en iure, aussi demeureront
Pris ensemble & lieZ, i'amaïs n'en sortiront
Que mon pere ne m'ayt rendu le mariage
Et ce qu'il eut de moy pour sa fille volage,
Pour ceste belle Nymphe, en qui n'est ny honneur
Ny honte, ny respect: cause de mon malheur,
Brulant de paillardise orde, sale, & lubrique,
Belle à la verité, mais nullement pudique.

Il dict, & tous les Dieux coururent à sa voix,
Sur les planchers de l'air vindrent tous à la fois.
Neptune y accourut qui les ondes amasse,
Et du globe terreux les rinages embrasse,
L'Atlantiade y vint, qui scait le gain chercher,
Et ses traits loin jettant Phabus le blond archer:
Les Deesses au Ciel seulettes demurerent,
Et venir chez Vulcan trop craintifues n'ozerent:
Honteuses elles ont vergogne de Venus.

Les Dieux dessus le seuil de l'huis se sont tenuZ,
S'eclatent tous de rire, & font du Ciel la fable
Le malheur de Vulcan, & son art admirable.

Ils admirent pourtant son dol ingenieux.

*Alors ie ne scay qui de la troupe des Dieux
Dit, ainsi qu'ils alloient parlant de cest affaire:
Les actes vicioux onc ne succedent guiere,
Et le pesant qui marche attrape le hastif.
Comme asteure Vulcan combien qu'il soit tardif
Par son art a pris Mars, qui de vistesse isnelle
Surpasse tous les Dieux de la voute eternelle:
Et tout boiteux qu'il est, par sa ruse il a pris
Le dispost qui obtient sur les disposts le prix
A ceste occasion sa peyne est augmentee,
Et de son ennemy l'ame plus irritée.*

*Ils denisoient ainsi quand en ceste facon
Apollon attaqua l'Arcade nourrisson.*

*Cher fils de Iupiter, dont les parolles sages
Font si discrettement des hauts Dieux les messages,
T'oy qui donnes les biens, voudrois tu les bras nuds
Et le corps depouillé tenir ainsi Venus
Douceement embrassée, & estre en ceste sorte
Estroittement serré de ceste chesne forte?*

*Auquel Mercure dit. O que fust il ainsi
Roy Phœbus, grand archer. I'endurerois cecy
Et trois fois plus encor, & que Dieux & Deesses
Me vinsent voir leur saoul, pris de telles finesse,
Garroté des chainons d'un lien plus puissant,
Pourueu que de Venus ie fusse jouissant.*

*Vn ry print tous les Dieux quand il finit de dire,
Mais le Prince des eaux fut seul qui n'en peut rire:
Ains des mains, de la voix Vulcan il suplioit
De laisser aller Mars, & ainsi luy disoit,*

*O Dieu, ô grand artiste, à l'alleure tardine,
Deslie ie te pry le belliqueux Gradine,*

LE VIII. LIVRE

Voicy, ie te promets pour luy, de te donner
Tout ce dont on se peut dignement guer donner
Entre Dieux immortels. Auquel la iambe torte,
Non, ne me vien iamais parler en ceste sorte
Neptune esbranle-terre, & n'entre en caution
Enuers moy miserable, & en respsion
D'un autre miserable. Hé te pourrois-ie prendre
Entre ces puissans Dieux, & en mes fers te rendre
Au lieu de cestuy cy, si tost qu'il se verra
Deffaict de mes liens & son debte niera?

Auquel Neptune alors. Si sortir tu le laisse,
Et qu'il ne veille apres te tenir sa promesse,
Je payeray pour luy ce qu'il aura promis.

De tant te reffuser il ne m'est pas permis,
Et ne le doy, dit il, ô grand ebranle-terre:
Je le vay deliurer. Ce disant, il defferre
Le secret des chainons. La chaine se dissout,
Et l'un & l'autre amant fut aussi tost debout,
Mars gaigne vistement les sommets de sa Thrate;
Et Venus au beauris la mere de la grace
S'en va droit en Paphos, sa treschere maison,
Fort ayse de se voir deliuré de prison.
Là son temple est dressé, & l'encens de Sabee
Sur son autel sans fin faict monter la fumee
De ses douces odeurs. Les charites soudain
Promptes à la servir la mirent dans le bain,
D'eau tiede doux fleurant doucement la laverent;
De suc Ambrosien l'oignants la recreerent:
Puis l'ayant bien servie ainsi qu'on faict les Dieux
Ietterent dessus elle habits tresprecieux.

Vlysse au chantre prit vn plaisir indicible,
Et le Phæacien à la rame invincible

Alors Alcinous commande s'aprestier
Le beau Laodamas & qu'il vienne sauter
Seul avec Halius, car nul ne s'appareille
A leur legereté disposte & n'ompareille
Adonques en leurs mains ils prennent le balon
Que Polybe auoit fait d'admirable façon,
L'un le pousse en l'air haut d'agilité si forte
Que dans l'obscurité des nues il l'emporte,
L'autre esleué de terre aysement le preuint,
Le prit ains que son pié sur le paüé reuint:
Puis apres s'estre assez exercez à la balle
Ils s'en viennent dresser le bal dedans la salle,
Font merueille des pieds, & dansants & sautants
L'un de l'autre à l'enuy passent ainsi le temps.
D'autres ieunes enfans d'un consert admirable
Donnoient plaisir au peuple, au chant emerueillable
De leurs airs doucereux, c'est plaisir de les voir
Tous chantans ou dansans faire bien leur deuoir.

Lors Vlysses au Roy. O Prince dont la gloire
Grande entre tous les Rois par le monde est notoire
Certes les Scheriens comme tu me l'as dit
Tous autres à denser passent sans contredit,
Et i'en suis bon temoin. Rany ie m'emerueille,
De voir l'agilité de ces gens n'ompareille.

Il dit, & le Roy prit un grand contentement
A ce qu'il auoit dit: Se tourne promptement
Vers toute l'assemblée, & de parole sage
Aux rameurs Scheriens vint tenir ce langage
Gentilshommes, Seigneurs, escoutez vostre Roy
Et vous Phaaciens ie vous pry oyez moy.
Ce bon seigneur me semble estre plein de prudence,
De grand vigueur d'esprit, d'insigne experience.

LE VIII. LIVRE

Faisons luy ie, vous pry quelques riches presens
 Honorans sa vertu, & qui luy soient plaisans:
 Douze se trouueront chacun ou Roy ou Prince
 Qui ont autorité dessus ceste prouince
 Ie feray le treziesme. A luy chacun donra
 Vn bel accoustrement, & present luy fera
 D'un talent de fin or. Que donques on s'assemble,
 Et nous luy porterons nos presens tous ensemble
 Il en sera plus gay alors qu'il les tiendra,
 Et plus alaigrement son repas en prendra
 Qu'Euryale aussi voise & se reconcilie
 A luy, i'en suis d'aduis, & courtois, le suplie
 De n'estre point fasché qu'inconsiderement
 Il ayt parlé à luy, luy offre honnestement
 Quelque present apart, Il dit: chacun l'aduoue
 De ce qu'il proposoit, & hautement le loue.
 Alors Euryalus en ces mots respondant:
 Alcinous, dit il, grand Prince commandant
 Sur vn peuple infini, ie luy veux satisfaire
 Selon ton mandement, afin de te complaire
 Iay vn estoc doré magnifiquement beau,
 La poignee est d'argent d'Ivoire le fourreau,
 Estoffé richement le don est honorable
 Et si luy sera fort, ie m'asseure, agreable
 Iele luy vois offrir. Ce disant, s'en alla
 Trouuer le fort Vlysse, & ainsi luy parla
 Mon pere, ô personnage excellent & insigne,
 S'il m'estoit eschappé quelque parolle indigne,
 Que le vent, ie te pry, l'emporte entierement.
 Les Dieux te doint pouuoir à ton contentement
 Faire voyage heureux, agreable & prospere,
 Et renouir ta maison & ta patrie chere.

Après

Après auoir sur mer si longuement erré
Les Dieux te doint aussitout aage desiré.

O montreschere amy, (luy respondit Vlysse
Tout ayse du present) & que long temps tu puisse
Viure heureux & content, sans iamais regretter
L'estoc que tu me viens par honneur presenter;
Puis que tu m'as voulu, afin de satisfaire
Autort que tu m'as faict, ce digne don en faire.

Ce disant, il le prend, le pend à son costé,
L'estoc, de maint beau clou richement argenté
Tandis le soleil tumber, & les dons on apporte
Qu'on auoit assemblez, riches en toute sorte.

Au prix que les heraultz au palais les portoient,
Les filz du Roy, soudain les prenoient les mettoient
Pres d'Arete la Royne. Apres ilz obeirent
Au Roy Alcinous & pres de luy se mirent
Comme il leur commandoit. En apres il parla
A la Reyne, & luy dit. Ce coffre que voila
Faictes le bien serrer, & que dedans on mette
Quelque beau vestement, & que quel robe honeste;
Et que le tout luy soit gardé soigneusement.
Et vous aultres, allez, courez diligemment
Faictes chauffer force eau, afin qu'il se nettoye
Qu'il se baigne, se lane, & que ioyeux il voye
Les honnestes presens, les richesses, les biens
Que luy font auourdhuyl les Seigneurs Scherrens.
Puis vienne s'esjouir au festin magnifique,
Et participe aux sons de la douce musique.

Pour moy: ce grand hanap d'or reluisant & fin
De bon cœur ie luy offre en don; à celle fin
Qu'il ayt de temps en temps tousiours de moy memoire;
Et que quand il voudra parmy ses amiz boire,

L E V I I I . L I V R E

*Chez luy, premierement au puissant Iupiter
Et puis aux autres Dieux il en puisse ietter
En terre le doux vin. La Reine, à sa parolle
Faiët le commandement à sa troupe: qui vole,
Si tost qu'elle l'entend, porte, verse, emplit d'eau
Le bain pour le laver, allume le fourneau,
Iette du bois dessous qui la chaudiere enflamme,
Et le long du trepiè rampoit la belle flamme.*

*Cependant Areté de sa chambre tiroit
Un beau coffre, & dedans curieuse serroit
Les dons, les vestemens, l'or & la pierrerie
Que son hôte auoit eu des Seigneurs de Scherie
Suivant l'aduis du Roy. Elle y fit metre aussi
Un bel habit tout neuf, & puis luy dit ainsi:
Remarque bien le tout, voicy que ie l'enferme,
Fai dessus quelque boucle & la serre bien ferme,
Qu'on ne t'en prenne, estant au vaisseau endormy.*

*De la Reine, Vlysses creut le conseil amy,
Enueloppe le coffre, une boucle subtile
Y fit, que luy apprit Circé la Nymphe habille.
Alors la fille vint, qui au bain le conduit,
Vlysses le voiant bien fort s'en resioit,
Car depuis Calypso, il n'estoit, pour remede
De sa grande fatigue, entré dans nul bain tiede.
Mais estant là, la Nymphe en auoit grand souci:*

*Après qu'il fut lavé des seruantes ainsi,
Et que son corps fut oint de liqueurs precieuses,
On lui ietta dessus robes delicieuses,
Puis il sortit ioieux, & de rechef alla
Trouuer ceux qui beuuoient. Alors l'attendoit là
L'excellente en beauté Nausicaa la belle,
Aiant la Majesté d'une Nymphe immortelle,*

Au maintien gracieux que graue elle portoit
Vne Deesse mesme elle representoit.

Elle s'esbahissoit voiant le Roy d'Ithaque
De tant belle presence : adonc elle l'attaque
Disant. Et bien mon hoste, estant en ta maison
Dy moi ie te suppli, si tu auras raison

De te ressouuenir de ta tant bonne amie
Nausicaa l'infante, à qui tu dois la vie.
Lors le cant Ulysses lui dit lui blandissant.

Belle Nausicaa fille du Roy puissant
Le grand Alcinois, soit la volonté telle
De Iupiter, mary de Iunon sa seur belle,
Que ie voye en seurté mon pais de retour.
Et selon mon desir me luisse l'heureux iour
Auquel i'arrineray sur mes champs domestiques.
Certes ie t'y rendray de mes vœux pacifiques
Les doux remercimens tant que viuant seray,
Et tout ainsi qu'un Dieu ie te reclameray.
Car tu m'as conserué ô gentille pucelle:

Ce disant il s'assit sur vne chaire belle
Aupres d'Alcinois, adonc ils detranchoient
Les viures en morceaux, & le vin debouchoient.
Puis le Herant arrive, & quant & quant luy entre
Le bon Demodocus, le tant aymable chantré:
On l'assied parmy ceux qui estoient là disnant,
Et contre un grand pilier il se va foustenant
Alors Ulysses dit au Herant venerable
En tranchant du Sanglier qui estoit sur la table
(Car il en restoit fort encores du repas)
Vn tronçon d'entre tous le plus tendre & plus gras.
Tien herant ie te pry, pren cela, & le porte
Au chantré de par moy, dy luy que ie l'exhorté

LE VIII. LIVRE

De boire & de manger : que ie le veux aussi
 Aimer & honorer, bien que plein de soucy.
 On doit tousiours porter honneur & reuerence
 Aux poëtes gentils, grande est leur preferance
 Sur tous hommes mortels. Car la muse a daigné
 Les instruire, & leur art leur â, douce, enseigné,
 Aymant fort leur mestier. Ainsi qu'il luy commande
 Le heraut prend soudain en ses mains la viande
 Qu'Ulysses luy tendoit, afin de la porter
 Au bon Demodocus, & la luy presenter.
 Il la prend de bon cœur, la decoupe l'entame,
 En mange à son plaisir, plein de ioye en son ame,
 Or tous les conuiez commencerent soudain
 A faire bonne chere, & de porter la main
 Et aux plats, & aux pots : & plein d'esionissance
 Vn chacun en prenoit selon sa suffisance.
 Quand la soif fut esteinte & l'appetit passé
 Ulysses en ces mots s'est au chantre adressé :
 Gentil Demodocus, des Muses l'excellence,
 Ie te prise beaucoup, grande est ta preferance
 Sur tous hommes mortels : soit que sous les douceurs
 Du diuin Apollo, ou dessous les neuf seurs
 Tu ayes tes chansons si doctement apprises :
 Tu dis, comme elles sont, les hautes entreprises
 Des Grecs, & leurs malheurs, & ce qu'ils ont souffert,
 Soit que tu ayes tout toy-mesme decouvert,
 Comme y estant present, soit que l'aye ouy dire,
 Tu scais naïfement le pinser sur la l'ire.
 Mais poursuy ie te prie & sur ta douce vois
 Chante nous l'appareil du grand cheual de bois,
 Dy nous l'inuention de l'estrange edifice
 Qu'Epens faconna d'admirable artifice

*A l'ayde de Pallas. Ulysses le sublin
Le poussa dans le fort de la ville, tout plein
D'hommes armez & forts, qui renuerserent Troye,
Mirent Pergame à sac & Ilion en proye.*

*Que si tu scais traicter ce sujet comme il faut,
Dessus tous les humains ie t'esleueray haut,
Ie publieray par tout que ton vers, que ta grace,
Que ton entendement tous les autres surpasse.
Ie metray ton renom iusque au plus haut du Ciel,
Je diray que les seurs t'ont abrenué du miel
Qui coule sur Parnasse, & qu'en toute largesse
Quelque Dieu a sur toy deployé sa richesse.*

*Il dit, & de ce los le Poëte excité
S'a prestant à bien dire a disert recité
Dessus son luth diuin, comme sur la marine
Monterent les Gregois pour faire bonne mine,
Des logerent hastifs, mettans le feu par tout
Commenceants cestuy cy, finissants l'autre bout:
Tandis les autres chefs que la montagne enferme
Dans le traistre cheual, là dedans faisoient ferme
Remplis de grand silence, & dedans la cité
Par les habitans mesme est le cheual ietté:
Ulysses qui menoit ceste gaillarde bande
S'enseuelit luy mesme en la montagne grande,
Et Troyens de tirer. Mais comme ils estoient là,
Diuerse opinion parmy eux se mesla,
Trois aduis se traictoient: & l'inconstant vulgaire
Se partissoit en voix l'une à l'autre contraire.
Les uns vouloient sans plus que le bois fust ouuert,
Et ce qui pouuoit estre au dedans decouuert:
Les autres qu'on menast dessus vn precipice
Et qu'on en fist rouler le mechant edifice,*

LE VIII. LIVRE

D'autres qu'on laissast là le sacrossaint present,
 Et que l'on adoucist les Dieux en ce faisant.
 Plus que tout autre aduis le dernier ils suivirent,
 Et les Troyens ainsi sous les armes perirent,
 Le destin les pressoit. Ainsi dans la Cité
 Fut mise la machine, & le cheval ietté:
 Dans lequel se cachoient la fleur de la jeunesse,
 Et les plus résolus de la flotte de Grece:
 Qui devoient tost donner aux Troyens malheureux
 Espouvantables morts & trespas rigoureux:
 Demodocus chantoit comme sortants du chesne,
 Descendans comme à flots des cavernes du fresne
 Les Grecs mirent à feu la superbe cité
 Se resspandants par tout, d'un & d'autre costé
 Espars ils saccageoient, & de grande furie
 Eslançoient les horreurs de leur aspre turie.
 La grande foule tumba deuers Deiphobus
 Où le Dulichien avec Menelaus
 Firent de grands efforts: car aux cris, aux alarmes
 Les plus braves Troyens s'estoient là mis en armes.
 Le combat fut bien grand, Mais ils furent mis bas
 Sous l'effort d'Ulysses assisté de Pallas.
 C'est le diuin sujet que Demodocus traicte.
 Cependant Ulysses larmes de ses yeux iette
 En grande quantité, son visage humectant
 Des grands ruisseaux de pleurs qui luy vont degoutant.
 Comme une pauvre femme & triste & desolée
 Embrasse son mary, tombé dans la meslée
 D'un furieux combat, pleure, couuert de coups
 Par le glaive ennemy son miserable espoux,
 Cependant qu'il deffend sa patrie, sa ville,
 Ses murs & son foyer, sa femme & sa famille.

La pauvrete qui voit son mary se mourant
 Et haletant encor, triste le va pleurant
 Couchee dessus luy, remplit l'air, de ses plaintes,
 Meut la terre à ses cris, le Ciel à ses compleintes,
 Cependant l'ennemy cruel luy est à dos,
 Qui la haste, & la frappe à coups de ianelots,
 La trainne en seruitude, & d'effort pitoyable
 Force de mille maux la pauvre miserable:
 Son visage tendret cy deuant tout amour
 Perd à force de pleurs son lustre & son beau-jour,
 Son beau teint se fanit sous la tristesse amere,
 Et ses yeux si tendus se rident de misere,
 N'est plus rien qu'une vieille, elle qui par auant
 Ieune fille s'alloit sur toutes esleuant
 Vlysses ainsi, au son des pitoyables carmes
 Qui chantoient ses malheurs, se fendoit tout en larmes,
 Et nul ne l'apperceut: le Roy tant seulement
 Qui luy estoit prochain le vid, secretement
 Gemissant en son sein, & de face troublee:
 Si prit occasion de dire à l'assemblee.

Je vous pry, mes amis, sans plus outre-passer
 Que le chancre diuin veille son chant cesser,
 Tout le monde n'a pas son suiet agreable.
 Je vous dy que depuis qu'on est sorti de table
 Et que Demodocus son chant a commence,
 Nostre hoste que voicy de gemir n'a cessé,
 Il a le cœur serré, la marriçon le presse,
 Et faut qu'il soit saisi de quelque grand tristesse,
 Que le chant cesse donc. Nous qui le recenons
 A quelque autre sujet retourner le deuons,
 Inuenter vn moyen qui destourner le puisse
 De cestristes penfers, & qui le resiouisse.

LE VIII. LIVRE

Car il est plus seant ses hostes delecter
 Quand on les tient chez soy, que de les contrister,
 Et à l'occasion de ce mien hôte honneste
 Ces dons icy se font, & ce festin s'appreste:
 Il s'est fait suppliant, & ie le veux cherir
 Comme mon frere propre, ayder, & secourir
 De toute ma puissance: & quiconque a bonne ame
 Nerejette jamais celuy qui le reclame.

Mais ie te pry, mon hôte, ouure moy maintenant
 Ton cœur, & l'à dedans ne va rien retenant:
 C'est toujours le meilleur se trouver veritable.
 Dy ton nom, que ton pere & que ta mere aimable
 T'ont donné, par lequel ceux qui te cognoissoient
 T'appelloient, & tes gens comme ils le prononceoient
 Personne n'est sans nom: & quiconque a sceu naistre
 Bon, mauvais, de quel lieu que ce soit qu'il puisse estre,
 En naissant, ses parens luy ont donné vn nom.
 Dy nous semblablement ton país, ta maison,
 La ville dont tu es, afin que tu t'embarques,
 Et que dans ton país te conduisent nos barques.
 Les navires d'icy n'ont timons, ny patrons,
 Semblables que les ont celles des environs:
 Nos gens scauent les meurs, les pensers, les courages,
 Des gens, les nations, les plages, les rinages,
 Les habitations, ils trauersent legers
 Les mers & les courants, ne craignent les dangers,
 Les vents, ny les brouillats, ny le hazard des ondes,
 Et n'ont peur d'enfondrer sous les vagues profondes.

Pourtant, Nausithous mon pere, cy deuant
 (Il m'en souuient fort bien) nous disoit fort souuent
 Que Neptun' nous portoit enuie merueilleuse
 Dequoy nous n'auions peur de son eau perilleuse,

Et sans difficulté que nous entreprenions
De mener un chacun, & point ne le craignons.
Qu'il nous menaçoit fort d'enfondrer un navire
Qui nous appartenoit dans son profond empire,
Pour un temps aduenir, ainsi qu'il reuiendrait
De conduire quelqu'un. Donc qu'il l'enfondreroit
Et sur nostre cité, ainsi qu'un mur terrible
Mettroit la pesanteur d'une montagne horrible.
Ainsi nous racontoit le vieillard : mais voila,
Soit qu'il plaise à Neptune de faire tout cela
Que mon pere a predit, & dont il nous menace,
Soit qu'il change d'aduis & qu'il ne le parface,
Tout gist en son plaisir. Mais, soit par toy conté
En quel payst tu as esté tant tourmenté,
Quels hommes, quelle gent : si c'est terre habitee,
S'ils sont humains, courtois, si elle est frequente,
Ou bien s'ils sont cruels, sauvages, furieux,
S'ils sont hospitaliers, & s'ils craignent les Dieux.
Dy moy encor cecy. Au sujet de ces carmes
Pourquoy ie te suppli, as tu ietté ces larmes?
Quelle tristesse as tu? Pourquoy gemis tu tant,
Lors que tu vas oyant les gestes racontant,
Et les malheurs des Grecs qui furent deuant Troye,
Son funebre accident, son pillage & sa proye.
Les Dieux ont faict cela, & leur perte pendoit
Sur le bout du fuzeau que la Parque tordoit:
Ces ruines, ces morts qu'elles leur ont filées
A tous hommes seront à iamais reuelees:
Les maux & les tourments qu'elles leur ont tramez
Seront sur les chansons chantez & renommez.
Quelqu'un de tes parens, ou ton pere, ou ton frere,
Ton gendre bien aimé, ton cousin, ton beau pere,

LE VIII. LIRE DE L'ODYSSEE.

Sont-ils morts deuant Troye, ou souz les hauts rempars
Du superbe Iliou ont-ils souffert de Mars
Le funeste trenchant? Car c'est en ceste sorte
Que se perd & déioint la proximité forte,
Et en ceste façon nous allons tous pleurans
Quand la mort les a pris, nos bien-amez parens,
Ou si c'est ton amy qui ait eu mort amere?
I'en estime pas moins un bon amy, qu'un frere,
Amy qui au besoin t'aide opportunement,
Et qui sage & prudent t'aime sincerement.

Fin du huiſtieme Liure.



LE NEVFIESME LIVRE DE L'ODYSSEE D'HOMERE.

ARGUMENT.

LE commencement de la narration d'Ulysses. Ses exploits de guerre contre les Ciconiens, son abord aux Lotophages, sa venue en Sicile vers le Cyclops Polypheme, auquel, luy ayant mangé six de ses gens, il creue l'œil & se sauue de sa cauerne industrieusement.

AUTRE SOMMAIRE.

*Les Cicones cruels, les heureux Lotophages,
Polypheme éborgné dans ses antres sauvages.*

Lors le sage Ulysses à dire ainsi commence.
Puissant Alcinoüs, Roy grãd par excellēce
Sur tous les Princes Grecs, de qui l'illustre
nom

*Parmy les nations estend son beau renom:
Certainement c'est chose agreable & honnest
Que d'entendre la voix d'un si parfait Poète
Que cestui-cy, semblable aux Dieux: & pour certain
C'est le plus agreable & plus beau d'un festin
Que la douce Musique: Alors qu'à sa merveille
Les doctes assistans sont ranis par l'oreille,*

LE IX. LIVRE

Que le peuple escontant y reçoit du plaisir,
 Que la ioye, de tous le cœur en vient saisir,
 Que par tout le logis on en faiët allairesse,
 Que tous les conuiez sont esmeus de liesse,
 Boient de ces accords les accents doucereux,
 Sont ravis du diuin de ses sons amoureux,
 S'emplissans à souhait de viures delectables,
 Quand le maistre d'hostel charge les longues tables
 De mets delicieux, de pain les pannetiers,
 Et de vin excellent les ioyeux sommeliers,
 Et ceste chose encor me semble estre tresbelle.

Mais ie te veux narrer ma fortune cruelle,
 Ie te veux raconter mes infinis malheurs
 Si tu les veux entendre, & quelles grands douleurs
 J'ay souffert sur les eaux en allant par le monde,
 Afin que dauantage en pleurs ie me debonde.
 Mais, las, quels de mes maux diray-ie les premiers,
 Lesquels mettray-ie encor en ordre les derniers,
 Et lesquels de beaucoup? Car la celeste bande
 M'a donné des ennuis en quantité bien grande.

Sois moy donc ententif. Mais tout premierement
 Ie te diray mon nom, puis vous scaurez comment
 Ie suis venu chez vous estrangeur miserable,
 Eschappé sur la mer à la mort effroyable,
 Aux tristes accidens du ruineur destin,
 Car de vostre pays le mien est fort lointain.

Du fameux Laërtes ie suis le fils, Vlysse,
 Cogneu par tout en ruse, en dol, en artifice:
 Iusques au Ciel s'estend la gloire de mon nom.
 Ie demeure en Ithaque isle de grand renom,
 Sur qui le mont Nerite estend ses frais ombrages,
 Et cache ses sommets dans les plus hauts nuages.

Maints arbres grāds & hauts vōt dessus luy croissans,
Et sont leurs beaux sommets de loin apparoissans.

Quelques isles autour sont dont elle est enceinte,
Dulichie, Samos, & l'ombreuse Zacynthe,
Son costé qui paroist pres la mer se penchant,
Et qui de terre ferme est le plus approchant,
Regarde vers le Nord, & les autres encore
Vers le Soleil levant & la nouvelle Aurore.

Elle est petite, elle est aspre & rude au labeur,
Elle porte pourtant gens forts & pleins de cœur.
Je ne puis de ces yeux rien voir tant agreable
Que ceste terre là, mon pays desirable:

Bien que de mariage & d'amour i'aye esté
Par toy, ô Calypso, sonnent sollicité,
Combien que de Circé, la Mage renommée,
En astuce, en sçavoir, en breuvage estimée
I'aye esté recherché, espouser m'ait voulu,
Rien ne m'a destourné, rien i'amaïs ne m'a plu
Que mon pays natal, & n'est en ma puissance
D'oublier la douceur du lieu de ma naissance.
Rien au pris du pays n'est precieux & cher,
Rien ne nous est si doux que le natal foyer.
Bien qu'un homme en richesse à nul autre ne cede,
Que palais somptueux & tresors il possede,
S'il est loin du pays sur lequel il fut né,
Et loin de ses parens, il est infortuné.

Or ie te conteray maintenant mes voyages,
Mes erreurs, mes trauaux, mes pertes, mes dommages,
Desquelles m'a voulu le puissant Iupiter
Dés le depart de Troye en mer persecuter.
Au partir de Phrygie, & des plaines herbeuses
Où auoit esté Troye aux mœurs fumeuses,

LE IX. LIVRE

Le tourbillon m'emporte, & pousse en moins de rien
 Au barbare terroir du bord Ismarien
 Des Cicones cruels, auxquels ie fy la guerre,
 Pry leur ville, iettay leur muraille par terre,
 Hommes, enfans, vieillards, tuay tout sans mercy,
 Leurs femmes emmenay & leurs filles aussi,
 Partageay à mes gens leurs biens & leur richesse,
 Et personne ne fut qui n'eust dons à largesse.

Ie commande soudain la retraite sonner,
 Et les armes au poing sur ses pas retourner.
 Mais voyez les destins desia comme ils nous traittent;
 Mes compagnons, hélas, mes paroles rejettent;
 Refusent d'obeir. Ils demouroient assis
 Par les nauys, fayneans, & d'yresse transsis,
 Oublieux s'amusoient à boire à toute outrance,
 Car ils auoient trouué du vin en abondance.
 Egorgerent au bord bœufs, montons & brebis,
 Tant que les Ciconois qui s'en estoient fuis
 Retournerent furieux, avec force autres bandes:
 Car ils leur auoient dit les occisions grandes
 Qu'on auoit faict des leurs. Ils viennent donc sur nous
 Avec tous leurs voisins, pleins d'ire & de courroux;
 Braues & belliqueux. Or au pays de Thrace
 Dedans le continent il habite vne race
 De gens, qui sont dressez à fierement courir
 A cheual sur leur homme & le faire mourir:
 Puis mettent pied à terre, & scauent bien combattre
 Quand il est necessaire, & l'ennemy abbattre.
 Ils nous surprennent donc, viennent à l'impourueu
 En grand nombre amassez, autant que l'on a veu
 De feuilles par les bois, de bleds par les campagnes
 De fleurs parmy les prez, & d'herbes aux montagnes.

Iupiter, ses destins, les assaults, les hazards
Nous pressoient grandement souz les armes de Mars,
Et le sort, qui sur nous a la chance tournée
Nous contrainst de souffrir vne triste iournée:
Nous sommes entouré de sia de toutes pars
Pressé de l'ennemy, qui es lance ses dars
Iusque dans nos vaisseaux, & de dessus la terre,
De flèches & de traits nous font mortelle guerre.
Depuis le poinct du iour tousiours nous combattons,
Et iusques au Midy brauement resistons, (che
Cōbiē que moindres qu'eux. Mais quād Tiron fut pro-
De noyer dans la mer du soir son panchant coche:
Les Ciconois alors deuindrent les plus forts,
Et aux Grecs debellez donnerent milles morts.
Là mourut de nos gens six de chacune barque,
Et le reste eschappant à la cruelle Parque
Ioyeux faiēt voile au vent, laisse le sanglant bord,
Aise de s'estre ainsi guaranty de la mort.
Nos nauires pourtant plus outre ne passerent,
Nos fermes auirons plustost ne se hausserent,
Et nos voiles iamais ne prirent le plein vent
Au large dans la mer, que n'eussions parauant
Par trois fois appelé nos gens. qui là tomberent
Et des fiers Ciconois la proye demeurerent.
Tost apres Iupiter encontre nos naisseaux
Enuoya la tempeste, & renuersa les eaux
Tout s'en-dessus-dessous, noyant nostre nauire
Des orages tombans des fleuves de son ire:
Nous couurit de bronillas, & son courroux amer
Cacha d'une nuee & la terre & la mer.
Nos vaisseaux sont frappez de la vague irritée,
La nuit humide chet du Ciel pre cipitée.

LE IX. LIVRE

Elle amasse tout l'air plein de poisseuse horreur,
Et la mer est changee en obscure frayeur.
Ia les pauvres vaisseaux nagent à l'adventure,
Sont emportez des flots : & la tempeste dure
Trois, quatre fois les frappe, on oit craquer le bois,
Les voiles déchirez rompent tout à la fois,
Sont emportez en mer en mille parts diuerses:
Les morceaux vont nageans dessus les ondes perses,
Nous fremissons de peur : car tout ce que voyions
Nous rapportoit la mort, & au fond nous cachions.

Après reprenans cœur nos forces redoublâmes,
A force d'auirons nos nauires poussâmes
A terre my-rompus par les vents furieux:
Nous fusmes là deux iours & deux nuits, soucieux
Et tristes au mourir. Couchez sur les herbages
Lamentions nostre sort pressez en nos courages.
Mais au troisieme iour que l'aube se leuant
Ses beaux cheuaux dorez amenoit du Leuant,
Et se monstroit vermeille, empourprant les campagnes,
Et sa teste dressant sur le bout des montaignes:
Nous remontons en mer, nos grands mats redressons,
Chacun rentre en sa nef, & nos voiles haussons,
Ia nous nous asseons, & toute nostre flotte
Au plaisir d'un bon vent agreablement flotte,
Le vent & le Pilote ensemble gouuernoient,
Et à nostre souhait nos nauires menoient.

Helas de ce temps là le vent ainsi prospere
I'eusse touché le bord de mon Ithaque chere,
Si le fier Aquilon & les flots rigoureux
Ne m'eussent déuoyé de mon chemin heureux:
Ne m'eussent destourné dessous la pointe fiere
Des rochers Maleans & du mont de Cythere.

L'erre

J'erre neuf iours entiers sur le flot agité,
Des aduersaires vents deçà delà porté:
Sur le dixiesme iour i'aborde les riuages
Prosperement conduis des heureux Lotophages,
Qui viuent des doux fruits croissans sur des rameaux,
Ioyeux, pleins de santé. Nous sortons des vaisseaux,
Nous mettons pié à terre, & beuons de l'eau nette
Que le sable Prochain à gros bouillons nous iette.
Nous faisons bonne chere, & sur l'herbe coucheZ
Delectons de bon vin nos gosiers dessecheZ.
Quand la soif & la faim ne nous firent plus guerre,
J'enuoye de mes gens pour decouurir la terre,
(I'en choisi deux de tous: le Herault pour le tiers
Pour aller avec eux i'adioignit volontiers.)
Quelle part nous estions, en quel coin souZ la sphere,
Et quels hommes c'estoient, & ce qu'ils scauoient faire:
Comme ils eurent marché par pays longuement
Ils s'allerent en fin mesler ioyeusement
Parmy ceux du pays, qui contre eux ne se faschent,
Ny de glaiues trenchans de les tuer ne taschent,
Ny furieusement ne les vont pas charger:
Mais de leurs fruits sucreZ leur donnent à manger.
Ils n'en eurent mangé, que tost ils oublierent
Tout ce qu'ils auoient faict, & ne se soucierent
De reuenir vers moy: de leurs naturels Dieux,
De leur douce maison pauurement oublieux,
Tout le soin, le soucy qu'ils ont en leurs courages,
Et de viure tousiours avec les Lotophages.
Ie les allay querir, à force les trainay,
Et dedans nos vaisseaux pleurans les ramenay.
Me fallut les lier par force & violence:
Lors ie dy que chacun r'entraist en diligence

LE IX. LIVRE

Dans les vaisseaux ailez, sur les bancs se rangeast,
Que du fruit du pays personne ne mangeast,
De peur qu'ensorcellez il ne leur prist enuie
D'user en ce pays le reste de leur vie,
Et ne fissent refus de remonter sur mer,
Oublieux du pays, & lassez de ramer.
Chacun donc se retire, & à force de rame
Frappe les flots ondeux, & les vagues entame.
Nous avançons chemin de deuil allangouris,
On voyoit escumer souz les ondes Doris.

Voicy nous arriuons à la riuë sanglante
Des Cyclops cruels engeance violente,
Effroyables Geans, gens sans raison, sans foy,
Superbes, orgueilleux, sans coustume, & sans loy,
Se faisans forts des Dieux, iamaïs ils ne labourent,
Ils ne plantent iamaïs : Mais là les moissons courent
D'elles-mesme sur terre, & croissent sur les champs
Qui n'ont esté fendus par les coutres trenchans.
Là, sans qu'on y laboure & là sans qu'on y seme,
Là terre leur produit leurs viures d'elle mesme,
Là croist le beau froment, là l'orge rous iaunit,
La vigne abondamment la vendange y fournit.
Et les arbres leurs fruits. Vous y voyez la vigne
Ployante souz le fais de ce doux fruit insigne,
De grands raisins chargee, & la vient humecter
La pluye que luy donne vn moitte Iupiter,
Dont le fruit se grossit & s'enfle en son escorce.

Ils ne plaident point là, la loy n'a nulle force
Parmy eux, les status n'y sont point recogneus,
Et les sceptres n'y sont en grand conte tenus.
Mais ils vont demeurans par les forests ombreuses,
Sur les monts esleuez, és grottes cauernenses.

Chacun sa loy s'ordonne, & a commandement
Sur sa femme & enfans : N'ont soucy nullement
De s'entre-rechercher une isle assez petite
S'estend dehors du port de la terre où habite
La race des Cyclops, & ce lieu tout desert
Est de grandes forests entierement couuert.
Comme l'isle n'est pas de leur terre prochaine,
Elle ne s'en void pas aussi par trop lointaine,
Mainte Cheure sauvage en grande quantité
Naist dedans ce pays nullement frequenté.
Pour les aller secourir sur leurs roches pointues
Les sentes nullement ne paroissent battues
Des pas d'homme viuant. La force de l'odeur
Des chiens ne va point là, là ne va le veneur,
Qui tousiours par les bois & les forests obscures
Sur les monts dangereux court maintes aduantures.
Le bestail, ny le soc ne la vont point couurant,
On n'y va point semant, on n'y va labourant,
Vuide de laboureurs, & exempt de leurs œures.
Toutesfois on y voit pasturer maintes Cheures,
Et à leurs brayemens resonnent les rameaux.
Les Cyclopes n'ont là nauires ny vaisseaux
Dorez & peinture : En leur fiere contree
N'a charpentier aucun encore faict entree,
Qui d'ais bien cheuillez de postaux grands & longs
Leur ait enseigné l'art de faire galions,
Sur lesquels entamans le creux des ondes perses,
Ils s'en aillent chercher les regions diuerses,
Voir estranges pays, apprendre, s'enquerir,
Visiter, traffiquer : Ainsi qu'on void courir
Les autres nations pour faire leurs traffiques,
Et entre-secourir chacun leurs republiques.

LE IX. LIVRE

Gens qui les frequentans les civilizeroient,
Et leur terre, & leurs mœurs en fin cultiueroient,
Bastiroient des citez, les mettroient à leur aise.

La terre toutesfois n'est nullement mauuaise,
Elle rapporteroit en saison, car les prez
Sur le bord de la mer fleurissent diaprez,
Mols & bien arrosez. Là s'aimeroit la vigne
Où pendroit le doux fruit de la souche benigne:
Le terroir y seroit facile à labourer:
Le grain dedans l'espy pourroit croistre & dorer,
Et l'espy pesamment y pancheroit la teste.
Le port y est aisé, exempt de la tempeste,
Et n'est ia de besoin d'y lier les vaisseaux
Lors que les vents fascheux bouleuersent les eaux,
Ou de les mettre à l'ancre. Nulle tourmente en somme
Ne vous empesche point d'y prendre vostre somme.
D'eux-mesmes les vaisseaux y demeurent flottans
En toute seureté iusques au nouveau temps,
Qu'on voit se rëueiller la mariniere tourbe,
Qui coule en mer le fais de son nauire courbe,
Que les vents gracieux vont doucement soufflant,
Et de leurs forts soufflets les voiles vont s'enflans.
Au port sort vne source & claire, & babillarde,
Dont l'eau va murmurant doucettlement iazarde,
Et iette à petits bonds son onde ialissant,
Maint grand aulne feuillu à l'entour va croissant.
Nous abordaſmes là, telle fut la fortune
Qui nous y vint pousser au temps de la nuit brune
Quelque Dieu que ie croy, fut nostre conducteur,
Car l'air estoit alors espais & fort obscur:
Mesmes de s'entrevoir il estoit impossible.
Nos masts estoient couuerts d'un air noir & horrible,

La poix & l'espaisseur estoient amoncellez,
Et noircissoient l'entour de nos vaisseaux voilez
La Lune auoit perdu sa corne desirable,
Ne monstroit plus du Ciel sa lumiere agreable,
Mais triste & renfermee es nues se cachoit.
Isle, terre, ne port de nous ne s'apperçoit,
Et ne vismes iamaïs les vagues se poussantes
Encontre le rinage, & les eaux se haussantes
Au bord qui les frappoit, que nous n'eussions touché
Le port, & nostre cable à la rive attaché.
Nos compagnons alors plient voile & cordage,
Et nous nous estendons couchez dessus l'herbage
Lassez de la marine & pesans de sommeil,
Et de l'aube attendons le gracieux réueil.

Mais dès que le matin ramenant la iournee
Elle nous eust monstré sa robe ensafrancee
Rebridant ses cheuaux, nous fusmes esbahis
De voir si pres de nous & l'isle & le pays.
Nous y dressons nos pas, y prenons nostre route,
Remplis d'incertitude, & agitez de doute,
Et les Nymphes des bois filles de Iupiter
Force Cheures touchans, les vindrent presenter
A nos gens affamez, afin qu'ils en tuassent,
Et que, dessus le feu les cuisans, en mangeassent.

Nous courons au vaisseau, prenons flèches & dards,
Et pour Cheures ferir nous enlunons nos arcs,
Nous nous mettons en trois, les suiuons sur la croupe,
Des pointes des rochers, & iusqu'en la grand troupe
La chasse leur donnons. Iupiter & le sort
Nous donna bonne prise, & nous fit mettre à mort
Nombre de venaisons, iettant en nostre voye
Enceinte de forest & la prise & la proye.

LE IX. LIVRE

Et comme nous estions quelques douze vaisseaux,
Le hazard nous donna à chacun neuf Cheureaux;
Mais le mien en eut dix du parsus de la guerre.
Alors chacun de nous de se ietter en terre,
De faire bonne chere, & de s'emplir ioyeux
De grasse venaison & de bon Bacchus vieux.

Tout le iour se passa, iusqu'à ce que dans l'onde
De l'Ocean, Titan mist sa perruque blonde:
Que nous estions à table, & que nous n'auions pas
Encor vuidé les pots, ny finy nos repas.
Car nous auions du vin encor à suffisance,
Et en auions chargé en tresgrande abondance
Lors que nous prîmes pié es bords Ismariens,
Et iettâmes à bas les murs Ciconiens.

Or nous considerons des geantines roches
Celles qui nous estoient de terre les plus proches,
Nous regardons fumer leurs trous & leurs crottons,
Nous entendons apres des Cheures & moutons
Infinis beestemens. Puis Phœbus le Ciel laisse,
Et faict en se cachant place à la nuit espaisse.
Et nous encor par terre au sommeil redonner
Nos membres tous lassez, iusques au retourner
Du iour, & que l'Aurore hors des ondes se tire.
Lors appellant mes gens ie me pris à leur dire:

Compagnons ie vous pry' & vous mes chers amis,
Demeurez tous icy, sans qu'à nul soit permis
De sortir des vaisseaux, mais faictes bonne garde,
Et de descendre à terre aucun ne se hazarde.

Moy avec mon vaisseau i'iray tant seulement
Décourrir le pays, desirant grandement
Apprendre en quel endroit de la terre nous sommes,
Et si les habitans de ce pays sont hommes

*Agrestes, incivils, sans hospitalité,
Ou bien s'ils ont en eux quelque civilité.*

*Paracheuant, ie monte en ma nef, & commande
A mes gens de me suiure, incontinent ma bande
Me suit, entre au vaisseau, donne des aurons,
Et vers l'endroit plus proche à force nous tirons.
Y estans abordez tous ceux de nostre flotte,
Nous duisons là pres l'entree d'un grotte
Haute dedans le roc. Maint laurier s'esleuant
De l'horrible cauerne ombrageoit le deuant.
Brebis en quantité & Cheures en grand nombre,
Innombrable bestail reposoient deffouz l'ombre,
Et vne grande salle aupres apparoissoit
Faiçte de grands cartiers, laquelle se haussait
D'une belle hauteur: Grands Pins de leur branchage,
Force chesnes feuillus y donnoient de l'ombrage:
Un homme horrible & grand là dedans se tenoit,
Et tout seul ses troupeaux par les rochers menoit.*

*Entre ses compagnons engeance abominable,
Il ne vent habiter nullement sociable,
Monstre prodigieux, ne semblant nullement
Aux autres de visage, en haussant seulement
Sa teste quand il sort de ses roches cornues,
Il touche de son front aux plus haultaines nues,
Et surpasse haultain, de son chef orgueilleux
Les sommets les plus hauts des grands môt sourcilleux.*

*A l'heure ie laissay le reste de ma bande
Au bord dans mon vaisseau, les prie & leur cōmande
De faire bonne garde, & que pour quelque cas
Que ce soit, des vaisseaux ils ne s'écartent pas.
I'en prens seulement douze, avec moy les emmeine
Fais porter de bon vin vne peau de bonc pleine*

LE IX. LIVRE

Pour nous reconforter, d'un tres-excellent vin
 Present delicieux de Maron le deuin,
 Le Prestre d'Apollon, sage fils d'Euanthee,
 D'Ismarie habitant, que nous auions domptee:
 Et ce faisant auions sauue luy & ses fils,
 Sa femme & sa maison d'entre les deconfits,
 Sans qu'il se ressentist en rien de ce desordre,
 Portons grand reuerence à luy & à son ordre.

Il habitoit pour lors Prestre à Phœbus sacré
 Dans un bois, à son maistre & saint & consacré,
 Me fit de grands presens: entre autres d'un grand vase
 D'argent massif le hault, d'argent massif la base,
 Sept talents de fin or, de vin delicieux,
 Incorruptible vin, saint breuuage des Dieux
 Douze grands poinçons pleins. Ses gens ne ses seruātes
 Ne sçauoient où estoient ces liqueurs excellentes.
 Dans vne cane à part secrette il les mettoit,
 Et sa femme la clef seulement en portoit:
 A grand peine vne fille, & fidelle & secrette,
 Avec sa femme & luy sçauoit ceste cachette,
 Quand de ce bon vin fort vne fois ils beuuoient
 Tant seulement un pot, sa force ils abrenuoient.
 De vingt mesures d'eau, il fumoit l'ambrosie
 Du verre, & de le boire onc ne mouroit l'enuie.

Je fais donc d'un tel vin vne grand' peau charger,
 Et porte quant & moy de quoy tresbien manger.
 Je brule de desir, mon cœur d'ardeur sautelle
 De voir le grand Cyclops à la face cruelle,
 Au corps fort & puissant, le mépriseur de loy,
 Le moqueur de iustice, & le rompeur de foy.
 Nous paruenons en fin à sa fiere demeure,
 Mais l'horrible Geant n'y estoit pas pour l'heure.

Ses bestantes brebis par les champs il païssoit
Et gardant ses troupeaux le temps ainsi passoit.
Nous entrons dans le trou où le monstre se veautre
Regardons chaque chose encor' l'une apres l'autre
Son mesnage admirons. Son laitage pressé
Es fescelles estoit proprement adiancé,
D'osiers bien repliez ses panniens & ses cages
Estoient chargez de beurre, & rompoient de fromages:
Icy estoit le toit des camuses brebis,
Là des boucs petulans l'establage estoit mis,
Et des cheures à part les logettes d'eclisse
Se fermoient proprement, d'un soigneux artifice
Le Cyclops rengerait tout faisant distinction
Et de bestail divers & d'habitation.
Là logeoient les plus vieux, à part font leur demeure
Les moyens, & plus loing ceux qui depuis peu d'heure
Sont nés, agneaus, cheureaus. Car au pris qu'ils naissoient
Ils trouuoient leurs maisons & en leurs rang passaient
Toutes pleines de lait rompoient ses laittries.
Je vy ses toits aux boucs, ie vy ses bergeries,
Ses grands pots escumans, ses cages, ses paniers,
Ses cherieres, ses ais, ses fais celles d'osiers,
Et ses mets où estoient bien serrez ses laitages,
Sa creme, son caillé, son beurre & ses fromages.
Mes gens me pressoient fort d'emporter ces vaisseaux,
De toucher devant nous son bestail à mouceaux,
Charger tout en nos nauts: & desencrer bien viste
De peur d'estre surpris, & de prendre la fuitte.
Ie ne peu malheureux cela leur accorder,
Et ne me voulu onc laisser persuader:
Ie refusay mon bien, pour voir la mine fiere
De ce mandit geant, & pour tascher de faire

LE IX. LIVRE

Qu'il m'en donnast plustost par hospitalité.

Mais, las! il nous deuoit user de cruauté.

*Dans le cachot ombreux du feu nous allumâmes,
De ses fruitz, de son lait, de ses biens nous mangeâmes
A nostre suffisance: & attendîmes là*

*Jusqu'à tant que le monstre horrible deualla
Des rochers, dans son creux: & voicy qu'il apporte
De grandz charges de bois sur son espaulle forte,
Des arbres tous entiers, pour cuire son soupper
Sur le feu qu'il alloit bien tost en allumer.*

*Il iette la dehors sa monstrueuse charge
Et du pesant fardeau ses espaulles decharge,
Vn bruit horrible & fort suit ce deschargement,
Et horreur nous saisit le cœur entierement,
Tremblans & fremissans nous cerchons les tenebres,
Et fuyons par les coins de ses caches funebres,
Es lieux plus enfoncez, du roc nous nous cachons,
Et fuir la fureur du Geant nous taschons.*

*Il serre ses troupeaux, de ses brebis craitifues
Il tire le laitage, & des cheures lasciuës,
Mais il laisse dehors tous les moutons bestans,
Les masles, les agneaux & les boucs petulans.
Puis il ferme son trou: les grands postaux il cronlle
Et pour seruir de porte vn roc entier il roule,
Vn enorme caillou, & le leue aysement,
Tel que vint & deux chars tres difficilement
Sous l'aisseuil craquetant tireroient hors des boues,
Encor chacun garny de deux paire de roues:
Après se reposant, quelque temps il s'assied.
Ses brebis puis après & ses cheures il traict,
Presse leurs pis des mains, & sans tout le lait traire
Chaque petit il prend & le met sous la mere.*

Après par la moitié il partage son lait,
Dedans ses pots percez vne partie en met
Pour la faire cailler sur la ioncheuse eclisse,
Et par les trous du pot la masse prise pisse,
L'autre moitié du lait à part il reseruoit
Pour breuuage à soupper duquel il se seruoit.
Puis du feu il allume. Or la fin estant mise
A tout ce qu'il faisoit, voicy qu'il nous aduise
Où nous tremblions cachez pour la premiere fois,
Puis nous vient enquerir d'une effroyable vois.

D'où venez vous icy estrangers par les ondes?
Quel chemin ont tenu vos barques vagabondes?
Qui estes vous? dit il: & quel sujet vous faict
Aborder en ce lieu, Seroit ce pour l'effect
Du traffic, & pour vendre en ce lieu vos denrees
Que vous fendez ainsi les vagues azurees?
Où bien tracassez vous de ça de la courans,
Pour rapine chercher comme font les brigans,
Les pirates en mer? Hazardans vostre vie,
Vous iettans en dangers continus, pour l'enuie
De faire quelque proye, & espiez ainsi
Les passans pour les prendre & piller sans mercy?

Il dit & la peur froide entra dans nos poitrines,
Nous tremblasmes d'horreur de ses horribles mines,
Et du cry furieux qu'il ietta. Tout tremblant
Lors ie m'adresse à luy, en ces mots luy parlant.

Nous reuenons de Troye, agitez des tempestes,
Pauvres Grecs égarez. Les orages molestes
Et l'impiteux Auster nous ont icy iettez,
Des vagues & des vents & du Ciel tourmentez,
Cerchans nostre pais & nos Dieux domestiques.
Icy nous ont portez nos fortunes iniques

LE IX. LIVRE.

Nous forceans vn chemin tout contraire tenter,
 Ainsi nous a voulu le puissant Iupiter
 Faire tourner ailleurs que dans nostre contree
 Nous peuple malheureux de l'ayné fils d'Atree,
 Du grand Agamemnon dont le los immortel
 Se hausse celebré iusques dedans le Ciel,
 Lequel a mis à sac la belliqueuse Troye
 Et dessus Mars a mis tant de peuples en proye:
 Nous voicy à tes pieds prosterneꝯ humblement
 A ton port abordeꝯ: donne soulagement
 A nostre grand misere, & de dons secourables
 Courtois hospitalier secours ces miserables:
 Ne mets point à mepris nos clameurs & nos vœux,
 Mais aye ie te pry, reuerence des Dieux,
 Crain le grand Iupiter: Nous voicy à ta face
 Tresumbles supliants, fay nous mercy & grace,
 Fay comme Iupiter qui deffend, qui maintient,
 Tousiours les estrangers, tousiours pres d'eux se tient,
 Grand Dieu hospitalier pour estre à leur deffiance:
 Et de ceux qui leur font iniure, prend vengeance.
 Iupiter fort souuent a voulu cheminer
 Avec les voyagers, & les accompagner.
 Comme i'eus acheué, il enflamma sa face,
 Me respondant ainsi de superbe menace.
 Tu es fol, estranger, & quiconque sois tu
 Arriné en ce lieu de l'orage battu,
 Tu resue, en nous disant qu'ayons en reuerance
 Les Dieux, & que craignons leur celeste puissance,
 Nous auons bien que faire icy de Iupiter:
 Il a beau fondroyer, il a beau eclater
 Sur les branchus sommets des plus hautaines croupes,
 Que nous en chant icy à nous autres Cyclopes?

Fay tant que tu voudrastes Dieux forts & heureux,
Nous auons plus de force & de puissance qu'eux.
Si nous l'entreprenons nous leur donnons la fuite:
Ie n'ay crainte ne peur ny de l'ire depite
Ny du courroux mutin de ton beau Iupiter,
Ny que pour son respect ie daigne m'arrester
De faire mon plaisir, & moins que ie pardonne
A toy ny à tes gens, si ma volonté bonne
Est tout presentement de vous aualler tous.

Mais respon moy un peu, dy moy, où auez vous
Delaisé vos vaisseaux tempestez de l'orage?
Sont ilz encor à l'ancre ou contre le rinage?
Il me disoit cela pour me circonuenir,
Mais ie le decouury & le senty venir,
Qui fit que finement ie me pry à luy dire.

En mer Neptume a mis en pieces mon nauire
L'eslanceant rudement contre les rocZ chenuZ,
Et en terre a ietté tous les morceaux menuZ
Contre vostre rinage, & moy seul à grand peyne
Et ceux cy auons fuy la tempeste in humaine.

Il ne respondit rien, mais cruel acharnant
Sa rage impitoyable, & contre nous venant
Il en empogne deux, & de grand violence
Les batant contre un roc, en terre les eslance
Comme deux petits chiens, ou bien deux agnelets
Que lon oste à la mere encore tous foiblets:
Depiteux sang caillé leur cernelle degoutte
En sanglante tumbant la terre goutte à goutte,
Qui s'abreuue de sang, & puis pour son soupper
En pieces le mechant vient à les decoupper:

Le Lion faict ainsi fondant de la montagne
Que l'orage, la fin, la colere accompagne,

LE IX. LIVRE

Se iettant sur la proye, & la rompant des dentz;
 De mesme le Ciclops les iette la dedans
 En son ventre enragé, sang & chair & cervelle,
 Entrailles & boyaux, les os & la moëlle,
 Rien à terre n'en chet, le monstre plein d'horreur
 Croque & deuore tout. Nous tremblons de frayeur,
 L'horreur nous faict dresser les cheueux en la teste
 Et tout nous represente vne mort toute preste.
 Nous tendons nos deux mains aux astres & aux Cieux
 Pleurans & gemissans, nous adressons nos veuz
 Autreshaut Iupiter, à cest acte effroyable.
 Apres qu'il eut ietté en son ventre execrable
 Ces pauvres corps sanglâts, prend un grād pot de lait
 Le hausse sur le cul & en boit à souhait.
 Apres auoir souppé, pesant il se retire
 Aupres de ses trouppeaux, sur le dos il se vire
 Et ronfle de sommeil. I'en souuent grand desir
 De prendre mon espee, & de l'aller choisir
 A l'ayse dans le cuer, luy trauerser le ventre
 Cependant qu'il ronfloit ainsi dedans son antre,
 Et souuent en mon cuer ie fus sollicité
 De tirer mon espee estant à mon costé,
 Et l'en perser tout oultre, & faire large voye
 Là où les intestins environnoient le foye,
 Et luy donner cent coups sur son dernier som meil.
 Mais ie fi beaucoup mieux de prendre aultre conseil:
 Nous fussions là periz, & la fin terminee
 Du malheureux Geant la nostre eut entrainnee.
 Nous n'eussions iamais peu la grand pierre esbranler
 Qui fermoit la cauerne, & dehors la rouler,
 Nous demeurames là iusqu'à l'aube nouuelle
 Fort tristes & perplex, & tousiours en cervelle;

Mais la fille au matin ayant à son retour
Ramené sur son char à la terre le jour:
Il allume du feu va ses bestes retraire,
Puis prend chaque petit & le met sous la mere
Comme il apartenoit. Quand il eut acheué
D'eux d'entre nous encor de terre il a leué,
Les à mis par morceaux, & le monstre execrable
En a faict vistement son past abominable
Puis il sort ses troupeaux & les mene chercher
Pasture par les champs: destournant le rocher,
Et puis le remettant sans effort, sans secousse,
Comme si le couuercle il mettoit sur sa trouffe.

Ainsi le fier Cyclops repeu de sang humain
Sifflant sur ses troupeaux se remet en chemin
Sur les aspres rochers. Et plein de peine extresme
Le demeure en fermé songeant à Polypheme,
Et au moyen comment ie pourrois me venger,
Desirant que Pallas m'y vint accourager.
Lors ie vay m'aduiser d'un conseil bon & sage.
I'apercoy la un pau d'un oliuier sauvage
Encor' tout frais & vert parmy l'ancre couché
Que le cruel Cyclops auoit tout esbranché,
Pour le porter en main, en faire une baguette
Après qu'il seroit sec. Ce gros rameau ie guette
Aussi puissant qu'un mast qu'on met à un vaisseau
Qu'on a faict pour aller traffiquer dessus l'eau,
Que vingt bons auirons menent de bande en bande:
Semblable estoit la branche, aussi forte aussi grande:
Et ie me mys soudain apres à l'empogner,
Eus une infinité de peine à la rogner.
Ie l'accourcy d'une aune ou bien peu d'auantage,
Puis meis mes gens apres, les presse & accourage

LE IX. LIVRE

De luy faire la pointe & de l'amenuiser,
Moy mesmes ie me mis apres à l'aguiser
La brulant par le bout; pource qu'estant brulée
Sa pointe estoit plus dure & bien mieux affilée.
Puis dessous un fumier la cachay gentiment,
Car il y auoit là du fiens abondamment.

Or ie iettay au sort ceux de ma compagnie
Dont l'ame estoit le plus de courage munie
Pour courir au danger, pour courir ala foix
Auecque moy pousser & enfoncer le bois
Dedans l'oeil du Cyclops, cependant que le somme
De declinant sommeil agraueroit nostre homme
Quatre furent tirez du sort ensemblement
Telz que ie les voulois, que de mon mouuement
Feusse choisi moy mesme en un danger semblable,
Pour courir avec moy un peril effroyable,
Et ie vins le cinquiesme auoir part au hazard.

Nostre Cyclops ce iour reuint des champs bien tard,
Touche tous ses troupeaux dans la fiere demeure,
Et nul de tous dehors ceste fois ne demeure.
Soit qu'un Dieu le voulust, qu'il le fist sciemment,
Ou que là son destin l'attirast iustement:
Il oste le rocher de deuant la grand bouche
Et son huis fremissant facilement debouche.
Comme à l'acoustumé cheures & brebis traict
Pressant le pis des mains, & faict pisser le lait
Puis en remplit ses pots, puis sans du tout les traire
Il prend chaque petit & le met sous la mere,
Comme il eut achené le cruel le hideux
Reuint encore a nous & en auale deux.

Alors en m'aduanceant i'enjollois le fier monstre,
Et pleine du vin noir vne couppe luy monstre.

Prenez

Pren, luy di-ie, Ciclops, aualle ce bon vin
Et dedanstes boyaux fay le tumber soudin
Après t'estre sanglant rempli de chair humaine,
Taste un peu de quelz vins nostre nef estoit pleine;
Quand tu en auras beu ie t'en reuerseray
Tant que tu en voudras, pour voir si ie feray
Que doux & appaisé d'icy tu me renuoyes
De nostre cher pais aller trouuer les voyes.
Mais tu te trompes fort le monde demembrant
Et trop intolérable ainsi le deuorant,
Et que la chair humaine en tes entrailles entre
Pour en farcir cruel le desir de ton ventre.
Quelz vaisseaux desormais ton isle aborderont?
Croy moy, certainement nulles gens n'y viendront
Tandis que tu seras si fier & si terrible,
Et que pratiqueras cruauté si horrible.

Il luy dist tout ainsi. Il pren le goubelet
De fort vin escumant & l'aualle tout net
Et de ce doux Nectar embasme sa poitrine.
Il redemande encor de la liqueur diuine
Priant & repriant, ça de ceste boisson,
Redonne m'en encor, & puis me dy ton nom.
Tu receuras de moy plaisir & courtoisie
Comme mon hoste cher, donne m'en ie ten prie;
Et tu te vanteras de m'auoir emporté
Ayant logé chez moy dons d'hospitalité.
Combien que le terroir de la belle Sicile
Soit florissant & beau, soit encor plus fertile,
Et que le vin exquis y croisse abondamment
Des eaux de Iupiter arrosé doucement,
Et sorte genereux de la grappe exprimée
Ceste liqueur pourtant est de moy estimée

LE IX. LIVRE

Et meilleure & plus douce: au doux boire des Dieux
Ayant le goust semblable & au nectar des Cieux.

Lors ie luy tens encor de la liqueur flambante,
Par trois fois il en prend, & de main ravissante
La porte à son gosier, trois fois il l'aualla,
Trois fois à pleine bouche hardy il l'engoula,
Jusque là le poussa sa bestise brutale

Par le destin, ie croy. La boisson cordiale
Montant en sa ceruelle, & la forte liqueur
Ayant pris & gagné la place de son cœur
Ie m'adresse au Cyclops & de parolle telle,

Tu veus doncques sçavoir de quel nom ie m'appelle,
Ie te diray le vray, mais toy pareillement
Fay moy quelque present servant de monument
Et que j'aye de toy la souvenance bonne:

Or pour te dire vray ie m'appelle, Personne,
Mes parens ce nom là me donnerent, aussi
Et mon pere & ma mere m'appellerent ainsi

Il me dit, (à sa voix reuerberoit tout l'antre)
Personne, tu viendras le dernier en mon ventre
Après tes compagnons que ie déchireray,
Tu seras le dernier, croy, que ie mangeray,
Repose t'en sur moy, c'est la grace & le gage
Que tu auras, mon hoste, empour mon hostelage.

Ce disant, il se couche à l'envers estendu,
Et iette son grand corps sur la terre espandu,
Appuyant sur vn roc sa grosse teste immonde.
Le sommeil l'arresta comme il faict tout le monde:
Il n'auoit pas quasi commencé de dormir,
Que trop soul, que trop plein il se prend à vomir,
Qu'il rend sur le paué vilainement sa gorge
Vin & viande meslez, tout ensemble il degorge

Chair humaine, morceaux qu'il auoit auallé
Se sont hors de son ventre ordement ecoulé.
Lors ie cours au tison, ie commence à le prendre,
Ie le mets dans le feu, le rousle dans la cendre,
Iusqu'à ce qu'il sortist du foyer tout flamant.
L'accourage mes gens, ie les vois enflamant
De s'en venir à moy, de ne trembler, ne creindre,
De pousser brauement, & de point ne se feindre.
Comme le pau me semble assés bien allumé
Et, combien qu'il fust vert, rougement enflammé
Et petillant d'ardeur, ie le retire viste,
M'y fumant, mybrulant, mes compagnons i'incite
Qui vindrent resolués pres de moy se ranger.
Quelque Dieu, ie le croy, nous vint accourager
Et nous haussa le cœur, car mes gens enfoncerent
La pointe du tison, dans son œil la poussèrent
Auec toute leur force, en l'endroit proprement
Où son œil se logeoit sous son front iustement:
Ie me guinde dessus le pau ardent de braise
Ie le tourne, le vire, afin que plus à l'ayse
Il penetre dedans: comme si quelques fois
Quand le charpentier perse vne piece de bois
Pour metre à vn bateau, ses gens qu'il a derriere
Luy aydent à tourner, à virer son terriere
A grand force de bras, il tourne, il perce à iour.
Ainsi tournans, apres maint tour & maint retour
Nous luy enfonçons l'œil: le sang à grosse goutte
Noir ensemble & fumant dessus son front degoutte,
Paupieres & sourcils le feu luy va grillant
Et la racine en sonne au brasier petillant.
Comme le mareschaliette vn soc ou vn vonge
Ou bien vne coguee, en son eau, toute rouge

LE IX. LIVRE

Qui siffle fremissant, de l'espeſſe vapeur
Son auge ſe remplit tant le fer a d'ardeur,
Ainſi l'œil du Geant ſous le pau qui le grille
Auec grand ſifflement bruit, bouillonne, & petille,
Il brâme horriblement, tout le roc en trembla,
Nous recullons de luy, fuyons par cy par la,
Nous cachans & muſſans, eſtrons que nous trouuaſmes
Par l'ancre, par le roc tremblans nous nous fourraſmes.
Il arrache le pau, fierement fremiſſant
Plein de ſang, au trauers du roc le va lanceant,
Encor' plus aigrement il depite, il ſe faſche
De ce qu'auuec le bois ſa chair meſme il arrache.
Il braille, il mugle, il crie, & d'une horrible voix
Appelle les Cyclops demeurans par les bois,
Par les rocſecarteſ, faiſans leur domicile,
Eſpars par cy par la dans les foreſts de l'Iſle.

A ſa forte clameur voicy tous les Geans
Qui viennent à la foule, accourent diligens
Et ſe rangeants autour de la grotte funeſte
Chacun d'eux de ſes criz & de ſon mal ſ'enqueſte
Polyphème, qu'as-tu de bramer ainſi haut?
Qui te bat la dedans, & qu'eſt ce qu'il te fault?
D'eneiller tout le monde à ceſt heure importune,
Et de leuer ainſi tes cris ſur la nuit brune!
Eſt-ce quelque larron qui te vient enleuer
Ton beſtail, & le touche en ſes vaiſſeaux ſur mer?
Te raut tes trouppes, & cruelles egorge?
Où quelqu'un eſt il l'à quite couppela gorge,
Qui te volle, te tue & pille ſans mercy?

A donques le Cyclops leur reſpondit ainſi
Du creux de ſon manoir qui de ſa voix reſonne.
Amis, icy dedans m'assassine perſonne,

Non pas de force ouverte, ains frauduleusement.

A ces propos ils vont respondre briefuement

*Personne? s'ainsi esttu fuiras à grand peyne
Du grand Dieu Iupiter la colere hautaine,
C'est du ciel que te vient ce malheur clandestin.*

Nul au monde ne peut euitier son destin:

*Adresse tes clameurs, fais tes vœux à ton pere
Qui commande en la mer, & Neptune reuere.*

*Ils se partent delà & s'en vont tous riant.
Presque d'autant en faire vn petit mal friant
Me chatouille le cœur, de voir mon entreprise
Estre venue afin par vn nom de surprise.*

*Le Cyclops en ses dents murmure horriblement,
Et pour le mal qu'il sent sousspire fierement.
Il souleue le poix de la grand roche forte,
Et les mains allongeant, se sied dessus la porte,
Il faict là ferme, avec sa grand' masse de corps
Et iette ça delà le lourd de ses bras forts,
Afin que si quelqu'un vouloit dehors se rendre
Quant & quant les brebis, soudain il le peust prēdre
La beste de Cyclops me pensoit ainsi fat.
Ie resue, ie rumine, & mon cœur se debat
Pour trouuer vn moyen d'oster s'il est possible
Mes compagnons & moy hors de la caue horrible,
Et la mort euitier, le monstre deceuant.
Ruse, fraude, conseil, tout est mis en auant
Pour l'ame & pour la vie, aussi bien la demeure
Nous perdoit la dedans. Or voicy la meilleure
De mes opinions, au moins ce me sembla.
Force m'ontons laineux le Cyclops auoit là
Grands & tresbien nourris, de stature hautaine,
Et tout le corps couuert de belle & forte laine.*

LE IX. LIVRE

Lors ie les pren tout doux, les lie ensemblement
 De vimes bien retors, & serrez fortement,
 Sur lesquels se couchoit le monstre sous qui tremble
 La iustice & le droit. I'en lie trois ensemble,
 Et celui du milieu vn de mes gens portoit.
 Chaque autre des moutons qui aux costez estoit
 Le couuroit de son corps entierement, en somme
 Trois de ces moutons la portoit tousiours vn homme.
 Or entre les brebis y auoit vn belier
 Le plus beau, le plus grand, plus fort, & singulier
 Dessus tous les moutons: ie l'empogne & l'entraine,
 Et vay m'accommoder dessous sa longue laine,
 Me serrant à son ventre à grand force de reins,
 Si le Cyclops tastoit, sous la toison mes mains
 Se cachoient aysement. Ainsi à la renuerse
 Je pendois dessous luy. Je fus en grand trauerse
 Et attendant le iour. Mais si tost que des eaux
 L'aurore iaunissant eut tiré ses cheuaux,
 Allongeant sur les montz sa belle main de rose,
 Le Cyclope leué se prepare & dispose
 D'enuoyer ses beliers dehors, aux champs paissans.
 Et dedans les brebis vont tout l'ancre emplissans
 De leurs bestantes voix. Car le monstre sauuage
 Traittes ne les auoit, tant pleines de laitage
 Qu'elles n'en pouuoient plus, A la porte il estoit
 Et au prix qu'ils sortoient les moutons il tastoit,
 Et leur passoit les mains par le dos sur la laine,
 Troublé d'anxietude, & d'angoisse & de peine:
 Pauvre d'entendement qui ne s'aduisa pas
 Comme il fit par en hault de taster par enbas,
 Comme ils estoient liez sous la laine & le ventre.
 Or le bellier sortoit le dernier de son antre

*A pas graue, & pesant de sa laine & de moy.
 Et comme ie songeois plein de peyne & desmoy
 Le Cyclops le taste. Et puis dit en soy mesmes:
 O paresseux belier qu'ayme tant Polypheme
 Tu sors donc le dernier! Hé quel indigne cas
 Te retarde aujourdhuy? car tu ne soulois pas
 Demeurer tant derriere, ains ô gentille beste
 Le premier du troupeau tu marcheois à la teste:
 Tu allois le premier les pascages chercher,
 Tu allois le premier les herbettes faucher,
 T'emplissois le premier des douces violettes,
 Tu beuuois le premier des fresches ondelettes,
 Tu reuenois tousiours le premier dans le toict
 Quant le soir le Ciel ferme, & que plus on ne voit.
 Et qui faiet maintenant qu'ainsi baissant la corne
 Tu sortes le dernier melancolique & morne?
 Pleures tu de ton Roy l'œil emporté du front?
 De ton maistre pleins tu le malheureux affront?
 Tu as donc regret de ma triste fortune
 Et pour mon œil bruslé ma douleur t'est commune.
 Helas, un meschant Grec, de gens accompagné
 Aussi meschans que luy, m'ont ainsi mastiné.
 Personne m'a seduit en me donnant à boire,
 Dessus moy indomptable il a eu la victoire.
 Mais quelque fin qu'il soit il n'eschappera pas,
 (Atrapé la dedans,) mes mains & son trespas.
 Il sentira l'effort de mes mains vengeresses.
 Si tu as sentiment pourtant de mes opresses.
 Et regrettes mon mal, cher belier, ie voudrois
 Que tu me peusse asture exprimer de ta vois
 L'endroit où il se cache, & afin qu'il euite
 Mon ire & ma vengeance où c'est qu'il prend la fuite.*

LE IX. LIVRE

O si ie le tenois, que ie luy briserois
 De bon cœur la ceruelle, & l'escarbonillerois
 Roide mort estendu, son sang teindroit mon antre
 Et son corps deuoré resiouiroit mon ventre.
 Fete turois personne, & ta cruelle mort
 Donneroit, à mon cœur au moins quelque confort?
 Ce disant, le belier sort hors la bergerie
 Et me voyant dehors, soudain ie me delie
 Et destache mes gens. Alors nous nous hastons
 Et touchons devant nous force de ses moutons.
 Nous gagnons nos vaisseaux, & nos gës nous receurët.
 Mais de force regrets, quand plus ils n'apperceurët
 Les autres, s'enquerans qu'ils estoient deuenus,
 A ceux qui s'en estoient avec moy reuenus,
 EschappeZ du Geant. Ie commande qu'on cesse
 Et lamentations, & larmes & tristesse,
 Fais signe que sans bruit on serre ces troupeaux
 Et qu'on les iette viste au fonds de nos vaisseaux,
 Puis qu'on se mette en mer. Lors à ma remonstrance
 Chacun faict son deuoir, & on rame à puissance.
 Mais comme ie nous vy tant soit peu hors du port
 Autant comme la voix d'un qui criroit bien fort
 Sur la mer, se pourroit distinctement entendre,
 Et de ceux de hors se pourroit laisser prendre,
 Fasché ie pronoquois le Cyclops furieux
 Et luy disois ainsi de mots iniurieux:
 O malheureux Cyclops, grand cloaque de ventre
 Qui miserablément as brisé dans ton antre
 Les amis d'un pauvre hôte implorant ton secours,
 Barbare, destournant ton visage rebours
 D'un qui te supplioit, où est ce que t'entraine
 Ta sale violence & ta rage inhumaine.

Tu déchires, cruel, les pauvres voyageurs,
L'hostellage pollus du sang des estrangers,
C'est aussi la raison que la peine tu sentes
De tes meschancetez & cruantez sanglantes,
Et que de ton forfait & fiere trahison
Tu prennes le payement en ta propre maison,
D'oser ainsi méchant démembrer piece à piece
Ceux qui n'auoient que trop enduré de tristesse
Eschappez de la mer : Perfide, déloyal,
Mesprisant les passans, & ne faisant que mal
Aux pauvres qui venoient à tes picds à refuge.

Doncque tres-iustement Iupiter iuste iuge,
Et les bourgeois du Ciel qui demeurent là hault,
Tes grandes cruantez ont vangé comme il fault :

Ie luy criois ainsi du hault de la nauire,
Luy m'oyant se rompoit & de fureur & d'ire,
Il enrageoit tout vif, & de ses mains froissant
Vn grand bout de rocher, il le va eslançant,
Et tire dans la mer la furieuse masse,
Elle tombe dedans, & tout contre nous passe.
Elle nous approcha & de fort peu faillit
Le timon de la nef. Du coup l'onde ialit,
De l'effroyable bruit les rinages redondent.
Et du poix du grand roc les ondes en regondent.
La mer ondoyoit toute, & la vague bauant
Alloit contre les bords son gros flat esleuant,
Et ialissoit dessus escumante d'orage,
Preste à couvrir la terre & le proche rinage,
C'estoit vne tempeste. A donc prenant en main
Le baston, ie parois à l'assault inhumain
Du flot qui s'en venoit couvrir nostre nauire.
I'accourage mes gens afin que chacun tire

LE IX. LIVRE

De toute sa puissance, & tant que ie pouuois
 Je remuois la teste & signe leur faisois.
 Ils entendirent bien & mon signe & ma mine,
 Et de tout leur effort ouurirent l'eau marine
 Haussans les auirons, & partissans la mer
 Qui bruyante escumoit à force de ramer.
 Lors criant de plus beau i' agassois Polypheme,
 Mes gens courent à moy pasles de peur extreme,
 S'amassent tout autour, & me vont suppliant
 De n'aller point ainsi au Cyclope criant.
 Pauvre homme, disoient-ils, qu'est-ce que tu te moques
 De ce monstre cruel, & que tu le prouoques?
 Qui aussi aisement qu'on viendrait de lascher
 Un trait, vient d'eslancer dans la mer un rocher?
 Nous pensions qu'il en eust nostre nauire atteinte,
 Et qu'il l'eust mise au fonds. Nous pallissons de crainte
 Qu'il n'entende ta voix, il nous escrasera,
 Et nous & nostre nef sans doute couurira,
 S'il entend où tu es, & qu'encor' il eslance
 Une roche sur nous, avec sa grand puissance.
 Mais pour tous leurs propos ie n'en eue peur nullement,
 Ains me pris à crier encor plus hautement.
 Si quelqu'un passe icy, Cyclops perfide & traistre,
 Et veut sçauoir de toy quel homme se peut estre
 Quit'a creué ton œil, & t'a faict cet affront
 Que de te despoiller de l'honneur de ton front,
 Dy luy, C'est Ulysses le preux fils de Laërte,
 Qui a razé les murs de Troie ores deserte,
 Qui habite en Ithaque au mont Neritien,
 Et frequente la mer du Cephallenien.
 Je luy criois cela, & le Cyclope infame
 Respondit, soupirant du profond de son ame.

Las, bien m'est arriué ce qu'on m'auoit prédit,
Et l'oracle ancien qui m'auoit esté dit.
Car ce fut Telemus Eurymedes le sage,
Et l'insigne deuin, dont le certain presage
Et l'oracle fameux les autres surpassoit.
Il me dit tout cecy alors qu'il vieillissoit,
Prophetisant tousiours sur les hautaines croupes,
Et dans les antres creux des Geans & Cyclopes.
Il me dit tout cecy qui, las, m'est arriué,
Que trop vray pour mon bien, que i'aurois l'œil creué
Par Ulysse au retour de la guerre Troyenne.
Mais tandis que i'attens que quelque Heros vienne,
Quelque fort combattant en superbe appareil
Et d'armes & de corps, pour me creuer mon œil:
Las, ie suis auenglé par le coup miserable
D'un homme de neant, par un nain méprisable
Qui n'a force ne corps, lequel m'a combattu
Par le vin, par le boire, & non par sa vertu.
Approche Ulysse, vien, vien de mon hostelage
Recevoir par mes mains quelque honorable gage,
Et ie feray priere à mon pere Neptun
Qu'enton retour par mer il te soit opportun,
Qu'il t'enuoye le vent propice & fauorable
Voyage fortuné, & retour desirable.
Celuy qui faict trembler la mer de son trident,
Qui esbranle la terre, & qui va commandant
Sur les flots escumeux, Roy de l'onde bruyante:
Neptun, ie suis son fils, il faict gloire, & se vante
De ce qu'il est mon pere. Or il me guerira
Luy tout seul, s'il luy plaist, le pouuoir il en a:
Homme, Dieu, quel qu'il soit, ne pourra te par fere,
Seulement que luy seul, luy qui l'onde legere

LE IX. LIVRE

Gouverne à son plaisir. ô qu'eussayie peu lors
Que ie creuay ton oeil, transpercer ce tien corps,
Luy dis-ie, de ces mains, & de maints coups de lame
Ce criois ie, enuoyer ceste malheureuse ame
Au fin fondz de l'enfer, au regne de Pluton
Noir manoir d'Erebus, marais de Phlegeton.
Mais ce Roy de la mer, cest Empereur de l'onde
Qui esbranle, ô Cyclops, les fondemens du monde
De son fourchu trident, sera bien empesché
Derecoudre à ton front ton vilain œil poché.

M'oyant ainsi parler ses deux mains estendues
Il hausse en les leuant vers les celestes nues,
Adore en suppliant, & adresse sa voix
A Neptune le Roy: escoute à ceste fois
Neptune, Roy de mers, qui embrasses le monde,
Et puissant esmoteur de la cauernense onde,
Dieu à la tresse noire, oy moy, s'il est ainsi
Que ie sois ton enfant, & toy mon pere aussi,
Donne moy ie te pry, que iamais cest Vlysse,
Cerafeur de citez, inuenteur de malice,
En Ithaque chez luy ne puisse retourner,
Que iamais son vaisseau ne puisse l'emmener
Iusques à Laërtes. Mais si sa destinee
Et la grace des Dieux par trop desordonnee
Veulent qu'il puisse voire, contre toute raison,
Ses parens, ses amis, sa terre, sa maison,
Que soit bien tard, au moins, mais qu'il coure, qu'il erre
Par tous les coins du monde & par mer & par terre:
Plein de mal, de naufrage, & d'incommodité,
Que battu de la mer & des flots tempesté,
Que ses gens submergez, que sa nauire en pieces,
Qu'englouties des eaux, ses hardes, ses richesses,

Il arrive bien tard, seul, en nécessité,
En fin en sa maison, incogneu, rebaté,
Et trouve là dedans ses affaires bronillées
Et en piteux estat. Le Roy des eaux salées
L'ouit, & l'exauça. Lors un plus grand rocher
Que celui de devant il retourne arracher:
Puis il le tourne en l'air, & dans la mer eslance
Bien avant le lourd poix de toute sa puissance,
Qui tombe devant nous, du coup en est mouillé
Tout nostre gouvernail: tout le flot est bronillé
A la chute du roc, & la vague regonde,
Esbranlant nos vaisseaux, qui sont portez de l'onde.
Quand nous eusmes trouvé nos autres compagnons
Que nous avions laissez, à l'isle nous gagnons
Où nos gens m'attendoient en grande inquietude,
Affligés, desolez, & pleins d'incertitude,
Je sorty sur le bord, & ie party soudain
Les moutons des geans, de peur que par dédain
Quelqu'un ne fust de moy malcontent, & les masles
Je donnay à chacun par portions égales.
Du commun gré de tous le bellier amené
De mes forts compagnons à moy seul est donné.
Sur la rive egorgée ie luy coupe les cuisses
Et au grand Iupiter les brusle en sacrifices.
Mais toute nostre offrande alors ne l'appaisa,
Il n'en fit conte aucun, mais plustost proposa
De nous perdre trestous, & noyer en son ire
Las, mes chers compagnons, & tout nostre navire.
Tant que le iour dura nous eusmes soin de nous,
Et nous remplismes bien de viure & de vin doux,
Mais le soleil couché, la nuit estant venue
Nous nous endormons tous dessus l'herbe menue

LE IX. LIVRE DE L'ODYSSÉE.

*Jusques au point du iour, que l'aube hors des eaux
Eust encor ramenés ses saffranés cheuaux.*

*Je commande pour lors à toute nostre troupe
Qu'on se mette à voguer, & que la corde on coupe:
Un chacun m'obeit, tout le monde entre en mer,
Et souz les aïrons on voit l'onde escumer.
Nous poussons en auant, les cœurs pleins de tristesse
Pour les nostres perdus, pourtant en allairesse
D'estre sortis du trou du Cyclope inhumain,
Et d'auoir eschappé sa sanguinaire main.*

Fin du neufiesme Liure.



LE DIXIESME LIVRE DE L'ODYSSEE D'HOMERE.

ARGUMENT.

Ulysses raconte ce que luy aduint chez Æolus Roy des vents, lequel luy donna le favorable Zephyre, luy ayant renfermé les autres dans vne peau de bœuf. Les gens d'Ulysses cuidans que ce fut des tresors, la délient & ouurent, ainsi qu'il dormoit, ils sont repoussez vers Æolus, lequel chasse Ulysses. Il vient vers les Lastrigons, qui luy mettent à fonds vnze de ses vaisseaux. Il se sauue avec le sien, & aborde en l'isle d'Ææe, enuoye Eurylochus avec la moitié de ses gens pour decourir. Circé les change en pourceaux, fors Eurilochus qui se sauue à la fuitte. Ulysses y va pour les deliurer, Mercure luy vient au deuant qui luy donne le moly, par lequel il se preserve. Il faict rendre à ses gens leur premiere forme, demeure vn an avec Circé, puis en depart, & descend aux enfers.

AUTRE SOMMAIRE.

*Æole à Ulysses const les vents dans des peaux,
Lastrigons, ses amis Circé change en pourceaux.*

DN Æolie vint nostre flotte, à la rade
Du bien aymé des Dieux Æolus l'Hippo-
tade, (ment
Isle au milieu des eaux, qu'enceint entiere-
Vn grand mur tout de fer, qu'on ne peut nullement

LE X. LIVRE

Rompne ne dépesser, & vne roche lisse
 Outre le mur encor à l'enuiron se glisse.
 En ce palais Royal douze enfans luy sont nez,
 Six fils & six filles: ses fils il a donnez
 Pour espoux & maris à ses six belles filles:
 Les Princes genereux, les Princesses gentilles
 Sont tousiours chez leur pere & leur mere en festin,
 Viures delicieux leur sont ouuerts sans fin
 Depuis Titan leué, insqu'à ce qu'il deualle,
 La Musique se faict dans la salle Royale
 Parfumée d'odeurs: & quand ce vient la nuit
 Chacun d'eux prend sa femme & chez soy la conduit,
 Gaignent les riches lits avecques leurs Nymphettes,
 Les linceux deliez, & les coites molettes.

Nous n'ensmes pas si tost le nauire quitté
 Que nous montons là hault en la forte cité
 Au chasteau somptueux, où nous reçoit Aeole
 Avec force caresse & courtoise parole.
 Nous y fusmes vn mois, & durant ce sejour
 Il s'enqueroit de nous, des Grecs, de leur retour,
 Qu'ils estoient deuenus, qu'il desiroit l'apprendre,
 Le luy en fis le conte, & luy fist tout entendre
 Sans en rien oublier: puis ie le requerois
 De nous donner congé, & de luy m'enquerois
 Du moyen le plus seur & le plus conuenable
 Pour gaigner mon pays. Il me fut secourable,
 Ne me refusa rien, mit ordre entierement
 A ce qu'il me falloir pour voguer seurement.
 Dans vne peau de boeuf qui sur les grasses pleines
 Auoit brouté neuf ans, il coufit les aleines
 De ses vents dangereux, garrotta là dedans.
 Les respirations & les souffles grondans,

Qui

Qui pouuoient esmouuoir leur tempeste en leur ire.
Car le Saturnien luy a donné l'Empire
Des vents tempestueux, afin de gouverner
Leurs souffles bourdonnans, leur serrer, leur donner
La bride à son plaisir, quand il vent qu'il arreste,
Ou quand il luy conuient esmouuoir la tempeste.

Or au fond du vaisseau ie les voy diligent
Lier & garrotter d'une chaisne d'argent,
Qu'ils ne trouuent moyen de couler par les fentes.
De Zephire tout seul les narines sifflantes
Il chassa sur les eaux, propres extremement
Pour me conduire, moy & mes gens seurement.
Mais, las, de ce bon vent ils eurent bien tost fantés
Car ils perirent tous par leur sottise & faute.

Au departir de là nous fusmes sur la mer
Neuf iours continuels, sans tirer, sans ramer
Nuiet ne iour que fort peu. La suiuite iournée
Dés que l'aube du iour se monstra retournée,
Ie découure de loin mon pays, ie ne faux
De voir le désiré de ses riuages hauts.
Nous nous diligentons, nous tirons à puissance
Où nous voyons les feux, que de l'isle on esclance
Presque tout contre nous, le destin nonobstant
Resiste à nostre bien, pource qu'au mesme instant
Lassé & fatigue le doux sommeil m'emporte:
Car ie n'abandonnois iamais en nulle sorte
La place du timon, perpetuellement
Collé & attaché ne pouuois nullement
Me fier en un autre: & tout pour gagner l'heure,
Et pour surgir plustost en ma chere demeure.

Doncques mes compagnons m'apperceuant dormir
Vont entr'eux bellement murmurer & fremir,

LE X. LIVRE

Pensans certainement que ces peaux fussent plaines
D'or, d'argent, de tresors, dont le Roy des alaines
M'auoit fait vn present. Or l'un d'entr'eux tout bas
Aduança ces propos qui ne les faschoient pas.

Dieux, que cet hōme icy quelque part qu'il chemine,
Rencontre heureusement. Voila, de la ruine
D'Illion il s'en va chargé d'argent & d'or,
Et riche il en remporte vn merueilleux tresor.
Et nous, nous retournons au pays les mains vuides,
Qui courons avec luy les campagnes liquides,
Et comme luy auons Illion ruiné.

Æolus d'abondant l'a tout seul guerdonné
De dons & d'amitié, luy chargeant sur nos barques
Innombrables tresors, & en voicy les marques,
Voyons tant seulement. Ne le voulez-vous pas
Voir les dons à luy faits par le fils d'Hippotas?

En deuissant entre eux ces semblables paroles
Ils se laissent aller à leurs pensees folles:
Possédez d'auarice & d'enuie entachez
Ils ont incontinent les liens destachez,
Pensans que fust argent. L'ouuerture donnee
Les vents prennent soudain leur carriere effrence,
Et se vont sur les eaux à l'aise promener.

Ce fut à nostre flotte adonc à retourner,
Mais par autre chemin qu'elle n'estoit venue:
Le vent souffle contraire & tousiours continuë
De plus fort en plus fort, nous raut de deuant
Nostre pays, qu'he las nous voyons par auant:
L'orage de plus beau s'esleue, & sa furie
A mes gens lamentans arrache leur patrie.

Je me réueille au bruit, & pensant à part moy,
Plein de perplexité, ie songe si ie doy

M'aller precipiter dans le profond des ondes,
Et ma vie estouffer dans les vagues profondes,
Ou bien s'il m'est meilleur de tousiours supporter
Mes malheurs, ma misere, & de patienter,
Continuant de faire en terre ma demeure,
Et ceste opinion me sembla la meilleure.

M'estant donc resolu ie iette mon manteau
A l'entour de ma teste, & dessouz le batteau
Mereiette estendu. Ce-pendant la mer forte,
La tempeste, le vent, nous traine, nous emporte,
Nous meine en Eolie, & nous rend iustement
Au lieu d'où nous estions partis premierement.

Mes compagnons pleurans s'affligent, se tourmētent
Accusent leur folie, & leur faute lamentent.
Nous tournons nos vaisseaux, les approchons du bord
Abbaissans nostre voile, entrons dedans le port,
Nous courons à l'eau douce, & tous nos gens se rengent
Sur le rinage herbeux, repaissent, boient, mangent.

Puis quād nous eusmes beu & mangé comme il faut,
Je prens avecque moy un homme & un Heraut,
Et m'en reuais trouuer, agraué de tristesse,
Le monarque des vents dedans sa forteresse.
Il prenoit son repas, & pres de luy ses fils,
Ses filles, & sa femme estoient à table assis:
Mais nous n'entrasmes pas, ains dehors demeurasmes
Pres de la porte assis, & là nous arrestasmes.
Lors ils vindrent à nous estonnez & ravis.

Qu'est-cela, Ulysses? As-tu changé d'aduis?
Quel malheur te poursuit? Que t'en reuiens-tu faire?
Quel destin ennemy, quel Dieu t'est tant contraire?
Quoy? nous t'auions donné tant de contentement,
Nous t'auions veu partir si fauorablement,

LE X. LIVRE

*T'auions fourny les vents, propices & prosperes,
 Pour en seurté te rendre à tes Dieux tutelaires,
 Dans ta douce maison, & où ta volonté
 Eust esté de donner. Ausquels tout attristé
 Je respons briefuement: Helas, moy miserable.
 Le sommeil m'a perdu, le sommeil deceuable,
 Et mes gens malheureux meus d'un méchant desir
 De proye & de butin: Mais si c'est ton plaisir
 Remedie à mon mal, pren de mon innocence
 Pitié, & me secours, il est en ta puissance.
 Je les priois ainsi humblement. Les maris
 Et la mere, & les sœurs se teurent bien marris.
 Eole seul me dit: Allons, Grec miserable,
 Déloge, & avec toy ta flotte abominable:
 Vaide tost mon pays, ô le plus vicieux,
 Et des hommes mortels le plus pernicious.
 Je ne puis recevoir ny faire compagnie
 De mes vents, à qui a contraire & ennemie
 La troupe des bons Dieux. Malheureux sors d'icy,
 Vaide de mon Royaume & de mes ports aussi:
 Osant en mes pays reuenir temeraire
 Et reprendre ma terre, ô des Dieux aduersaire.
 Ainsi, par Eolus de sa cour fus chassé
 Fort lamentablement, d'ennuis fort oppressé.
 Ainsi en lamentant nostre triste fortune
 Fâsché nous nous iettons sur le dos de Neptune:
 Et ja mes compagnons se lassoient de la mer,
 On ne les voyoit plus que laschement ramer,
 Tristes de leur sottise & de leur arrogance,
 Car de nostre retour mort estoit l'esperance,
 Six iours continuels nous nauigeons ainsi
 Et de nuit & de iour abbatus de soncy,*

Sur le septiesme iour nostre nauire donne
Contre la region du geant Lastrigonne,
La cité de Bamus, ceinte de hauts rampars
Aux esloignez portaux. On oit de toutes pars
Vn pastre appeller l'autre: il le huche, l'excite,
Le pousse à son deuoir, & l'autre sortant viste
Accourt à sa clameur, & vient diligemment.
Celuy qui ne dort point a double appointment,
Pource que toute nuit il meine aux champs l'omaille,
Puis apres tout le iour garde la brebiaille:
Se sert de cella là pour les Toreaux muglans,
Et puis de cestui-cy pour les moutons beestlans:
Les troupeaux nuit & iour vôt aux chaps agreables,
Car la nuit & le iour y sont presque semblables.

Un port tres-gracieux à nos naufs sy donnoit,
Et une grande roche autour l'environnoit,
Qui de chaque costé s'esleuoit orgueilleuse,
Et vers le Ciel iettoit sa pointe sourcilleuse.
Fiere elle mesprisoit l'orage tempestant,
Et ne craignoit la mer ny son flot inconstant.
Ses bords estoient courbez, & son entree estroitte,
Car tout l'environ est d'une roche fort droitte,
Puis où est le passage elle serre ses eaux.
Par là nos gens vouloient faire entrer leurs vaisseaux,
Et le firent de faict, dans le port se rangerent,
Et leurs vaisseaux tirez à leurs ancrs lierent.
Rien n'est là dangereux, fascheux n'y sont les flots,
Mais tout y est tranquille & plein de grand repos.
Ie n'entray dans le port pour moy, mais ie retire
Arriere hors du port doucement mon nauire,
Et le long d'un rocher me mettant à l'escart
Ie lie mon vaisseau, & fais mon cas à part.

LE X. LIVRE

Puis montant sur un hant ver toute l'estendue
De la plaine, ie iette & retourne ma veüe,
Mais ie ne vy personne, & mesmes n'y vy pas
La terre cultivee. En un lieu un peu bas
Ie vy tant seulement quelque peu de fumee
Pirouettant en l'air sa debile nuee.

Ie pry deux de mes gens, mon Heraut fit le tiers,
Leur commande d'aller decouvrir ses cartiers,
De voir, de s'enquerir, du lieu, du paysage,
Et quels gens y vivoient au pain du labourage.

Comme ils sont arrivez au chemin frequenté
Où les chars vont au bois sortans de la cité,
Ils rencontrent, venant puiser à la fontaine
Pour apres remporter sa cruche toute plaine,
Du Roy la fille aisnee: Antiphates estoit
Son pere, & la fontaine hors la ville iettoit
Son eau plaisante & fraische, & la fontaine belle
Par tous ceux du pays Artacie s'appelle,
Nos gens courent à elle, & luy vont demandant
Le nom de la contree, & le Roy commandant
En icelle, quels gens habitoient en ceste isle.

La fille leur monstra le haut ain domicile
Où son pere habitoit. Ils y vont viftement,
Et voyent là dedans la Reyne, enormement
Haute, & grande de corps, remuant effroyable
La masse de sa chair si fort émerucillable
Qu'elle eust peu de hauteur aisement égaller
Les sommets des grands monts qui se cachent dās l'air.
Ils recullent d'horreur & de frayeur ensemble,
La peur gelle leurs os: & le cœur leur en tremble.
Son mary elle appelle, & crie horriblement,
Il estoit dans la ville, il accourt viftement

A son cry. Le cruel mal & mort leur pourchasse,
Il en attrappe l'un, il le brise, il le casse,
Le rompt à belles dents, & en faict son soupper,
A grand peine les deux peurent-ils eschapper
Et gagner les vaisseaux. L'alarme est par la ville,
Et de la ville aux champs, des champs par toute l'isle.
Antiphates s'escrie, & tous les Læstrigons
D'accourir sur le port horribles & felons:
Non hommes, mais Geans de stature effroyable,
Se rangent en bataille, une troupe innombrable
Accourt de toutes parts, foudroyent dessus nous,
Iettent de tous costez pierres, rocs, & cailloux,
Font un fracas horrible: un murmure, une gresle,
Sur l'eau, sur nos vaisseaux, chet, tombe, pesle-mesle,
Tout resonance à l'entour: on ne voit sur le port,
On n'entend dans la mer que ruine & que mort,
Les vaisseaux craquetās souz les grands rocs se fendēt,
Et les pauvres soldats souz les coups l'ame rendent,
Piteusement crians. Les horribles Geans
Hurlans & abbayans courent apres nos gens,
Le fier Antiphates les acharne, ils redonnent,
Et à coups de cailloux nos pauvres gens estonnent,
Ils acrauantent tout, fracassent nos vaisseaux,
Nos soldats sont contraints se ietter dans les eaux,
Dont ils les vont tirant, & dessus le rivage
Les deuorent cruels, en estanchent leur rage:
Ainsi que le pescheur faict des foibles poissons
Pris dedans ses filets, ou dans ses hameçons.
Ce-pendant que ie voy ceste troupe occupee
A telle cruauté, ie tire mon espee
En coupe le funail bouillonnant de fureur,
Accourage mes gens à tirer de roideur,

LE X. LIVRE

Et de fuir la mort. Ils tirent à puissance,
 Et se sauvent dehors le trait que nous eslance
 La race des Geans : si bien que mon vaisseau,
 Pource que hors du port il flotloit dessus l'eau,
 Euit a leur effort : les autres qu'assaillirent
 Dans le port les Geans dans les ondes perirent,
 Supplice, hélas, rendu à leur temerité.
 Mais les voyant perdus, d'esprit fort contristé,
 Regrettans leur malheur, les voiles nous haussasmes,
 Et dans la rine Aee esbranlez nous poussasmes,
 En l'isle de Circé, dessus les bords baveux,
 Auriage glissant. Circé aux blonds cheueux,
 Deesse venerable, accomplie en science,
 De grand entendement, & pleine d'eloquence,
 Sœur germaine d'Eta le sage & prudent Roy,
 Titan les engendra, qui de son clair charroy
 Court sur toute la terre, & duquel la carriere
 Salubre biaiſant apporte la lumiere
 Aux mortels, aux humains. Il les eut de Persé
 Fille de l'Ocean. En ceste isle Circé
 Sa demeure faisoit, & là nous abordaſmes,
 Et coyment dans le port nostre nauire entraſmes.
 Certes vous eussiez dit que les celestes Dieux
 A nostre barque ouuroient ce port delicieux,
 Car nul vent n'y battoit. Nostre nauire ancree,
 Et sur la terre ayant librement faict entree,
 Deux iours continuels & tout autant de nuits
 Nous reposasmes là nos langoureux ennuis
 Pleins de grands amertumes. A la tierce iournee
 Comme l'aube nous eut la lumiere amenee,
 Et son beau chef rosin sur la terre eut ietté,
 Mon iauelot en main, mon espee au costé,

Je descens seul en terre, à trauers champs m'aduanee,
Vn costau que ie voy ie gaigne en diligence
Pour me seruir de guette, & pour faire courir
Mes yeux de toute pars, afin de decouurir
Le pais, la campagne, & si par auanture
I'orrois des habitans le bruit & le murmure:
I'y demeuray long temps. Puis commenceay de voir
Au trauers des Forests, de terre s'esmouuoir
Vne grande fumee, & s'esleuer legere
Par dessus le palais de Circé la sorciere.
Comme i'en veu celà, ie me deliberay
De descendre en campagne, & de scauoir au vray
Quelle terre c'estoit, pour le rapport en faire
A tous mes compagnons. Long temps ie delibere
Et consulte en moy mesme: & sur ce doute là
Cest aduis que voicy le meilleur me sembla.
Ce fut de retourner. de bien faire repaistre
Mes gens, les enuoyer puis apres recognoistre,
S'enquerir du pais, & le tout recercher.
M'estant la resolu, ie commence à marcher:
Mais, si ce fut adonc quelque Dieu secourable
Qui prit pitié de moy & seul & miserable,
Ou par cas fortuit, ie vy venir deuant
Vn grand cerf haut le chef, & le col esleuant,
Il sortoit des forests, & par les vertes plaines
Recerchoit alteré la frescheur des fontaines.
Du chaut d'Hyperion violemment pressé
Et des traits de Titan pantoisement poussé,
Le voyant aprocher de mon dard ie le perse,
Et mort roide estendu par terre le renuerse.
Mon dard part de ma main & s'en vole dispos,
Luy ouure les costez & l'espine du dos,

LE X. LIVRE

*Il se veautre, mourant sur la terre poudreuse,
Et d'un gemissement remplit la forest creuse,
Vomissant sa rouge ame & mourant enfermé.*

*Soudain hors de son corps mon dard luy ay tiré,
Et le laissay sanglant veautrer dans la poussiere,
Pour courir arracher vistement vne oziere,
Ou couper vne roitte : adonc ie la tournay
La prenant sous mon coude, & d'elle faconnay
Vne forme de corde, avec quoy ie luy lie
Fort & ferme les pieds : dessus mon dard m'appuye
Et l'entraîne à mon col : car à force de bras
Le ietter sur mon dos ie ne le pouuois pas,
Tant grande, tant pesante, & grasse estoit la beste.
Lors deuant mon vaisseau la posant, ie m'arreste,
Vins à mes compagnons, & pour les consoler
Tout doucement à eux ie me pris à parler.*

*Mes amis, ce disois ie, encor que la fortune
Nous fatigue bien fort, nous presse & importune,
Nous ne serons pourtant de Pluton le butin
Deuant le iour à nous ordonné du destin.
Nous iouirons viuans de la douce lumiere
Insq' à l'extreme point de nostre heure derniere.
Resiouissez vous donc, & chassant tout soucy
Soulagez vostre faim du butin que voicy,
Et redressez encor vos banquets & vos tables.
Vins abondent encor & coieres delectables
Dedans nostre vaisseau, & l'en ayant tout plain
Ce seroit honte à nous que mourussions de faim.*

*Ayant ainsi parlé, ils n'osent me dedire,
Ils s'en viennent à terre & sortent du nauire,
Mes gens dessus le port admirent la grandeur
Del'enorme animal, sa beauté, sa hanteur,*

Et s'estans esgayez de voir si belle proye
Vn chacun court à l'eau & les mains se nettoye.
Aprestent la viande, & les tables dressans
Nous nous allons encor un peu resjouissans.
Nous beuons à plaisir, & dessus la verdure
Alaigres banquetons autant que le iour dure,
Jusqu'à ce que Titan eut plongé ses flambeaux
Dans le sein abismieux des Iberiques eaux.
Mais comme le Soleil eust fini sa carrière
Noyant dans l'occident sa flambrante crinière,
Et que la sombre nuit tout le Ciel eust voilé,
Alors le doux sommeil sur nos yeux esoulé
Nous estend sur la rive. Et ce pendant se coulent
Les astres lumineux & par le Ciel se roulent.

Tandis la belle Aurore aux safranez cheueux
Monstre ses doigts de rose & sort du flot baveux,
Et à peine estoit elle encor sur les montagnes
Jettant ses tendres pleurs sur les grasses campagnes,
Quand de rechef ie parle à mes gens en ces mots.

Compagnons, tant batus des malheurs & des flots,
Vertueuse jeunesse esprounee aux trauerses,
Resolue aux assauts des fortunes peruerfes,
Escoutez ie vous pry, nous n'auons point icy
Notice du leuant ny du couchant aussi
De quelle part la nuit tenebreuse se couure,
Non plus de quel costé la belle Aurore s'ouure,
Ne scauons de quel lieu Titan sortant des eaux
De l'Eoë doree attelle ses cheuaux,
Pour ioyeux ramener sa torche sur le monde,
Non plus l'endroit qu'il prend pour se ietter en l'onde
Du flot hesperien. Regardez entre vous
Si vous ne scauriez point lieu de salut pour nous.

LE X. LIVRE

Prenez un bon aduis. Car s'il faut vous le dire,
 Je ne voy point icy tout ce que ie desire.
 J'ay monté tout là haut où le Ciel semble ouuert
 Pour ce rocher hautain. J'ay bien tout deconuert,
 J'ay veu un grand país que la mer environne,
 Et l'eau tout à l'entour effroyable bourdonne.
 Puis assez loing d'icy un palais se haussait
 Dedans la plaine basse, & des tuyaux poussait
 Vne noire fumee, au trauers des bois sombres
 Et parmy l'espeſſeur de leurs obscures ombres,
 Dont se vont noircissant les forests, & les vaux
 Qui sont es ennirons. Je n'eus pas dit ces mots
 Qu'une froide sueur tous les membres oppresse
 De tous mes compagnons. Leur cœur rompt de tristesse
 Recors d'Antiphates, & de l'eschec piteux
 Qu'il fit dessus nos gens: le Cyclope hydeux
 Leur reuient en memoire, & sa rage cruelle,
 Sa soif de sang humain, sa cruauté bourrelle,
 Estrippant, deuorant, brisant dans son gosier
 Leurs pauvres compagnons, horrible monstre & fier.
 Au seul ressouuenir de ces tristes alarmes
 Ils remplissent leur sein de plaintes & de larmes,
 Ils ne se resoluoient, pourtant parmy leurs pleurs,
 Ne venoient à l'effect avecques leurs clameurs:
 Ils refusoient d'aller en lieu qu'ils ne cogneussent:
 Quoy que sollicitez & priez par moy fussent.
 Lors les plus courageux & fermes aux hazards
 Je choisi d'entre tous, & les mets en deux parts,
 Je suis en celle cy, & en l'autre Eurymaque,
 Autant sēblable aux Dieux que nul autre d'Ithaque.
 On remue l'armet, & Eurymac le fort
 Le sort tumbant sur luy, tiré de l'armet, sort.

Il sort pour s'en aller, pour escorte on luy donne
Vint & deux compagnons. Le danger les estonne,
Ils sortent souspirans, le cœur de deuil pressé,
L'esprit d'incertitude & de peyne angoissé,
Et nous laissent trestous dedans nostre navire,
L'ame triste de deuil, le cœur plein de martire,
Ils trouuent assez loing dans vn penchant vallon,
Le chasteau de Circé, la fatale maison,
Le bastiment estoit de pierre blanche & nette
Le plant en estoit beau, eminente l'assiete,
Ils donnent iusques là, puis s'arrestent vn peu
Sur le seuil de la porte. A donques ils ont veu
Roder tout à l'entour de la maison plaisante
Force loups & lions. La maistresse scauante
Les auoit par son art priuez d'entendement
Et par ses potions changez entierement
Ils ne vindrent à eux avec regars terribles,
Avec mordantes dents, ouurans gueules horribles
Afin de les blesser, mais ils les entournoient
Et se iouans à eux leurs quèues demenoient,
Et faisoient grand caresse, aprochans amiables,
Pas apas les suiuanants de gestes agreables.
Non autrement qu'on void les turquets blandissans
Et de quèue & de voix leur maistre aplandissans,
Courir autour de luy quand les mains il leur monstre,
De la table sortant luy venir à l'encontre.
A l'entour d'eux ainsi quantité de lions
Aux ongles fort pointus, des loups à millions
Accourent les flattans des pieds & de la bouche.
Pas vn d'eux quel qu'il soit n'aproche, ne les touche,
Ains en prennent frayeur: attendent resolus
Sur le seuil de la Nymphe aux cheueux crespelus

LE X. LIVRE

Et mignonnement blonds. Adonc à leur oreille
 Vient donner une voix gratieuse à merueille.
 C'est la voix de Circé, qui là dedans chantoit
 Et de son chant plaisant son labeur enchantoit.
 Elle ourdit le subtil d'une gaze tresfine,
 Et frappe de son peigne & de sa main diuine,
 Les fils entrelacez. Les Deesses des Cieux
 Font ainsi leur ouurage & riche & précieux.
 Ainsi vont reluisant leurs diuines tissures,
 Ainsi consent la Grace à leurs entrelasseures.
 Adonques Polites le plus digne d'honneur
 De tout tant qu'ils estoient & qui auoit mon cœur
 Sur tous mes compagnons, pour ce qu'à sa prudence
 Je portois volontiers honneur & reuerence,
 Compagnons, ce dit il, quelqu'une est là dedans
 Qui fort doucement chante, ouïre cela i'entens
 Craqueter le mestier sur lequel elle iette
 Son ouurage faisant, sa courante nauette,
 La maison en resonne, & ses coups & sa voix
 Courants sur le paue s'oyent tous à la fois:
 Soit qu'elle soit Deesse ou bien femme mortelle
 Appellons ie vous pry. Alors chacun appelle,
 Et soudain elle sort & d'entrer les semond
 En leur ouurant sa porte: ils entrent, & s'en vont
 Dedans le beau palais, la sottise les guide,
 En leur esprit deuient hebeté & stupide,
 Le seul Euryclochos fit ferme, se doubta,
 Et ne voulut entrer. Circé leur apresta
 La table tout soudain, les faict soir, & leur offre
 Du miel nouvellement tiré hors de la goffre,
 De la farine en fleur, du fromage, du lait
 Meslé tout dans du vin Pramnier, puis y met

De ie ne scay quel iust de poison, dont le boire
Faiet perdre du pais le soing & la memoire:
Lors elle leur presente à boire de sa main.
Après que les pauvrets eurent ben, tout soudain
Elle prend sa baguette, & dans ses toits les touche
Ils prennent de pourceaux & la voix & la bouche,
Et les vilains sions. Le seul entendement
Leur resta sain & net : pleurans amerement.

Circé commande lors qu'à l'estable on les mette,
Qu'on les enferme bien, que devant eux on iette
Des cormes & du glan que mangent les pourceaux
Quand ils fouillent en terre, & leurs sales museaux
Vont par tout enfonceants, porcs à face fangeuse,
Et tousiours se veantrans dans la terre bourbense.

Euryloch' tourne teste, & gagne vers le port
A porte la nouvelle, & le charmeux effort
De la fauce Circé, il n'a pas la puissance
D'exprimer de propos le faiet comme il le pense,
Il desire le dire, & à toutes les foix
Qu'il commence à parler il demeure sans voix,
Tant il est estonné, tant la crainte le presse
De l'horreur de ce faiet, tant grande est sa tristesse.
Il plenroit à ruisseaux & pressé de douleurs
Le cœur luy va batant, & se fend tout en pleurs.
Nous l'enquerons ravis de si estrange chose.
Et luy, prenant son vent, à dire se dispose.

Grand Vlysses, dit il, suivant ton mandement
Au departir d'icy nous passons vistement
Bocages & forets, dans la vallee obscure
Nous trouuons un palais de belle architecture,
Basty de gros cartiers tous polis au ciseau,
Dont l'assiete eminente & le plant estoit beau:

LE X. LIVRE.

Qu'un doux vent recreoit de sa plaisante haleine:
 La où quelque Deesse ou quelque femme humaine
 Ouuroit sur un mestier, & son riche labeur
 Enchantoit de sa voix admirable en douceur
 Nous l'appelasmes tous, elle sort à la porte,
 Nous faict fort bon visage & d'entrer nous exhorte,
 Nous entrons, & nos gens la suivent la dedans
 Las, stupides qu'ils sont, & fols, & imprudens:
 Je fis fermer tout seul. Car i'estois en grand doute
 Et craignois trahison: la compagnie toute,
 Comme ils furent entrez, soudain s'esuanouit,
 Et depuis ce temps là pas un d'eux ne se vit,
 Et si ie fu long temps dehors à les attendre.

Il acheua de dire, & soudain ie vay prendre
 Mon espee argentee, à mon costé la pens,
 Et mon arc en ma main & mes flesches ie prens:
 Je commande en apres qu'Eurylochus s'en vienne
 Et que soudainement à ce palais me meine
 Il chet à mes genoux & ferme les serrant
 L'un & l'autre embrassez, lamentant & pleurant
 Me coniure en ces mots. Trescourageux Vlysse
 Las, ne me meine point dedans ce precipice
 De dangers, malgré moy, & me delaisse en paix,
 Car d'où tu veux aller tu ne viendras iamais,
 Et ne rameneras iamais ta compagnie
 Saine & sauue avec toy: fuyons ie te supplie,
 Remettons nous en mer, ramons & nous sauons,
 Ce sera beaucoup faict encor si le pouuons.
 Il acheuoit encor, quand ie vins à luy dire:

Demeure donc icy à l'ombre du nauire,
 Mange & boy tout ton soul, à l'aise en seureté,
 Quant à moy, ie m'en vois, & la perplexité

Où ie

Où ie suis m'y contraint. Ce disant ie le laisse
Et la barque & la mer: & mon chemin adresse
Où ie pourrois trouver quelque sentier tracé
Qui conduise au chasteau de la Nymphe Circé.

I'estois desia bien pres du sacré domicile
De la magicienne, & du palais fertile
En charmes & poisons, plein d'ennuy & d'esmoy,
Quand Mercure soudain vint au deuant de moy:
Il portoit en sa main sa baguette admirable,
Il paroissoit encor ieune d'age, & semblable
Au ieune iouuenceau dont le subtil coton
Commence à crayonner seulement le menton.
Lors me prenant la main il me tint ces parolles:

Où vas tu malheureux? ou tes pensées folles
Te menent elles seul? au trauers de ces bois
Ignorant le pais, & dedans les destroits
Des terres de Circé, & sans que nul te mene?
Où de tes compagnons la bande se demene
Eschangee en pourceaux, estant honteusement
Enfermee en ses toits? viens tu expressement
Pour les en retirer, triste, de la misere
Où les retient ainsi la scauante sorciere?
Croy moy, iamais, croy moy, tu n'en retourneras
Et de semblable fin pauvre tu periras
Que tant d'autres deuant sont peris miserables.
Mais ie te veux sauuer de ses mains deceuables,
Iet'en veux garantir. Pren ce remede icy,
Puis entre hardiment, & ne sois en soucy:
En le portant sur toy ne crein nul malencontre.

Or si tu veux m'ouir il faut que ie te monstre
Les tours pernitiens de Circé, qui viendra
Te presenter du pain, où elle meslera

LE X. LIVRE

Du charme & du poison : mais sois en assurance,
Car ses enchantemens n'auront sur toy puissance,
Et ce que ie te donne osterà le danger
Que tu pourrois courir de te voir tost changer.

D'abondant, de cecy encor' ie t'amoneste,
Quand la fille à Titan, haussera sur tateste
Le bout de son baston, degainne vistement
Et tire ton espee, & furieusement
Iette toy dessus elle, & tout enflammé d'ire
La haussant, fay semblant de la vouloir occire.
Alors de grand frayeur & creinte qu'elle aura
Elle te flattiera, elle t'amadouera,
Lasciue te prira de coucher avec elle,
Et t'importunera d'amitié mutuelle.
Mais donne toy bien garde aussi de mespriser
Le liét de la Deesse & de la reffuser:
Pour oster tes amis de leur misere grande,
Si tu veux qu'elle t'ayme & qu'elle te les rende
Tire d'elle serment qu'elle ne bastira
D'autre fraude sur toy, ne te pourchassera
Nul autre detrimement, de peur que l'efficace
De son enchantement ne te rendist mollace
Et tout effeminé, contrain la de iurer
Le grand serment des Dieux & de t'en assurer.

Ce disant il ceuillit de terre la racine
Du remede sacré, diuine medecine,
A tous enchantements, en main me la liura
Et ses proprietez & vertus me monstra.
De ce simple diuin & remede admirable
Noire estoit la racine, & la fleur delectable
Blanche comme le laiét : moly communement
Des celestes nommé : se trouue rarement

Par les hommes aux champs. Les hommes en ont faite
Mais les Dieux, habitans dessus la voute haute
En ont abondamment, car tout peuvent les Dieux.

Ainsi me dit Mercure, & s'esleuant aux Cieux
Sur lestalons aylez, il se guindoit habile
Par dessus la forest au trauers la belle isle
Et ses bois ombrageux. Quant à moy ie dressay
Mes pas vers la maison de la docte Circé,
M'arrestay à la porte, & auois ma pensee
De cogitations estranges eslancee.

Soudain quei'appellay, soudain elle sortit,
Me conuia d'entrer & sa porte m'ouurit.
Ie suy, triste & perplex la Nymphé qui m'appelle,
Elle me fit assoir sur vne chaire belle

Garnie de beaux cloux d'argent resplendissant
D'artifice diuers, sous mon pié se baissant
Estoit vn marchepié posé de bonne grace,
Où celuy qui se sied s'appuye & se delasse.

Lors la Deesse a pris vn beau vase doré
Où cruelle & traistresse elle m'a préparé
Son breuuage mortel, ses herbes elle enchante
Qu'elle verse dedans, à boire me presente
La force de son vin pestifere & mechant,
I'aualle sans trembler, le grand vase assechant.
Ie ne fus pas changé pour cela par ses charmes,
Elle prit donc sa verge & puis me dit ces carmes.
Toy, sois aussi du train de mes pourceaux mignons,
Et va t'en dans le toict avec tes compagnons.

Lors ie m'en vins à elle estant fort occupee
A ses barbotemens: luy monstre mon espee
La menace de mort, sur elle me haussant,
Comme voulant frapper, & ces mots repoussant.

LE X. LIVRE

Lors amoureusement les pieds elle m'embrasse,
 Me dit en s'escriant, mais qui es tu, de grace,
 Estranger mon amy, d'où viens tu, qui es tu?
 Tes parens? ton pais: qui si bien la vertu
 De mes enchantemens rends inutile & vaine,
 Et n'es en rien change de ta figure humaine?
 Iamais nul qui ayt beu ma fatale poison
 Ne m'a brauee ainsi en ma propre maison,
 Qui n'ayt perdu soudain sa puissance pristine,
 Qui ayt peu soustenir ma forte medecine,
 Qui ayt peu resister quelque fort & gaillard
 Au supernaturel de mon precieux art.
 Mais ie voy, homme fort, sans estre interessee
 Ta force te rester, ie ne voy point blesee
 La pointe & la vertu de ton entendement.
 Serois tu point Vlysse, helas que si souuent
 Le beau fils de Maja, le celeste interprete
 Qui porte de fin or la charmeuse baguette,
 Et le meurtrier d'Arguus, m'a dit deuoir vn jour
 En ces lieux arriuer de Troye de retour?
 Cache moy ie te pry ceste espee, & la serre,
 Nous irons faire au liect vne plus douce guerre,
 Nous verrons de l'amour les passetemps menus,
 Et nous resiouirons dans le liect de Venus.
 Qu'il y ayt deormais foy, paix & assurance
 Entre nous amoureux: adonques ie m'aduanee
 Et luy dis en ces mots. Comment puis-ie, Circé,
 N'estre pas contre toy iustement courroucé
 Quoy m'enioins tu de t'estre & courtois & traittable
 Toy qui oses remplir ta prison detestable
 De mes amis changez en porcs dans ta maison,
 Encor' me machinant ruyne & trahyson?

Tu me veux apaster de tes blandices douces
Pour coucher avec toy, & puis, que tu me pousses
Hors de mon naturel, ma force confondant
Et tout effeminé & lasche me rendant.

Non, Circé, si tu veux que de toy ie m'asseure
Que i'entre dans ton liect, il faut que tu me iure
Par les tout-puissans Dieux que tu affermeras,
Que iamais de ton art ne m'endommageras.

Elle atteste les Dieux, & les iure. Et à l'heure
Ie vay trouuer son liect en sa molle demeure.

Quatre Nymphes tandis se mettent en deuoir
D'aprester ce qu'il faut, fidelles au vouloir
De leur docte maistresse, & au seul clin d'œil d'elle
Sont promptes à dresser dedans la maison belle
Ce que leur dame veut, trauaillans sans arrest:
Nymphes filles des eaux, ou bien de la forest,
Nymphes des clairs ruisseaux dont les coulantes ondes
Courant menent leur train dedans les mers profondes.
L'une a soin d'aprester les beaux throsnes polis,
Sur lesquels, elle met les precieux tapis
De pourpre & d'ecarlata, & mesnagere experte
Les couure par embas d'une belle cauverte
D'un linge delié, le iettant au plus loing
Qu'elle peut estendu: la seconde a le soing
D'apareiller, aupres les tables bien rangees,
Qui sont toutes d'argent. Et les rendre chargees
De la vaisselle d'or faicte parfaictement
Et de les bien remplir: l'autre consequemment
Dans les tasses d'argent versoit la liqueur douce
D'un vin delicieux, lequel escume & pousse
Son doux miel l'à dedans: elle mettoit encor
Dessus, les gobelets, & les grands coupes d'or.

LE X. LIVRE

La quatriesme hastine accouroit aux fontaines
 Remplissoit de claire eau les grādes chaudieres pleines,
 Mettoit le feu dessous : le feu va trepillant
 Sous le fer du trepié, l'eau dessous va bouillant
 Et se leue à gros bonds : mais apres quelque espace
 Soudain qu'elle eut assez bouilly dedans la casse,
 La Nymphe dans le bain aussi tost la porta,
 Dans un cuuier bien net promptement la ietta,
 Trop chaude la tempere, & verse à grands ondees
 Sur ma teste & mes reins les ondes debordees,
 Affin de me lauer, affin de delasser
 Mes membres travaillez, & de moy dechasser
 Toute la lassitude : Apres, officieuse
 Elle oinct mon corps lauë d'une humeur precieuse.
 Cela faict, elle prend un bel accoustrement
 D'une laine tresfine & m'en vest richement.
 Or la dedans estoit une chaire excellente
 Toute ouuree d'argent, tresbelle, estincellante,
 Et de riche façon, dont l'art industrieux
 Jettoit de tous costez ses rayons radieux
 Un appuy estoit mis dessous la basse bande,
 Et ie m'assieds dessus comme elle me commande.
 La pucelle à lauer m'apporte cependant,
 Et de l'aiguierre d'or l'eau nette va fondant
 Dans un bassin d'argent : puis aprochant la table
 Elle apporte dessus le bon pain delectable,
 Avecques force mets bons & delicioeux,
 Et me les presentoit d'un maintien gratieux,
 Alors Circé me dit, mange & fais bonne chere.
 Mais tous ces viures là ne me pouuoient pas plaire :
 Et demourois assis triste & plein de douleur,
 En mon cœur presageant ie ne scay quel malheur.

*Circé me regardoit plein d'amertume grande,
Et que ie ne portois à ma bouche la viande,
Donc à moy s'adressant elle me dit ainsi:
Que reste tu muet, Vlysse, & quel soucy
Te tourmente le cœur? qui faict que tu ne touche
A ces viures icy & n'en mets à ta bouche?
Voila viures sur table, & tu n'en manges pas:
Astu doute & scrupule encor de quelque cas?
Tu ne dois plus pallir de quelque tromperie,
Ny que i' essaye en toy nulle sorcellerie.*

*Mon sacrossaint serment te doit estre assuré,
Et ie ne rompray point mon compromis iuré.
A laquelle ie dy. Circé, ie te suplie,
O fille du Soleil, quel desir, quelle enuye
Aura l'homme d'esprit de boire ou de manger,
Se donner du bon temps, & son ventre charger,
Si ses chers compagnons plustot ne se voit rendre,
Et leur premiere forme auparauant reprendre?
Si tu veux que ie mange & taste de tes biens,
Ren moy, ie te suply, plustost les amis miens
Remets les en leur forme, & que remply de ioye
En leur pristin estat reuenir ie les voye.*

*Ie n'euy pas si tost dit, que la Nymphe soudain
Sort de la salle, ayant sa baguete en sa main,
Et ramene mes gens sortants de son estable
Ayans de porcs vilains la forme detestable
De porcs par neuf estez le glan aux bois paissans:
Ils estoient donques là se poussans & pressans.*

*Elle les environne, autour d'eux se pourmene,
Les frotte d'un onguent de force souveraine,
Autre que le premier, & faisant autrement.
Lors la soye, du corps leur tombe entierement*

LE X. LIVRE

Et que leur fit venir par l'ordure charmense
 De ses enchantemens la sorciere famense.
 Alors leur teste ils vont hors de terre haussant,
 Et le semblant vilain de porcs les va laissant:
 Leurs espaulles, leurs bras, leur reuiennent sur l'heure,
 On les voit retourner en ieunesse meilleure
 Et plus beaux que deuant. Ils acourent soudain,
 Me viennent embrasser, me touchent en la main,
 Car ils m'auoient cogneu: lors vne larme douce,
 Un pleur voluptueux hors de leurs yeux se pousse,
 Vn frapement de mains, vn bruit, vne clameur
 Sort par tout, vn chacun entressant de trement,
 La maison en resonne, & la Deesse mesme
 Prit à la fin pitié de nostre mal extresme.
 Qui fit quelle me tint ces propos doucereux.
 Prudent fils de Laërte, Ulysses genereux,
 Va t'en viste à la mer, retourne en ton nauire,
 Fay le venir en terre, & tes hardes en tire,
 Cache tout dans le creux des antres les plus bas,
 Armes, habillemens, & tout ce que tu as,
 Puis de tes compagnons ameine icy la bande.
 Je fay incontinent ce qu'elle me commande:
 Sitost que i'arriuay pres de nostre vaisseau
 Je rencontray mes gens serrez en vn monceau,
 Affligez, abbatus pleins de creintifs alarmes,
 Et les yeux tous mouilleZ de grāds ruisseaux de larmes.
 Comme on voit quelquesfois retourner des pastis
 Les vaches sur le soir, cependant les petits
 Demeuroient enfermez, qui soudain qu'ils les voyent
 D'ayse vont sautelant, tout à l'entour tournoient,
 Le toit ne les peut plus retenir nullement
 Qu'ils n'aillent retrouver leurs meres vistement:

Ils courent resiouys, d'allairesse ils bondissent,
Et de mugissemens les estables remplissent.
De la mesme façon courent de toutes pars
Viennent de tous costez autour de moy espars
Mes chers compagnons : me saluent, m'embrassent,
Et les yeux pleins de pleurs de leurs bras m'entrelassent.
Non autrement que si dedans les lieux cogneus
D'Ithaque leur pays, ils fussent reuenus,
Et fussent retournez és champs pleins de verdure,
Où iadis ils auoient receu leur nourriture.

Lors ils me vont disant : Ainsi nous t'embrassons
Valeureux Ulysses, & nous te caressons
Comme si nous estions venus sans nulle perte
Dans les champs desirez de ton pere Laërte.

Or dy nous le destin de tes gens tant aymez,
Et nous raconte où sont nos amis transformez.

Compagnons, ie vous pri' premierement qu'on tire
Hors de la mer, leur dy-ie, en terre le nauire.
Puis, dedans les cachots de ces antres cauez
Cachez sans contredit tout ce que vous auez,
Armes & equipage, & qu'apres moy on vienne
Au palais de Circé sage magicienne
Voir tous nos compagnons bonne chere faisans,
Et tout à leur souhait à table deuissans
Pres du feu, pres du vin, & la sage Deesse
Ne se peut assouuir de leur faire caresse.

Ie n'en pas acheuè, que chassans leur é moy
Ils s'apprestent, contans de venir avec moy :
Mais Eurylochus seul de me suyre refuse,
Tous les autres retient, & de ces mots leur use.

Quelle rage vous vient miserable tenter,
Et où vous allez vous ainsi precipiter?

LE X. LIVRE

De gayeté de cœur? cerchans vostre ruine,
 Aueuglez, endurcis, chez la Nymphemaligne
 La sorciere Circé? Qui, las, vous changera
 En pourceaux très-vilains, qui vous transformera
 En Loups, ou en Lyons, pour garder, misérables,
 Et de iour & de nuit ses toits & ses estables?
 Vous représenteray-ie, hélas, le faict recent
 Et la brutalité du Cyclops, fracassant
 Nos pauvres compagnons, quand chez luy ils entrerēt,
 Et cheZ luy sans sortir, le trépas rencontrerent?
 Le temeraire Ulysse en fut le conducteur,
 Ce guide audacieux de leur mort fut auteur,
 Par sa folle entreprise, hélas, tous ils perirent,
 Et d'où il les mena iamaïs ils ne sortirent.

Je me sens à ces mots, d'ire tout transporté,
 Je tire mon espee estant à mon costé,
 Je me iette sur luy ainsi qu'une tempeste
 En resolution de luy oster la teste,
 Bien qu'il fust mon parent. Ce que voyans mes gens
 Se iettent dessus moy, accourent diligens,
 Me retiennent pleurans, & de douce parole
 Taschent de m'adoucir. O dont le renom volle
 Par tout, grand Ulysse, accorde nous cecy,
 Et nous le laisserons, disent-ils, seul icy
 Pour garder le vaisseau, & meine nous au reste
 Dans les palais hautains de la Nympheste.

Ainsi voulurent-ils m'exhorter & prier.
 Lors ie sors du vaisseau & delaisse la mer.

Eurylochus pourtant ne demeure au nauire,
 Mais nous suit pas à pas, car il craignoit mon ire.

Mais la Nymphetandis que i'estois en chemin
 Auoit mes compagnons faict entrer dans le bain,

Les auoit fait lauer, & de precieux huille
Leurs membres delasser, qui doucement distille:
Puis riches vestemens fit ietter dessus eux.
Nous les trouuâmes lors à table tous ioyeux
Qui faisoient bonne chere. Aussi tost qu'ils se virent
S'entrerecognoissans l'un de l'autre ils s'enquirent.
Ils prenoient du plaisir à conter leurs malheurs,
Et mesloient en contant leur plaisir à leurs pleurs:
Leurs regrets, leurs soupirs tout le palais remplissent
Au son de leurs clameurs les vaultes retentissent.
Lors la belle Deesse aux Deesses des Cieux
Pres de moy me tenoit ces propos gracieux.

O fils de Laërtes abundant en sagesse,
Generoux Vlysses, cessez vostre tristesse
Et ne lamentez plus, que vostre gentil cœur,
Ne soit pas plus auant consumé de douleur:
Non, ie n'ignore pas les dangers & les peines
Que vous auez souffert és poissonneuses plaines,
Et vos fiers ennemis contre vous animez,
Quels efforts ruineux contre vous ont tramez:
Mais resiouyssez vous, beuvez en abondance
De ce vin genereux, & pleins d'esiouyssance
De ces viures mangez, rappelez vos esprits,
Bannissez tous le soing dont vous estes épris:
Chassez toute tristesse, empoignez ce remede
Encontre cestrauaux, & qu'à l'ennuy succede
La ioye & le plaisir, ainsi que vous estiez
Au temps que des sablons d'Ithaque vous partiez:
Bien qu'à la verité la misere vous presse,
Et vostre mal present vous ronge de tristesse,
Bien que vous souuenans de vos maux, vos erreurs,
Vos courses, à bon droit vous fondiez tout en pleurs,

LE X. LIVRE

Et qu'on ne voye point parmy telle souffrance
L'esprit entierement recevoir allegeance,
Mais plustost se dechoir lassé de tant de maux,
Et abbattu d'un nombre infiny de trauaux.

Elle disoit ainsi, & nos tristes pensees
A ces propos courtois nous furent redressees.
Or par autant de iours que l'an entierement
Pouuoit estre fourny, continuellement
Nous demeurasmes là. Sans cesse estans à table
Nous remplissons de chairs & de vin delectable:
Mais quand l'an fut parfaict, que les heures par tours
D'ordre faisans les mois allongerent les iours,
Mes compagnons venans deuers moy, m'appellerent
Du logis de Circé, puis ainsi me parlerent.

Mal-heureux, souuient toy de ton pays en fin,
Au moins s'il est ainsi que ton fatal destin
Est, que tu dois vn iour reuoir ton doux rinage,
Sit a terre natale & ton cher heritage
Te sont promis des Dieux, & si à sauueté
Tu dois estre à la fin en Ithaque porté,
En ton palais hautain, & dans ta maison forte.

Ils me parloient ainsi, & leur aduis m'emporte
Touché de leurs propos, nous banquetons encor
Tout le iour, & vuidons le vin de dedans l'or.
Le soir estant venu lors que les rouës siennes
Le Soleil va plonger és eaux Hiberiennes
De sombre obscurité la teste se couurant:
Mes gens se vont cacher, & le sommeil courant
Sur les corps assoupis leurs paupieres abbaïsse.
Lors ie m'en vins trouuer en son liét la Deesse,
Et pressant ses costez tombant à ses genoux,
La Nymphe m'escontoit avec vn parler doux.

Je luy dy: O Deesse esconte ma priere,
Et ne reiette point ma requeste en arriere:
Accomply maintenant ce que tu m'as promis,
Et nous donne congé à moy & mes amis.
Que ie ne sois forclos de ce dont ie te prie,
Que retourner ie puisse en ma douce patrie
D'un Zephire par toy donné prosperement.
Cela est resolu en mon entendement,
L'impetuosité de mon desir m'y force,
Et tous mes compagnons veulent à toute force
Me contraindre d'aller, me demandent le iour
Qui leur commencera leur desiré retour.
Ils languissent pressez de mille inquietudes,
Sont tousiours apres moy pleins de sollicitudes,
M'assomment de regrets, & de pregnant é moy
Continuellement pleurent autour de moy,
Toutes & quantes fois que par les douces pleines
De ton plaisant iardin seule tu te pourmeines.

Je luy disois ainsi. Ainsi me respondit
La Deesse Circé, Nymphé de grand credit,
Des Deesses Deesse. O grand fils de Laërte,
Qui la terre remplis de ta prudence experte,
Non, ne demeure plus ceans en ma maison
Contre ta volonté, ce n'est pas la raison.
Mais il te faut sçavoir qu'il vous conuient bien faire
Au departir d'icy un chemin tout contraire
A celui que pensez. Cela est arresté
Qu'il le faut entreprendre, & par nécessité.
Il te conuient aller aux stigiennes ondes,
Au regne de Pluton, aux cauernes profondes
De la basse Hecaté: Là tu recercheras
Les oracles sacrez du vieil Tirolias

LE X. LIVRE

*Le Prophete admirable, & l'aveugle interprete,
Ne te les denira, luy seul aupres de Lethe
Les oracles des Dieux rend ordinairement.
Il est encor' doué d'un sain entendement,
Et combien que la mort long temps a le domine,
A luy seul toutesfois la Reyne Proserpine
A donné de chanter la nette verité:*

*D'autres ombres encor' tu seras accosté
En ces regions là. Ainsi dit la Deesse:
Et le corps me fremit de crainte & de tristesse,
Je remplissois le liét de souspirs & de pleurs,
Je mandissois ma vie, accusois mes malheurs,
Me repentois d'auoir iamais veu la lumiere,
Et d'auoir regardé la flambante carriere
Des cheuaux de Titan: mon esprit tourmenté
Dit qu'il a trop vescu comblé d'aduersité,
De tourment & de mal. Je me tourne & me viré
Sans repos par le liét, ie lamente & souspire:
Puis ayant bien pleuré, rassasié faisant
Quelque fin à mes cris, ie vais ainsi disant,
Demy mort, à Circé. Ma tres chere Deesse
Qui pourra me guider, & me donner adresse
Aux ombres de Pluton, où me fais-tu ramer,
Où iamais ne paruint nul nauire par mer?*

*A donc me respondit Circé la mage experte:
Genereux Ulysses, prudent fils de Laërte,
Ne te tourmente point, ne pren aucun soucy
Qui te pourra guider au departir d'icy:
Hausse tant seulement sans rien craindre tes voiles,
Et t'assieZ sans rien faire à l'ombre de tes toilles,
Car Boreas sans plus hors d'icy t'ostera,
Et ton nauire & toy sur la mer portera.*

Quand tu auras passé force mer escumense,
Tu verras le rinage & la forest ramense
De la grand Proserpine, où les aulnes montez
Et les saules sterils en nombre sont plantez.
Arreste en cet endroit ton navire sur l'onde,
Puis descen en personne en la maison profonde
Du redouté tyran des rines de Charon.
Là Pyriphlegeton tombe dans Acheron,
Et le Cocyte noir de mesme s'y décharge,
Qui procede & qui vient de Styx le fleuve large,
Et la pierre où vont choir les deux fleuves grondans.
Si tost que tu seras arriué là dedans
Tu ne faudras de faire une fosse dans terre,
Dont la ronde ouverture & s'ouvre & se deserre
D'une coudee autour : dedans tu verseras
Effusions à tous les esprits de là bas.
Premierement, du miel la liqueur decoulante,
Puis apres du doux vin la liqueur excellente :
Tiercement y mettras de l'eau tout doucement,
Et puis finalement de la fleur de froment.
Adore cela faiet les imbecilles ombres,
Et les ames sans force estans és forests sombres.
Promets leur, fay leur vœu, s'il t'est en fin permis
De reuoir ton Ithaque, où sont tes bons amis,
De leur sacrifier une brehaine vache
Grasse par excellence, & sans vice ne tache,
Et de tout le meilleur de tes biens dresser as
Une grand pyramide, & leur esleueras.
Puis à Tiresias il luy faudra promettre
A part vn bellier noir, le plus beau, & le maistre
Entre tous testroupeaux, quand sur les tristes bords
Auras ainsi prié les preux effeins des morts,

LE X. LIVRE

Immole vne brebis qui ayi noire la laine,
Et vn belier pareil, puis tourne & le promeine
Vers l'Erebe blaffard. Retire toy à part
Vers le courant du fleuve, & te tiens à l'escart,
Lors tu verras venir vne innombrable bande,
Ames des trespassez. Incontinent commande
A tes gens d'écortcher, & bruler promptement
Tout ce bestail tué. Apres, fay humblement
Tes prieres au Dieu de la demeure infame
A Proserpine apres, sa redoutable femme,
Puis tire ton espee, & chasse les esprits,
Si quelqu'un d'approcher du sang estoit épris
Alors empesche l'en, & ne laisse la rine
Tenant ton coutelas, iusques à tant qu'arrive
Le Roy Terecias, lequel te resoudra
De ce qu'auras affaire, & deuers toy viendra
T'enseigner le chemin, la façon, la maniere,
De retourner bien tost en ta demeure chere:
Quelles mers, quels sentiers, quels destours hasardeux
Il te faudra tenir dessus le flot ondeux.

Elle acheua de dire, & l'aurore naissante
Monstra son char doré, claire & resplendissante:
Et tout au mesme temps la Nymphe me vestit
D'un manteau precieux, & d'un tres-riche habit.
Mais elle se couurit d'une grand robe blanche
Tres-fine & deliée, & mit dessus sa hanche
Vne ceinture d'or, & dessus ses cheueux
Un bel escoffion tres-riche & precieux.

Ie vay par la maison vistement, & réueille
De tous mes compagnons vn chacun qui sommeille:
Sus debout mes amis, disois-ie, faut aller,
Il est temps de partir, il se faut réveiller,

Et prendre le chemin dont la sage Deesse
M'a fait ceste faueur de me donner l'adresse.

A ces mots ils sont prests, mais, ô defastreux sort,
Il ne me fut donné de conduire à bon bort
Tous les miens sains & saufs, car l'un plein de ieuuesse,
Elpenor ayant nom, sans force, sans adresse,
Sans grand entendement & sans grace de corps
Tousiours presque endormy, mais estant yure alors
Pauvre, ce-temps pendant que miserable yurongne
Il cherche la fraischeur, & des autres s'esloigne,
Le sommeil le surprit au plus hault d'unetour.

Mais comme il entendit dessus le point du iour
Ses compagnons partir, du sommeil il s'excite,
Et du vin estourdy du hault se precipite,
Ne se souuenant plus de conduire ses pas
De degré en degré. Ainsi tombant à bas
Il se rompit le col, les reins & les iointures,
Et descendit ainsi souz les ombres obscures.
Le reste de mes gens estant soudain passé
Auec moy, ie leur dy le vouloir de Circé.
Possible pensez vous que nous allions asteure
Vers les champs Ithaquois nostre douce demeure?
C'est bien tout autrement: car deuant qu'y aller
Il faut premierement chez Pluton deu aller,
Consulter Tiresie aux bordz de Persephone,
Et prendre son oracle. Ainsi Circé, l'ordonne.

I'en dit. Et tout le ceur froissé leur demeuroit,
Et chacun de depit la barbe se tiroit.
Sans courage & sans force assis ils demeurèrent,
Et larmes sans cesser de leurs yeux distillerent.
Mais pour tout leur pleurer ne leur en fut pas mieux:
Nous vinsmes au vaisseau sur le flot esumeux,

L

LE X. LIVRE DE L'ODYSSEE.

Et là chacun encor' s'escrie & se lamente,
Larmoyant chaudement. La Deesse sçauante
Arrina ce- pendant, un belier attacha
Et vne brebis noire, aysement se cacha:
Cela faiet, à nos yeux, & sans estre apperceüe,
S'esuanouit en l'air sans pouuoir estre apperceüe,
Qui pourroit voir un Dieu quand il est agité
Cà & là où il veut, contre sa volonté?

Fin du dixiesme Liure.



LE VNZIESME LIVRE DE L'ODYSSEE D'HOMERE.

ARGUMENT.

L raconte en continuant comme par le mandement de Circé il descendit aux enfers, le moyen qu'il tint pour parler au deuin Tiresias, qui luy dit comme il falloit qu'il fist pour se conseruer & ses gens, pour retourner en leur patrie. Il vit les Heros & Heroynes, parle à sa mere, & aux Princes qui auoient esté avec luy deuant Troye, puis remonte des enfers.

AUTRE SOMMAIRE.

*V*lysses de Pluton visite les lieux pasles,
 Reconnoist les esprits des ombres infernales.



*Q*uand nous fusmes venus pres des barques
 voutees
 Qui estoient pres du port sur les ondes por-
 tees,

*E*t qu'eusmes ioint le flot resonnant hautement,
 Nous tirasmes du port la nef premierement,
 La iettasmes en mer, puis le mast nous haussasmes,
 Et le blanchissant voile à l'entour agenceasmes,
 Nous prenons nos brebis, en pleine mer montons,
 Et gemissans sans cesse hors du port nous sortons.

LE XI. LIVRE

Par derriere vn doux vent nous pouſſoit favorable,
Que nous auoit donné la Nymphé redoutable
La ſçauante Circé aux cheueux blondiffans,
La Deeffe aux Diſcours eloquemment puiſſans.
Sur la nef arrangez les armes bas nous miſmes,
Et ſur les bancs luiſans à l'aiſe nous aſſiſmes,
Nos conducteurs eſtoient le patron & le vent.

Ce iour là tout entier nous pouſſaſmés auant,
Et les Zephirs legers faiſoient tendre nos toiles,
Phœbus chet ce- pendant, & les tenebreux voiles
Tombent ſur les chemins, ainſi qu'il declinoit,
Et d'ans l'eau d'Occident en penchant ſe trainnoit.
Et nos voiles enſlez haſtans leurs courſes viſtes
Du profond Ocean toucherent les limites,
Où les Cimmeriens, leurs villes, leurs deſerts
Sont eternellement de tenebres couuerts:
Iamais ſes clairs rayons Titan ſur eux ne darde,
Et ſon feu gracieux iamais ne les regarde,
Ny quand deuers le Ciel ſon char il va touchant,
Ny quand il va du Ciel en terre trebuchant.
Un air pernicioeux, vne nuit perdurable
Vole eternellement ſur la gent miſerable.

Nous ſommes portez là, là tous nous nous rendons,
Et au flux de la mer pres du bord abordons.
Les victimes ſortons pres des barques profondes,
Et derechef encor en coſtoyant les ondes
Nous ſuiuons l'Ocean, tant que miſmes le pié
Au lieu que nous auoit Circé ſpeciſié.
Et là Perimedes accompliſſant l'office
Auec Eurylochus, porte le ſacrifice
Saint & religieux. Tandis ayant oſté
Mon eſpee, qui lors pendoit à mon coſté,

Je creusi une fosse, & luy fais l'ouverture
 En la circonference en egalle mesure
 Que le coulde alongé, iettant dedans le fonds
 De mes effusions aux bas esprits profonds,
 Du miel premierement, du vin l'humeur diuine,
 Tiercement de l'eau pure & puis de la farine.
 Priant profondement tous les esprits legers,
 Faisant promesse & vœu aux ombres des enfers,
 De leur sacrifier une vache brehaine,
 Si de tant de faueur leur puissance me daigne
 En mon heureux pays conduire à sauueté.
 Et de tout le meilleur de mes biens a planté
 Si leur douce faueur prosperement me guide,
 Leur dresser une belle & grande pyramide:
 A Tiresie à part promets de mon troupeau
 Qu'une grasse brebis à la noirastre peau
 Sera sacrifiée à luy seul, surpassante
 Le reste de la troupe es prez l'herbe paissante.

Lors que i'en par mes vœux & supplications
 Appaisé les esprits, faiçt mes oblations,
 L'égorge les brebis au dessus de la fosse:
 De sang couloit dedans une riuere grosse,
 Et du coup une humeur noirastre distilloit.
 Lors une quantité autour de moy voloit
 De simulacres vains, ceux que la mort cruelle
 Auoit à toute force entrainnez apres elle:
 Les ieunes vigoureux, & les foibles vieillars
 A l'enuiron de moy courent de toutes pars:
 Maintes Nymphes encor, & filles miserables
 Que le deuil au trépas a conduit pitoyables:
 D'autres y auoit là de grands coups transpercez,
 De piques & de dards les estomacs blessez,

LE XI. LIVRE

Les armes tout en sang : ils couroient à la fosse,
Et s'y precipitoient en multitude grosse
Sifflans autour de moy d'une fresse rumeur.

Tout le corps me glaça de frisson & tremeur,
Et le sang me figea de peur & de misere.

Lors ie crie à mes gens que les brebis n'aguere
Egorgees par moy, ils prennent viftement,
Aillent les depouiller de leurs peaux promptement,
Et que dessus l'autel où les charbons petillent
En toute diligence ils les brulent & grillent.

Qu'au fort Pluton premier, aux Erebiqes Dieux,
A la grand' Persephone ils adressent leurs vœux,
Ie tire mon espee alors, & la presente
Aux esprits qui venoient, toute nue & luisante,
Afin de les chasser, & de les empescher
De venir à la fosse, & du sang approcher,
Et tant que ie pouuois leur offrois mes obstacles,
Tant que Tiresias m'eust rendu ses oracles.

Le premier des esprits fut celui d'Elpenor
Qui me vint au deuant : car il n'auoit encor
Esté enseuely, & nous ne l'inhumasmes
Au partir de Circé, sur luy nous ne pleurasmes:
Ainsi il fut laissé là, pource que nous estions
Autre part empeschez, & qu'en haste partions.
Le voyant, la pitié que i'eus de sa misere
Me fit tomber des yeux vne humide riuere,
Et luy disois ainsi : Elpenor, & comment
Es-tu venu à pié ainsi diligemment
Plongé dans l'espaisseur de ces noires tenebres,
En ces lieux de silence, & pleins d'horreurs funebres?
Plus viftement que nous, qui auons eu le vent
Et la mer à souhait? I'allois ainsi disant.

Et pleurant il me dit : O grand fils de Laërte,
Magnanime Ulysses, plein de prudence experte,
Le vin, & un démon mauuais m'ont renuersé.
Car comme ie dormois au logis de Circé,
Ne me souuenant plus des degrez, d'aduenture
Ie cheu du haut en bas de la grand couuerture,
Et me rompy le col : puis vins à l'environ
Des déplorables bords de l'ombreux Acheron.

Mais or' ie te coniuire, & par ta femme chere,
Et par le saint respect de ton genereux pere
Qui t'a petit enfant nourry si cherement:
Eux qui sont loing de toy, & que presentement
Tu ne peux conuenir, par ton cher Telcmaque
Que tu laissas petit au departir d'Ithaque,
(Car ie sçay pour certain que ce lieu delaisé
Tu passeras encor' au pays de Circé,
Et ta barque des vents & des eaux demenee
Reprendra port encor' dans l'isle de l'Ææe)
Alors, ô ie te pry d'Ithaque puissant Roy,
Repense à mes propos & te souuien de moy,
Enseuely mon corps dessouz la terre obscure,
Et ne le laisse pas sans pleurs ne sepulture,
De peur que par malheur tu ne vinsses aux Dieux
À mon occasion, à te rendre odieux,
Pour ne m'auoir donné sepulture ne larmes.
Fay bruler avec moy le reste de mes armes,
Et dresse le tombeau de cet infortuné
Sur le bord escumeux de Neptun mutiné:
Pour me faire paroistre & donner cognoissance
À la prosperité du lieu de ma naissance,
Puis de mon infortune, & mets dessus encor
L'auiro, par lequel le pauvre Elpenor

LE XI. LIVRE

Avec ses compagnons en reuenant de Troye
Dessus les flots ondeux à la barque a fait voye.

Et ie luy respondy : De la mesme façon
Que tu dis, ie feray, miserable garçon.
Et de coulantes pleurs ma face estoit trempee,
Mais tousiours pres du sang ie branlois mon espee,
Et le pauvre Elpenor au departir de là
Tristes cris estenant pleindre ailleurs sen alla.

Voicy venir apres l'ame de ma feu mere
Anticlea, qu'auoit rauy la mort amere,
Fille d'Antolichus, & vola celle part
Où i'estois. Ie l'anois laissee à mon depart
Viuante, en m'en allant deuant Troye la sainte.

La voyant, de pitié mon ame fut atteinte,
Mais pour tous mes regrets ie ne luy laissay pas
Pres du sang approcher aucunement ses pas:
Tant que i'eusse receu la sainte prophetie
Des oracles sacrez du diuin Tiresie,
Lequel arriue en fin de moy fort desiré.
En sa main il portoit son beau sceptre doré,
Et me recognoissant il me parle & m'appelle:
Qui te meut de laisser la lumiere si belle
Du Soleil, miserable Ulysses, & comment
As tu abandonné le hautain Element?
Est-ce pour contempler ces ames déplorables
Et le silence froid de ces lieux miserables?
Quitte vn peu ceste fosse, & ne crain de cacher
Ton coutelas luisant, puis me laisse estancher
Ma soif dedans le sang, si scauoir tu desire
De moy ce qu'il te fault. Alors ie me retire,
Et fy ce qu'il me dit. Le sang il aualla,
Puis d'un gosier prophete en ces mots me parla.

*Tu voudrois bien auoir un retour fauorable
En ton pais aymé, ô Ulysse indomptable,
Mais un Dieu te le rend difficile & mauuais.
Car mon aduis n'est pas que Neptune jamais
Te laisse reposer. Son ire mutinee
Est en son cœur brulant par trop enracinee.
Pour ce que ton tison son cher fils auengla.
Mais il y a remede encor à tout cela,
Tu reprendras a gré le train des eaux marines
Si de tes compagnons & de toy tu domines
L'impetuosité, si tu peux arrester
Leurs fiers debordemens, & la faim suporter,
Lors qu'ayant euité des ondes la furie
Tu viendras aborder aux fins de Trinacrie.
Là vous rencontrerez force troupeaux paissans,
Les vaches du Soleil par les champs verdissans
Bronter & s'engresser, du Soleil dont n'est close
L'oreille ne la veue. Il entend toute chose,
Il void tout le premier. Si sans les aprocher
Pour leur faire du mal, sans les prendre & toucher
Tu les laisses en paix, tu t'acquerras sans doubte
À tes gens & à toy toute prospere route,
Pour faire ton retour, & sans beaucoup d'ennuis
Tu reuerras en fin Ithaque ton pais.
Mais si tu ne t'abstiens, & que les mains tu jettes
Sur les troupeaux du Dieu aux mortelles sa jettes
Le blondoyant Tityan, en mer vous perirez.
Tes compagnons & toy, soyez en asseurez.
Quant à toy si tu peux à force de rabatre
Les ondes en nageant, la tempeste combattre,
Tu seras, mais bien tard en ton pais porté,
Et de mille malheurs cependant tourmenté.*

LE XI. LIVRE.

Tes compagnons noyez, en galere empruntée
 Trouveras la maison de ton pere gastée,
 Et force poursuiuans, qui mangeront ton bien,
 Saliront la splendeur de ton regne ancien,
 Souilleront ton palais, & de poursuite infame
 Pourchasseront d'auoir ta chere espouse à femme,
 Et de riches presents fort l'importuneront.
 Mais en fin, sous ta main à mort ils tumberont,
 Et d'eux tous tu prendras exemplaire vengeance.
 Mais quand tu les auras rengez sous ta puissance
 Ou par fraude, ou par dol, ou par le fer tranchant,
 Pren encor' un vaisseau, & le pais cerchant
 Si tu crois mon conseil, chemine, iusques à ce
 Que tu auras trouué vne gent, vne race
 Ignorant la marine, & qui ne scait que c'est
 Que de manger salé, ny du piquant aprest
 Des viures de la mer. Les pleines azures
 Ne les recoient point, des barques peinturees.
 Ils n'ont point cognoissance, ils ne scauent ramer
 Ny faire voir des nauts les ayles sur la mer.
 Mais pour n'en douter point, de toutes tes affaires,
 Iet'en veux remarquer des enseignes tresclaires.
 Quand vn autre passant te viendra au deuant
 Qui te dira que c'est vn soufflet plein de vent
 Que tu as sur l'espaule, alors iette ta rame,
 Fiche la contre terre, & prosterne reclame
 Le Roy des eaux Neptun, humble luy immolant
 Vn belier, vn verrat, & vn toreau muglant.
 Puis reua-t'en chez toy, & presente l'offrande
 D'une sainte hecatumbe à la celeste bande
 Or, la mort du costé de la mer te viendra
 Quant tu seras debile, elle te surprendra

En païssible vieillesse, & de ses mains meurtrieres
En aage plein & meur fermerates paupieres.

Durant ton regne encor tes sujets bien-heureux
Gousteront de la paix le repos sauoureux.

Or tout ce que i'ay dit est seur & veritable.

Ainsi prophetisoit le deuin honorable
Et ie luy respondy consecutiuelement:

Diuin Tiresias, les dieux certainement
Ont decreté cela, & leur sainte ordonnance
A mis de longue main sur moy ceste influence.

Mais dy moy, ie te pry, que voy-ie tant errer
Ma mere, que la mort est venue enferrer
Sans me dire aucun mot, & pour quoy se sied elle
Aupres de ceste fosse, à soy point ne m'appelle,
Et ne me cognoist pas? dy tresexcellent Roy
Des augures diuins. Ie te pry monstre moy
Comme elle me pourra à la fin recognoistre.

Tu le scauras, dit-il, quelque autre que puisse estre
A qui tu permettras de se sang aprocher
Elle te parlera, si tu veux l'empescher
Elle te laissera. Ainsi dit le Prophete,
Et puis il descendit dans la noire cachette
De Pluton Roy d'embas. Or ie demeuray là
Iusqu'à tant que ma mere aupres de moy vola.
Ie luy permy de boire, & retiray mes armes.
Lors elle me cogneut: & puis fondant en larmes:

Comment es tu venu viuant en ces manoirs,
Comment es tu entré dedans ces gouffres noirs,
Dit elle, ô mon cher fils? l'entree est difficile,
A ceux qui sont viuants, dans la riuie sterile
Des marais stygiens. Un grand estang tousiours
Enuironne ces lieux, vn grand fleuve à son cours

LE XI. LIVRE

Fuyant tout à l'entour, dont le canal est triste,
Et le cruel courant espouuante & attriste.
L'ocean spatieux enceint premierement
Ceste palle contree, on ne peut nullement
Y venir à pied sec, si ce n'est que vous porte
Sur la mer une barque & puissante & bien forte.

Serois tu point venu icy ayant erré
Long temps avec tes gens sur le flot azuré
En reuenant de Troye? as tu point en Ithaque
Encores mis le pié? la mere à Telemaque
N'e't'a elle point veu encores dans la Cour?
Lors en luy respondant ie luy dy à mon tour.

Ma mere, vn cas forcé m'a contraint d'entreprendre
Le chemin des paluds de Stix, afin d'entendre
Du saint Tiresias l'oracle de mon sort.
Las, ie n'ay point encor aproché le doux port
De la chere Achaye, & n'ay point fait entrée
Sur les bords desirez de ma douce contree.
Mais ie suis miserable incessamment porté
En mer deca dela par les vents agité
Souffrant peyne, tourment, & douleur infinie.
I'ay eu encontre moy la fortune ennemie
Depuis que ie party avec Agamemnon
Pour aller guerroyer Pergame au grand renom,
Où sont les beaux cheuaux. Mais toy ma chere mere,
De quelle mort t'a pris la Parque trop amere?
Est ce de maladie ayant trop longuement
Languy dedans le liét: ou, si cruellement
Diane qui de loin ses traits empennez iette
T'a la mort enuoyee au bout d'une saiette?
Dy moy, que fait mon pere, & que fait mon cher fils,
Que ie uenne ie laissay, comment se portent ils?

*Ma dignité dure elle encor entre les nostres?
Mon regne n'est-il point entre les mains des autres?
Quelque autre n'est-il point sur mon trosne monté?
L'esperoir de mon retour leur est-il tout osté?
Me pensent ils perdu? dy moy encor nouvelle
De ma Penelope mon épouse fidelle,
Conte moy son maintien & son deportement,
Aymet'elle tousiours mon fils uniquement,
Conseruant la maison & la famille nostre?
Où bien s'est elle point mariee à quelque autre
Des princes de la Grece? Ainsi ie luy parlois,
Et en me respondant elle reprit sa voix.*

*Ta femme continue en l'amitié ardante
Qu'elle t'auoit, dit elle, endure, patiente,
Ton absence & son mal, confite de douleurs
Nuit & iour se paissant de soupirs & de pleurs.
On n'a point usurpé ton bien en ton absence,
Telemaque en iouit en toute patience,
Il y tient rang de Prince, & dedans ta maison
Tient tousiours bonne table ainsi que de raison.
Mais ton pere demeure aux champs, ne se soucie
De ville, ne de Court, mene champestre vie.
De tapis & de lits il s'est voulu priner,
Ne se fait point de bien: & quand ce vient l'hyuer
Triste parmy ses gens son corps il vient estendre
Au foyer pres du feu, se couche sur la cendre,
Ses habits dessus luy rompus entierement.
Mais quand l'esté reuiet, & puis consequemment
L'autonne donne fruits, il se retire à lerte,
Par la vigne s'en va de fruits toute couuerte,
Et sur l'herbe & la terre à se coucher se met,
Et les feuilles par tout luy seruent de chenet.*

LE XI. LIVRE

Là en se lamentant il se couche par terre,
 Et l'ennuy douloureux piteusement l'atterre,
 Son corps est consume de mal & de douleur,
 Souspire tes travaux, lamente ton malheur,
 Si bien qu'attenué, & courbé de tristesse
 Il est avant le temps accablé de vieillesse.
 Cela m'a faict mourir, le desespoir trop fort
 L'ennuy trop violent est cause de ma mort:
 Diane qui de loing ses traits ennemis iette
 Ne m'à la mort itree au bout de sa saiette,
 Le tourment iette-deuil, le mal contagieux
 De quelque maladie, aux membres ennuyeux,
 Et qui souuent des corps la pauvre ame separe,
 C'ela ne m'a point faict proye de Stix auare.
 Le triste deuil de toy, que i'ay tant regretté,
 Ta modeste vertu, mon corps ont surmonté,
 Ils m'ont priné de vie, & mon ame esbandue
 Dedans l'obscurité de ces lieux ont rendue
 Quand elle eut dit cela fresle elle s'enfuit,
 Et dans le delié de l'air s'esuanouit,
 Me delaissa pleurant, & forcené d'enuie
 De luy parler encor. Trois fois ie l'ay suiue,
 Par trois fois à son col ie me voulu jeter,
 Et comme elle fuyoit ie me voulu haster
 Afin de l'attrapper, & de ma douce mere
 Au moins toucher la main, trois fois l'ame legeré
 S'eschappa de mes mains, simulacre pareil
 A l'ombre, au leger vent, & au fuyant sommeil
 Lors la douleur esment & pressa mon courage
 Et ie parlay ainsi à la fuyarde image.
 Ma mere, t'enfuis tu de ton enfant, hélas!
 Qui cherche à te toucher, pourquoy n'attens tu pas

Ta chere geniture, afin que nos mains iointes
Nous nous soulions au moins de larmes & de plaintes
Sous les eaux de Pluton? Est-ce pour m'affliger
Et m'attrister tant plus, que ton esprit leger
Que ta face sans corps, m'est aujourd'hui monstree
De celle qui regit ceste triste contree?

A quoy ma mere alors. La Reyne d'icybas,
Enfant infortuné, ne te circonuient pas,
C'est la loy des humains pressez sous la mort dure
De n'auoir os, ne nerfs, ne chair, ne cheueleure:
Car la flamme a tout pris, le feu a tout brulé,
Et si tost que l'esprit hors du corps est volé,
Libre de nerfs & d'os blanchissans, il s'enuole
Ainsi que le sommeil, le vent ou la parolle:
Mais fuy t'en hors de Stix, d'Auerne pallissant,
Retourne t'en reuoir le Ciel resplendissant,
Et ce que tu as veu sous l'Acheron infame
Et chez l'Erebe ombreux, raconte l'à ta femme.

Ainsi que nous parlions, voicy venir à moy
Un troupeau feminin, que la femme du Roy
Des esprits tenebreux, redoutable Deesse
Dans son empire esmeut comme une armee espee.
Toutes femmes iadis des Heros renommez,
Filles semblablement de Princes estimez.
Ombres elles venoient en troupe espee & grosse,
Et accouroient au sang qui rougissoit la fosse.
Or ie me conseilloy en mon entendement
Comme ie leur pourrois parler separément.
En fin ie fu d'aduis de tirer mon espee
Et ne les laisser boire en la fosse trempee
Toutes ensemblement, mais d'ordre, à celle fin
Que ie pusse scauoir leur estat & leur fin.

LE XI. LIVRE

Tyro vint la premiere, elle se disoit nee
 D'un pere, homme de bien l'accomply Salmonee;
 Crethee l'Æolide autresfois l'espousa,
 Mais l'amour d'Enipe le fleuve, l'embrasa,
 Fleuve plaisant & beau sur tout autre dumonde.
 Elle falloit ebatre au long de la claire onde,
 Et Neptune qui le sceut, vne fois se cacha
 Sous la forme du fleuve, & coyment se coucha
 Le long de l'emboucheure, où par vn canal large
 Dans les eaux de la mer le fleuve se decharge.
 Puis comme vne montagne il haussa au milieu
 Les flots pers tout autour: & la femme & le Dieu
 Furent tous couuers d'eaux où l'ayant endormie
 La ceinture pucelle il rompit à s'amy.
 Puis ayant acheué son amoureux plaisir,
 La main de sa maistresse il accourut saisir,
 Et luy dit, pren courage, ô la bien fortunee
 En amour, tu auras vne belle lignee
 Deuant qu'il soit vn an: jamais l'attouchement
 D'un Dieu quel que ce soit ne porte vainement:
 Partant aye le soin qu'elle soit esleuee
 Ainsi qu'il appartient dans ta maison priuee:
 Adieu, & ne di mot de nos larrons amours:
 Retourne chez ton pere en ses royales tours,
 Je suis cil qui la mer & ses vagues modere
 Avec mon fort trident, dont l'ire & la colere
 Vient la terre ebranler, Neptune sceptre portant,
 Il dit, & dans les eaux soudain se va jettant.
 D'elle grosse, Nelee & Pelias naquirent,
 Qui le grand Iupiter tresdignement seruirent.
 La large Iacolce Pelias habita
 Aux champs fort spacieux, la terre conquesta,

Et fut

Et fut riche en bestail, & le hardy Nelee
D'ailleurs Pyle occupa sablonneuse appelée.
Or Tyro de Crethe eut force autres enfans,
Æson & Pheretè en armes triumpans,
Avec Amithaon. Là ie vy Antiope
Qui fut fille autresfois du flenne Dieu Esope.
Elle faisoit honneur de ce que Iupiter
Espris de son amour la voulut accoster,
Dont elle eut Amphion & Zethè, qui bastirent
Thebes, & qui premiers les fondemens y mirent,
Y firent des maisons, & qui les sept portaux
Lierent de fortz murs & de rempar tres-haultz.
Pource qu'ils ne pouuoient sans eux Thebes deffendre
Bien qu'ils fussent vaillans, & prompts à entreprendre
Ie vy Alcmene aussi, qui femme auoit esté
Du preux Amphitrion: mais elle auoit gasté
Pareillement son lit, & commis adultere
Auecques Iupiter: D' Alcide elle fut mere.
Vn plus vaillant au monde & plus braue n'estoit,
Et la force & le cœur d'un lion il portoit.
I'aduisay Megara la fille Creontide
Qu'autresfois espousa le tres-fort Tyrintide,
Ie vey Epicaëta, l'excellente en beauté
La mere D'Oedipus, grande en meschanceté
Bien qu'elle n'en sceust rien, & qu'en sa conscience
Elle fust inculpable: Elle fist grande offence
En espousant son filz: luy son pere meurtrit,
Sur le lit maternel malheureux entreprit,
A sa mere portant amour desordonnee
L'incestueux brusla d'un mechant Hymenée
Mais aux hommes bien tost diuulguerent les Dieux
De la mere & du filz le forfait odieux:

LE XI. LIVRE

Par le destin des Dieux en leur ire esfroyable
 Il regna longuement en Thebes l'amiable
 Dessus les Cadmaëns, en douleurs, & trauaux
 La mere descendit es Stigiennes eaux
 Et passa de Pluton la trespuissante porte,
 S'estrangent par le col d'une courroye forte
 Vaincue de douleur, ayant au solineau
 Estroitement lié le malheureux cordeau.

A son mary laissa en delaisant la vie
 L'inceste en sa maison, en son cœur la furie,
 Misere, regret, plainte, & deuil continuel
 Dont tousiours fut puny le forfait maternel.

Après ie vy Chloris la princesse amiable
 Qu'espousa Nelëus, Chloris l'incomparable
 En insigne beauté. Nelee fut un iour
 En son cœur ardemment espris de son amour,
 Puis l'ayant fiancee avec un riche gaige
 Pour sa grande beauté la prit en mariage
 Des filles d'Amphion la moins chargée d'ans,
 L'Iaside Amphion, qui regna en son-temps
 En Pyle & Orchomene : eut lignee tresgrande
 Et Chloris luy donna d'enfans une grand bande.

Car Peiclymenus, Chromius & Nestor
 Sortirent de son ventre, elle porta encor
 La celebre Pero, de beauté tant extresme
 Qu'elle fut en miracle à tous les hommes mesme.
 Pero, dont tant de gens deuindrent amoureux
 Qu'estrangers & voisins requirent, desireux
 De l'auoir pour leur femme, en sa beauté bruslerent,
 Et les yeux gratiens de la Nymphe admirerent.
 Mais à nul Nelëus ne la voulut donner
 Qu'à celui qui pourroit raurir & emmener

Le bestail d'Iphiclus, & tirer hors des bornes
Du lieu qui les serroit ses vaches aux grands cornes.
Un seul gentil deuin promet & se fit fort
Qu'il les iroit rair iusques dedans leur fort,
Mais les destins des Dieux, cruels l'en empescherent
Avec les forts liens qui long temps l'attacherent,
Et les pastres aussi ruraux & rigoureux.
Mais aprestant de iours & de mois malheureux
Et beaucoup d'ans passez, l'ame rude & barbare
D'Iphiclus s'adoucit, tandis qu'il luy declare
Les choses à venir. Ainsi auoit esté
Du puissant Iupiter la bonne volonté.
Lors il me sembla bon de voir Leda, la belle
Femme de Tyndarus, qui en enfans excelle:
Elle enfanta Castor le parfaict escuyer
Et pollux l'escrimeur aduantureux & fier:
La terre les contient en vie assidue,
Et sous la terre aussi ils ont vie immortelle.
Ils sont viuans par tour, par tour ils vont mourant;
Et chacun à son tour en vie est demeurant
Et puis meurt à son tour: c'est vne alternatiue
Qu'un viue, l'autre meure, & mourant, l'autre viue;
Pareil honneur pourtant leur est donné des Dieux
Et leur belle vertu vit en terre & aux Cieux.

Après Iphimédie à moyse presentoit
Femme d'Aloëus, elle meracontoit
De l'amour de Neptune, qui l'auoit poursuiuie:
Elle en eut deux enfans & courte fut leur vie.
Le braue Ephialtes & Olus le puissant.
La terre les nourrit, l'un & l'autre croissant
En extreme hauteur, en beauté admirable
Et nul n'estoit à eux en force comparable.

LE XI. LIVRE

Que le fort Orion, qui certes les passoit.
 Ils n'auoient que neuf ans que chacun paroissoit
 Par le milieu du corps gros comme neuf coudées.
 Leurs enormes longueurs ne furent excédées
 De neuf aulnes entiers: Orgueilleux ils haussioient
 Leur teste vers l'Olympe & les Dieux menaçoient
 De guerre & de combat. De faict ils l'entreprirent
 Et l'eminent Ossa dessus l'Olympe mirent,
 Et sur luy Pelion haussèrent outrageux,
 Pelion noir de bois & d'arbres ombrageux.
 Ils en fussent venus about, si d'auantage
 La saison eust meury & renforcé leur aage.
 Mais Apollo, le filz de Iupiter puissant
 Que Latone enfanta au cheuen iannissant
 Les mit tous deux a bas, & de ses dures fleches
 Au trauers de leurs corps fit de mortelles breches
 Ils n'auoient pas atteint leur aage fort encor
 Et leur menton n'estoit frisé de coton d'or.

I'y vy Phædra, Procris, Ariadné la belle
 La fille de Minos, la fortune cruelle
 Le pressoit fort alors, que du bord Cretien
 Theseus la raut, pour au Cecropien
 Par la mer l'enleuer: Et toutesfois Thesee
 Ne iouyt pas long temps de la mal aduisée:
 A cause qu'il estoit trompeur & deceuant.
 Car la seur d'Apollon Artemis, par auant
 En resolution de la rendre facile
 Au bon Denis, l'auoit arrestée en vne Isle.
 I'y vy Mera, Clymene, & Eriphyle encor
 Pour trahir son mary prenant vn collier d'or.

Mais de vous raconter toutes les Heroïdes
 Que ie vy frequenter les bordz Acherontides

Il m'est fort mal-aysé. Plustost seroit passé
L'ombrage de la nuit au crespé noir poissé.
L'heure passe & les feux qui au ciel estincellent
Desjà piroüettans au sommeil nous appellent:
A nos vaisseaux legers ie m'en retourneray,
Ou si le trouuez bon ceans ie dormiray,
Les dieux, & vous aurez le soin de ma retraite.

Il dit, & vn chascun eut la bouche muette
Ravis de grand plaisir: Quand la Reyne leur dit.
Quel honneur, Phæaquois, en cest homme reluit!
Quelle prestance belle, & quel hardy courage,
Quelle taille: Et combien est orné son langage!
Il est mon hoste à moy: mais vn chascun pourtant
Aura part a l'honneur qu'il nous va departant.
Mais ne vous hastez pas si tost de le conduire
Au port, & de le faire entrer dans le nauire,
Et ne luy faiçtes pas vos dons & vos presens
Comme à quelque indigent. Or nous auons ceans
De quoy tres-bien le faire auons en abondance
Et richesses, & biens, par la munificence
Et grand bonté des Dieux. Lors le Phæacien
Echené, de tous eux lors le plus ancien
Dit ainsi, Mes amis, ce que la Reyne sage
Vous a mis en auant par son prudent langage
Est tres-bien digeré: Ie vous pry quant à moy
De luy obtemperer: Sera honneur au Roy
De la suyure en cela. Au Roy sied de conduire
Vn Roy dessus la mer, & l'ayder de nauire.

A donc Alcinoüs. Il sera faiçt ainsi,
Tant que i'auray de vie en ce bas monde icy
Et que i'auray pouuoir sur les gens de Phæace
Qui sçauent bien ramer. Mais nostre hoste, de grace

LE XI. LIVRE

Attende encore un peu, combien qu'il soit pressé,
Et iusques à demain, tant que i'aye amassé
Ce qu'on luy donnera, & quand à son escorte
Mes gens, qu'incessamment i'y pousse & i'y exhorte
En auront prou de soing : moy principalement
Qui ay dessus ce peuple entier commandement.

A qui dit Ulysses. Alcinous Roy digne,
Et des Princes & Roix le roy le plus insigne
Si tu me commandois de faire icy séjour,
Tant que l'an tout entier eust parfourny sentour
Ie t'obtempererois. Que si tu m'accompagnes
De gens & de presens sur les bleues compagnes
Tu en seras tant plus en honneur exalté
Et moy, i'en receuray plus grande utilité,
I'en seray mieux venu, mon retour honorable
En sera beaucoup plus à mon peuple agreable.
Quand ils me reuerront arriuer au pais
Suivy d'hommes, & plein de presens infinis:

Auquel Alcinous. Ta facon, ô Vlysses,
N'est point d'un affronteur, d'un confit en malice,
D'un trompeur, d'un menteur : comme il y en a tant
Sur la terre aujourd'hui, qui vont haut se ventant
Bien qu'ils ne vallent rien, sont pleins de menterie,
Faisans les gens de bien, usans d'affronterie,
Tellement qu'à grand peyne on s'en peut garantir.
Le beau parler qu'on oit de ta bouche sortir
Monstre de ton esprit l'excellence & l'adresse
Tu nous as raconté les Princes de la Grece
Leur histoire & leurs faits, & puis les grands dangers,
Que tu as tant couru dessus les flots legers,
Comme quelque poëte aymé des Aonides.
Or dy nous les heros qu'aux eaux Acherontides

Tu vis pareillement, & ceux de tes amis
Qui combatans à Troye ont succombé, soumis
À la mort violente, & sont deffous la terre,
Ayans acquis renom immortel par la guerre
La nuit est longue assez, l'heure de sommeiller
N'est pas venue encor: puis il faict beau veiller.
Conte nous de la bas les plus rares merueilles:
Ie te rendray du tout ouuertes mes oreilles,
Et pendray desireux de tes granes propos,
Iusqu'à tant que l'Aurore au chariot dispos
Nous ramene le iour: pourueu que tu nous dies
Tes traux, tes labeurs, tes peynes infinies.
Lors le Laërtiade, vn temps est pour parler,
O Roy tresexcellent, & temps pour sommeiller.
Nous auons assez d'heure & de temps, pour estendre
Nos discours, toute nuit. Donc si tu veux entendre
Mes ennuyeux traux, les fortunes aussi
Et les hazards pour moy suportez iusque icy,
Certes ie le veux bien: & les morts deplorables
Que i'ay veu, qu'ont souffert mes amis miserables,
Tant ceux qui deuant Troye ont basti leurs tombeaux,
Que depuis, ceux qui sont submergez sous les eaux:
Et ceux la qui encor' es combats inuincibles
S'estans sauuez des coups & des lances horribles
Sont venus, las, mourir en leur propre maison
Par la mechanceté, l'astuce & trahison
De leur cruelle femme, en la gorge coupee,
Et sont cheus sous l'effort de la trenchante espee
Si tost que Proserpine eut faict haster le pas
Aux femmes, & les eut faictes serrer la bas:
Voicy voler à moy l'ombre toute ensaignee
Du Roy Agamemnon, d'autres accompagnee,

LE XI. LIVRE

Qu'Ægystus autresfois sous le cruel effort
Du destin, auoit mis chez luy mesmes à mort
Il beut du sang, si tost que i'en caché mes armes,
Et puis me recogneut. Adonc fondant en larmes,
Pantelant de soupirs, deuers moy se rendit
Me voulant embrasser, & la main me tendit
Mais, las! il n'auoit plus de vènes ne d'arteres,
Et son corps manque estoit de ses forces premieres.
Lors mon cœur fut saisi de tristesse & d'ennuy,
Voyant son triste estat, & pleurant avec luy.

Excellent fils d'Atreus, ce me pris-ie à luy dire,
Qui sur les hommes eus un si puissant empire,
Quelle triste fortune & quel cruel effort
Ou quel cruel destin t'a mis ainsi à mori?
Neptunet'il point englouty sous les ondes
Renuersé dans les flots de ses vagues profondes?
Ou bien, serois tu point tumbé hostilement
Par le fer des mechans, combatant hardiment
Pour raurir en tes nauys le bestail des campagnes,
Ou par l'espee oster les brebis des montaignes.
Ou bien cetempendant que tu vas assiegeant
Les superbes citez, & leurs murs rauageant
Pour les femmes, est tu tumbé deffous les armes?
A quoy le fils d'Atreus me dit, fondant en larmes.

O fils de Laërtes, race de Iupiter
Qui scais en ton esprit grandes choses traicter,
Ie ne suis point pery sous les eaux de Neptune,
Ie n'ay point par les vents couru ceste fortune,
Ie ne suis point tumbé deffous mes ennemis?
Le perfide Ægystus & ma femme m'ont mis
En l'estat que tu vois: femme faulce & traistresse,
Qui tandis qu'Ægystus ses embusches me dresse,

Et à soupper chez luy doucement m'inuitoit,
Massacre, trahison, & malheur m'apprestoit.
Comme nous soupçons donc les méchans me perserent
D'infinité de coups, & mort me renuerserent,
Sans armes, sans soupçon. Comme qui meneroit
Vn bœuf deuant l'estau, & là l'assommeroit.
Je fus ainsi tué, puis mes gens misérables
Furent tous egorgéz par ces abominables,
De la mesme façon qu'on abbat les pourceaux
Quand quelque riche faict ses festins nuptiaux
Alors qu'il se marie & ses nopces ordonne,
Ou quand à tout plaisir son ame il abandonne.
Tu as veu force gens qui souz les durs efforts
De Mars, en combattant, sont peris & sont morts:
Mais si tu eusses veu ce forfait execrable
Tu en eusses pleuré, tant il fut pitoyable.
Là parmy le festin, les tables, renuerséz,
Et les pots, nous estions l'un sur l'autre entassez:
Le sang qui de nos corps à gros ruisseaux deualle
Humectant remplissoit le pavé de la salle.
Et comme ie rendois les extremes abbois,
De la fille à Priam i'ouy la triste voix
Mourant aupres de moy, de la pauvre Cassandre
De qui les malheureux vindrent le sang espandre.
Ce fut Clytemnestra de toute iniquité
Ouvriere abominable, & d'infidelité
Et de ruse ministre: elle auoit prise en haine
L'amie de Phœbus, l'impudente vilaine.
Les mains ensemblement aux Astres ie haussais
Sur la terre veantré, souz le fer trépassais
Palpitant & tremblant, & la fauce meurtriere
En me fuyant, tourna son regard en arriere.

LE XI. LIVRE

Elle n'eut pas le cœur de me fermer les yeux
 Ne la bouche, en tombant au fleuve Stygieux.
 Voyez comme rien n'est si méchant qu'une femme,
 Qui rumine en son cœur, & machine en son ame
 Toute sorte de mal & de desloyauté,
 Comme a fait ceste-cy, traistresse ayant osté
 La vie à son mary. Je païssois mes attentes
 De reuoir mes enfans, mes gens & mes seruantes.
 Je pensois arriuer en prospere saison,
 Et d'estre bien venu de toute ma maison,
 Mais ceste preude femme a fait vne besongne
 Pleine de deshonneur, de honte & de vergongne.
 Qui plus est, son opprobre & sa méchanceté
 Porteront infamie à perpetuité,
 Non seulement à elle & aux autres infames,
 Mais aux sages encore & aux honnestes femmes.
 Ainsi qu'il acheuoit ie luy dy promptement:
 Helas, que Iupiter continuellement
 Agite de là hault la race des Atrides
 Par les méchanceté, les dols, les homicides
 Des femmes, & combien la colere des Cieux
 Punit ceste maison pour leur train vicieux.
 Car à beaucoup de gens ta belle sœur Helene
 La premiere a porté mort, douleur, perte & peine,
 Et puis Clytemnestra par sa desloyauté
 T'a malheureusement comme tu vois traité.
 I'en dit, & le propos encor il me r'entame.
 Il ne se faut iamais fier en vne femme
 Ayant la vanité: rien qu'infidelité
 Ce sexe ne produit, rien que méchanceté.
 Ne leur sois indulgent ny par trop debonnaire,
 Ne luy fay iamais part de ton secret affaire,

Et si tu veux celer & taire quelque cas

Tu feras sagement de ne luy dire pas.

Quelques choses pourtant sont bonnes revelees,

Les autres veulent estre entierement celes:

Mais tu n'as rien de mal à craindre du costé

De ta femme, Ulysses, car toute honnesteté,

Tout honneur loge en elle, & la fille d'Icare

La sage Penelope, est vne perle rare.

Certe il n'y auoit pas encores fort long temps

Qu'elle estoit mariee, à l'heure que montans

Sur la mer, nous marchions contre Troye la belle,

Et ton fils luy pendoit alors à la mammelle

Petit enfant encor, asteure se seant

Entre les hommes grands. Tres-fortuné enfant

Alors qu'il accourra au deuant de son pere,

Qu'il sera spectateur de son retour prospere,

Et puis l'entretiendra de propos, de deuïs.

Ma miserable femme, hélas, ne m'a permis

De voir le mien monsaoul, mais au premier rencontre

À l'enfant & à moy a donné malencontre.

Or pren ce mien conseil ie te prie, & me croy,

Vien plustost à couuert qu'ouuertement chez toy,

Il n'y a pas tousiours aux femmes grand fiance.

Mais dy moy ie te pry, si tu sçais d'assurance

Comme il va de mon fils, s'il est viuant encor,

S'il est en Orchomene, ou s'il est chez Nestor

Le bien-heureux vieillard à Pyle sablonneuse,

Ou à Lacedemon, à Sparte spatiense

Auec Menelaüs, car encores n'est pas

Le diuin Orestes descendu icy bas.

Il me parloit ainsi, & ie luy dis encore:

Que me demandes-tu, fils d'Atreüs? car i'ignore.

LE XI. LIVRE

De ton fils Orestes la fortune & le sort,
Et ne sçay pour certain s'il est vivant ou mort,
Ie ne t'en puis que dire : & c'est vne grand peine
Que de vouloir parler d'une chose incertaine.

Comme nous deuisions ainsi baignez en pleurs,
Et tristes racontions nos maux & nos douleurs:
Voicy venir à nous l'ombre du preux Pelide
Achilles, de Patrocle, & celui du Nelide
Le bel Antimachus, d'Aiax semblablement
Qui de force & beauté passoit entierement
Tous les Grecs, excepté le vaillant Aeacide.

Alors me recogneut l'ame du Peleide,
O fils de Laërtes, Ulysses, nompareil,
(Me dit-il en pleurant) en prudence & conseil,
Quelle entreprise encor' as tu si hâz ardeuse
Que d'estre venu voir cest terre hideuse?
Qui te meut de venir avec si grand soucy
Reuisiter les lieux de ce royaume icy,
Où tu ne verras rien que miserables ombres,
Qu'images d'hommes morts, que simulacres sombres,
De temeraires morts les mal-heureux esprits?

Après qu'il m'eut parlé, à dire ie me pris,
O fils de Peleüs, Achilles, en proüesse
De bien loing surpassant tous les Princes de Grece,
Ie suis venu icy afin de consulter
Le deuin Tiresie, & de luy m'enquester
Du moyen que i' auray de reuoir ma patrie:
Car ie ne suis encor passé en Achaïe,
Ie n'ay point encor veu ma maison: le malheur
M'a tousiours poursuiuy ie n'ay eu que douleur.
Mais toy, tu es heureux Achilles, homme au monde,
Soit mort ou soit vivant, en fortune n'abonde

Plus contente que toy : car devant ton trépas
Nous te portions honneur, nous faisons de toy cas
Entre nous autres Grecs. Et or' apres ta cendre
Sur les ames des morts tu viens ton regne estendre.

Ainsi tu n'as sujet de te deconforter,
Quelque mort que tu sois, ny de te contrister,
Car tu obtiens par tout où tu es quelque empire.

A ces mots Achilles se prit ainsi à dire:
Tres-fameux Vlysses ne me ramentoy pas,
Je te supply, la mort ny les lieux d'icy bas:
J'aimerois cent fois mieux estre homme de village,
Et servir par les champs avec vn peu de gage
Quelque homme, tant fust-il & pauvre & indigent,
Que commander icy dessus toute la gent
Des ames des enfers. Mais dy moy quelque chose
De mon fils, si tousiours de suivre il se propose
Le mestier de la guerre, ou non: & de Pelé,
Mon pere genereux, t'en a ton point parlé?
Luy fait-on de l'honneur encor' en Thessalie
Entre les Mirmidons en ma ville de Phtie?
Ou, le méprise ton à cause de ses ans,
Qu'il a foibles les mains, les pieds gourds & pesans,
Car ie n'ay du Soleil la belle iouyssance,
Et ie ne suis plus tel pour en faire vengeance,
Que i'estois devant Troye, alors que renuersant
Les bataillons entiers, i'allois tout fracassant
Combattant pour les Grecs. O si i'estois asteure
Semblable, voire moins & vif, en la demeure
De ce pauvre vieillard, ie leur montrerois bien
La force & la roideur de mes bras, & combien
J'aurois encor' assez de cœur & de puissance
De les mettre à raison, & de venger l'offence

LE XI. LIVRE

De ceux qui luy font tort, ont sur luy entrepris,
Dédaignent sa vieillesse, & l'ont à tel mepris.

Pour ton pere, luy dy-ie, ô plein de force extreme;
I'en en ay rien ouy. Quant à Neoptoleme
Iete conteray tout puis qu'ainsi tu le veux;
Car ie l'allay querir sur les flots orageux
Jusqu'au bord Syrien, l'amenay en l'armee
Où combattoit des Grecs la ieunesse animee.
Toutes & quantes fois qu'on entroit au conseil
Deuant les murs de Troye, il estoit nompareil
En discours, en propos, nul n'auoit la puissance
De parler deuant luy en grace & eloquence,
Sans plus moy & Nestor le sage Prince vieux
Contendions avec luy à qui parleroit mieux.
Mais puis, quand on venoit à courir aux alarmes
Qu'il falloit manier & les mains & les armes,
Auecques le commun point il ne cropissoit,
Mais tousiours le premier sur tous il paroissoit
Et en force & en taille, il n'arrestoit en place,
De tous costez monstrois son cœur & son audace;
Ne cedit à personne, ains tousiours assaillant
L'ennemy, tuoit tout, tout alloit de taillant.
Certes ie ne scaurois te conter sa vaillance,
Nommer combien de gens tua sa forte lance,
En deffendant les Grecs: mais quand il mit à mort
Le fils de Telephus Eurypile le fort,
Ses gens autour de luy en nombre s'allierent
Mais souz sa forte main roides morts ils tomberent;
Cethyens qui des Grecs se firent ennemis
A la faueur des dons de femme à eux promis.
I'en en vy iamais vn si beau, si hault encore,
Hors-mis le seul Memnon le beau fils de l'Aurore:

Puis quand on fut entré dans le cheual de bois
Qu'auoit faict Epeus, (la charge i'en auois,
Le tout m'estoit commis, soit de fermer l'entree,
Soit de faire sortir l'embusche & la ventree)
Les plus braves trembloient de frayeur paslissans,
En cachette essuyoient les pleurs sur eux glissans,
Mais ie ne vy iamais ton fils changer de face,
Ne pleurer, ne trembler : me pria plein d'audace
De le laisser descendre en haste du cheual,
De sortir de l'embusche, & de sauter à val.
Il branloit son espee & son horrible lance
Au luisant bout d'airain, portant mort & vengeance
Aux malheureux Troyens, & leur dernier trépas.

Après, ayant ietté les murs de Troye à bas,
Et que toute Phrygie en flamme consumée
Fit ondoyer en l'air sa funebre fumée.
Il monta sur la mer de dé pouilles chargé,
Sans auoir de blesseure esté endommagé :
Comme il aduient souvent, lors que Maors terrible
Esmeut les bataillons, & de démarche horrible
Se meslant au trauers les coutelas trenchans,
Et de sang & de pleurs il détrempe les champs.

Comme i'eus acheué, d'une brane démarche
Et d'un pas orgueilleux le Heros se démarche :
Santelant il alloit par les prez florissans,
Et par les champs herbus tels qu'ils sont verdissans,
Contant d'auoir ouy raconter de l'adresse
De son fils, & parler de sa grande prouesse.

D'autres esprits de morts, noirs de deuil & blafards
Me contoient leurs douleurs autour de moy épars :
La seule ame d'Aiæx s'éloignoit indignée
Pour ma victoire acquise, & contre luy gaignée,

LE XI. LIVRE

Des armes d'Achilles, suyuant le iugement
Donné pres des vaisseaux à mon contentement.
Ainsi le proposa sa venerable mere,
Et les fils des Troyens, & Pallas droituriere
Donnerent la sentence, & chacun decretoit
Que la vertu d'Ulysse un tel prix meritoit.
Que n'eussay-ie iamais obtenu ceste gloire
A ceste occasion, & pour ceste victoire.

Ce brane chef de guerre Aiax, las, en est mort;
La terre l'a couuert, qui estoit le plus fort
Et le plus beau des Grecs, fors l'irreprehensible
Achilles, beau de corps & de force inuincible.

Je luy voulu parler, l'appellant par son nom
Fort amiablement. Fils du bon Telamon,
Luy dy-ie, ô grand Aiax, hé, ne se peut-il faire
Que tu puisses un peu moderer ta colere,
Rabattre du courroux qui te mine si fort,
Et te faict me haïr mesmes apres ta mort?
Pour les armes d'Achille? armes trop odieuses,
Et qui furent par trop aux Grecs pernicieuses,
Par le vouloir des Dieux: Toy leur mür, leur rāpart.
Or nous n'auons pas moins déploré ton depart
Que celui d'Achilles, nul des Grecs, à vray dire,
N'est cause de ta mort: c'est la haine, c'est l'ire
De Iupiter sur nous, qui ietta sur ton chef
Le ruineux accez de ce triste méchef.
Ne laisse pas pourtant, ô des Rois la merueille,
De t'en venir icy & me prester l'oreille,
Surmonte ie te pry, le dépit de ton cœur,
Et te ren genereux sur ton ire vaincœur.

Il ne me respondit vne seule parole,
Mais au trauers d'Erebe indigné il s'en volle

Vers les autres esprits, ie n'eusse pas laissé
De parler avec luy, combien que courroussé,
Mais i'en trop grand desir de voir les autres ombres.

I'aduisay là Minos iuge des cachots sombres
Le fils de Iupiter : sur son siege il estoit,
Vn puissant sceptre d'or en sa main il portoit,
Donnoit son iugement, prononçoit sa sentence
Sur les ames des morts, & deuant sa presence
D'autres ames plaidoient, & là dans la maison
De Pluton Roy de Styx il leur faisoit raison.

Ie vy là Orion courant par les prairies,
Et foulant les guerets des campagnes flories,
Les bestes pourchassant qu'il auoit autrefois
Renuersé de son dard par les champs, par les bois.
Il promenoit tousiours sa luisante massue
Encore toute entiere, & nullement rompue.

Ie vy Titye aussi le grand & fier geant
Qui fut fils de la terre. Il estoit là gisant
Estendu sur le sable, & son horrible place
De neuf arpens entiers parfournissoit l'espace.
Son foye est bequeté sans cesse de vautours,
Qui font impunement sur son corps mille tours
Avec leur bec crochu : le pauvre ne s'efforce
De les chasser des mains. Il prit Latone à force
L'amie à Iupiter, qui fut par luy trompée
S'en allant à Pytho le long de Panopæe.

Là Tantalus estoit, son cœur cruellement
Sans cesse estoit pressé d'un horrible tourment.
Il estoit au milieu d'une source profonde,
Sa barbe surnageoit dessus le frais de l'onde,
Et si mouroit de soif : car si tost qu'il pensoit
Ses leures y moniller, l'eau fuyant se baissoit.

LE XI. LIVRE

Et ne vouloit l'attendre. Autant de fois qu'il cuide
S'enclinant attrapper la fontaine liquide,
Autant de fois souz luy la fontaine s'enfuit,
Et trompant l'alteré viste s'esuanouyt:
En terre souz ses pieds la source s'est cachée,
Car le triste demon son onde auoit sechée.
Les arbres d'autre-part leurs fruits luy presentoient,
De pommes leurs rameaux tous chargez éclatoient,
Poires, figues, pains, pendoient sur le pauvre homme.
Dés qu'il haussait sa main pour prendre quelque pome
Viste elle s'enfuyoit, & dessus luy le vent
Dans les nues de l'air la pomme alloit leuant,
Et regardant sa main il l'apperceuoit vuide.

Le vy pareillement Sisyphe l'Æolide
Tourmenté grandement, souffrant maux inhumains,
Et tournant sans repos un rocher en ses mains.
Souuent s'appuyant contre, & de toute sa force
Poussant de pieds, de mains, le monter il s'efforce:
Et de faict il le monte, & haletant le met
Contre le bord penchant de l'escarpé sommet:
Mais pensant auoir faict, la roche espouventable
Se coulant de ses mains eschappe au miserable,
Roule tant qu'elle peut, tombe en terre là bas,
Et faict en rouelant un horrible fracas.
La force luy defaut, toutesfois il retourne,
Rempogne son rocher & contre mont le tourne:
Alors une sueur par tout luy distillant
Ainsi qu'à gros ruisseaux sur son corps va coulant.
Le poussier esleué sur la terre s'entasse,
Et se baissant de force en terre il met sa face.

I'aduisey par apres le simulacre vain
Et l'idole leger d'Alcide le diuin:

Car il est quant à luy sur le Ciel, à la table
Des grands Dieux immortels en festin delectable,
Avec sa femme Hebé, & belle & ieune encor,
La fille de Iunon aux talonnières d'or,
Et du grand Iupiter. Une importune bande
D'ames, ainsi qu'oyseaux faisoient rumeur bien grāde,
Et pres de luy voloient, & l'idole poisseux
Son vain arc en la main & la flèche dessus,
Guignoit sur les esprits d'un regard effroyable,
A un qui veut tirer entierement semblable.
Dessus son estomac apparoissoit encor
Son horrible baudrier: la chaisne en estoit d'or,
Dessus estoient grauez de merueilleux ouurages,
Et d'ours & de lions & de sangliers sauvages,
Ses exploits, ses combats, les trespass & les morts
Qu'il donna en sa vie aux monstres les plus forts
Que celuy qui l'a fait n'en face onc de semblable
Y ayant employé son art inimitable.

Alcides parmy l'air tenebreux m'apercent,
Et m'ayant aduisé fort bien me reconnut,
Si me dit sousspirant l'Amphitrioniade:
Race de Iupiter, ô grand Laërtiade
Sage, prudent & fin, tu es bien malheureux
Si tu as le destin cruel & rigoureux
Ainsi que ie l'auois, lors que i'estois en vie,
Et voyois du soleil la splendeur infinie.
Car combien que ie fusse enfant de Iupiter
Ie ne laissay pourtant de tousiours supporter
Infinité de mal reduit souz la puissance
D'un homme inferieur de race & de vaillance,
Qui m'alloit exposant à cent mille hazards:
Il m'enuoya un iour en ces regnes blaffars

LE XI. LIVRE DE L'ODYSSEE.

Pour en raver le chien, ne pensant pas possible
Chose au mode pour moy plus grieve & plus horrible.
Je l'enlevay pourtant, les mis hors des enfers,
Mercure m'assistant & Minerve aux yeux pers.

Quand il eut ainsi dit, il retourna descendre
En bas devers Pluton, & ie voulus attendre
Si quelqu'un viendroit point de ces hommes hardis
Ces Heros anciens qui moururent iadis.

Et possible quelque ame en eussay-ie aduisee
De ceux que ie voulois, ou celle de Thesee
Ou de Pirithoüs, qui sont des Dieux venus.

Mais voicy arriuer de mille esprits menus
Images des deffuncts une innombrable bande
Faisants un tresgrand bruit. Lors une frayeur grande
Me saisit tout le cœur, ne sçachant que douter

Si Proserpine en fin ne feroit point monter
Des enfers devers moy, la criniere felonne
Et l'effroyable chef de l'horrible Gorgonne.

Qui fit que tout soudain ie retourne au vaisseau,
Et commande à mes gens de remonter sur l'eau
Et prendre nostre route. Eux soudain m'obeissent,
Se seent sur les bancs & les rames saisissent,
Le flot sur l'Ocean va la barque enlevant.
En premier par la rame, & puis par le bon vent.

Fin de l'unziesme Liure.



LE DOVZIESME LIVRE DE L'ODYSSEE D'HOMERE.

ARGUMENT.

Lysſes eſtant de retour des enfers, retourne vers Cir-
cé, enterre Elpenor, ſe remet ſur mer, paſſe les Sire-
nes, & par quel moyen: ſe ſauue des rochers errans,
de Silla & de Charybdis. Arriue en Trinacrie, où ſes gens
mangent les bœufs du Soleil. Son nauire & tous ſes gens
ſont ſubmergez. Il ſe ſauue ſeul à nage en l'ifle de Calypſo.

AUTRE SOMMAIRE.

*Les Sirenes, leur chant, le vagabond eſcueil,
Charybdis & Scylla, puis les bœufs du Soleil.*

Ommenotre nauire eut delaiſſé les ondes
Du cours de l'Ocean, & ſes rines profon-
des,
Dedans la large mer nous entraſmes tirez,
Tant que nous paruinſſions dans les ports deſirez
De l'ifle de l'Æee, où font leur demeurence,
Et l'aube matiniere & les jeux & la danſe,
Et le liēt du Soleil. Arrinez ſur le port
Nous lions notre barque, & approchons du bord,
Nous ſortons à la rine, & deſſus l'herbe tendre
Chacun pour repoſer va ſes membres eſtendre,

LE XII. LIVRE

Attendant & l'Aurore & son diuin retour.

Or apres que l'Aurore eust ramen  le iour
Avec ses doigts rosins paroissant matinier,
Et eust de ses cheuaux commenc  la carriere,
Soudain mes gens i' enuoye au palais de Circ 
Pour apporter le corps d'Elpenor renuers 
Du haut de la maison, puis coupants en grand nombre
Arbres feuillards rameaux sur le riuage sombre,
Après auoir sur luy pleur  suffisamment,
Il est enseuely fort honorablement.

Le corps estant br l  aux flammes allumees,
Et ses armes ensemble avec luy consumees,
Son tombeau fut hauss  de terre   l'environ
Et fut sur le sommet pos  son auiron.

Tandis nostre retour   Circ  ne se celle,
Laquelle tout soudain, mainte Nymphe apres elle,
Vistement accourant, nous venoit fournissant
De viures, & de pain, & de vin rougissant:
A donc nous regardans atterrez de tristesses
Ainsi parler nous vint la Deesse aux Deesses.
Pauvres gens, qui auez deux fois la mort souffert,
Viuanes estes entrez dedans l'abisme ouuert
Du redoubt  Pluton, combien que tout le monde
Ne voye qu'une fois l'Erebe & sa noire onde,
Et ne meure qu'un coup. Or vous resionissez
Et tout le long du iour vos forces redressez,
En mangeant & beuuant & faisant bonne chere.
Demain d s que Titan ouurira sa carriere
En mer de meilleur c ur vous vous reietterez,
Et sur le point du iour les eaux rent amerez.
Je vous enseigneray le chemin qu'il fault prendre,
Vos routes, vostre cours ie vous feray entendre,

De peur que d'auanture estans mal conseillé
Soit que soyez en terre ou en mer trauallez,
Si le mal la douleur vous presse & vous rencontre,
Tristes vous ne tombiez en quelque malencontre.

Elle acheue de dire, & lors nous commençons
A reprendre un peu cœur & nous resiouyssons
Tout le iour à la table, & de soucis deliures
Assis, nous remplissons & de vins & de viures.

Mais dès que le soir vint & Titan se cacha,
Alors sur le tillac un chacun se coucha,
Et le sommeil les prit & la sage Deesse
Me prenant par la main, me tira de la presse,
Et me faisant assoir pres d'elle, me requit
De ce que i'auois veu, de tout de moy s'enquit,
Et ie la satisfis. Ce fait la Nymphé insigne
Me parla doucement de sa bouche benigne.

Tout ce que tu m'as dit est fort bien accompli
Il n'y a que redire. Or ne mets en oubly
Ce que ie te diray pour les choses futures
Comme si les Dieux mesme ouuroient tes aduantes
Et te les declaroient, retien le fermement
Et l'observe soigneux. Donc tout premierement
Il te faudra, rasant les escumes les plaines
Aprocher de bien pres les rochers des Sirenes,
Enforçant le monde en leurs doucereux chants,
Ceux qui par imprudence en vont trop aprochans,
Et de leur voix tant douce & miellée à merueilles
Le doux air tant soit peu goustent de leurs oreilles:
Non, il ne leur chant pas de femmes ny d'enfans,
Le pays, les amis ne les vont eschauffans
Pour retourner les voir, tant les fieres Sirenes
Les vont enforçant de leurs douces alenes,

LE XII. LIVRE

Esparses par les prez. Là est vn grand monceau
 D'os des hommes pourris, leur charongne, leur peau
 Qui pitoyablement à l'entour se pourrissent
 Les rinages, les prez, & l'air empuantissent,
 Par ainsi tout soudain que tu approcheras,
 Les oreilles de cire à tes gens boucheras,
 Si que bien estouppéz ils ne puissent entendre
 Les Nymphes, & leurs sons de les oreilles prendre.
 Si toutesfois tu as desir de les ouyr
 Et du sucre attrayant de leurs chansons iouyr.
 Fay toy lier au mast d'une corde bien forte
 Et les pieds & les mains. Passant en ceste sorte
 Tu les pourras ouyr: que si tu les priois
 De deslier la corde enchanté par leur voix,
 Et voulusses aller avec impatience
 Les Sirenes trouver. Ayes en souuenance
 De bien dire à tes gens, que tu sois plus pressé
 Plus tu voudras aller. Quand vous aurez passé
 Toy & tes compagnons ces femmes mal-heureuses,
 Les routes puis apres des ondes dangereuses
 Qu'il te faudra tenir, ie ne puis bonnement
 Te dire celles là que plus commodement
 Tu pourras enfoncer, mais c'est à ta prudence
 De les considerer. Aye donc souuenance
 De ce que ie te dy. Deux rochers sont en mer
 Les Dieux communement les ont voulu nommer
 Errans & vagabonds: A l'entour d'eux resonnent
 Les vagues de la mer, & fierement bourdonnent.
 Les oyseaux parmy l'air volans legerement,
 Ny les pigeons craintifs qui portent mesmement
 Au Ciel à Iupiter la celeste Ambrosie
 Ne les peuent passer, ains y laissent la vie,

Aumoins pour la plus part. Car tousiours au passer
Le rocher en atrape, & pour les remplacer
Le bon pere toujours d'autres y en renuoye
Iamais on ne vit nef passant par ceste voye.
Eschapper ce passage: Ains le feu & les eaux
La tempeste & le flot despesent à morceaux
Barques & mariniers autresfois Argo seule
De force gens conduite eschappa de leur gueule
Vogant deuers Aeta, & possible qu'aussi
Eslancee au trauers du rocher endurcy
Elle eust eschoué là, sans que Iuno la sage
Accourant la tira de ce mauuais passage,
Car elle aymoît Iason le hardy combatant.

Or deux rocs sont apres, l'un desquelz se montant
Iusques dedans le Ciel cache dedans la nue
Le sommet esleué de sa cyme pointue,
Qui iamais ne reculle, & dessus son sommet
Iamais le ciel serain sa lumiere ne met
Soit esté soit automne: onc nul n'osa se prendre
D'y monter quel qu'il fust, onc nul n'en peut descendre,
Quand il auroit vingt pieds & vingt mains: car le tour
Du rocher est tout lis, & taillé à l'entour.
Le meilieu du roc est vn trou plein de tenebre
Au couchant, & tourné vers l'erebe funebre:
Par là vostre vaisseau sa route dressera,
O gentil Vlysses, & n'en aprochera
Nul tant ieune soit il de ceux de ton nauire
De quelque grand roideur que sa sajette il tire.
C'est le trou de Scylla, d'où son horrible voix
Degorge le hideux de ses tristes abbois:
D'où ses mugissemens elle iette, semblables
Aux fiers rugissemens des lions effroyables,

LE XII. LIVRE.

Horrible monstre & fier, qui regardé l'aura
 Tant il est plein d'horreur, ne se resjouira
 Quand un Dieu mesmement luy viendrait à l'encontre
 Douze gryphes dehors l'horrible beste monstre,
 Elle a six grands gosiers, six long cos euidens,
 Sur chacun vne teste avec trois rancz de dents
 Ne menacans que mort, dans le trou elle plonge
 La moitié de son corps, & dehors elle allonge
 Ses testes fierement. D'où elle va mangeant
 Les chiens & les Dauphins qu'elle voit surnageant
 Autour d'elle sur l'eau, mesmes les grands balenes
 Qu'Amphitrite nourrit sur ses bruyantes plenes.
 Tant hardy marinier qui onc sur mer hanta
 D'estre eschappé de là iamaïs ne se vanta,
 Car iusques dans la nef son gosier elle porte
 Et en les attrappant la teste leur emporte.
 Non gueres loin delà se voit l'autre rocher
 Que tu pourrois Vlysse, avec ton dard toucher
 Quand tu le darderois: il n'est de hanteur telle,
 Mais pourtant son aproche est facheuse & cruelle,
 Vn grand figuier sauvage au feuillard verdissant
 Se nourrit à l'entour, sous qui angloutissant
 Les noircissantes eaux l'effroyable Charibde
 Trois fois sans y faillir le iour elle les vuyde
 Et trois fois les reprend: retien tes matelots.
 N'aproche point alors qu'elle aualle ses flots:
 Le Dieu mesme Neptun n'auroit pas la puissance
 De te tirer delà: que ton vaisseau s'eslance
 Vistement vers Scylla: il t'est meilleur beaucoup
 De perdre six des tiens, que perdre tout à coup
 Enueloppé dedans Charybde la cruelle.
 Lors ie luy respondy; ô deesse immortelle.

Dy moy, pourrois ie point d'un combat hazardeux
Ayant fuy Charybde & son rocher hydeux
Avoir raison de l'autre au moins, & de l'offence
Faitte à mes compagnons tirer quelque vengeance.

A quoy elle me dit. Pauvre homme que dis-tu?
Et tu tousiours apresta force & ta vertu?
Astu tousiours à cœur la guerre & la vaillance?
Ne veux tu point ceder aux Dieux, dont la puissance
Domte & surmonte tout? Car Scylla, Vlysses,
N'est point tuable à toy : mal de mortel accez,
Inexpugnable, fier, cruel, plein de furie:
Vertu ne force n'est au monde qui la fuye,
Et crains fort que l'allant en armes recercher
Affin de la combatre au trou de son rocher,
Elle ne retournaist sur toy impetueuse,
Et que de chasque teste horrible & monstrueuse
Elle ne se iettast sur autant de tes gens.
Fuyes donc ce danger & voguez diligens:
Inuoque Crataïs mere de la cruelle,
Qui sur la terre mit ceste peste mortelle,
Affin qu'elle l'appaise, & quede ces rochers
Elle ne sorte plus sur toy & tes nochers:
Ren la, en la priant & propice & facile.

Venu en Trinacrie, & mouillant en ceste isle,
Tu verras du Soleil les vaches & les beufs
Et les brebis errer dessus les prez herbues.
Les beufs en sept troupeaux paissent par les passages,
Et de brebis autant tondent l'herbe aux champages,
Chacun est de cinquante, or ils n'engendrent point
Et ne meurent iamais, sont tousiours en un point
Lampetie & sa seur Phaetuse la blonde (monde
Nymphes aux beaux cheueux, qu'à l'éclaireur du

LE XII. LIVRE

*N*eera la diuine autresfois a porté,
*G*ardēt ces beaux troupeaux. Quand elle eut enfanté
*L*a mere les voyant l'une & l'autre nourrie
*L*es enuoya depuis au long en Trinacrie
*A*ffin d'y habiter, & sur ces vers tapis
*D*e leur pere garder les vaches & brebis.
*S*i vous vous empeschez & retenez de metre
*L*es mains sur ces troupeaux, ie vous ose prometre
*T*out assure retour (bien que diuers ennuis
*V*ous ayent attaquez) en vostre doux pais
*M*ais si tu ne me crois & que tu ne tegardes
*Q*ue mal ne leur soit fait, & de tant te hazardes
*D*e te ruer dessus, ta troupe souffrira
*U*ne cruelle mort, & ta nef perira,
*E*t n'eschapperas point que plustost tu ne voye
*T*ous les tiens submergez, & des poissons la proye,
*E*t ta flotte brisee : apres tout ce hazard
*S*i tu reuiens chestoy, croy que sera bien tard.
*E*lle me dit ainsi, & l'aurore doree
*H*ors des eaux cependant sa carrosse a tiree.
*L*a diuine deesse adonques me laissa
*E*t deuers son palais ses pas elle dressa.
*I*e m'en vois, & ie tiens ma troupe toute preste
*E*t de monter en mer soigneux ie l'admoneste.
*I*ls entrent dans la nef, & tous selon leurs rans
*L*es auirons en main s'asseent sur les bans
*I*ls frappent les sillons des ondes blanchissantes
*L*es eaux vont resonans sous les rames glissantes:
*D*erriere nous auions les fauorables vents
*Q*ui nos voiles enfloient nostre vaisseau suiuan
*F*idelles compagnons, que Circe la deesse
*A*ux beaux cheueux dorez, la sage enchanteresse

Nous auoit enuoyez, lors nous ne ramions pas
Ains à nostre ayse assis mismes les armes bas
Veantrez par le vaisseau: la nef à l'aise flotte
Ayant pour gouuerneurs le vents & le pillote
Lors ie vins à leur dire en mon cœur angoissé.

Amis ce que m'a dit la diuine Circe
Il le vous faut scauoir. Il n'est guerre agreable,
Mais que seul ie le scache il n'est pas conuenable,
Ny deux semblablement. Donc ie le vous diray,
Et tout sans en mentir vous représenteray,
A fin que nous soyons resolu en nos ames
Si nous deuons mourir & lasches & infames,
Ou fuyant le danger qui nous menace fort
Faire nostre deuoir d'eschapper de la mort:
Il nous faut euitier les roches inhumaines
Les champs & les atrais des trompeuses Syrenes,
D'escouter leurs chansons à moy seul est permis:
Partant ie vous supplie mes fideles amis
Que de liens tresforts on me lie & m'atache
Au mast bien garroté, & quoy que ie me fasche
Et prie que lon vienne vn peu me desserrer,
Lors plus estroitement il me faudra serrer.

Ie leur parlois encor, alors qu'à voiles plenes
Nostre barque aprocha de l'isle des Sirenes:
Le vent chut sur les eaux, la mer plus n'escuma
Et ne scay quel Dæmon les flotz entiers calma.
Nous abbatons le voile & reprenons la rame,
L'onde dessus nos bras se balaye & s'entame.
Lors ie coupe vn morceau de cire, & le pressant
Souuent entre mes doigt s ie vay l'amolissant
Aux raions du Soleil que son flamboyant coche
Se pourmenant au Ciel chaleureux nous decoche

LE XII. LIVRE

Puis ie vois estoupper l'oreille de mes gens,
Qui courent aussi tost dessus moy, diligens
M'attachēt pieds & mains, de forts cordeaux me lient;
Et tres-bien garroté contre le mast m'appuye.

Cela fait, de tirer à force & de ramer
Et sous les aïrons faire l'onde escumer,
Comme nostre vaisseau de la fatale roche
Des bords sireniens, se trouuaſt aussi proche
Comme il faudroit d'eſpace entre cil qui criroit
Asſez haut, & celui lequel l'eſconteroit:
Voicy nager vers nous les sirenes riantes
Qui de nostre arriuer n'eſtoient pas ignorantes
Et contre le vaisseau commençans les doux ſons
Elles iettoient vers nous le miel de leurs chansons.

Aproche, Vlyſſe, aproche, ô l'honneur magnifique
De Grece, arreſte vn peu, gouſte nostre muſique,
Perſonne iuſqu'icy ces flotz n'a trajetté
Qui n'ayt premierement nos doux chants eſcouté:
Qui n'ayt mis pié à terre en ce plaiſant riuage
Et ne s'en ſoit rendu plus ioyeux & plus ſage.
Nous ſcauons, nous ſcauons tout ce qui s'eſt paſſé,
Et les triſtes deſſeins qui ſous eux ont preſſé
Autant Grecs que Troyens ſous l'eſſort de la guerre;
Rien ne nous eſt caché ſur le rond de la terre.

Elles me font ainſi de leurs doux airs iouir,
Et mon ame treſſant de les aller ouir.
Je faiſois de mes yeux ſigne à ceux de ma trouppé
Que toſt on me delie & que la corde on coupe:
Eux de tirer touſiours, Euryloch ſe leuant
Auec Perymedes ſerrent plus que deuant
Et mes pieds & mes mains de leurs cordes noueuſes:
Quand nous euſmes paſſé les Sirenes charmeuſes

Et que leur douce voix ne me vint plus frapper,
Mes gens se viennent lors l'oreille destouper,
Et puis me destacher. Nos barques vagabondes
Laisserent ceste plage, & voloient sur les ondes,
Quand nous voyons de loing un grād brouillas fumeux
Pirouetter en l'air sur le flot escumeux,
Les vagues sur la mer se hausser furieuses,
Sonner, bruire, & fremir les eaux impetueuses,
Et les rocs se choquer. Lors l'aïron tremblant
Nous tombe hors des mains, & le flot se troublant
Fremit horriblement à l'entour du nauire,
Qui s'arreste tout court: personne plus ne tire,
Personne n'a plus cœur d'evertuer ses mains,
Ils courent ca dela, & de propos humains,

Amis, ce leur disois ie, he! sommes nous encore
Aprentifs aux dangers? Quand ie me rememore
L'effroyable Cyclops en son antre sanglante,
Non, ce danger icy n'est point si violent.
Mon conseil toutesfois, ma vertu, ma prudence
Nous en a reschappez, la fresche souvenance
Vous entient, & tiendra tant que sereꝫ viuans
Sus donc, renforceꝫ vous, & vos bras esleuans
Frappez ces flots, enfleꝫ domtez ces eaux rebelles,
Ces bouillons enragez & ces vagues cruelles:
Si Iupiter peut estre & son puissant destin
Nous donne d'eniter cest orage mutin,
Ceste peste de mer. Toy pilote regarde
Ne donne point dedans ceste fumeꝫ, & garde
Le choc de ce rocher, que nous n'embarassions,
Trop auant la dedans, & le bac ne froissions
Tutiens le gouuernail, & c'est toy qui nous guides.
Et mes gens de hacher soudain les flotz humides

LE XI. LIVRE

Or ie n'auois parlé nullement à mes gens
 De Scylla, ne des cris de ses chiens abboyans
 De peur qu'intimidez les rames ne iettassent
 Et dessous le tillac cachez ne se mussassent
 Et i'auois oublié aussi ce que me dit
 La titanide, alors qu'elle me deffendit
 De m'armer, car soudain de passion bouillante
 I'endosse ma cuirasse, & armé me presente
 Dessus le chastellet, branlant dessus les flots
 Une couple en ma main d'acerez ianelotz:
 Ie regarde, pour voir le formidable monstre
 Que ie crains pour mes gens, si tant est qu'il se monstre:
 Ie ne voy rien, mes yeux s'esblouissent lassez
 De regarder l'espais de ces brouillas poissees.
 Ià nous recognoissons l'emboucheure effroyable
 Du dangereux destroit, & un pleur miserable
 Decouloit de nos yeux, deca estoit Scylla
 Au gosier abbayant, & Charybdis delà
 Horrible engloutissant les tempestes salees.
 Mais quand elle iettoit les ondes auallees
 Semblables au bouillon d'un ample chaudiere
 Alors qu'un grand braisier s'eschauffe à l'enuiron
 Elle mugissoit toute, & l'escume ietee
 Jusqu'au haut des rochers rouloit precipitee,
 Mais quand elle absorboit les orages grondans
 Elle estoit grandement tempestee au dedans:
 Les rochers à l'entour horriblement fremissent
 Et du bruit bourdonnant les antres en gemissent:
 La vase & le sablon paroissent au dessous
 Vne peur nous saisit, & nos yeux à tous coups
 Regardent ceste horreur. La cruelle presence
 De la mort se monstrois sans aucune esperance.

Cependant

Cependant que mes gens en tressailloient si fort
Et n'attendoient plus rien que le pas de la mort
La hideuse Scylla sous les ondes courantes
Nous en enleva six de ces mains violentes
Des plus hardis de tous, ieunes gens au hazards
Des plus aventureux, & plus braves soldards:
Ainsi que ie soignois à la mer, au navire,
Et à mes compagnons, ie la voy qui les tire
Par les pieds par les mains, sous les eaux esclancez,
Et les pauvrets le nom appelloient d'Ulysses:
Une crainte qui faist que tout le cœur tremblotte
Saisit ia fremissant toute la pauvre flotte:
Ainsi que le pescheur pour prendre le poisson
Cache dedans un ver son trompeur hameçon,
Puis du haut d'un costau, quant il tire sa ligne
Lette dessus le pré le poisson qui trepigne,
Ainsi Scylla, mes gens fremissans m'enlevoit
Les rompoit en ses dents des qu'elle les avoit:
A la gueule du trou les pauvres miserables
Entre leurs piteux cris & clameurs effroyables
Tendoient les mains en haut. Or i'ay veu de ces yeux
Tout ce que scauroit voir de triste, d'enuyeux
De misere & de mal, quiconque dessus l'onde
A couru quelqueffois la misere du monde,
Ie l'ay veu di-je aupres de ces cauernes là.

Quand nous eusmes fuy Charybdis & Scylla
Et leurs affreux rochers, à force nous cinglasmes
Et pres d'une belle isle en rien nous arrivasmes.
C'estoit l'isle où estoit le bestail pasturant
Et les sacrez troupeaux du Soleil éclairant,
Vaches au large front, aux cornes repliees,
Et les grasses brebis aux toisons deliees.

LE XII. LIVRE

Certes comme i'estois encores sur la mer
 Dans mon vaisseau noircy, i'ouy de loing bramer
 Cestroupeaux par les champs, les vaches mugissantes,
 Les bestantes brebis par les plaines paissantes
 Je ne l'eu pas ouy, qu'il ne me ressouuint
 Du deuin Tiresie, en memoire me vint
 Ce que Circé voulut par tant de fois m'enioindre,
 Que nous euitassions, que ne vinsions à ioindre
 Sur tout l'isle au soleil, la terre esiouissant.

Alors ce souuenir mon ame saisissant
 Je parlay à mes gens, tremblant tout en moy mesme.

Bien qu'ayons eschappé vn danger tres-extreme,
 Toutesfois croyez moy. L'Aeëenne Circé
 Et l'augure Thebain tous deux m'ont annoncé
 De fuir & abhorrer la campagne & la terre
 Consacree à Titan qui ces rayons deserre
 Sur les champs sillonneux, & les pauvres mortels
 Illustre des rayons de ses feux immortels:

Car là nous attendoit vn malheur execrable.
 Fuyons donc ie vous pry, ce terroir effroyable,
 Serrez le manche en main, & le vaisseau poussez.

Soudain le froid saisit tous les membres glacez.
 De mes gens, perdans cœur: & plein d'un conseil pire
 Eurylochus se prit en ces mots à me dire.

O par trop mal heureux aux labeurs, aux trauaux
 Vlysses, ton courage est endurcy aux maux,
 Iamais sous nul hazard quel qu'il soit tu ne tombes,
 Iamais sous nul danger peureux tu ne succombes:
 Tu es de fer, tout est dedans ton cœur ferré,
 Qui nous deffens la terre & le port désiré,
 Nous de travail recreu, rompu de mal en contre
 Et batus de sommeil. Mais nous voicy tout contre

Vn terroir à propos, nous y aprestérons
 A boire & à manger, & nous reposerons
 Tandis que sur le bord flotteroit le nauire
 Et tu nous le defend, & cruel nous viens dire
 Qu'il faut encor ramer & voguer toute nuit
 Dessus les flots obscurs, où nul feu ne reluit,
 Encor bien loing d'icy. De nuit des vens horribles
 Soufflent communement, aux vaisseaux fort nuisibles,
 N'oyans les matelots. Qui fuira de la mort
 Sous les eaux enfondré le trop cruel effort?
 Si le Nort, si l'ouest suruient à l'impourueue
 Et nous surprend la nuit, nostre flotte est perdue,
 Voire malgré les Dieux. Donc nous obeirons
 A l'obscur de la nuit, icy nous soupperons
 Pres de nostre vaisseau. Puis apres, ie conseille
 Que du plus grand matin demain on se reueille
 Et qu'on remonte en mer. Les autres fremissans
 Vont à ce beau conseil des mains aplaudissans,
 L'aperceurent bien alors qu'un demon en son ire
 Nous machinoit du mal. Ie me pris donc à dire.
 Puis que, ô Eurylochus, vous me violentez
 Touchez moy dans la main, iurez & promettez
 Par serment sacressaint: Que si par aduantage
 Nous rencontrons par l'isle en cherchant leur pasture
 Ou vaches, ou brebis, nul ne se iettera
 Sur troupeau quel qu'il soit & ne le frappera.
 Et les viures sacréz que Ciroé Nymphé bonne
 En partant me donna, ie les vous abandonne,
 Faictes en bonne chere. Ainsi ie leur parlois.
 Ils me iurerent tous d'une commune vois
 Par les Dieux immortelz. Ces choses acheuees
 Nous dévalons en bas nos voiles eslenees,

LE XII. LIVRE

Nous nous mettons à terre, d'eau douce nous cerchons,
Et sous le bord vouté nostre nef nous cachons.

Mes compagnons sortiz dessus l'herbe se iettent,
Apprestent à manger, & à soupper se mettent.
Quand la soif fut esteinte & l'appetit chassé:

Lors au cœur leur revint le dommage passé
De leurs chers compagnons, que Scylla & la Parque
Mangerent à leurs yeux, les tirans de la barque
Mais comme ilz les pleuroient, le sommeil gracieux
Leurs membres assoupit, & leur ferma les yeux.

Desia la tierce part de la nuit approchante
Rendoit des feux du Ciel la brigade panchante,
Quand Iupiter qui tient les amas nuageux
Esment les tourbillons dedans l'air orageux:

Terre & mer sont couuertz de nues tenebreuses,
Et la nuit triste espard ses courtines ombreuses,
Mais si tost que l'aurore aux safraneux cheuaux
Fit luyre ses beaux doigts sur le bout des costaux,

Nous aduisonz ouuert le vouté d'une grotte
Des Nymphes le seiour. Là nostre galiotte
Nous poussons, & cachons, pour estre en seureté.
Là maint siege moitteux d'un & d'autre costé
De l'autre estoit taillé: Lors tous mes gens i'appelle
Et de rechef leur fais ma remonstrance telle.

Amis, il reste encor viures abondamment
Dedans nostre vaisseau, ie vous prie ardemment
Abstenez vous du sang des sacrossaintes bestes
Que quelque grand malheur ne tombe sur nos testes,
Ces vaches, ces brebis appartiennent au Dieu
De qui l'œil tout voyant eclaire en chascun lieu,
Qui voit tout, qui oit tout. Que vostre main se garde
De toucher au bestail du Dieu qui tout regarde

*Ils m'assentirent tous. Or nul vent ne tira
Sinon Notus tout seul tant que le mois dura:
Après Eurus & luy ensemble s'esleuerent.*

*Or tant que de Circé les largesses durerent
Les troupeaux par mes gens ne furent assaillis
Soigneux de leur salut. Mais les voyans faillis
Ils commencent d'aller viftement à la quête,
Aux oiseaux, aux poissons: & rien ne les arreste,
Car tout leur faict besoing. Leurs crochus hameçons
Ils vont ietter en mer pour prendre les poissons,
Et leurs filets en l'air: & l'un & l'autre appaise
Leur ventre. Car la fin conseillere mauuaise
Leur genes les boyaux. Lors ie monte du port,
Ie chemine dans l'isle, & cherche si par sort
Quelqu'un m'enseigneroit les routes marinières.
I'innoque les grands Dieux, ie leur fais mes prières,
I'adore leur pouuoir, & leur dresse mes vœux.*

*Mais, las, en m'escartant par les champs spacieux
Loin de mes compagnons, voicy que ie rencontre
Un lieu fort à l'abry, où pour mon malencontre
Ne battoit aucun vent. Ie me lave les mains,
Et comme ie priois les Dieux de m'estre humains
Eux qui vont habitans les celestes lumieres,
Un sommeil gracieux m'enombre les paupieres
Qu'espandirent les Dieux sur mes membres surpris.*

*Tandis Eurylochus d'aduis mauuais espris
Persuada mes gens de parolles rebelles.*

*Oyez mes compagnons, des fortunes cruelles
Sans cesse poursuiuis, quelque mort que ce soit
Tousiours & miserable & triste s'aperçoit,
Mais de mourir de faim, toute rage surpasse.
Par ainsi croyez moy. Allons tous à la chasse*

LE XII. LIVRE

Du bestail du Soleil, & ne nous soucions,
Tuons en des plus beaux, & les sacrifions
Aux grands Dieux immortels, dont la douce demeure
Et sur l'olympé haut. Que si à la bonne heure
Nous venons au pais, là nous edifions
Un beau temple au Soleil, & luy consacrerons
Force beaux ornemens, & tres-devotieuses
Nos mains luy offriront choses fort precieuses.

Que si n'amolissant son ire & son courroux
Ses troupeaux egorgez il repete sur nous,
Et nous veille punir pour ses vaches mangées
Nos ames enfonçant sous les eaux submergées,
Et que les autres Dieux ne s'y opposent pas,
Mais, vengeurs, avec luy signent nostre trespass,
Meilleur est de mourir sous les vagues ondules,
Et perir une fois sous les ondes hydeuses,
Que languir mal-heureux si longuement de faim
Regardant le desert du terroir si prochain.

Il leur parloit ainsi. Eux à courir se prennent
Les vaches du Soleil les meilleures entrennent
Car elles n'estoient pas guerres loing du vaisseau
Mais païssoient tout aupres presques en un monceau
Leurs fronts larges & hauts, noires belles & grandes
Ils se mettent autour, font aux Dieux leurs offrandes
Et cueillent des feuillards d'un chesne grand & beau,
Car il n'y avoit plus d'orge dans le bateau.

L'innocation faicte adonc ils immolerent
Les bestes de leurs peaux apres les depouillerent
Couperent les cuissots, puis les ayant chargez
De gresse, l'un sur l'autre ils les ont arrangez.

Le vin estoit failly, de l'eau donques ils prirent
Pour les effusions, & puis griller ils firent.

Les boyaux tous entiers sur les ardans charbons.
Quand ils eurent brulé la gresse, & les iambons
Et les tripes mangé, le reste ils dépeçerent
En pieces & morceaux, & apres l'embrocherent:
Et en ce mesme instant me laissa le sommeil.

Lors ie cours au basteau tost apres mon reueil,
Mais comme i' aprochois, l'odeur douce ie fleure
Qui me montoit au nez, ie lamente ie pleure,
Et aux Dieux immortels hausse ma triste vois.

O Dieux, disois ie, & toy Iupiter qui tout vois
Vous m'auex endormy à mon tres-grand dommage,
Et mes gens ee pendant ont faict vn grand outrage.

Lampetie soudain en courant s'aduanca,
Alla trouuer Titan, & tout luy annonca,
Comme mes compagnons auoient sans nulle crainte
Egorgé ses trouppeaux. Aux Dieux il fait sa plainte
D'un courage animé, leur tenant propos tels.

O pere Iupiter, & vous Dieux immortels,
Las, faictes moy raison, & de l'outrecuydance
Des soldats d'Ulysses, & de l'irreuerance.

Ils ont sans nul respect couru sur mes trouppeaux
Ils en ont egorgé les plus gras & plus beaux,
C'estoit tout mon plaisir & toutes mes delices,
Soit qu'allant eclairer sur vos hauts edifices
Ie montasse vers vous, soit que retrogradant
Ie vinsse du haut Ciel en terre descendant.

S'ils ne sont chastiez, si ne prenez vengeance,
Et de leur fier orgueil & de leur grande offence,
Sans doute, ie m'en vois descendre vers Pluton,
Et porter ma lumiere aux morts de Phlegeton.

Auquel respond ainsi le grand amasse-nues.

O Soleil, tes clarteZ seront au Ciel cogneues,

LE XII. LIVRE

Tu y luyras tousiours & encor ta splendeur
 Sur la terre fertile espandra son ardeur:
 Laisse faire si tost que sera leur nauire
 Tant soit peu dans la mer ie delascheray l'ire
 De mon foudre sur eux, ie les embraseray
 De mon brulant tonnerre, & les submergeray
 Au profond de la mer il me souuient ast eure
 Que Calypso, qui a blonde la cheueleure
 Me conta tout cecy, & qu'elle l'entendit
 Raconter à Mercure, alors qu'il luy predict
 Ce qui nous aduiendrait. Or si tost que i' arriue
 Ames gens au vaisseau flottant sur l'onde vine
 Ie les tence & reprens. Mais i' ay beau estriuier,
 Remede ne se peut à ce malheur trouuer.
 Car les vaches gisoient mortes sur le riuage
 Desia des Dieux vengeurs le portenteux presage
 Anous se presentoit, par terre se trainnoient
 Hideusement les peaux, les chairs se demenoient
 Dans les hastes tremblants, & horribles merueilles
 De fiers mugissements remplissoient nos oreilles.
 Par six iours tous entiers ils firent sur le bord
 Grand chere du bestail qu'ils auoient mis à mort
 Sur le septiesme iour, que le fils de Saturne
 Nous fit voir le matin, nous oyons par fortune
 La tempeste cesser, & l'amas orageux
 Finir ses tourbillons, nous montons courageux
 En mer, haussons le mast, le garnissons de toiles
 Blanchissantes en l'air, sortons à pleines voiles,
 Et la terre & les bords semblent se reculler.
 Ayans laissé la terre & les bois s'en aller
 En pleine mer flottans, que plus terre habitable
 Ne se monstre à nos yeux, & rien qu'onde effroyable

Et Ciel ne nous paroist : nous voyons arriuer
Sur nostre nef tombant un tenebreux hyuer,
Iupiter fond sur nous l'obscur d'un noir nuage
Portant tempeste & nuit, & terrible rauage:
L'onde est pleine d'horreur & d'horribles brouillars,
Nous voyons se couvrir la mer de toutes pars,
Le flot entre en la nef, un fort vent qui resonne
D'effroyable bruit sur nous tempeste & donne,
Brise nostre cordage, entame nostre mas,
Qui de son bout penchant se precipite en bas.
Et tout nostre armement & naual equipage
Tombe dans le vaisseau ébranlé de l'orage,
Qui en prouë versant frappe mortellement
La teste du patron, brise cruellement
Tous ses os à la fois, iette le miserable
Du hault dedans la mer, à un sauteur semblable.
Il tombe de sa place au creux milieu des eaux,
Et l'esprit & la vie abandonnent ses os.
Iupiter quant & quant de sa dextre irritée
Son foudre va dardant sur la nef agitée,
Tonne, foudroye, éclaire, & ses feux élançant
Faiët que la pauvre nef tourne se renuersant,
Et par dedans le souffre & le foudre grommelle.
Mes gens tombent brulez dedans l'onde cruelle,
Qui emporte des flots aux plongeonneaux semblans,
Au trauers de la mer, se demenent tremblans:
Iupiter sur les eaux en nageant leur arrache
La vie & le retour. Pour moy tousiours ie tasche
De conseruer ma barque & de marcher sur l'eau,
Iusqu'à tant que le foudre eust brise le bateau,
Et les pieces ietté flottans dessus Neptune:
Ie fais tout mon effort d'en aller saisir vne:

LE XII. LIVRE

Le mast encor rompu sur la mer s'estendoit,
 D'un fort cuir de Toreau une corde y pendoit,
 Je la pren, & mon ais & le mast i'en garrote,
 Et les ioints en façon de quelque galiotte.
 Ainsi dessus assis le vent m'alloit poussant,
 Et l'enragé Zephir son vent alloit cessant,
 Mais le viste Notus rebrouillant la marine
 Me menaçoit encor de perte & de ruine:
 Prest à merietter dans les cruels abbois
 Des rocs de Charybdis. Las, toute nuit i'allois
 Sur mon pauvre vaisseau, ioint de debiles pieces,
 Et comme le Soleil nous remonstroit ses tresses
 Ramenant de ses feux le matin, me voila
 Tombé dans les escueils de Charybde & Scylla:
 Charybdis n'eut si tost beu les eaux de l'orage
 Que ie me voy porter sur le figuier sauvage,
 Dont ie suis retenu, ne pouvant nullement
 Sur ses branches monter, ny assoir fermement
 Mes pieds dessus le roc comme la souris chauue.
 Les racines sont loing, la branche où ie me sauue
 Estoit fort estoignee, & rendoit ombrageux
 Le trou de Charybdis: ie m'y pen courageux,
 Et m'y tenois tousiours, tant que d'une autre tire.
 Elle eust en hault domy ses eaux & mon nauire,
 Ce que ie vy en fin à propos me venir.

A l'heure que se void du palais reuenir
 L'homme sçauant en loix, incorruptible iuge
 Recours des orphelins, des vefues le refuge,
 Estans expediez procez & altercas,
 Pour se mettre à la table & prendre son repas:
 Tout à semblable temps le bois qui me gouverne
 M'apparut, remontant de la noire cauerne

De la fiere Charybde. Alors tout bellement
Je me conle les pieds, les mains ensemblement
Sur les pieces de bois, puis tout à coup me laisse
Tomber au beau milieu, par la branche qui baisse,
Et mes pieds en tombant rendirent un grand bruit.

Ainsi dessus assis la vague me conduit,
Des mains ie gouvernois mes tables dépecees
Du mieux que ie pouuois sur les eaux courroucees.

A doncques le grand Roy des homes & des Dieux
Scylla pour ceste fois destourna de mes yeux,
Car ie n'eusse iamais fuy la mort amere
Si le vent m'eust poussé contre sa roche fiere.

Ainsi neuf iours durant sur les rompus morceaux
De mon bac mal lié i'errois dessus les eaux.

Sur la dixiesme nuit la douceur infinie
Des bons Dieux me poussa en l'isle d'Ogygie,
Où se tenoit alors en pompeuse façon

La Nymphé aux cheueux blonds la belle Calypson:
Sa reputation est grande & venerable,

Et pleine de renom. La Deesse agreable
Me retint là long temps souz ses douces amours.

Mais ces malheurs passez les diray-ie tous iours.

Ie t'ay desia conté toute ceste infortune
A toy & à la Reyne. Et c'est chose importune,
Et qui m'attriste fort, de dire si souuent
Ce que ie t'ay desia raconté cy deuant.

Fin du douziesme Liure.



LE TREZIESME LIVRE DE L'ODYSSEE D'HOMERE.

ARGUMENT.

Es Phæaciens conduisent sur mer Vlysses, & le posent endormy sur terre en Ithaque. Neptune à leur retour transforme leur vaisseau en Rocher. Minerue s'apparoist sur le riuage à Vlysses. Ils consultent de mettre à mort les poursuuans. Cachent les thresors dans vne cauerne. Puis Pallas transforme Vlysses en gueux & vieillart.

AUTRE SOMMAIRE.

*Vlysses est mené par les gens de Scherie,
Et rendu endormy dans sa chere patrie.*

Lachenoit de dire, & tous ravis de ioye
Entêtifs à merueille auoient la bouche coye.
Adonc Alcinoüs luy dit : O Vlysses,
Puis que tu as trouué seurte, & libre accez
Dans ma riche maison, & recueil fauorable
En ceste mienne terre, il n'est pas raisonnable
Que derechef errant dessus les flots moiteux
Tu retournes chez toy incertain & douteux :
Tu as souffert assez sur l'onde & sur la terre,
Tu as assez couru de trauaux de la guerre

En cherchant ton pays. Or i ordonne à vous tous
Qui mangez dans ma sale & beuvez le vin doux,
Qui pres de moy seez avec honneur semblable,
Et du chancre écontez la voix émerueillable,
Et les Muses par luy chantans si doucement:
Outre ce que ce coffre enferme richement
En habits precieux pour nostre hôte Argolique
Bonne quantité d'or & riche & magnifique,
Et les dons precieux que moy & vous aussi
Princes Phaaciens auons donnez icy,
Que nous y adionstions encor' chacun par teste
La liberalité d'un present bien honneste,
Sçavoir est contrepie, avec un chauderon.
Et si avec cela ie trouue encores bon
Que de sa part aussi le peuple en quelque sorte
Contribue à donner, & dans le vaisseau porte
Selon ses facultez quelque present d'honneur
Car il est mal aysé qu'un tout seul soit donneur.

Si dit Alcinous. Tous ceux qui là se trouvent
Consentent, & du Roy les paroles approuuent,
S'en vont en leur logis pour prendre le sommeil.
Mais si tost que l'Aurore à son doré reueil
A la terre eust donné claire reioissance,
Les gens des Scheriens portent en diligence
Aux peinturez vaisseaux argent en quantité
Apportant aux humains plaisir & volupté.
Du Roy Alcinous la maiesté sacrée
Enioint qu'on porte tout dans la fregate encrée,
Et au prix qu'on aporte il faict serrer le tout:
Car il se pourmenoit de l'un à l'autre bout
Sur les bancs du vaisseau, prenoit soucy & cure
Qu'ils ne fussent blessez en mettant d'aduanture

LE XIII. LIVRE

*Les rames en leurs lieux. Après qu'ils eurent fait,
Ils vont incontinent apprester le banquet:
Et le Roy fait venir une vache, & l'immole
En l'honneur du grand Dieu, dont la seule parole
Ment & gouverne tout. La vache ils dépessoient;
Et les cuissots coupeZ sur le feu rostissoient
Banquetans à plaisir. Or la douce musique
Du bon Demodocus rendoit plus magnifique
Et ioyeux le festin: Demodocus chery
Et honoré du peuple, & de tous fauory.*

*Mais Ulysses tournoit souuentefois la face
Vers le Soleil, dont l'œil les tenebres efface;
Il presse tant qu'il peut son desiré retour;
Curieux de reuoir Ithaque son sejour.*

*Comme le laboureur las & suant de peine
Desire le souper, ayant la langue pleine
Marquee de sillons, souZ les bœufs encornez
Qu'il a par les guerets longuement pourmenez;
Et tant que du soleil la splendeur se ternisse,
Et que le soir tombant sur les champs se noircisse
Heure tant desirée, alors à courbeZ pas
Lassé, il va chercher le gracieux repas:
Ainsi au gré d'Ulysse, & selon qu'il souhaite,
Le Soleil vient cacher sa flambrante charrette.
Qui fait que s'adressant au Roy Alcinoüs,
Et aux Phœaciens sur la mer tant cognus,
Il leur dit en ces mots: O grand Roy de Scherie,
Donnez moy mon congé, laissez moy ie vous prie,
Aller à mon vouloir. Au reste accomplissez
Le sacrifice entier, & vous resiouyssez,
I'ay quant à mon regard ce que mon cœur desire,
I'ay presens à souhait, i'ay escorte & nauire,*

Que facent les bons Dieux qu'en Ithaque porté
le trouue mon épouse en prospere santé,
Et que tous mes amis desiréz ie renoye.
O Scherians heureux viuez en toute ioye,
Soyez tousiours heureux, & possédez icy
Vos femmes, vos enfans, & vos filles aussi:
Et de bon cœur pour vous tous les grāds Dieux ie prie,
Qu'ils doint honneur à vous, gloire à vostre patrie,
Que vostre bien public ne coure aucun danger,
Et tout bon-heur se puisse en vos champs heberger.

Il mit fin à son dire, & tous hault le louèrent,
Et qu'on le conduisist en sa terre ordonnerent,
Car sa demande iuste & raisonnable estoit.

Alors Alcinoüs dont le lustre éclatoit,
Et l'insigne vertu, à son Herauld commande.

Pontonoüs, pren moy la tasse la plus grande,
Remply là de vin pur, & puis la porte à tous
Par la salle de rang, qu'ils offrent le vin doux
Au puissant Iupiter, afin que l'on renuoye
Nostre hoste en son pays, & qu'il ayt seure voye
Chez luy, par sa faueur. Il dit, & l'echangeon
A tous distribua l'agreable boisson:
Eux de leurs sieges hauts, où deuant ils s'assirent.
Aux Dieux bourgeois du Ciel leurs effusions firent,
Et le fort Vlysses dessus ses pieds planté
Le hanap arondy mit és mains d'Areté
L'incitant de parole & courtoise & humaine.

Voicy, ie te saluë, ô vertueuse Reyne,
Vy pleine de plaisir & de contentement
Iusques en ta vieillesse, & puis finalement
Tant que la mort t'arrine, à tous ineuitable,
Pour moy, ie m'en vay voir ma maison desirable,

LE XIII. LIVRE

*Mais toy demeure, chere en ce pais icy,
 Au Roy, à tes enfans & à ton peuple aussi.
 Ce disant Ulysses son depart il commence,
 Alcinous commande au herant qu'il s'advance
 Devant luy vers le port, & de mesme Areté
 Ses servantes enuoye au navire masté:
 L'une portoit la robe & riche & precieuse
 Les autres les coffrets, faits d'œuvre industrielle,
 D'autres portoient les bleds & les vins rougissans.
 Venues pres des flots d'escume blanchissans,
 Chacune sagement soit don, soit vin, soit viure
 Se décharge au vaisseau & à ses gens les liure,
 Mais à Ulysses en bas dans sa chambrette on tend,
 Vn matlas bien douillet, les linceux on estend
 Pour le faire coucher, & au gracieux somme
 Estendu mollement inciter le bon homme,
 Qui se iette dessus. Le silence est par tout,
 Et les Phaaciens rangez de bout en bout.
 S'assirent sur les bancs, le cable destacherent
 Hors du rocher percé, les escumes hacherent,
 Et pousserent les flots. Vn doux sommeil amy
 Vint rendre au mesme temps tout son corps endormy,
 Sommeil assoupissant, toutesfois agreable,
 Endormissement lourd, pesant, inexcitable,
 Qui l'abbat sans nul soing, & charmeur l'embrassant
 Presque comme une mort sur luy se va glissant.
 Ainsi que les cheuaux mis hors de la barriere
 Pour emporter l'honneur d'une isnele carriere,
 Empoignent le guerret, s'estendent incitez,
 Et du foïet les hastant & de leurs volontez,
 Hors des mains du cocher les renes ils se couent,
 Et de ses coups de foïet se moquent & se ioient:*

Ainsi

Ainsi dessus les mers le vaisseau se haussoit,
Et la mer par derriere encontre luy poufsoit,
Et bouillonnante & noire. Il cour de grand' vifesse
Et de grand fermeté & de grande allegresse,
L'esperuier le plus vifte & leger des oyseaux
Ne l'eust pas attrappé. Ainsi dessus les eaux
Le vaisseau galopant de vitesse incroyable
Vn homme souleuoit, ayant vn cœur semblable
Aux Dieux, pour tollerer la peine & le tourment,
Luy qui deuant auoit souffert si longuement
Tant de sortes de maux, aux combats, à la guerre,
Et sur les flots douteux en ce- pendant qu'il erre
Et court tant de hazards : maintenant le voicy
Surpris d'un fort sommeil, exempt de tout soucy,
Hors de toute amertume, oublieux des grands peines
Qu'il souffrit autresfois sur les mers incertaines.

Mais quand la claire Estoille au matin annonçant
Le proche poinct du iour parut resplendissant,
Le vaisseau galoppant dessus les mers agile
A la fin approcha de la venë d'une isle.

Phorcin estoit vn port qui dans Ithaque estoit,
Qui deux bouts aux costez du riuage iettoit,
Et qui entre-rompus dedans la mer s'estendent,
Et les flots irritez & les vagues defendent.
Port seur pour les vaisseaux, à l'abry de tous vents,
Et rechassant l'effort des flots les poursuynans.
Là n'est-il ja besoin de cordes ny de cables,
Et les ancrs n'y sont du tout point recerchables.
Mais le vaisseau table y loge à seureté,
Dés qu'il est vne fois dans le port arresté.
La sommité du port au dessus est conuerte
Des rameaux espandus de mainte oline verte;

LE XIII. LIVRE

Aupres, un antre ombreux aux Najades sacré
 Saintes Nymphes des eaux dans le roc est ancré
 Pour leur fraîche retraite, & dedans s'aperçoivent
 Les cruches & vaisseaux qui les ondes reçoivent
 Toutes de pierre dure, & les filles du Ciel
 Murmurans au dessus y succrent leur doux miel.
 Bien avant dans le roc les belles Nymphes perses
 L'ouvrage façonnoient de leurs toilles diverses:
 Estrange chose à voir, & une fort douce eau
 Deconloit là dedans un perennel ruisseau.
 Al' antre double entree, & double porte est mise,
 Celle qui tend au Nord aux mortels est permise,
 Mais celle du Midy aux Dieux tant seule ment
 Est sacree, & ne s'ouvre aux hommes nullement.

Quand les Phœaciens ce port désiré virent
 Ils y poussent leur barque, à terre descendirent,
 Et à force de bras, de voiles, d'anirons,
 Ils abordent la terre, & ces beaux environs,
 Puis sortans du vaisseau qui sur les ondes glisse
 Ils montent dessus terre, y font porter Ulysse,
 Et puis avecques luy ils font porter le lit
 Et les linceux sur quoy en partant on le mit.

Agrué du profond d'un sommeil désirable
 Ils posent doucement leur homme sur le sable,
 Mais ils sortent aussi du navire les biens
 Et les riches presens que les Phœaciens
 Firent à Ulysse, qu'ilz mirent en reserve
 Dedans le riche coffre en l'honneur de Minerve:
 Hors des chemins battus, fréquentez des passants
 Au pié d'un olivier ils les vont entassans
 De peur que les trouuans quelques uns ne les prissent
 Deuant qu'il s'esueillast & qu'ils ne luy messissent

Ayans fait tout cela les Scheriens donnoient
Joyeux leur voile au vent, & chez eux retournoient,
Mais Neptune n'auoit la menace oubliée
Qu'il auoit contre Ulysse autrefois publiée
Grandement indigné. Qui fit qu'il s'en alla,
Et trouuant Iupiter en ces mots luy parla.

O pere Iupiter, quelle immortelle essence,
Quel des Dieux desormais n'auroit en reuerence,
Quand les Phœaciens qui viennent mesmement
De moy, ne m'ont porté respect aucunement:
Je disois qu'Ulysse tracasseroit le monde,
Souffriroit longuement sur la terre & sur londe
Plustost que d'arriner au lieu de son sejour,
Car ie ne luy ay peu arracher son retour
Irrenocablement, & n'ay peu faire en sorte
Que premier n'ayt esté ta promesse plus forte:
Et voila, ces galans sur un nauire amy
Luy ont passé la mer, ont posé endormy
Seurement sur le sable en Ithaque leur homme,
Auec tant de presens, d'or vne telle somme,
Habits si precieux, qu'il n'en eust apporté
Tant pour sa portion, quant mesme à seureté
Il fust victorieux chez luy venu de Troye
Plein de superbe honneur, & chargé de la proye
De tout l'Orient mesme. A Neptune respondit
Iupiter donne-pluye, & ces propos luy dit.
Dieux dont l'Empire est grand! que me viēs-tu de dire
Neptune, ô grand dompteur du noir profond empire?
Les puissans Dieux, croy moy ne te méprisent pas,
Il est bien dangereux de ne faire tel cas
Qu'on doit d'un si grand Dieu, & de grand reuerence
N'honorer pas celuy qui a tant de puissance.

LE XIII. LIVRE

Mais si quelque mortel est si méconnoissant,
Et ne reconnoist pas ton empire puissant,
Presomptueux qu'il est, tu peux prendre vengeance
Des hommes à ton gré, portans irreuerance
A ta grand' Maesté: qui t'en d'estournera?
Parquoy, va & fay d'eux ainsi qu'il te plaira.

A ces mots respondit le fort esbranle-terre.
Ie le feray bien tost ô grand dard-tonnere,
Puis que tu le permets. Ie n'osois m'aduançer
Pource que ie t'honore & crain de t'ofencer.
Mais ie vay maintenant submerger en mon ire
De ces Phaaciens l'arrogante navire,
Comme ils retourneront: ie perdray leur vaisseau,
Affin que cy apres ils ne montent sur l'eau:
Qu'ils s'abstiennent du tout de l'art de nauigage,
Et n'entreprennent plus de fournir de passage
A nul homme viuant. Apres imposeray
Vn mont dessus leur ville, & haut l'enleueray.

A ces mots Iupiter qui tient le fort empire
Des nuages du Ciel, ainsi se prit à dire.

O Dieux, combien me plaist ceste entreprise icy!
Sera bien vn grand cas quand tout le peuple ainsi
D'une ville, verra vne barque chargée,
Par Neptune en rocher estre si tost changée:
Rocher di-ie semblable à vn galion prompt
Et contre vne Cité imposer vn grand mont,
Afin qu'un tel amas par apres on admire.

Comme le Dieu qui tient sur les mers son empire
Eut entendu cela, luy qui le flot grondant
Encontre les sablons choque de son trident:
Il prend droit son chemin en l'isle de plaisance,
Où les Phaaciens faisoient leur demeurance:

Afin de se trouver iustement pres de l'eau,
Lors qu'ils arrieroient, & desia le vaisseau
Porté des aurons & de l'escume vine
De retour se voyoit approcher de la rive:
Quand Neptune soudain accourut au deuant,
Et le bac qui estoit de bois auparauant
En dur rocher changea: Sa puissance diuine
Mit par apres dessouz mainte forte racine,
Et de sa forte main dans la mer le roula,
Et soudain qu'il eut faict il s'en alla de là.
Les habitans experts aux loingtains nauigages
Dessus ce changement tenoient diuers langages,
Et s'entre-demandoient, Qui a peu attacher
Une barque dans l'eau & en faire un rocher?
Comme elle estoit desia dans le port retournee?
Ignorans le miracle, avec la destinee?
Ausquels Alcinoüs en rendit la raison,
Et en plaine assemblee haussa son oraison.
Pour le vray mes amis, asteure est en pratique
De mon pere chenu la prophetie antique:
Il disoit que Neptun se deuoit animer
De ce que nous passons vn chacun sur la mer
Sans penser faire mal: & qu'il deuoit destruire
De nous Phaaciens la plus belle nauire
Venant de faire escorte: en outre imposeroit
Vn mont sur nostre ville, & hault l'esleueroit.
Vous voyez accomplir ceste menace, comme
L'auoit prophetizé cy deuant le bon homme.
Pourtant ie vous conseille, & obeissez moy,
Laissez d'oresnauant toute escorte & conuoy,
Qu'on s'abstienne des eaux, que du tout on s'en priue
Quelque hoste qui suruienne, & dans la ville arriue.

LE XIII. LIVRE

Sacrifiez apres douze beau grands torreaux
A Neptune, le Roy de la mer & des eaux,
Qu'il se rappaise à nous pitoyable & tranquille,
Et ne veil imposer vn mont sur nostre ville.

Il dit. Ils eurent peur, furent obeissans
Et les douze torreaux allerent terrassans:
Lors tout le saint Senat avec la populace
A l'entour de l'autel implorerent la grace
De Neptun courroucé, le Dieu au fort trident.

Le diuin Vlysses s'esueilla ce pendant
De dessus le sablon de sa chere naissance
Ayant dormy long temps: il n'auoit cognoissance
De son pays natal, tant il auoit esté
Des champs Neritiens longuement écarté.
La fille à Iupiter la prudente Deesse
L'auoit enueloppé d'une nuee espaisse
Afin qu'on ne le peust regarder ne toucher,
Ou bien ce qu'il auoit entrepris empescher,
Ou s'enquerir de luy, & qu'il ne fist entendre
Sa venue à quel qu'un pour cognoissance en prendre,
Et que plustost aussi sa femme ne sceust point,
Ny quel que soit qui fust d'alliance à luy ioint
Sa venue au pays, que plustost ne le vissent
Les citoyens d'Ithaque & à luy se rendissent
Qu'il n'eust premierement à coups de coutelas
A tous les poursuiuans aduancé le trépas:
Punissant le desordre & le train deshonneste
Qu'ils menoiert en sa Cour, par vne mort funeste.

Toutes choses adonc de modelles diners
Paroissent à ses yeux, les grands chemins ouuers,
Les beaux ports enlunez, les recourbez riuages,
Les rochers esleuez, les grands forests sauvages,

Les arbres verdoyans, & par les champs espars
Les petits arbrisseaux feuillus de toutes pars.
En se dressant en pieds lors resta ferme Ulysse,
Regardant son terroir, dont il n'auoit notice,
Puis iettant force pleurs, ses cuisses martelant
Par trois ou quatre fois alloit ainsi parlant.

O miserable moy, où fay-ie mon entree,
Quel pays est-ce cy, quelle est ceste contree,
Sont-ce monstres cruels, ou bien hommes humains
Qui tiennent ces pays? Sont-ce gens inhumains,
Farouches, & sanglans, ou si leur face est peinte
De pieté benigne & d'humanité sainte?
Cherissans la iustice, aymans l'honnesteté,
De bonne conscience, & de fidelité?
Où pourray-ie porter ces presens, ces richesses,
Où cacheray-ie, hélas, ces biens, & ces largesses?
Mais, où vay-ie ignorant errer & m'égarer?
Que ces biens, Scherians, vous peussent demeurer,
Et que vers d'autres Rois i'eusse pris mon adresse.
Quelque autre Roy peut estre, hélas, m'eust fait caresse,
Et touché d'amitié, m'eust avec ses amis
Et avec bonne escorte en mon pays remis.
Ie ne sçay où les mettre, osons les de la voye
Toutesfois, qu'aux passans ils ne seruent de proye.

Mais ces Pheaciens certes, n'ont point esté
Ny bien considerans, ny gens de probité,
M'ayans ainsi conduit en contree estrangere,
Veu qu'ils m'auoient iuré qu'en mon Ithaque chere
Ils me rameneroient, ils ne l'ont fait pourtant.
Que le grand Iupiter les aille tourmentant
Qu'il m'en face vengeance, esmeu de mes prieres:
Car il voit les humains, regarde leurs miseres,

LE XIII. LIVRE

Et punit les méchans. Mais voyons tout à part
S'ils ne m'ont rien soustrait avecques leur depart.

Ce disant, il contoit remply d'impatience,
Et rien n'estoit soustrait de toute sa cheuance:
Il trouua ses trepiez, ses chanderons, son or,
Ses riches vestemens, & ses robes encor.

Puis regardant la mer, & le bruyant rinage,
Il plaint son pays doux & pleure en son courage:
Tant qu'il sent de ses pleurs tout son sein humecter.

Alors Pallas s'en vint à luy se presenter,
Ayant vestu la forme & la presence belle
D'un beau ieune berger, en apparence telle
Que les enfans des Rois se marchent par les champs:
Sur son dos deux manteaux richement s'acrochans,
Estoffez reluisoient, à ses pieds la chausseure
Environnoit l'entour de riche entre-lasseure,
Le iauelot en main elle alloit esleuant.

Adoncques Ulysses luy courut au deuant,
Consolé de le voir, & luy tint ce langage.
Ie te saluë, amy, que i'ay sur ce rinage
Rencontré le premier? ie te pry ne me voy
D'un courroucé visage, & nous sauue, tant moy
Que tout ce que tu vois: Les genoux ie t'embrasse
Ainst qu'à quelque Dieu, & i'implore ta grace.
Dy moy ie te supply, quelle terre est-ce cy?
Quel est le menu peuple & les hommes aussi
Qui en sont habitans? Seroit-ce point quelque isle
Assise dans la mer & plaisante & fertile?
Y a-il quelques ports par fortune dedans
Sur le bord de la mer la terre regardans?

A ces propos, Pallas dont l'œil pers estincelle,
Tu es bien ignorant estrangier, ce dit elle,

Quoy, viens tu de si loing, que tu t'enquiers du nom
De ceste terre icy ? dont le bruit le renom
N'est point tant incogneu, que de son excellence
Force gens n'ayent eu notice & cognoissance,
Tant ceux qui sont viuans sous le soleil qui fait
L'aurore du matin, que ceux qui sous la nuit
Le regardent coucher. Elle est assez, fascheuse,
Sa situation est aspre & raboteuse,
Mais non sterile aussi, n'est l'arge aucunement,
Mais elle a quantité de vins & de froment.
Elle est incessamment de pluyes arrosée:
Et lon void les matins la seconde rosée
Qui gayera uerdit, & prez & champs herbus,
Riche à cheures nourrir, commode à porter bœufs
Plantée de forests, de petis costaux plene,
Et dessus soy portant mainte fresche fontaine,
Mains ruisseaux perennels, où l'on peut s'abreuuer.
Quoy ? d'Ithaque le bruit a peu bien arriuer
Iusques à Iliou, qu'une espace infinie
Eslogne ce dit on de la riche Achaïe?
Elle disoit ainsi & d'un tres-grand plaisir
Vlysses se sentit soudain l'ame saisir,
Tant il s'esioiissoit de se voir en sa terre,
Comme l'en asseuroit du Dieu iette-tonnerre
Pallas la sage fille. A qui dissimulé
Non de parole vraye, alors il a parlé,
Car c'estoit sa coustume, ayant l'ame sans cesse
De deguisement plene & de toute finesse.
Nous auons quelquesfois en Crete ouy parler
D'Ithaque, & son renom à nous a peu voler,
Dit il, & maintenant ie fay donc mon entree
Amené par la mer dedans vostre contree,

LE XIII. LIVRE

Laisant, hélas, la mienne & la mer essuyant
 Avec tous ces thresors, & mon pais fuyant
 Où i'ay l'aissé autant de biens & de richesse
 A mes enfans comblez de deuil & de tristesse
 Comme vous en voyez ie m'en suis destourné
 Pource que i'ay tué le fils d'Idomené,
 Si disposé, si léger, qu'il laissoit en arriere
 Tous les meilleurs coureurs sur la viste carriere,
 Qui fussent en Candie: il me vouloit hautain,
 Priuer entierement de la part du butin
 Que i'auois fait à Troye, où i'ay eu mille peines,
 Et ma part des combats & des eaux incertaines:
 Pour ce que ie n'auois marché sous l'estandart
 De son pere, ains menois mes compagnons à part
 Le le renuersay mort de ma pique aceree
 Ainsi qu'il reuenoit des champs sur la seree
 Caché pres du chemin. Personne ne nous vit
 Moy ne mon compagnon, car il faisoit fort nuit
 Quand ie l'eu mis à mort soudain ie me retire
 A des Phéniciens, monte dans leur nauire,
 De me prendre avec eux ie les prie instamment,
 Et leur promets salaire à leur contentement,
 Moyennant qu'en seurté leur nauire me guide
 Et me rende dans Pyle, où bien dedans Elyde
 Où les forts Epæens regnent, & vont brauants
 Mais certes maugré eux, par la force des vents
 Ils en furent chasséz, car ils n'auoient enuie
 D'user en mon endroit d'aucune tromperie.
 Or de là, toute nuit demenez, tracasséz
 Nous surgissons au port à peine, & tant lassez
 Que n'eusmes de souper aucune souuenance
 Bien qu'eussions fort grād faim: mais mattez à outrāce

Nous nous couchons, sortis de la nef, sur le bord
Où las & travaillé vn doux sommeil m'endort.
Et les Phéniciens deschargeans mon bagage
Le portent bellement en haut sur le riuage
Où i'estois endormy, & remontans sur l'eau
A l'escume des flots redonnent leur bateau,
Pour reprendre, s'ils ont la mer douce & facile
Leur route vers Sidon terre belle & fertile:
Et m'ont laissé, pressé de maints soucis diuers.
Auquel se souriant la deesse aux yeux vers,
Ayant pris la façon d'une dame galante,
Industrieuse ez arts & de face excellente,
Luy touchant en la main. Bien corrompu seroit,
Bien fin & bien madré le fin qui te prendroit
Quant seroit mesme vn Dieu, ô confit en malice,
Dissimulé, menteur, & pere d'artifice,
Dessus tous les rompus tu emportes le pris,
Et tu es à cela de ta ieunesse apris:
Mesmes dans ton pais tu ne peux que tu n'uses
De tes deguissemeas, subtilitez & ruses.
Or nous sommes tous deux en cella excellens,
Toy de tes fins aduis, de tes mots doux coulans
Tu passe les mortels, & moy Pallas, la gloire
Des hauts Dieux en conseils i'obtiens sur eux victoire.
Astu donc mescogneu la fille à Iupiter
La deesse Pallas, qui ta faict emporter
La victoire & l'honneur dessus tant d'aduantures,
Dessus tant de dangers & de trauerses dures?
Et quit'a mis en grace enuers les Schericiens
Qui t'ont en t'en allant faict don de tant de biens?
Or ie reuiens encor pour t'estre conseillere,
Afin de te monstrier ce que tu as affaire

LE XIII. LIVRE

Pour cacher tes tresors, ces presens precieux
Que par mon moyen seul tu as obtenu d'eux.
Ie te veux declarer les fortunes aduerses,
Et les afflictions & les peines diuerses
Que dedans ton pais le dur destint t'enjoint
Encor de supporter. Pren cœur, ne deffaux point
Supporte les malheurs. Car il est necessaire.

Garde à qui que ce soit de dire ton affaire,
Hommes, femmes, amis, ne parle nullement,
Ne te decouure point, qu'on ne sache comment
Ne pourquoy te voicy, tolere, souffre & porte
Tout ce qu'on te fera d'ame constante & forte.

A qui respond ainsi Vlysses le scauant.
Certe à qui que ce soit que tu viens au deuant
Tant aduisé soit-il, il est bien difficile
De te bien recognoistre, ô grand deesse habile,
Qui te fais sur les Dieux en conseil estimer
Car en toute façon tu te scais transformer.
Ie confesseray bien, que au temps qu'en bataille
Les Grecs se presentoient sous la forte muraille
De la ville à Priam, la superbe Cité,
De secours, de conseil tu m'as fort assisté,
Mais depuis qu'elle fut prise, destruite & arse,
Et nostre flotte fut par Iupiter esparse,
O fille à Jupiter, ie ne t'ay veu depuis
Et ne t'ay aperceue alleguer mes ennuis
Montant sur mon vaisseau : où comblé de tristesse
I'ay sur les eaux erré sans relasche & sans cesse,
Iusqu'à ce que les Dieux eurent de moy mercy,
M'osterent du danger, me ietterent transi
Au port de Pheacie, où benigne & facile
Tu me vins consoler, & me mis en la ville.

Or, par mon pere cher, d'y moy à ceste fois
Si ie suis arrivee dans le bord Ithaquois,
Car ie ne pense pas, tant grande est ma misere
Avoir encor le pié dessus ma terre chere,
Mais que ie suis tousiours en terroir estrange
Et que tu me deçois vien donc me descharger
De la peyne où ie suis. Lors la Tritonienne
Ton cœur se plaist toujours en sa ruse ancienne
Dissimulé qu'il est. le ne te lairray pas
Tremper plus longuement au travail que tu as:
Puis que tu es si plein d'oraison blandissante,
Et de prudence, à tous la raison ranissante:
Tout autre homme que toy que le malheur aura
Long temps trainné sur l'eau, tousiours desirera
De reuoir sa maison, sa femme fortunee
Et ses tres-chers enfans sa tres-douce lignee:
Mais ce n'est pas à toy d'ainsi le pratiquer.

Deuant que te monstrier, que te communiquer
Il te faut esprouuer l'amitié coniugale,
Scauoir premierement si ta femme est loyale.
Ta femme pour certain passe ses iours en pleurs
Dans ta propre maison, & les nuits en douleurs,
Se lamentant du iour qui s'enfuit & la laisse
Et de la longue nuit qui accroist sa tristesse.

I'ay cogneu tout cecy, des long-temps ie scauois
Que tes amis perdus en fin tu reuiendrois.
Mais ie n'ay pas voulu faire de resistance
A mon oncle irrité, n'opposer ma puissance
A l'indignation, n'y au dedain reglé
Qu'il auoit contre toy, quand son filz au euglé
Fut par toy, Ulysses. Or sus aye courage
Car ie te veux monstrier ton bien, ton heritage,

LE XIII. LIVRE

Pour y adjoûter foy, regarde ce beau port
 Qui baille aux flots saiez & s'y ouvre si fort,
 C'est l'antique Phorcin: sous la feste gelee,
 Sous ceste espesse oline vne grotte est taillee
 De Nymphes le seiour, & que nous appellons
 Les nayades des eaux, & dessous ces vallons
 Force cavernes sont de grands rochers enceintes,
 La faire tu soulois tes hecatombes saintes
 Aux deesses des eaux. Là Neritus apres
 Couuert d'une forest, à lombre espais & frais
 Mont orgueilleux & hant ses summitez esleue.
 Elle dit, puis soudain lannee elle leue
 Et l'espandit en l'air. Lors la terre apparut.
 Et un tres-grand plaisir dedans le cœur courut
 Du divin Vlysses, regardant comblé d'ayse
 Son doux pais natal. Alors la terre il baise
 Et soulevant les mains que jointes il plia
 Aux deesses des eaux ainsi il suplia.
 Race de Iupiter, ô Naiades gentilles,
 Je ne pensois iamais vous voir, ô saintes filles,
 Je vous salue asteur, acceptez ceste fois
 Les salutations de ma ioyeuse vois.
 Nous vous sacriffrons encore mainte offrande,
 Si du hant Iupiter la fille sainte & grande
 Le veut & daigne encor ma vie pr'longer,
 Et mon cher Telemach, en tout bon-heur plonger.
 A qui respond encor Pallas, deesse sainte:
 Rappelle l'esperance & chasse toute crainte,
 Et plus pour tout cela ne sois sollicité:
 Mais plu'stost ce tresor par nous soit emporté
 Et cachons le leans. Puis il nous fandra faire

Ce que nous te verrons estre plus necessaire,
Et nous prendrons aduis. Elle dit, puis entra
Dans la cauerne obscure, au trauers penetra,
Et cerchoit la dedans les cachettes espesses.
Ulysses y porta les tresors, les richesses,
Les dons & les presens & les vaisseaux dorez,
Les riches vestemens par art elaborez
Dont luy firent presens les Seigneurs de Pheace,
Disposans chascune chose en son lieu en sa place
Au fonds de l'ancre noir. Lors Pallas, que rendit
De son cerneau le Dieu qui le foudre brendit
Et que nourrit la cheure, vne grand roche forte
Poussa deuant la grotte, & en ferma la porte.
Après se retirans sous le fenillage ombreux
D'un oliuier espais, ils consultoient entr'eux
Des moyens d'arracher aux poursuiuans la vie
Et de passer au fer ceste bande ennemie.

Lors Pallas commença d'un discours aduisé.
O de tous les Gregois le plus fin & rusé
Fils du vieux Laërtes, race des Dieux inclite,
Voy comme tu metras ceste troupe maudite.
De poursuiuans à mort, poursuiuans insolens,
Et qui presumptueux desia depuis trois ans
Gourmandent ta maison: troupe trop deloyale
Quitte de salir ta couche coniuale,
Violer de ton lit la pure honnesteté,
Et corrompre ta femme & sa pudicité,
Offrans force presens. Mais ta pudique femme
Te regrette sans fin, sans cesse te reclame,
Passe ses ans en pleurs, lamente nuit & iour
Et espere tousiours ton desiré retour
Afin de n'espouser. Ceste troupe qui pense

LE XIII. LIVRE

Toujours à l'atraper elle paist d'esperance,
Les decoit finement, & leur promet sans fin
D'enuoyer gens par tout pour te chercher, assure
De te garder sa foy, trompant ingenieuse
Leur importunité & poursuite ennuyeuse.

Lors Ulysses remply d'aduis prudent & fort
Helas, il est certain que i'estois roide mort
Ainsi qu'Agamemnon dedans ma maison mesme
Sans ton prudent aduis & ton amour extreme.
Donne moy donc conseil, quel moyen ie tiendray
Pour auoir ces galans & morts les estendray:
Mais tiens toy pres de moy, telle que deuant Troye
Quand nous rasons ses murs & la mettions en proye.
Si tu m'assistes tant, si telle ie te sens,
Le cœur me bastera d'en combattre cinq cens,
Si ie t'ay avec moy, & tu m'essecourable
O fille à Iupiter deesse venerable.

Elle luy respondit. Ie viendray tout à point
Ie te te dourray secours & ne te faudray point
Et lors qu'on nous verra si bien branler l'espee,
I'espere que la terre au sang sera trempee
De ces braues mignons, au sang qui coulera
Quand nous serons apres le painé rougira,
Ie d'y de tout autant qu'ils sont, & dont la rage,
Ulysse, a degasté ton bien, ton heritage.
Mais ie te veux encor deguiser de tout point
Et que, qui que ce soit, ne te cognoisse point.
Tapeau qui maintenant est fresche & bien tendue
Ie veux qu'elle se ride, & qu'elle soit rendue
Et seche & sans humeur: ton poil ie noirciray
Encore qu'il soit blond, ie t'envelopperay
De si sales haillons, que tu seras horrible

A qui

A quiconq te verra, rendray ton œil terrible
 Et ton visage affreux, pour le monstrier à tous
 Mesmement à ta femme, & à ton enfant doux
 Sur tout aux poursuiuans hydeux & efroyable
 Deuant que commencer va t'en au prealable
 Ches ton maistre porcher, qui garde par les champs
 Tes porcs, les engressant des glands qu'ils vont cerchās
 Sous les chesnes branchus. Il t'est seur & fidelle,
 Et à ton fils de mesme, & à ta femme belle.
 Tu le rencontreras gardant ses gras pourceaux
 Ioignant le roc corax, auprès des fresches eaux
 De la claire Arethuse au dessus de la riuē
 Paisans le ferme gland & beuuans l'onde viue.
 Tu demeureras là, des choses t'enquerant
 Que tu t'auiseras, tant que i'iray courant
 Jusqu'en Lacedemon, de belle femmes pleine
 En r'apelle ton fils & icy le r'amene.
 Car il s'en est allé jusqu'en Lacedemon
 Deuers Menelaus, l'Atride au grand renom,
 Pour s'enquerir de toy, s'il pourra point entendre
 Quelque bonne nouuelle, & de ce prince apprendre
 Si tu serois encor sur la terre viuant.

Lors le sage Vlysses le propos poursuiuant
 Ayant ouy cela dit ainsi à Minerve.
 Veu que tu retiens tout en toy comme en reserve,
 Que tu n'ignores rien: que ne luy disois tu
 La verité de tout? est-ce afin que, battu
 Des vagues & des vents il coure tout le monde,
 Endure mille maux: & ceste troupe immunde
 Consumera, gourmande, ains qu'il soit reuenu
 Et tout mon patrimoine & tout mon reuenu.

N'en sois point en soucy, luy dit lors la deesse

LE XIII. LIVRE

Et ne prend pour cela de deuil & de tristesse.
 J'ay voulu que ton fils vint en Lacedemon
 Pour acquerir bon bruit & glorieux renom,
 Il est en la maison de l'Atride à son aise.
 Mais certains ieunes gens plains d'enuie mauuaise
 Sont montez sur la mer, espient son retour,
 Et tachent s'ils pouuoient luy faire un meschant tour
 Ils veulent le tuer auant qu'il s'en reuienne.
 Mais ils se trompent fort, & plustost qu'il aduienne
 Que la terre plustost en couure l'un de ceux
 Qui desirent son mal & perdent malheureux
 La maison & le bien du pere à Telemaque,
 Et qui vont consumans les richesses d'Ithaque.
 Quand elle eut acheué, sa verge elle estendit,
 Et sa peau par dehors seche & noire rendit,
 Changea ses cheueux blonds, couurit d'une peau sale
 Les membres deguisez du vieillard sec & palle,
 Son visage enlaidit, le vestit de lambeaux,
 Vieux, usez enfumez, & tumbans en morceaux.
 La peau d'un viste cerf sans estre courroyee
 Couuroit ces membres vieux, sur un pal appuyee
 Sa main senestre estoit : & un bissac vilain
 De rompures, de trous & de pieces tout plein
 Qui pendoit sur son dos d'une vieille courroye
 Elle donne à son homme, & ainsi ell'l'enuoye.
 Le riuage laissant ayans bien consulté
 De ce qu'il failloit faire en telle extremite,
 Ils se separent lors. Pallas plus loing s'escarte
 Et s'en va rencontrer Telemachus a Sparte.

Fin du treziesme liure.



LE QUATORZIESME LIVRE DE L'ODYSSEE D'HOMERE.

ARGUMENT.

Ulysses s'achemine aux champs vers Eumæe son maistre porcher, ses chiens le veulent mordre. Eumæe le reçoit de bon cœur. Ils discourent ensemble, il se disguise, & se donne à entendre pour vn autre, luy faisant quelques contes controuuez.

AUTRE SOMMAIRE.

*Ses chiens le veulent mordre, & le maistre porcher
Reçoit sans y penser ches luy son maistre cher.*

Mais Ulysses laissant le riuage moiteux.
Entre dans vn sentier & rude & raboteux
Chemine par l'espace des ombrageux bo-
cages,

Et grimpe sur le haut des grands costaux sauvages.
Le sentier le menoit où pour l'heure habitoit
Le fidelle porcher que Pallas luy contoit.
Là sur tout il auoit & la charge & la cure
Et des gens d'Ulysses & de leur nourriture.
Il le trouua seant au deuant de la cour
D'un grand & beau logis enfermé tout autour

LE XIII. LIVRE

Et basti en bel air. En l'absence d'Ulysse
 Luy mesme auoit construit tout ce bel edifice
 A ses propres despens, sans que Penelope
 N'y le viel Laertes eussent aux frais trempé,
 Amenant sur le lieu les grands cartiers de pierre.
 Une haye d'espine & l'enceint & l'enserre
 Avecques de gros paux tout au trauers fichez
 De bois de chesnes forts qu'il auoit ebranchez.
 Ny ayant entre deux que bien fort peu d'espace,
 Il auoit fait dresser au dedans de la place
 Douze grands toits à porcs, l'un l'autre se touchans
 Pour les truyes sans plus, où elles vont couchans
 Cinquante dans chascun, avecque leurs ventrees
 Et dedans peuuent estre à leur aise veantrees.
 Les masles sont aupres: mais ils couchent dehors
 Moins en nombre beaucoup: car tous les plus grãds porcs
 Decroissoient grandement, pour-ce que d'ordinaire
 Les braues poursuinans en faisoient bonne chere,
 Et failloit que le maistre eust soing pour leurs repas
 De leur en enuoyer tous les iours des plus gras
 De trois cens & soixante estoit pour lors la bande.
 Aupres deux quatres chiens de taille forte & grande
 Que le maistre porcher auoit nourry iadis
 D'ordinaire couchoient comme lions hardis.
 Luy mesmes ses souliers rapetassoit pour l'heure
 D'une grand peau de beuf de gentille teinture:
 Trois des autres porchers estans pour lors au champs
 Alloient à la paisson les gras troupeaux touchans.
 Il auoit enuoyé le quatriesme en la ville
 Mener un porc par force à la bande inciuile
 Des amans insolens, qui ne vouloient chommer,
 Ains tousiours des plus gras en faisoient assommer.

Pour faire leurs festins & bien fournir leurs tables.

Comme Ulysses fut veu de ces chiens effroyables
Ils accourent sur luy, abbayans fierement.

Luy qui se voit par eux pressé cruellement
Prudent & plein d'astuce il faict ferme en sa place
Et son baston luy cheut, sans user de menace:

Las! quelle cruauté tumber en tel ennuy
Et courir le hazard lors qu'il se voit ches luy.

Lors le porcher accourt en toute diligence,
Son cuir luy chet des mains, les chiens il chasse & tense,
Les espard par les champs à grands coups de cailloux,
Puis en vint à son maistre, & d'un parler fort doux,

Pauvre vieillard, dit il, ne s'en est fallu guere
Que ces malheureux chiens de leur gueule meurtriere
Net'ayent dechiré. Tu m'eusses à iamaïs
Reproché ce malheur. Mais i'ay bien desormais
D'ailleurs que de cecy sujet de me plaindre,
De gemir mes malheurs & du destin me plaindre.
C'est pour un diuin Roy que ie lamente ainsi,

Que ie pleure sans cesse agraué de soncy,
Et tous ces beaux porcs gras par ces campagnes belles
Pour d'autres ie nourry gourmandises cruelles.

Et luy mourant de faim est peut estre poussé
Errant & vagabond par les flot courroucé,
Ou bien il va courant, ô fortune legere
Quelque esloigné pais, quelque terre estrangere,
S'il vit encor au moins, s'il hume encor le iour
Et s'il voit du Soleil le lumineux retour.

Mais entrös, mon bon hōme, entrös, nous aurös cure
De te faire à plaisir prendre ta nourriture
Et de te faire boire, & puis quand tu seras
Bien plein & bien content, tu nous raconteras

LE XIII. LIVRE

De quel pais tu es, & puis quelles fortunes
Tu as peu tolerer rudes & importunes.

Il dit, puis il commence à se metre deuant,
Le mene en la maison, & des feuilles leuant
Par terre les espanches, & leur espais branchage.
Puis il estend la peau d'une cheure sauvage
Et mollete & polie, il en faict un cheuet
Et un lict large & grand, dessus le lict le met
Pour le faire coucher. Sur ceste couche molle
Ulysses est bien ayse, & prenant la parolle,

Les Dieux du ciel, dit-il, & le grand Iupiter
Veillent à ton souhait tousiours le contenter
O mon hoste courtois, qui m'as receu de grace
Et m'as donné ches toy une si bonne place.

Eumae luy dit alors. Seroit mal faict à moy
S'il m'arrinoit quelcun plus pauvre encor que toy
Que ie le meprisasse. Or tout estranger mesme
Tout pauvre, est enuoyé de Iupiter supresme.
Ce que ie puis donner n'est pas de grand valeur,
Ne monte pas beaucoup, mais il vient d'un bon cœur.
Et puis tous seruiteurs ordinairement, craignent,
Lors principalement que ieunes princes regnent.

Certainement les Dieux ont mis empeschement
Au retour du bon Roy, qui si benignement
M'aymoit, me maintenoit, & faisant son voyage
Comme à son cher amy, m'a laissé, heritage,
Maison, possessions, en outre m'a baillé
Femme tres-desiree. Or i'ay fort trauaillé
A gouverner son bien, mais Dieu par sa clemence
A benit mon labeur & acru ma cheuance.
Ce mesnagement doncoù ie m'adonne icy
S'augmente par ma peine & par mon soin aussi,

Sila courbe vieillesse à ce Roy miserable
Se fust passée, hélas! en sa terre agreable,
S'il fust deuenu vieil en ses champs Ithaquois,
He! combien de richesse & de biens a la fois.
Car il m'eust fort aydé de sa seule presence.
Mais hélas! il est mort. Que toute la semence
D'Helene, son enfance & sa posterité
Perisse entierement: pour ce qu'elle a esté
Cause de tant de maux qui sont chus sur la terre
Et que tant d'hommes forts sont peris en la guerre
Sous le commandement du Roy Agamemnon
Il s'en alla iadis pour acquerir renom
Vers le cheualeux Ilion, faire guerre
Auec toute la Grece à la Troyenne terre.

Ayant ainsi parlé, sa ceinture il ceignit,
Et sa robe haussant ses reins il estraignit,
Puis aux porcs s'en alla, & de toute la troupe
Il prend deux gras cochons & la gorge leur coupe,
Pour les faire rostir, il les prend tous sanglans,
Il les met en morceaux, les embroche tremblans,
Les rostit, les fait cuire, & la fleur la plus fine
Esparpille dessus de mollete farine:

Les porte à Vlysses, & puis luy presentant.
Le doux vin, en ces mots il l'alloit confortant:

Mon hoste, ie te pry mange ta suffisance
De ce que te fournit ma petite puissance,
Cene sont que cochons: les plus beaux, les plus gras
Seruent aux poursuiuans de banquets delicas.
Ces hommes sont du tout sans respect & sans honte,
Et de compassion ne tiennent aucun compte.

„ Or les Dieux ne sont pas amis des cruautéz
„ Ne fauorisent pas telles meschancetéz,

LE XIII. LIVRE

„ Ils ayment l'equite, ceux qu'ils voyent bien faire
 „ Ils leur en scauent gré, leur en rendent salaire
 Les plus fiers ennemis, les plus cruelles gens
 V sans d'hostilité sont prompts & diligens
 De faire leur ravage, ostent par malencontre
 Tout ce qui deuant eux se trouue & se rencontre,
 Se chargent de butin, & sont prest d'emporter
 Ce qui leur est offert du vueil de Iupiter.
 Mais comme ils ont rempli de butin leur nauire
 Chacun gaigne le haut & ches soy se retire,
 Par fortune saisis de crainte & la frayeur
 Qu'ils ont d'estre suuis leur faict trembler le cœur.
 Or il faut que ces gens & fascheux & molestes
 Ayent sceu de la voix de quelques Dieux celestes
 La mort de ce bon Roy perdu si pauurement.
 Car ils ne veulent pas pourchasser iustement
 Ny comme il apartient. Ches eux ils ne retournent,
 Mais dedans sa maison sans propos ils sejourment,
 Dilapident son bien sans moderation,
 Et n'y a nul propos à leur extortion:
 Et par autant de iours que le bon Dieu eclaire
 Et par autant de nuits qu'il scache encor faire
 Ils ne font que tuer: & ne leur suffit pas
 D'une beste ou de deux à leur gourmand repas.
 Pour le vin, sans raison, sans loy, ne conscience
 Ils le vont consumans en perdue abondance.
 Grandes par cy deuant estoient ses facultez
 Et les plus grands seigneurs qui ont de tous costez
 Où soit en terre ferme, ou en Ithaque mesme
 De biens & de bestail vne cheuance extresme
 Non pas vingt des plus gros, n'oseroient nullement
 S'accomparrer à luy, ie te diray comment

Il a douze troupeaux de bœufs par les campagnes,
De brebis tout autant paissans par les montagnes,
De Cheures tout autant par les panchans coupeaux
Tondans la feuille tendre, & autant de pourceaux.
Chacun de ces troupeaux à ses gardes feables:
Pour les Cheures à part on a fait onze estables
Que les pastres au loing hors des champs vont gardât,
De ses troupes chacun bon compte va rendant.
Chacun d'eux tous les iours à toute heure qui passe
Prend un bœuf, un mouton, ou une Cheure grasse
La plus belle du parc, les mene aux amoureux
Afin d'en apprestier leurs festins plantureux.
Moy ie garde les porcs, à moy en est la charge,
Desquels le plus souvent le plus gras, le plus large
Leur est aussi mené, & les mangent sans fin.

Ainsi luy disoit-il. L'autre qui avoit faim
Cassoit ce-temps pendant, & remplissoit sa pance,
Et beuvoit le bon vin versé en abondance:
En s'attristant par fois, & ruminant bien fort
Comme il pourroit donner à ces mignons la mort.

Après qu'il eut souppé à chere suffisante,
Le porcher prend encor sa tasse & luy presente
Pleine de son bon vin: c'est celle où il beuvoit,
Et luy gaillardement l'accepte & la reçoit,
Et la vuide ioyeux du bon ius delectable.
Après se retournant au porcher à la table,
Se prend à dire ainsi. Or sus raconte moy
Qui est ce Prince riche, & ce tant puissant Roy
Qui t'acquit, ce dis-tu, & toute ta cheuance
De ses propres moyens, & avec sa finance,
Et que tu dis encor pour acquérir renom
Estre mort, en suyuant le Prince Agamemnon,

LE XIII. LIVRE

Dyle moy ie te pry : si ie l'auois peut estre
 En allant par le monde au moins peu recognoistre,
 Iupiter & les Dieux sçauent si ie diray
 Si pour vray ie l'ay veu, ou si ie m'en tairay.
 I'ay couru diuers lieux, i'ay veu mainte prouince,
 Auquel lors le porcher, des autres porchers prince:
 Mon bon homme, combien que diuers estranger
 Vint en ceste maison passé par maint danger,
 Et qu'il nous rapportast de ce prince nouuelle,
 Son pere, ne son fils, ne sa femme fidelle
 N'y croiroient nullement, tout ce qu'on en diroit
 Fust vray, fust faux, i'amaïs ne les esmouueroit.
 Ces coureurs de pays indigens, miserables,
 Rapportent tousiours faux, & ne sont veritables.
 Car ils veulent disner. Que si quelque estranger
 En ce fertile pays pauvre se vient ranger,
 Parle à Penelopée de chose qui luy plaise,
 Bien que soit en mentant, elle le met à l'aise
 A table à banqueter, & de tout s'informant
 La pauurete se va de douleurs consumant,
 Elle fond tout en pleurs, & selon sa coustume
 S'humecte tout le sein de larmes d'amertume:
 Pieté feminine, & qui tousiours sied bien
 A la femme pudique, à qui le mary sien
 Perdu ne se void plus, & ce-pendant qu'il erre
 A ces iours achenez en quelque estrange terre.
 Or sus mon bon vieillard, bonte toy à songer,
 Vien nous quelque nouuelle inuenter & forger,
 Attrappe en ce faisant de la Nymphé diuine
 Quelque bon hoqueton, ou quelque manteline.
 Helas, il est gisant long temps a par les champs
 La proye des oyseaux, les chiens vont écorchans

Sapeau dessus ses os, les Autours effroyables
Mangent long temps y a ses boyaux miserables
Tirez hors de son corps, ou bien és eaux là bas
Les poissons en ont faict leur proye & leur repas,
Et ses os blanchissans és sablonneuses plaines
Gisent ensevelis dans les seiches arenes.
Ce bon Prince, ce Roy n'est plus, n'est plus à nous
Helas, il est perdu, & n'a laissé à tous,
Et principalement à moy, que sujet d'estre
En pleint perpetuel. I amais un meilleur maistre
Ie ne retrouueray ou que ie puisse aller,
Ne qui puisse i amais en bonté l'égalter.
Soit que ie coure aux lieux de ma naissance chere,
Soit que i aille reuoir ou le pere ou la mere
Desquels ie suis sorty: dont ie ne plaindrois pas
Tant que de cestui-cy la perte & le trépas:
Encor que i aye en d'eux la naissance & la vie,
Non, ie n'ay point au cœur vne si grande enuie
De les voir, retourné en mon pays natal
Que i'ay de voir Ulysse, & qu'il me faict de mal
De ce qu'il est perdu, tant i'ay en reuerence
Ce nom que ie regrette, & nomme en son absence:
Tant, las, il me portoit de bonne volonté.
Ie l'appelle tousiours en douceur & bonté,
Comme mon frere aisné, & sa memoire forte,
Combien qu'il soit absent i amais en moy n'est morte.
Lors Ulysses luy dit: Tu ne peux tant donner
A ta foy, qu'Ulysses doine onques retourner,
Tu en as, ce dis-tu, perdu toute esperance.
Or ie te iure icy la supresme puissance,
Non temerairement, bien tost tu le verras,
Mais recompense aussi donner tu m'en feras:

LE XIII. LIVRE

*Arrivé qu'il sera dans sa maison divine
 Alors habille moy, ou d'une manteline
 Ou d'un bon hoqueton, pour t'avoir seurement
 Annoncé qu'Ulysses viendrait finalement.
 Je ne veux toutesfois, bien que plein d'indigence
 Qu'il ne soit arrivé, prendre la recompense:
 Ichay plus que l'enfer un que la pauvreté
 Contraint impudemment de dire faulseté.
 Que le grand Jupiter qui du Ciel tient l'empire
 Me soit un iour tesmoin de ce que tu m'ois dire,
 Ceste hospitalité, & ceste table icy
 Où i'ay esté receu me le tesmoigne aussi,
 Et du grand Ulysses la digne couverture
 Où ie suis entré pauvre, oye ce que ie iure,
 Tout ce que ie t'ay dit sans faillir adviendra,
 Ulysses en sa maison dans cet an reviendra,
 Ce mois n'aura si tost veu son heure dernière,
 L'autre n'aura si tost commencé sa première
 Que dedans son pays remis on le verra:
 De son fils, de sa femme alors il vengera
 Les mortels ennemis, ceux qui son bien deuorent,
 Et sa maison illustre insolents deshonorent.*

*Auquel Eumee, alors ainsi tu respondis.
 Iamais, ô bon vieillard, pour tout ce que tu dis
 Tu n'auras recompense, & ce Roy honorable
 Ne reverra iamais son pays desirable.
 Mais boy tout à ton ayse & pren ce bon repas,
 Tu dis chose incroyable & qui n'adviendra pas.
 Parlons donc d'autre chose, & qui point ne m'ennuye:
 Pour autant que mon œil mal-aisement s'essuye
 Quand i'entens que quelqu'un me vient parler de luy:
 Tristesse, marriçon, melancolie, ennuy,*

Me geinent là dedans, Soit donc comme tu iures
Qu'Ulysses reuiendra, soit comme tu l'asseures,
Soit comme tant de fois i'ay veu Penelopé
Le cœur plein de souspirs, l'œil de larmes trempé
Le demander aux Dieux, le vieux Prince d'Ithaque
Laërtes autant qu'elle, & le beau Telemaque
Qui ressemble à un Dieu, & moy plus qu'eux cent fois
Qui l'ay requis aux Dieux & de cœur & de voix.

Or ie plein le desastre & la fortune inique
De Telemach', qu'Ulysses a laissé fils unique
Dés sa tendre ieucesse, il ressembloit tout fait
Un gentil arbrisseau tout noble, tout parfait,
Que les Dieux ont planté, croissant en beaux ramages,
Et reiettons plaisans, & verdoyans feuillages.

Souuentes fois i'ay dit, estant tout seul assis,
Quand son aage viendra plus fort & plus rassis,
Il ne sera pas moindre en vertu, en prudence,
En forme, en maiesté, en armes, en vaillance,
Que son pere a esté. Ie luy voy beau le corps,
La face bien formée, & les membres bien forts.

Ie ne sçay si un Dieu son ame auroit blessée,
Ou si quelque mortel l'auroit interessée:
Mais une humeur l'a pris depuis peu de courir.

Il est allé à Pyle afin de s'enquerir
Qu'est deuenu son pere, & si par grands merueilles
Quelque bruit en viendroit certain à ses oreilles.
Ce-pendant ces méchans ont armé un vaisseau,
Ils sont en quelque part à l'attendre sur l'eau
Afin de le surprendre, & par leur artifice
Faire que d'Arcesie entièrement perisse
La race dans Ithaque, & que le tombeau creux
Se repaisse en sa mort de tout ce sang fameux.

LE XIII. LIVRE

Mais laissons tout cela, n'en parlons davantage,
Soit qu'il doive tomber souz leur cruelle rage,
Soit qu'il eschappe heureux leur fiere trahison,
Et doive reuenir en sa douce maison:

Le benin Iupiter en sa garde le tienne.

Bon vieillard conte moy de la fortune tienne,
Dy moy tes pauuretez, tes peines, tes ennuis,
D'où tu viens, qui tu es, & quel est ton pays,
Ta race, ta maison: quel vaisseau, quelle sorte
De gens t'ont mis icy, & t'ont seruy d'escorte,
C'est d'y venir à pié impossibilie.

Pasteur, ie te diray, dit il, la verité,
Quand le pain sur la table & le vin en la tasse
Ne nous fandroient iamais, tandis qu'en ceste place
Nous faisons bonne chere en toute oyssiueté,
Et les autres seroient par la chaleur d'Esté
A faire leur travail, ie ne te pourrois dire
La moitié de mon mal, le quart de mon martyre:
Tous les épics d'un an, toute la neige aussi,
Ne seroient assez longs pour conter le soucy
Et les maux que i'ay eus des Dieux en abondance:

L'arriue de Candie où i'ay pris ma naissance,
Mon pere estoit fort riche en auoir paternel,
Il eut plusieurs enfans, du costé maternel.
Leur noblesse estoit grande, illustre, & en estime,
Mais ie ne fu pas né de mere legitime,
Ains d'une concubine, & mon pere acheta
Esclane à prix d'argent celle qui m'enfanta,
Et qui me mit au monde. Or encor que ma mere
Fust telle que i'ay dit, ce neantmoins mon pere
Castor fils d'Hylacus (i'ose me renommer
De ce pere le fils) ne laissa de m'aimer

Comme ses vrais enfans. Il estoit en Candie
Honoré comme vn Dieu tandis qu'il fut en vie,
Le peuple l'adoroit plein d'honneurs triomphans,
Plein de bien, de richesse, & de braues enfans.
Mais si tost que la Parque eust submergé son ombre
Dans le fleuve de Dis, & que le destin sombre
L'eust rangé chez Pluton, mes freres orgueilleux
De telle heredité, de biens si merueilleux,
Champs, richesses, tresors à partager se mirent,
Et de tout ce grand bien petite part me firent.
Ce beau partage faict ie ne fu longuement
Que ie ne prisse femme & bien & richement,
Ma vertu me l'acquit, mes armes, ma proïesse:
Car ie n'auois le cœur engourdy de paresse,
Ie n'estois ignorant du fort mestier de Mars,
Et ne tournois le dos aux coups ny aux hazards.
Mais, las, tout cela tombe asteure en decadence:
Si peux-tu toutesfois à voir mon apparence
Tirer presumption de ma force & vertu,
Et les malheurs encor' ne m'ont point abbatu.
Certes Mars & Pallas, l'invincible Deesse
Ne m'ont point depourueu de force & hardiesse:
Toutes & quantes fois qu'en embuscade mis
I'ay porté malencontre à tous mes ennemis
Suiuy de bons soldats, i'amaïs (& i'en fay gloire)
L'image de la mort ne me vint en memoire,
Et i'amaïs la frayeur ne me glaça les os.
Mais tousiours le premier de cœur de pieds dispos
I'allois donner dedans, & tousiours mon espee
Estoit dedans le sang la premiere trempee.
Tel en guerre i'estois, tel i'estois aux combats,
Le soing de la maison ne me derenoit pas,

LE XIII. LIVRE

Le soucy d'agrandir le profit domestique,
Le bien de mes enfans ne m'estoit en pratique:
Car mon humeur estoit de courir sur la mer
D'auoir de bons vaisseaux, & de faire escumer
Souz mes rames les flots. Les piques bien dorees,
Les ianelots pointus, les flèches acerees
C'estoit tout mon plaisir: les armes, la fureur,
Et les guerres qui sont aux autres en horreur.
Dieu m'auoit faict ainsi: vn autre à autre enuie,
Et à d'autres mestiers accommode sa vie.

Deuant que contre Troye allassent les Gregeois
I'auois esté desia Capitaine neuf fois,
Je conduisois mes gens & mes nauys sur Neptune,
Et contre tout le monde esprouuois ma fortune:
Et tout me succedoit, tout selon mes discours
Croissoit, & iamais rien ne me vint à rebours.
Par là i'acquy en bref mainte grosse cheuance,
Ma maison augmentoit en honneur, en puissance,
Et mon nom s'en alloit par Crete fleurissant.

Mais quand de Iupiter le pouuoir tout puissant
Voulut contre Ilion armer toute la Grece,
Guerre qui mit à mort tant de braue ieunesse.
Il me fallut aussi en diligence armer
Auec Idomenee, & monter sur la mer,
Nous en aller à Troye, & sur le bleu empire
De Neptune equipper mainte forte nauire.
Or ne falloir-il pas tarder, ny reculler,
N'eust esté que l'honneur, il y falloir aller
Crainte qu'on ne nous vint taxer de coïardise,
Nous incitoit assez à subir l'entreprise
Neuf soleils tous entiers nous fusmes à l'entour
Des hants murs d'Ilion combatans nuit & iour,

En fin

En fin le dixiesme an à fleur nous les razasmes,
Puis remontans sur mer les voiles nous haussasmes
Pour nous en reuenir. Mais Neptun dispersa
Les nauires des Grecs, & sur mer les poussa:
Ie vins, mais Iupiter m'enuoya en colere
Le destin malheureux d'une fortune amere.

Ie ne fu pas un mois entre les voluptez
Dont ie m'apperceuois comblé de tous costez,
Que tout m'alleit riant, ma maison fortunee,
Femme ioyeuse & belle, & nouuelle lignee,
Femme que i'espousay en ses ans florissans:
Que desirs trop cruels le cœur me vont poussans
A plus haute entreprise, & ne me fut possible
De supporter plus outre un repos si paisible.
I'arme donc une flotte & remonte sur mer,
L'ardeur qui me poussoit me dictoit de ramer
En la terre du Nil. Ia desia mes gallees
Neuf en nombre flottoient sur les ondes salées,
I'assemble tous mes gens, gailtards ils banquettoient
Par six iours, & de vins & viures se traittoient,
Et moy-mesme immolois à la majesté grande
Des Dieux sur leur autel mainte souëfue offrande:
Sur le septiesme iour vers le Soleil Leuant
Nous montasmes sur mer & nous mismes au vent
A la venë de Crete allans à voile pleine,
Et le vent nous poussoit d'une plaisante aleine,
Nos naufs rasoient la mer, & nos voilles sonnoient
Au pris que le Pilote & le vent gouuernoient.
Sur le cinquiesme iour vindrent nos naufs profondes
En Egypte, où le Nil faict égayer ses ondes:
Ayant deliberé d'entrer dedans ses eaux
Ie commande à mes gens d'y dresser leurs vaisseaux

LE XIII. LIVRE

Et de n'en sortir point, des escoutes i' enuoye:
 Eux inconsiderẽs se mettent à la proye
 Se fians en leur force, & courans par les champs
 Ils mettent tout au fil de leurs glaines trenchans:
 Ils degastent les bleds, & les troupes craintives
 De femmes & d'enfans ils entraînent captives.
 La frayeur, la clameur, court des champs aux citẽs,
 Dessus le poinct du iour les bourgeois incitez
 Conuiennent tous ensemble, & la troupe animee
 A cheual & à pied fait vne iuste armee.
 Les morions luisans ils marchent contre nous,
 Et Iupiter iettant ses foudres en courroux
 Tourna mes gens en fuite, & nul n'eut le courage
 De soutenir le choc, la fuite, le carnage
 Nous prend de tous costez, les ennemis plus forts
 Estendent la plus part de nos gens roides morts,
 Les autres prisonniers souz leur puissance rude
 Sont toucheẽs, pour subir tres-dure seruitude,
 Mais Dieu eut soin de moy en ce piteux effort.
 Toutesfois son plaisir fust que ie fusse mort
 Sur le champ en Egypte, au beau milieu des armes,
 Helas qu'il m'eust sauueẽ & d'ennuis & de larmes.
 L'arrache mon armet, iette mon contelas,
 Destache ma rondache, & iette tout à bas
 Cours au cheual du Roy, tombe deuant sa face,
 Me iette à ses genoux, les baise & les embrasse,
 Il me donna la vie, en son char me monta,
 Me mena dans la ville, & leur ire arresta,
 Car ils m'environnoient, & de grande furie
 Me presentans leurs dards vouloient auoir ma vie.
 Il me tira delà, de crainte d'encourir
 L'ire de Iupiter si l'on m'eust fait mourir:

Car il est protecteur des supplians, & venge
Tres-affreusement le tort qu'on fait à un estrange.

Je vescu là sept ans assez heureusement,
Mes affaires menay assez prosperement
Entre ces gens du Nil, & me fit on largesse
Assez benigne de bien & de richesse,
Voicy le huitiesme an qui desia s'en venoit,
Et ses iours reuolus dans son rond retournoit,
Quand un Phenicien, homme plein de malice,
Dont force gens auoit ruine l'artifice,
M'accosta doucement. Il me persuadoit
D'aller en Phenicie, où lors il possedoit
Force biens, force champs, force riche heritage.
Il me tint tout un an avec son doux langage,
Je demeure chez luy. Or se passant le temps,
Et les iours & les mois, en fin vint le Printemps.
Il me depescha donc comme pour la traffique,
Sur un vaisseau chargé en la terre Libyque.

Or sa meschanceté reuenoit à cela,
De me faire en-aller & de me vendre là,
Car il ne pensoit pas en tirer peu de somme:
Je le suy, me doutant toutesfois de mon homme,
Mais force m'estoit bien. Mais pour l'heure le vent
D'un souffle bon & doux nous alloit poursuyuant:
Si que prosperement sur la mer nous cinglâmes,
Tant que pres de Candie en fin nous arrivâmes,
Et Iupiter alors du mal nous ourdissoit:
Nous laissons apres Crete, & plus on n'apperçoit
Isle, terre, ne port: nous n'auons plus en uenë
Rien que mer, rien que Ciel. Lors vne noire nuë
Iupiter fond sur nous portant orage & bruit,
Tenebres & tempeste: au lombre de sa nuit

LE XIII. LIVRE

L'eau se couvre cachee, & Iupiter qui tonne
 Eclairs, foudres & feux au trauers de nous donne,
 Le vaisseau pironette, & du foudre frappé
 De tonnerre est remply, de foudre enueloppé:
 Nos gens tombent en mer, à corneilles semblables
 Flottons dessus les eaux, les ondes effroyables
 Engloutissent la barque, & le grand Iupiter
 Leur vouloit tout espoir de se sauuer oster.
 Il me mit toutesfois, en me sauuant à nage,
 Le mast entre les mains, me donna le courage
 De le prendre & serrer pour euitier la mort:
 L'eau le vent me portoient d'un admirable effort,
 Neuf iours entiers la mer sur elle me souleue,
 Mais le dixiesme flot me iette sur la greue
 Des Thesprotes humains. Le Ciel estoit bandé
 Et la nuit estoit close alors que i'aborday
 A nage sur le bord, où me sauua la vie
 Le gentil Roy Phedon, & me fit courtoisie:
 Car son cher heritier me courut au deu ant,
 Me recent demy-mort du froid, du flot, du vent,
 Du traual de la mer, me mena en sa salle
 Me tenant par la main, tant qu'en sa court royalle
 Il m'eust accompagné, & tres-benignement
 Déchiré, me courrit d'un bon accoustrement.
 Là ie l'ouy parler d'Ulysses le Roy sage,
 Comme il l'auoit receu par le droit d'hostelage,
 On luy auoit dressé tout son embarquement
 Pour iusqu'en son pays le mener seurement.
 Les richesses qu'Ulysse auoit lors amassees,
 Il me les fit monstrier à monceaux entassees:
 Tant fer elabouré, qu'or & cuyure luisant.
 Le tout tel, qu'il seroit pour nourrir suffisant

Quelqu'un iusques aux enfans de la race dixiesme,
Et chez ce Roy estoit tout ce tresor extresme.

Il me contoit comment le Cephalenien
Son chemin auoit pris au bois Dodonien
A Iupiter sacré, pour auoir favorable
Du chesne prcdiseur l'oracle veritable,
Et comment il deuroit reuoir finalement
Son Ithaque par luy desirée ardamment,
S'il reuiendrait caché dans sa chere contree,
Ou si à découuert il y feroit entree:

Dessus l'autel sacré iurant il protestoit
Que pour ce seul conuoy des nauys il apprestoit,
Les rangeoit dans son port, & que tout l'equipage
Et les gens estoient prests pour faire le voyage.
Mais l'occasion vint de m'enuoyer deuant,
Qui fut qu'une nauire alloit prendre le vent,
D'hommes Thesprotiens, qui venoient faire charge
De bleds en Dulichie, & prendre la mer large.

Il commande à ses gens que ie fusse porté
Vers le Roy Acastus en toute seureté,
Mais estans sur la mer ceste méchante bande
Machina contre moy vne trahison grande,
Afin que ie tombasse en des malheurs nouueaux:
Nous ne fusmes plustost bien auant sur les eaux
Qu'ils me firent sentir leur grande ingratitude,
Prests à me faire entrer en dure seruitude.

De mes habillemens & bons & precieux
Ils me font despouiller, & me donnent ces vieux
Que voicy sur mon dos: au soir ils arriuerent
En la plaisante Ithaque, alors ils me lierent
De cordes dans la barque, & puis chacun d'eux sort
Et s'en vont apprester leur soupper sur le port:

LE XIII. LIVRE

Les bons Dieux irritez contre leur inclemence
 Rompirent mes liens. A l'heure ie commence
 Deplier sur mon chef mes déchirez haillons,
 Me couler dans la mer, puis ie fends les sillons
 A grand force de bras, l'onde me porte à nage,
 Et ie coupe le flot, tant que sur le riuage
 J'aborde vistement. Là un bois verdoyant,
 Et maint grand chesne alloit ses feuilles ondoyant:
 Je me tapy dessous, & elles me cachèrent,
 Les cruels inhumains longuement me chercherent
 Avec de grands regrets, ils visitoient par tout,
 Et fouilloient la forest de l'un à l'autre bout.
 Ils penserent en fin de ne point davantage
 Perdre temps à chercher le bois & le riuage,
 Et montans sur la nau à force de ramer
 Regagnerent le hault de la profonde mer.
 Les Dieux à seureté souz les feuilles me mirent,
 Et puis en ta maison benins me conduisirent,
 Toy qui, comme ie voy, te maintiens prudemment.
 A donc luy respondit le porcher brefuement:
 O sur tous estrangers, estranger miserable,
 Certes tu m'as esmeu en contant pitoyable
 Tes malheurs, tes erreurs: mais tout ce que tu as
 Raconté d'Ulysses, iamaïs tu ne pourras
 Me le persuader, ce sont fables & songes
 Trouuez mal à propos. Qu'uses-tu de mensonges
 Si temerairement en l'estat où tu es?
 Je sçay bien que mon Roy ne reuiendra iamaïs.
 Les Dieux l'ont trop hay, puis qu'ès mains ennemies
 Souz Troye il n'est pas mort, nō plus qu'ès mains amies
 Combatant vaillamment. Les Grecs pour sa valeur
 S'il y fust succombé, eussent à son honneur

Un sepulcre dressé, superbe, & conuenable
A Prince si vaillant, & qui eust honorable
Pour son fils à iamais, son beau renom ietté
Fameux & triomphant à la posterité.
Mais maintenant il gist déchiré des harpies
Sans reputation. Or ie garde ses truyes
Et ses grands pourceaux gras, vray amateur des chāps,
Haïssant le commerce & les hommes méchans,
Ie ne vay iamais plus dans la maison royalle,
Que quand Penelopé son espouse loyalle
Des Princesses l'honneur veut parler avec moy
Alors qu'elle a ouy des nouuelles du Roy:
Ses seruiteurs alors s'enquierent, se tourmentent,
Et de sa longue absence attristez se lamentent.
Les autres ce- pendant gourmandent à plaisir,
Et dedans sa maison viuent à leur desir.

Mais depuis, ie n'ay eu volonté de m'enquerre
Qu'un Etole menteur qui tracassoit la terre,
Me trompa méchamment. C'estoit un vray volleur,
En fin il arriva ceans à mon malheur.
Ie l'y receu selon ma petite puissance,
Cet homme me disoit que pour toute assurance
Il auoit veu en Crete Ulysse, s'adressant
Au Prince Idomené, ses naufs rebastissant
Brisees par les flots. Que pour chose certaine
Il deuoit estre icy dans la moisson prochaine,
Pour le moins en Automne, alors qu'on cueilleroit
Des arbres les fruits meurs, & qu'il ameneroit
Auec luy tous ses gens, hardis, pleins de vaillance,
Et portans avec eux butins en abondance.

Bon homme, par ainsi puis que les Dieux tres-hauts
T'ont conduit en ce lieu, apres mille trauaux

LE XIII. LIVRE

Par toy soufferts sur mer : Ne me dy point de songes,
Car ie hay à la mort les controuuez mensonges
Et les mots enjolleurs, inuentez pour flatter.
Ie ne lairray pourtant de te tresbien traiter,
Et ne cognoistras point que rien moins ie t'en ayme,
Car ie crains le courroux de Iupiter supreme,
Et prenant grand pitié de tes ennuis cuisans
Et de ta pauvreté, ie t'ay receu ceans.

Auquel dit Ulysses le prince venerable:
Tu t'es armé d'un cœur du tout inuiolable
Aux persuasions, l'opiniastreté
Rend ton ame confite en incredulité,
Puis que tous mes sermens ne t'ostent point de doute,
Et ne t'esmeuent pas. Mais voicy que i'adiouste
A tout ce que i'ay dit, faisons vn pact nous deux,
Et prenons à tesmoins de cecy tous les Dieux
Qui habitent au Ciel : Si ton Roy, si ton Prince
Est bien tost de retour icy en sa prouince,
Alors tresbien couuert d'un bon accoustrement
Tu me feras par luy conduire seurement
Où ie voudray aller : mais s'il ne vient se rendre
Icy comme ie dy, sur l'heure fay moy prendre
A tes gens, & me fais du plus hault d'un rocher
Precipiter en mer, pour apprendre à prescher
Cy apres aux coureurs, à dire flatteries
Aux pauvres, mesmement vsans de menteries.

Eumae luy replique, à qui l'entendement
Estoit prudent & sage : Ainsi asseurement
Puissay ie conseruer ma bonne renommée,
Que mon integrité par tout soit estimée,
Puissay-ie accroistre encor' en reputation,
Moy qui t'ay recueilly de bonne affection,

Que i'ay logé ceans, a qui i'ay faict largesse
De tout ce que i'ay peu suivant ma petitesse,
Qu'encores ie te tue & te retourne oster
Ton amiable esprit, & puis qu'à Iupiter
I'allasse offrir mes vœux en grande diligence.
Mais l'heure du souper long-temps y a s'advance,
Et mes gens là dehors l'attendent volontiers,

Ainsi qu'ils mettoient fin à ces propos diners
Voicy venir ces gens, avecques les grands bandes
Et des porcs engressez & des truies gourmandes.
Lors selon leur coustume ils s'en vont renfermans
Les truies dans les toits, & un grunissement
Effroyable, s'entend a l'entour des grands auge,
Un bruit, un grondement se faict dedans les banges
Où ils s'alloient coucher. Adonc il appella
Ses pastres par leur nom, & ainsi leur parla.

Garçons amenez moy le plus gras de la troupe
Afin que ie l'immoie & la gorge luy coupe.
Afin de festoyer ce bon homme estrange
Qui est venu ceans, lequel ie veux loger
Et le traicter tres-bien. Nous ferons bonne chere:
Aussi bien n'auons nous que peyne & que misere
A traicter ce bestail, & ces braues galans
Vont de nostre labeur se moquans & soulans.

Il disoit, & soudain il agence vne broche
De son luyfant cousteau, & le grand porc aproche,
Qu'ils touchent deuers luy de long-temps engressé,
Et dans le cinquiesme an desia fort aduancé.
Il est mis sur le gril pres du feu qui esclaire
Eumée, qui n'estoit pas aprentif a bien faire
Une ceremonie, adresse alors ses vœux
Au lieu qu'il conuenoit memoratif des Dieux.

LE XIII. LIVRE

Puis arrachant du poil dessus l'horrible teste
 Ayant blanches les dens, dans la flamme il le iette,
 S'aprocha de l'autel & pria longuement,
 Apres qu'il eut tiré fort ententinement
 Le poil dessus la heure, & ietté dans la flamme
 La troupe des hauts Dieux il supplie & reclame,
 Qu'Ulysse son seigneur puisse par leur bonté
 Quelque iour retourner chez luy à sauueté.
 Lors la massue il prend faicte de bois de chesne,
 Et la haussant en l'air la grand beste il assène,
 Et son ame la laisse. Ils l'egorgent alors
 Et le brulent au feu, luy despeissent le corps,
 Et le maistre porcher prenant piece apres piece
 Par tout les entortille & les couure de gresse:
 Puis de fleur de farine il les saupoudre vn peu,
 Et pour les faire cuire il les met sur le feu:
 Le reste est departy, & les pieces tranchees,
 Dans les hastes pointus sont soudain embrochees,
 Font le tout bien rotir, & puis rosty qu'il est
 Des broches l'ont tiré, & l'ont mis sans arrest
 Dedans les grands bassins. Tout si bien s'achemine
 Que lon voit vn chacun seruer en cuisine:
 Entre tous le porcher qui faict tout prudemment
 Faict du corps detranché sept pars egallement:
 La premiere il dedie aux Nymphes, la seconde
 Au beau fils de Maja à la langue faconde
 Mercure l'eloquent, humblement le priant
 Les autres portions il va distribuant
 A ceux qui assistoient au diuin sacrifice,
 Mais pour plus grand honneur il presente à Ulysse
 Du porc aux blanches dents l'eschine entierement,
 Et à son maistre donne vn tel contentement:

Qui luy dit. Pleust aux Dieux que Iupiter le pere
Te voulust tant de bien, te fust autant prospere
Comme i'ay de subiet de t'aymer & cherir:
Tu me viens honorer, me traiter, me nourrir
Moy chetif estranger & par ta bienueillance
Recen dans ta maison ie mange à suffisance.

Lors Eumæe hôte heureux, reçoit ioyeulement
Ces viures qui te sont offerts benignement,
Et ne t'espargne pas, mange en toute allegresse,
Car c'est Dieu qui nous faict de tout cecy largesse.
Il donne, il faict encor tout à sa volonté:

Car grand est son pouuoir & n'est point limité.

Ce disant il parfaict les diuins sacrifices
Et aux Dieux immortels il offre les premices.

Puis versant le vin noir, il le met de bon cœur

En la main d'Ulysses des villes le vainqueur

Seant à son costé. De viure delectable

Mesaulius couuroit abondamment la table

Il l'auoit achepté son maistre absent apart,

Luy seul, sans que le viel Laërtes y eust part

Ny sa dame non plus. Au pays de Taphie

Il l'acquit, de l'argent que de son industrie

Il auoit amassé. Ils se traictoient ainsi

Des viures aprestez & du bon vin aussi.

Quand la soif fut esteinte & la faim arrestee

Mesaulius dessert & la table est ostee,

Eux ils gaignent le liect. La nuit alors tumbait

Et de son pied obscur sur la terre eniamboit,

La pluye decouloit du ciel en abondance

Et Zephire souffloit de grande vehemence.

Lors le cault Ulysses inuention cerchant

Sondoit le cœur d'Emæe & de ses gens, taschant

LE XIII. LIVRE

De reconurer pour luy encontre la froidure
Ou quelque manteline ou quelque couuerture,
Car il auoit tousiours de soy tres-grand soucy.

Pasteur Eumæe, dit il, & vous porchers aussi
Oyez moy ie vous pry. Ie vous veux faire conte
Pour me glorifier & si ie vous raconte
Chose qui me retourne à louange & honneur,
Vous me suporterez. Car le vin, domineur
Incite aussi souuent le discret & l'honneste
A dire & à conter, que le sot & la beste:
Faiet si tost l'un que l'autre entre les pots chanter,
Dire propos ioyeux, & danser & sauter.
Mesmes sans y penser des propos il entire
Que chose que ce soit ne se scauroit mieux dire
N'y plus pertinemment. Donques, puis que ie suis
Entrain de babiller, & taire ne me puis
Ie ne cacheray pas mes faicts & ma prouesse.

Fussay-ie asteure au temps de ma forte ieunesse,
Eussay-ie maintenant la force & les moyens
Comme quand nous faisions la guerre aux forts Troyes
Entre autres vne fois nous batismes l'estrade,
Et leur fusmes dresser vne forte embuscade.
Vlysses la menoit avec Menelaus
Et ie fus le troisieme. Or estans paruenus
Tout contre la Cité, atrauers les bocages
Et parmy les grands bois touffus de vers feuillages,
Al'entour de la ville, & les murs grands & hauts
Où Priam dominoit, entre les grands ruisseaux
Dans les marais tapis, la nuit qu'on ne voit goutte
Sur nos armes couchez nous estions à l'esconte.
La bise nous faisoit, le manteau sombre & froit
Nous geloit de la nuit, le giure nous couuroit

Herissant de glacons, & les glaces cruelles
A nos armes pendoient en guise de chandelles.
Tout tant qu'ils estoient là de bons manteaux couverts
Bien vestus, bien fourrez, sommeilloient à l'envers
Et ne sentoient le froid. Moy par ma negligence,
De l'armée sortant, n'auois plein d'imprudence
Pris mandil, ne manteau, seulement plein d'ardeur
Je suiuois, ne pensant que si grande froideur
Se denst leuer la nuit : ià de la nuit poissée
La plus grand part estoit entierement passée
Et les astres tumboient de l'olympé noircy,
Quand ie me pris a dire à l'Ithaquois ainsi:
Ie le pouissois du coulde, & luy prompt à merueille
En m'entendant parler vifement se reueille.

Noble Laërtiade Vlysses, fils des Dieux,
Sans doute ie suis mort, & ce froid odieux
M'etue & me transit, faute de couuerture
Que ie puisse opposer à ceste grand froidure.
Le temps m'a bien trompé ie n'ay que le pourpoint
Tout simple & sans manteau, & si ie ne voy point
De remède à mon mal. Tel estoit mon langage,
Et luy ne tarda guerre à me donner courage:
Car il auoit les deux, combatre vaillamment
Et tres-bien conseiller alors tout bassement
Parle bas, me dit il, que quelcun de la bande
Ne cognoisse ton faict & ton malheur n'entende,
Puis le coulde courbé, pensif & en soucy,
En s'appuyant dessus, se prit a dire ainsi.

Escontez compagnons, ce pendant qu'on repose
I'ay dormy, & si ay songé à vne chose.
Nous sommes eslognez de nos gens grandement.
Que quelcun d'entre nous coure diligemment

LE XIII. LIVRE

Deuers Agamemnon qui aux peuples commande,
Si son aduis seroit qu'une troupe plus grande
Vint au deuant de nous. Qu'on luy voise annoncer
Afin qu'il en enuoye & les face aduancer.

Il n'eust pas acheué, que Thoas, brauerace
Du vaillant Andramon, se leue sur la place,
Iette son manteau teint de pourpre richement
Et aux vaisseaux dorez s'encourt diligemment

Ie leue le manteau tres-bien m'en enuironne
Et m'endors la dessus, tant que l'aube rayonne,
Et nous monstre le iour fussy-ye comme alors
Plein de force & vigueur les membres & le corps;
Certes quelqu'un de vous esmeu de la froidure
Me viendrait secourir de quelque couuerture
Comme vn homme de bien m'aymant & reuerant
Car ces haillons rompus me vont des-honorant.

A ces mots Eumaüs. Bon vieillard honorable
Certes tu n'as rien dit qui ne soit fort louable,
Rien ne t'est eschappé n'y de mal digeré
Ny de mal à propos, n'y d'inconsideré.
Tu ne chommeras pas de bonne couuerture
Ny d'autre chose encor pour chasser la froidure
Dont on peut au besoing vn pauvre accommoder;
Pour vn temps seulement, sans par trop le garder
Mais le matin venu, des que l'aube doree
Aura de ses rayons la campagne eclairee
Tu reprendras sur toy ton vieux accoustrement
Nous n'auons pas icy trop à commandement
Des robes à changer. I'ay seulement la mienne
Et des autres chacun à simplement la sienne
Mais quand Telemachus le preux fils d'Ulysses
Nous sera de retour, lors tu auras assez

D'acoustremens pour toy, il te douera tunique,
Et mandils & manteaux & robes magnifiques,
Et le fera guider sur le flot indompté
Comme te dictera ta bonne volonté.

Ce disant, il se leue & le feu il attise,
Et la place du lit au plus pres il a mise
Où couchoit Ulysses, dessous il estendit
Force peaux de brebis, quant il fut sur le lit
On iette dessus luy vne grand manteline
Espesse, douce, molle, & de laine fort fine,
Dequoy le bon pasteur Eumæus se souloit
Et couvrir & vestir, quand aux champs il alloit,
Et que l'hyver fascheux plein d'horreur & de glace
Herissoit sur les champs sa morfondante face.
Ulysses s'endormit, pour lors libre d'ennuy
Et les ieunes porchers dormoient autour de luy.

Mais au braue porcher par trop seur il ne semble
D'estre ainsi sur vn lit, & dormir tous ensemble
Si loing de son bestail. Il sort donc vistement,
S'apreste pour aller, & s'arme brauement.
(Ulysses s'esioit, qu'un tel homme commande
Et donne ordre a son faict d'affection si grande,
En le pensant si loing) premierement il prend
Son coustel as tranchant, à son costé le pend,
Après il met sur luy sa sappe en couverture
Forte contre le vent & contre la froidure,
Vne grand peau de cheure au dessous le couuroit
Bien forte, bien passée, & propre à qui voudroit
S'armer contre le temps: prend en main dauantage
Vn long baston ferré. Puis en ceste ecquipage
Propre pour se garder & des hommes meschans
Et des chiens dangereux, sort pour aller aux champs.

LE XIII. LIVRE

*Il s'en alla ietter au dessous d'une roche
Cavee, où repositoient ses porcs à la dent croche,
Ou le paisible abry la colere appaisoit
De la siflante bize, & le vent se taisoit.*

Fin du quatorziesme liure.

LE QVIN-



LE QVINZIESME LIVRE
DE L'ODYSSEE D'HOMERE.

ARGUMENT.

Pallas se représente à Telemachus en dormant, l'admoneste de retourner en Ithaque. Il part, apres avoir receu des presens de Menelaus & d'Helene il recoit en son vaisseau Theoclymenus deuin, s'enfuyant pour vn meurdre qu'il auoit commis. Eumæus conte a Vlysses comme les Phœniciens l'ayant enleué de Syrie, le vendirent à Laertes. Telemachus reuiet en Ithaque sans rencontre, enuoye son vaisseau a la ville, & luy, va trouuer aux champs Eumæe.

AUTRE SOMMAIRE.

*Telemaque reuint sauf de Lacedemone,
Eschappe des amants l'embuscade felonnie.*

DEdans Lacedemon à la large estendue
La deesse aux yeux vers Pallas s'estoit
rendue, (encor
Ou faisoient bonne chere & seiournoient
Le fils du preux Vlysses & celui de Nestor,
Afin d'en rappeler le gentil Telemaque
Et faire qu'il reuint en sa terre d'Ithaque.

LE XV. LIVRE

Elle les rencontra chez le fils d'Atrée
 Couchez dans le palais du Roy Menelaus,
 Palais aux hautes tours, où la magnificence
 Du prince se monstroît en superbe excellence.
 Le fils du vieux Nestor dormoit profondement
 Mais celui d'Ulysse ne fermoit nullement
 Ses yeux pleins de songe, nulle mollesse tendre
 Nul repos nul sommeil ne le pouvoient surprendre,
 Toute la nuit le soing soucieux le rongeoit
 Et plein d'inquietude en son pere il songeoit.

Ces mots luy furent tels de la deesse affable.
 Ce long sejour icy ne t'est pas convenable
 Gentil Telemachus: tu laisses sans raison
 La garde de tes champs, le soin de ta maison,
 Et tant de poursuivans te rongent, te deuorent,
 Et de tout leur pouvoir ta maison des-honorent,
 Ce pendant que tu perds ton temps, en t'adressant
 Au ieune fils d'Atree, & le vas caressant.
 Debout: va le presser qu'il te renuoye, insiste
 Sur ton depart, tandis que ta mere persiste
 En son integrité, ne voulant offencer
 Sa chasteté, combien qu'on la veuille forcer
 De se remarier. Car son malheureux pere
 Et ses freres aussi la pressent en colere
 De prendre Eurimachus, qui passe de moitié
 Tous ses competeurs de biens & d'amitié
 Et veut accroistre encor son dot & son douaire
 Plus que n'estoit celui que luy donna ton pere
 Par ainsi haste toy, que rien ne soit osté
 Dehors de la maison contre ta volonté.
 La femme est, tu le scais inconstante & muable
 Qui croistra s'elle peut, legere & variable

Le bien & la maison de qui l'espoulera:
Et enfans, & mary premier elle oubliera.
Elle n'a plus du mort aucune souvenance
Ne le regrette plus, tant s'en faut qu'elle y pense.
Par ainsi, tout soudain que tu seras ches toy
Commets tout ton affaire en la main, en la foy
D'une tant seulement de tes servantes, celle
Que tu pourras iuger t'estre la plus fidelle,
Iu/qu'à ce que les Dieux te faisans rencontrer
Femme digne de foy te la viennent monstrier.
Escoute encore un mot une gaillarde troupe
Des poursuiuans, t'attend & le chemin te coupe
Entre Ithaque & Samos, en l'endroit proprement
Où la mer s'estressit le plus estroittement.
Leur conspiration, leur complot leur enuie
Porte de te surprendre & de t'oster la vie
Deuant que tu arriue en ta propre maison.
Ils n'accompliront pas pourtant leur trahison.
Plustost s'ouure la terre, & quelcun engloutisse
Des meschans poursuiuans mangeur des biens d'Ulysses.
Tu destourneras donc gentiment ton vaisseau,
Des isles t'esloignant, prendras le large en l'eau,
Toute nuit rameras: & le vent agreable,
Celuy des immortels qui t'est plus favorable
T'enuoir a par derriere. Il te deliurera
De la troupe sanglante & au port te rendra.
Quand tu seras rendu dans ta paternelle isle
Que tous tes compagnons s'en aillent à la ville
Pour toy tu t'en iras trouuer diligemment
Ton fidelle porcher, qui garde seurement
Tes troupes de pourceaux & les paist de glandage
Et qui t'est si humain & de si bon courage.

D d ij

LE XV. LIVRE

Tu reposeras là toute nuit à recoy,
Et il ira porter des nouvelles de toy
A ta mere en la ville, & luy dira habile
Que tu es arrivè à seureté de Pyle
Ce disans dans le ciel viste elle s'en vola
Et luy tout aussi tost reueiller s'en alla
Le fils du vieux Nestor dessus la couche molle,
Et le poussant du pié luy dit ceste parolle.

Debout fils de Nestor Pisistrate, attellons
Nos cheuaux pie-cornez au carrosse, & allons.
Et le fils de Nestor. Il n'est pas temps encore
De presser son depart. Il est nuit, & l'aurore
A paroistra bien tost : demeure, & attendons
Que nous ayons receu les presens & les dons
Du Roy Menelaus, & ce que voudra faire
Ce prince liberal courtois & debonnaire:
Les faisans sur le char porter premierement,
Puis nous donnant congé, nous parlant doucement.
Car l'amy recueilly en douceur & clemence
De son hoste à iamais garde la souuenance,
Il dit, & la belle aube alors apparoissoit
Et de son beau retour tout le ciel rougissoit.

Desia Menelaus à la voix forte & bonne
Ayant laissé le liét d'Helene sa mignonne
Helene aux beaux cheneux, de sa chambre sortoit,
Et le fils d'Ulysses le voyant se hastoit
De venir au deuant : il ierte en diligence
Dessus luy son manteau riche par excellence,
Sort & luy dit ainsi s'estant aproché pres.

Dinin. Menelaus prince des peuples grecs
Nourry de Iupiter donne moy ie te prie
Congé de retourner en ma chere patrie,

I'en brule de desir, d'enuie & de soucy.

*Auquel le fils d'Atreus respondant dit ainsi,
Je ne te priray pas d'estre icy dauantage
Contre ta volonte prince gentil & sage,
Pars, selon ton desir. Car ie me fasche fort
Si plus que ie ne veux quelcun faict son effort
De m'arrester chez luy: soit que ce soit par hayne
Ou par trop grande amour. L'observance moyenne
Est seante en cela. Mesme indiscretion
Est de chasser celuy qui n'a affection
De s'en aller encor, & retenir par force
Celuy qui departir s'entremet & s'efforce.
L'hoste soit bien venu tant qu'il veut sejourner,
Il luy faut dire adieu s'il s'en veut retourner.
Mais toy demeure au moins iusqu'à tāt qu'on apporte
Les presens que ie veux t'offrir en toute sorte,
Que tu verras bien tost & ie vay ordonner
Aux femmes là dedans de nous faire disner
De ce qui sera prest & c'est chose notoire
Que gloire, honneur, profit reuiennent de bien boire
Avant que de partir: on va plus longuement
Et passe ton pais bien plus allaigrement.
Que si tu veux passer au trauers de la Grece
Et aller par Argos ville grande en richesse,
Iet'accompagneray par tout tres-volontiers
Et à mon char ioin dray mes agiles coursiers,
De la Grece au trauers du regne Pelopide
Ioyeux te seruiray & d'escorte & de guide,
Et si n'y aura nul qui volontairement
En signe d'amitié ne te face un present,
Soit beaux tripiez d'airin, ou quelque belle casse,
Quelque beau vase d'or, ou quelque couple grasse*

LE XV. LIVRE

De mules pour tirer. Auquel fort prudemment
Respond Telemachus: des Gregeois l'ornement
O grand Menelaus, race du fils de Rhee,
C'est chose dedans moy toute deliberee
Que de m'en retourner. Je suis venu de loing
Et personne n'est la qui puisse prendre soing
De mes biens de mes champs, & pendant mon absence
Avoir l'œil pour regir une si grand cheuance
Possible qu'en cherchant mon pere vaynement,
Je me perdrois moy mesme, & tout entierement.

Menelaus oyant ces raisons pertinentes
Commande que sa femme enioigne à ses seruanter
D'aprester le disner, afin de contanter
Ses hostes en partant, & de les bien traiter.
Puis vint de Boethes le fils Eteonee
Car sa chambre n'estoit grandement eslognee
De celle de l'Atride, auquel lors signe il fit
D'aller tout aprester. Et l'autre y satisfit.

Cetempendant le Roy alla dedans sa chambre,
Puis en son cabinet qui ne respiroit qu'ambre,
Helene le suiuit la mignone à Venus.
Et Megapente apres. Quand ils furent venus
Au lieu où lon serroit les tresors admirable,
Menelaus en prend un vase emerueillable
Gentiment arondi. Son fils Megapenthé
Un grand hanap d'argent a pris & emporté,
Et la Reyne fouillant dedans ses garderobes
Où elle resserroit ses precieuses robes
Ouvrage de sa main une elle en choisissoit
Qui sur toute tres-belle & grande paroissoit,
De diuerses couleurs en estoit la tissure,
La riche broderie avec l'entre-lassure

Comme un astre luyfant la faisoient eclater,
Elle estoit tout dessous. Jls viennent apporter
Soudain ces beaux presens au prudent fils d'Ulysse,
Auquel Menelaus: que Jupiter propice
Le mary de Iuno te doit entierement
De faire ton retour à ton contentement
De tout le plus exquis dont ma maison se pare
Ie te veux faire honneur du plus beau, du plus rare.
Quant à ce hanap là d'argent resplendissant
Dont les bords sont dorez de fin or iaunissant,
C'est œuvre de Vulcan, forgé par excellence
Par l'orfeure du Dieu qui le tonnerre eslance
Le riche Roy de Tir qui commande en Sidon
Ainsi que ie passois chez luy m'en fit un don.

Ce disant, il luy mit en main le digne vase
Dont l'or pur entouroit superbement la base,
Si luy tendit son fils le beau Megapenthé
Le grand hanap d'argent qu'il auoit apporté,
La belle Helene apres à la ioue vermeille
Tenant entre ses mains la robe nompareille
Au beau Telemachus alloit ainsi disant
Et ie te donne aussi ce precieux present
Pren le mon cher enfant & garde cest ouurage
De l'amitié d'Helene en gaigne & tesmoignage,
Et que tu donneras quand viendra la saison
A celle qui viendra espouse en ta maison,
Et qu'elle portera comme ta femme chere
Quand tu l'espouseras, & ce pendant ta mere
Te la pourra garder. Or va en grand plaisir
En ta noble maison, & selon ton desir.

Elle dit, & luy tend ces presens d'excellence,
Et Thelemach les prend en grand esionissance.

LE XV. LIVRE

Piſiſtratus les porte au carosse, & en soy
 Admire la grandeur d'un si liberal Roy
 Adonc Menelaus aux blonds cheueux emmene
 Les princes dans la sale, avec sa belle Helene:
 Chacun d'eux prend son siege & honorable & beau
 Et la seruante apres leur aporte de l'eau
 Et verse sur leurs mains l'eau freschement tiree
 Qui claire va coulant de l'aiguier doree
 Dans le bassin d'argent, apres elle estendit
 La nappe sur la table & dessus le pain mit,
 Et viures à l'argesse Etheoné decoupe
 Et les parts distribue à chacun de la troupe,
 Et de Menelaus le fils Megapenthé
 Leur seruoit le bon vin selon leur volonté.
 Eux estendent les mains sur les chairs aprestees
 Et qu'à table on auoit deuant eux aportees
 Quand ils eurent chassé la faim, la soif encor,
 Alors Telemachus & le fils de Nestor
 Attelent les coursiers, montent en diligence
 Sur le coche doré. Menelaus s'aduance
 Pour sortir avec eux, & tenant en sa main
 Une grand coupe d'or plene du meilleur vin,
 La verse deuant eux, priant pour leur voyage,
 Puis se tournant à eux il leur tint ce langage.

Or a Dieu mes enfans, que puissiez vous ainsi
 Estre a iamais contants. Raportez tout cecy
 Au sage Roy Nestor, qui tant que seiournaſmes
 Deuant la forte Troie & les mains y menasmes
 Me seruit d'un bon pere. A qui l'Vlyssien,
 Nous ferons ton message au heros ancien
 Le genereux Nestor, ô magnanime prince.
 Dieu voulust qu'arriuant en ma chere prouince

Où ie m'en vois tout droit au departir d'icy
Sans m'arrester ailleurs, ie rencontrasse ainsi
Le prudent Vlysses, ie luy ferois entendre
Le courtois traitement, l'honneur & l'amour tendre
Que i'ay receu, son fils, en ton palais royal,
Combien tu m'as esté de beaux dons liberal.

Il acheuoit de dire alors qu'on vit parestre
Vn Aigle qui voloit deuers la bande dextre,
Prodige merueilleux. Vn Oye il rauissoit
Et blanche & domestique, & serrant la pressoit
En ses serres pointus, vne criarde bande
D'hommes, femmes, enfans avecques clameur grande
Alloient courant apres, le porte-foudre oyseau
Triomphant hache l'air de son double cerceau,
Vient passer pres des Rois, & de la troupe approche,
A dextre outrepassant deuant cheuaux & coche.
Eux s'estans apperceus de ce presage heureux
Ils le vont saluant, & s'égayent entre eux
Tressaillans d'allairesse. A donc le Nestoride:

Neuen de Iupiter, Prince des Grecs, Atride,
Dy ie te pry, dit-il, ce signe merueilleux,
Dieu l'a-il ennoyé pour toy ou pour nous deux?
Il pensa longuement, roulant en son cœur sage
Ce qu'il pourroit iuger au vray de ce presage,
Mais Helene preuint avec grane maintien.

Escoutez moy, dit-elle, & considerez bien,
Car les Dieux ceste chose ont mis en ma pensee,
Et telle elle aduiendra que ie l'ay prononcee.
Tout ainsi que l'oyseau sacré à Iupiter
Fondant de la montagne, a bien voulu quitter
Son nid & ses petits, a party de ses roches
Pour enlener ceste Oye, & de ses serres croches

LE XV. LIVRE

L'estripper toute grasse & nourrie à plaisir,
Et de ce bon morceau contenter son desir.
Ulysses tout ainsi apres beaucoup de peine
Et de travail souffert dessus l'onde inhumaine
Retournera chez luy, vengeur retournera,
Et tous ses ennemis en armes deffera,
Si plus tost de cest heure il n'a mis pié à terre,
Brassant à ces mignons une mortelle guerre.

A qui Telemachus. Ainsi le Dieu puissant
Le mary de Iunon le clair Ciel embrassant,
Permette qu'il aduienne: à leur majesté haute
Vœux & oblations i'immolerois sans faute:
Et à toy belle Reyne vn autel dresserois
Ainsi qu'à ma Deesse, & te sacrifirois.

Ce disant il s'esbranle, & ses cheuaux incite
Faisant fliquer le foïet: eux se mettent en fuite,
Arpentent le chemin, sortent de la cité,
Et le long de la mer d'un pié precipité
Galoppent esueillez, secouans leur criniere,
Et tant que le iour dure allongent leur carriere.
Le Soleil se panchoit, & les ombres cachotent
Desia tous les chemins. Quand les Rois approchoient
De la cité de Phere, és champs de Dioclee
Le fils d'Orsilochus, que le beau fleuve Alphee
Autresfois engendra. Ils debri derent là,
Diocles les recent, & Titan s'en alla.

Après auoir dormy voicy l'aube nouvelle
Qui laisse son vieillard & ses cheuaux attelle,
Ils attellent aussi, refoïettent leurs cheuaux,
Sautent sur le carrosse, & par monts & par vaux
Galoppent les coursiers, les Princes les excitent
A corps de foïet sifflant, & tousiours les incitent.

Or touchoient-ils desia les champs Neleïens
Où commandoit Nestor le Roy des Pyliens,
Quand en ces mots se prit à dire l'Ulysside:
Tien moy ta foy promise, ô gentil Nestoride,
Ne te retrace point. Nos peres ont esté
Long temps unis du droit de l'hospitalité,
Ils ont eu mesmes Dieux, & le nœud qui assemble
Les courages amis les a liez ensemble
Il y a fort long temps: & ce que nous voila
En aage tous pareils, ioint encor à cela
Une autre liaison, de force accomparables,
De volonteZ pareils, de courages emblables.
En outre, ce voyage a noué de moitié,
Nos penfers, nos desseins, nos meurs, nostre amitié:
O prince genereux, ie te pry ne me force
De passer mon vaisseau, ne me retiens par force,
Mais laisse moy icy, que le sage Nestor
Quand ie seray cheZ luy ne me retarde encor',
Et contre mon vouloir plus long temps ne m'arreste
Par sa grand courtoisie, & sa parole honneste,
Ie suis pour mon honneur contraint de me haster.

Mais le fils de Nestor fut long temps à douter
Sur ce qu'il deuoit faire, & balancer en detresse
Ou de le retenir, ou garder sa promesse.
En fin, tout resolu, il tourne ses cheuaux
Et deuers le riuage & deuers les vaisseaux,
Et puis ayant porté au bac de l'Ulysside
Les dons & les presens du liberal Atride.
Il luy parla ainsi: Or monte viste en mer,
Sollicite tes gens à voguer & ramer
Deuant que ie m'en aille, & que mon pere sçache
Des nouuelles de toy, & t'arrester ne tasche.

LE XV. LIVRE

*Je cognoy son humeur, magnifique sur tout,
S'il te tenoit, jamais tu ne viendrois à bout
De sortir de ses mains, sans qu'à Pyle tu vinsses,
Et presens de ses mains liberales ne prinsses.
Si tu t'en vas pourtant ie sçay bien qu'il sera
Indigné contre moy, & qu'il me tansera.*

*Ce disant, il poussa ses cheuaux vers la ville,
Et bien tost ataignit les murailles de Pyle.*

*Mais Telemach' hastoit sans relasche ses gens,
Armez vous compagnons, tost soyez diligens,
Ramons, montons en mer. Eux soudain obeissent,
Ils montent sur les bancs, les flots souz eux blāchissent,*

*Telemachus faisoit à Minerue ses vœux
Es ses oblations au bout du vaisseau creux,
Quand un homme vers luy accourt à toute bride
Qui s'enfuyoit d'Argos, pour certain homicide,
Et de peur d'estre pris ainsi il se hastoit.*

*Augure fort expert, & deuin il estoit,
Et de maison illustre, issoit de Melampode,
Qui en Pyle habita iadis, terre commode
A nourrir brebiaille. Il fut puissant en biens
Alors qu'il habitoit entre les Pyliens,
Mais il luy conuint faire vne autre demeure,
Delaisant sa patrie, & fuyant la puissance
De Nelé, magnanime, entre les hommes fors
Le plus à redonter qui vescuissent alors,
Qui luy retint son bien toute vne annee entiere
Par force & par contrainte: & luy en grand misere
Estoit ce-temps pendant prisonnier arresté
Es ceps de Phylacus, & tout pour la beauté
De la fille à Nelée, entre les belles, belle,
Qui fut le seul sujet de sa prison cruelle,*

Car la fiere Erynnis luy auoit mise au cœur.
Mais il sauua sa vie, & emmena vaincœur
Les grands bœufs mugissans en Pyle, hors Phylace,
Si luy fit acte indigne & de mauuaise grace.
Le diuin Neleus contre toute raison,
De son frere il mena sa femme en sa maison,
Puis il partit delà cerchant autre contree:
Si s'en vint en Argos, & y fit son entree,
Argos propre aux cheuaux, où se vont esleuant
Mieux qu'en nulle autre part les cheuaux pieds-de-vêt.
Or vouloit son destin que dans Argos en somme
Après force tracas, vint habiter cet homme
Pour y rendre le droit, & plein d'autorité
Commander sur les Grecs avec toute equité.
Il s'y maria donc, & brulant de la flamme
D'amour : finalement il y prit une femme,
Y bastit des palais & haults & triomphans,
Y engendra de beaux & illustres enfans:
Antiphates en vint & Mantius le iuste,
Antiphate engendra Oiclé le robuste,
Luy Amphiaraius le deuin excellent
Sage au vol des oyseaux, qu'aima parfaitement
Iupiter, & Phœbus Dieu à la belle tresse:
Mais il ne paruint pas à sa blanche vieillesse,
Car il mourut à Thebe, & à l'occasion
Du present que sa femme eut en affection:
De luy Amphilochus & Alcmaon sortirent,
Polyphide & Clytus de Mantius nasquirent,
Mais Clytus fut au Ciel pour sa grande beauté
Par l'Aurore au beau char raui & transporté:
Phœbus fit Polyphide augure plein d'estime,
Duquel vola par tout le renom magnanime,

LE XV. LIVRE

Quand *Amphiaraius* le saint fut trépassé,
 S'estant contre son pere un iour fort courroucé
 Il s'en vint demeurer dedans *Hyperefie*,
 Aux hommes enseignant le don de prophetie,
 Et là pere il deuint de *Theoclymenus*.
 C'est luy qui vint trouuer alors *Telemachus*
 Immoant sur la mer, & faisant sa priere
 Aux Dieux, que son retour par eux luy fut prospere:
 Vers lequel esleuant sa voix, il dit ainsi:
 Amy que i'ay trouué sacrifiant icy,
 Et suppliant les Dieux, par tes diuins seruaices,
 Par tes oblations & sonés sacrifices,
 Par les Dieux inuozuez, par ton chef, & par tant
 De gens qui sont à toy, ie te vay obtestant,
 Dy moy la verité, respon à la requeste
 Que ie te vay faisant & civilé & honnesté,
 Qui es tu, d'où viens-tu, de quelle ville es tu,
 Et qui sont tes parens? *Telemachus*, en vertu
 Accomply, luy respond. Mon nom est *Telemachus*,
 Mon pere est *Ulysses*, & ie suis né d'*Itaque*:
 Voila la verité. Mon pere, dy-ie, estoit
Ulysses, quant au monde encores il restoit,
 Car ie croy que la mort l'ait emporté, cruelle.
 C'est pourquoy pour sçauoir de luy quelque nouuelle
 I'estois venu icy avecques ce vaisseau
 Et tous mes compagnons, me bazzardant sur l'eau.
 Ie suis contraint laisser, dit lors *Theoclymene*,
 De mesmes ma maison, & ma ville ancienne,
 Pour ce que i'ay tué l'un de nos citoyens,
 Homme de grand maison, homme plein de moyens
 Et bien apparenté, ayant beaucoup de freres,
 D'amis, de compagnons, qui ont les mains legeres,

Et promptes à frapper, tous braves & dispos,
Forts, ieunes, & vaillans. Leur demeure est Argos,
En bons cheuaux illustre, en haras renommee,
Et sur toute la Grece en courriers estimee:
Ils sont grands en Argos, ville aussi d'où ie suis,
Ie m'enfuis pour cela, euitant si ie puis
Leurs vengeresses mains, & la mort, & la peine.
Ie vague, i'erre, & cours sur ceste foible arene,
Nè d'estre vagabond, & que le cruel sort
Et la dure fortune, hélas, tourmentent fort.
Pour ceste occasion reçois moy, ie te prie,
Mets moy dans ton vaisseau, moy, las, qui te supplie,
Et ay recours à toy, empesche que leur main
Ne me face descendre en l'Erebe inhumain:
Ils me turent sans doute, ils ne sont plus, ie pense,
Guere esloignez d'icy, me suyuans à puissance.

Auquel Telemachus. Ie ne te chasseray
De mon vaisseau, dit-il, plustost tereceuray
Si tu veux. Suy moy donc, i'ay desir de t'y faire
De ce que nous aurons, recueil & bonne chere.
Ce disant il luy prit son iauelot d'airin
Et le mit au vaisseau couppant le flot marin:
Monté dedans qu'il fut, il se sied sur la pouppe,
Et Theoclymenus pres de luy. Lors la troupe
Des gentils nautonniers délient les cordeaux,
Et luy les accourage à bien fendre les eaux:
Les garçons à l'enuy l'un de l'autre obeissent,
Ils enleuent le mast, en l'air ils le brandissent,
L'attachent fermement, le cordage ageançant,
Et de tout leur pouuoir le voile en hault haussant.
Pallas leur enuoya tout soudain par derriere
Vn favorable vent, vn Zephire prospere,

LE XV. LIVRE

Pour leur faire coupper l'onde legerement,
Et sur les flots s'allez glisser plus aisement.

Titan panche, & par tout s'estendent les ombrages,
Le bac va costoyant les Pheriens riuages
Par un vent favorable, Elyde outrepassant
Où l'Epean domine, & puis en se glissant
Il se iette, & s'ecarte hors des isles pointues,
Les eaux sont viuement souz les rames battues:
Il scaura ceste fois ou s'il succombera
Souz l'aguet qui l'attend, ou s'il échappera.

Cependant Ulysses & Eumæus, le maistre
Des porchers, s'égayans en la maison champestre
Faisoient fort bonne chere, & tousiours banquetoient,
Et d'autres avec eux à la table assistoient.

Quand la faim fut passée & la soif fut esteinte,
Ulysses commença d'inuenter vne feinte

Pour tenter Eumæus, si la reception
Qu'il luy a faicte est faulse, ou si l'affection
Qu'il luy monstre porter n'est point dissimulee.

Il luy tint ce langage (& toute l'assemblée
L'entendoit clairement) pour voir s'il le priroit

De demeurer encore, ou le conseilleroit
D'aller en la cité. l'ay, luy dit-il, enuie
D'aller demain en ville y demander ma vie,
Car i'ay peur d'estre en charge à tes gens & à toy:

Partant ie te supplie, Eumæe, conseille moy
Comme il faut, donne moy un guide qui me mene,
Afin qu'en mendiant par tout ie me pourmene.

Cerchant ma pauvre vie à qui me la donra,
I'iray chez Ulysses, quelqu'un m'adressera

Deuers Penelopé, luy diray des nouvelles,
Verray ces poursuyuans, & leurs façons cruelles,

Parauenture

Par aventure esmeus de ma nécessité
Ils me donront du pain qu'ils ont en quantité,
I'y meneray les mains, car ie suis à tout faire.
Et ie te dy pour vray, ô pastre de bonnaire,
Personne ne scauroit, tant expérimenté
Soit-il, me surmonter d'ingeniosité.
Et par le bon vouloir du Message Mercure,
Qui aux humains honneur & dignité procure,
Et qui en toute affaire & en toute action
Leur faict acquerir grace & reputation,
Nul n'aura dessus moy l'industrie plus forte.
Soit qu'il faille allumer un feu de bonne sorte,
Ou bien fendre du bois, ou les morceaux trencher,
La viande apprester, la rostir, l'embrocher,
Verser à boire à table, & tout ce qu'on doit faire
Au service des grands. Eumée lors en colere,
Qui t'a mis ceste chose en ton entendement
O mon hoste, dit-il, tu veux entierement
Perir, tu veux ta mort, mettant en ton courage
D'aller trouuer ces gens, insolens, pleins de rage,
Et dont la violence a monté insqu'aux Cieux.
Ils n'ont point autour d'eux de gens sables & viex,
Et couuerts de lambeaux, ils n'ont rien que ieunesse,
Bien propres, bien vestus, beaux, pleins de gentillesse,
Gras, frais, & en bon point, hommes disposés, & gens
Prompts au seul clein de l'œil, esueillez, diligens,
Chargeans de mille mets delicieux les tables,
Et versans sans cesser les bons vins delectables,
Plustost si tu m'en crois tu demourras icy,
O mon hoste tres-cher, n'ayes peur ne soucy,
Nul n'est ceans qui ayt dessus ton ayse enuie,
Nul encor n'a pensé te reprocher ta vie.

LE XV. LIVRE

Puis si tost que le fils du puissant Ulysses
 Nous sera retourné, lors tu auras assez
 De quoy te resjouyr, il te donra mandilles,
 Robes, accoustremens, & casaques gentilles.
 Apres il te fera conduire seurement
 Où tu verras le mieux pour ton contentement.

Alors luy respondit le patient Ulysse,
 Que le bon Iupiter te soit autant propice
 Comme tu as mon cœur & mon affection,
 Noble pasteur Eumæe, en mon affliction
 Tu me retiens chez toy plein de bonnes paroles,
 Et mes tristes douleurs amollis & consoles,
 Quelle douleur peut poindre vn homme si au vif
 Que d'estre comme moy vagabond & fuitif?
 Mais le ventre méchant quand la faim le saccage
 Apporte bien souvent & malheur & dommage,
 Car quand il presse trop il n'y a nul danger
 Que l'homme n'entreprenne, il sent son cœur ronger
 De soucy deuorant, qui souvent le conuie
 D'aissaillir vn autre homme aux despens de sa vie.
 Mais depuis que tu veux me retenir chez toy,
 Entretien moy vn peu de la mere du Roy
 Et de son pere aussi, que desia la vieillesse
 Auoit quasi courbée, quand il partit de Grece
 Pour aller à Pergam. Sont-ils tousiours viuans,
 Jouyssent-ils tousiours des beaux rayons luisans
 Du lumineux Titan, ou bien si fresles ombres
 Ils sont morts, descendus dans les caernes sombres
 Du triste Phlegethon, vains esprits & legers?
 A quoy respond Eumæe la gloire des bergers.
 Amy, ie te diray comme le tout se passe,
 Laërtes vit encor, la vieillesse le casse,

Et la douleur l'abbat, il faict incessamment
Priere à Jupiter qu'il vueille vistement
Le faire trespasser, & son ame retire:
Tant desmesurement il lamente & soupire
Son Ulysses rany, tant il regrette fort
De sa fidelle épouse & la perte & la mort,
Qu'il auoit espousee en ieunesse pucelle:
Maintenant qu'elle est proye à la Parque cruelle
Le vieillard s'en afflige, & de pertes comblé
L'un & l'autre trespas l'ont rendu tout troublé:
Elle est morte d'ennuy en pleurant son Ulysse,
Mort pleine de pitie, ainsi mourir ne puisse
Ceans en ma maison quiconque m'aimera,
Et qui deuoir d'amy paroistre me fera,
Tandis qu'elle viuoit, combien que l'amertume
La rongeast, toutesfois elle auoit de coustume
De m'enquerir tousiours, & selon son desir
De me demander chose où elle prist plaisir:
Car elle me nourrit avecque la gentille
Ctymené, sa derniere & sa plus ieune fille,
Ctymené au bouffant & ample accoustrement.
Avec elle ie fus nourry premierement,
Et n'estois qu'un peu moins en honneur de la mere:
Mais quand ayant passé la ieunesse premiere
Nous creusmes l'un & l'autre en aage plus dispos,
Elle fut mariee en l'isle de Samos
Avec force tresors qu'elle eut en mariage.
Et pour moy, on me mit en fort bon equippage,
On me vestit à neuf, robes, accoustremens
Beaux & de tresgrand prix, & autres vestemens,
De bons souliers aux pieds, & toute autre chausseure:
Puis on m'enuoye aux champs pour y faire demeure,
Ee y

LE XV. LIVRE

Et pour les gouverner. La Princesse m'aymoit,
Et sur toutes ses gens en son cœur m'estimoit.
Or i'ay de tout cela maintenant bien grand faute,
Mais les Dieux habitans dessus la voulte haute
Dont la vie est heureuse, & deuant qui ie suis
M'ont accreu, au milieu de mes tristes ennuis:
Si que i'en boy, i'en mange, & en tien bonne table;
Les departs de bon cœur à tout homme honorable.
Quant à Penelopé, nous n'en auons pour nous
Assistance, soustien, non pas vn seul mot doux,
C'est à l'occasion de l'insolente bande
De ces beaux poursuyuans, trouppes fiere & gourmāde,
Et qui n'ont point de fin de perdre & consumer,
Les pauvres seruiteurs n'oseroient l'informer,
Ny dire ce qu'on faiet à l'affligee Reyne,
Bien qu'il fust necessaire, ils n'osent pas à peine
Demander pain ne vin, ne les necessitez
Qu'on portoit parauant aux champs de tous costez
Aux pastres, aux bergers, & desquels l'abondance
Apportoit à leurs cœurs ioye & resiouyssance.

Il tenoit ces propos, & le souffre-soucy
Le prudent Vlysses luy respondit ainsi.
Dieux! Estant si petit que tu dis, ie te prie
Comment as tu erré si loing de ta patrie,
Et de tous tes parens: mais par toy me soit dit,
Pour le vray: Le pays a-il esté destruit
Où pour lors habitoient & ton pere & ta mere?
Qui te força courir autre terre estrangere?
Quel estat suiuois-tu? Estois-tu addonné
Aux bœufs, ou aux brebis quand tu fus amené
En ce pays icy, & que sur leurs fregates
Te vindrent enleuer les escumeurs Pyrates,

Desquels selon ton prix Laërtes t'acheta?
Eumæus en ces mots alors luy raconta.

Ie te raconteray, puis que tu veux l'entendre,
Ce qui m'est advenu dès ma ieu nesse tendre,
Sans en rien oublier. E sconte seulement,
Et nous seans icy beuons ioyeusement.
Car la nuit est bien longue aussi bien, & m'ennuye.
Tu t'en iras dormir quand t'en prendra enuie:
Car entendre parler n'est pas sans grand plaisir.
Et deuant que le somme accoure te saisir.
Il n'y a nul propos que tu vinsses le prendre.
Le dormir par trop long tristesse au cœur engendre:
Quand on a trop dormy on n'en est pas si sain,
Et l'assoupissement de fascherie est plein.
Si quelqu'un des valets est endormy, qu'il sorte,
Qu'il s'en aille coucher, dorme & se reconforte,
Puis quand le point du iour demain matin poindra
Et l'aube ses cheuaux à son coche ioindra,
Prendra son desienner, & les troupes gourmandes
De ses troupeaux grondans menera par les landes.
Quant à nous, pres du feu beuans & banquetans,
Et nos malheurs passez à l'enuy racontans
Nous passerons l'enuy de nos melancolies.
Quand on vient à conter toutes ses fascheries
On y prend du plaisir, mettant hors ses douleurs
On contente son mal de quelque peu de pleurs.
Qui a beaucoup souffert de fortune & d'opresse
Prend quelque volupté à dire sa tristesse.

Orie vay commencer. Doncques en nostre mer
Est vne isle, Syrie on l'a voulu nommer,
(Si ce nom est venu iusques à tes oreilles)
Au deffous d'Ortygie, où ses roües vermeilles

LE XV. LIVRE

Le Soleil va tournant, & où prend ses destours
 Titan qui trace au Ciel le chemin de son cours.
 L'isle n'est pas fort grande, estroitte est ceste terra
 Sa petite estendue estrangement se serre:
 Pourtant elle est fertile & son terroir heureux,
 Donne force pascage aux brebis & aux bœufs,
 Vin & froment y croist: là iamaïs la famine
 N'assault les habitans, là iamaïs ne domine
 Mal fieure, ne langueur: sans douleur, sans tourment
 Les hommes pleins de iours y vivent longuement:
 Mais quand ils ont atteint vne extreme vieillesse,
 Phœbus à l'arc d'argent & à la blonde tresse,
 Et Diane sa sœur de leurs traits argentez
 Les viennent assaillir par la mort emportez.
 Or deux citez sont là, chacune a son domaine
 Distinct & separé, de coustume ancienne:
 Sur toutes deux mon pere auoit commandement,
 Ctesius Ormenide aux Dieux entierement
 Pareil. Là des marchands de Phénice aborderent
 En l'isle, & leurs biens & fatras déployerent,
 Car ce sont gens sur tous fins & ingenieux,
 Surprenans tout le monde, esblouyssans les yeux
 Avec leurs affiquets. Or seruoit vne fille
 En ce temps chez mon pere, assez belle & gentille,
 Phénicienne mesme: elle auoit l'esprit beau,
 Elle inuenoit tousiours quelque ouurage nouueau,
 Au mestier de l'egueille estoit ingenieuse,
 Ouuriere excellente & fort industriense.
 Un iour qu'elle lauoit quelque linge en la mer
 Un de ces marchands là fit rage de l'aimer,
 Et l'endormit si bien, que dedans sa nacelle
 Il fit monter la fille, & concha avec elle.

La femme de loisir fort volontiers se prend
Par le lit, par l'amour, bien qu'elle ayt l'esprit grand,
Après qu'il eut faict d'elle, il l'enquiert, il la prie
De luy dire son nom, sa maison, sa patrie.

Ma patrie est Sidon, dit la fille, où se prent
Le cuyure en quantité, mon pere est Arybant,
Homme riche & aisé. Les Taphiens pirates
M'enleuerent un iour sur leurs hautes fregates
En reuenant des champs: l'un desquels qui flotta
Sur ces bords me vendit, & le Roy m'acheta.

Adoncques le marchand qui dedans sa nauire
L'auoit depucelee, en ces mots luy vint dire:
Tu t'en reuiendras donc, si il te plaist, avec nous,
Et reuerras ta mere & ton pays si doux,
Ton pere & ta maison, apres si long espace
Que tu ne les as veus. Les Dieux leur font la grace
De viure encor' tous deux, fort riches, fort puissans
En tresors & en biens à souhait fleurissans.

A qui la fille alors: Je le veux, ie t'en prie.
Iure moy de me rendre aussi en ma patrie
En toute seureté: Promets moy sur ta foy,
Dy-ie, de m'y conduire, & i'iray avec toy.
Le marchand luy iura. Lors elle luy adiouste:
Or ne dittes donc mot, & soyeZ à l'esconte,
Et si vous me voyez & vous me rencontreZ
Venant à la fontaine, ou passant par ces prez,
SoyeZ seurs & secrets, que le Roy ne le sçache,
Et dans les fers cruels ne me lie & m'attache,
Et vous face mourir. Retenez donc cecy
Apportez gentiment tous vos viures icy,
Puis que quelqu'un de vous prudent & habile
Viennne m'en aduertir viftement à la ville.

LE XV. LIVRE

Mais qu'il soit, ie vous prie, & prompt & diligent.
 Alors i'enleueray tout l'or & tout l'argent
 Pour l'apporter icy : Je prendray davantage
 Vn beau petit enfant, & d'un florissant aage
 Dont ie suis gouuernante, enfant bien aduise,
 Et de belle esperance, & desia tout ruzé:
 Il sort souuent dehors, & s'esbat par la ville
 Cerchant ses compagnons : il me sera facile
 De le faire venir & le prendre avec moy
 Pour l'amener ceans : il est enfant du Roy
 Il est gentil, fort beau, & de façon naïfue,
 Vous en pourrez tirer vne somme excessiue:
 Ce disant, au chasteau soudain se retira.

Les marchans cependant tandis que l'an dura
 Ramenant les moissons par la ville prattiquent,
 Accommodent leur faict, changent, vendēt, traffiquēt,
 Portent en leurs vaisseaux, puis quand ce vint le temps
 De se mettre sur mer & d'essayer les vents,
 Ils en depeschent vn vistement vers la fille,
 Fin, cault, & aduise, qui s'en vient à la ville
 Au chasteau de mon pere : il portoit vn carquant
 De pur or & bien faict, on alloit remarquant
 Force ambre qu'il auoit. Lors mainte chambriere
 Lettoit les yeux dessus. apres elles ma mere
 S'amusoit à le voir & l'alloit marchandant.
 Il faict signe à la fille, & s'oste cependant
 Retournant à ses gens, Adoncques la vilaine
 M'empoigne par la main, hors du chasteau m'emmeine,
 Puis trouuant quantité de vases entassez,
 Grands vases d'or massif qu'on auoit là laissez
 Pour traicter des plus gros de toute la prouince
 Qui estoient au conseil pour assister le Prince

En affaire important, où le peuple tousiours
Consulte, & va disant nouvelles & discours:
Elle en empoigne trois, hors la porte s'aduançe
Et moy ie la suiuis avec grande imprudence.

Les ombrages tumberoient, & Titan descendoit
Quand nous vinmes au port où l'on nous attendoit.
Là sur le bord estoit un vaisseau grand & large,
Vaisseau Phenicien sur lequel on nous charge.
Quand nous fumes montez, eux soudain de ramer
Et de gagner le haut de la profonde mer.

Iupiter nous donna les vents bons & prosperes.
Ià par six iours durants & par six nuits entieres
Nous auions nauigé le septiesme venu
De par le premier fils de Saturne chenu,
Diane tire-trais la fillete transperse
Dans le creux du nauire, & morte la renuerse:
Elle fit vn tel bruit que faiët ense plongeant
La canete de mer & la cruelle gent
La iette dans la mer aux balenes horribles
Et aux monstres des eaux & poissons plus terribles
Ainsi seul au vaisseau triste ie fu laissé
Pauvre enfant miserable & par trop angoissé.
Le vent incontinent de plus beaux nous attaque,
Nous porte en ce pais, & nous rend en Ithaque,
Où le bon Laërtes m'ayant d'eux marchandé,
M'achepte & leur paye le salaire accordé:
Et voila la façon que ie vy ceste terre.

A luy lors Vlysses grand en ruse & en guerre,
Certes tu m'as esmeu, ô pasteur, grandement
En me contant ainsi la peyne & le tourment
Que tu as endurez des ta tendre ieunesse.
Iupiter toutesfois t'a meslé ta tristesse

LE XV. LIVRE

*Avec de la douceur, t'ayant finalement
Conduit en la maison d'un maistre si clement
Où tu as à souhait pain & vin & viande,
Et où tu peux mener vie heureuse & galande
Moy ie suis vagabond & ayant bien couru
Me voicy sous le toict où tu m'as secouru.*

*Ainsi les bonds vieillards passoient la nuit entiere
Puis s'allerent coucher, & ne dormirent guerre,
Car le clair point du iour parut incontinent
Et le beau Telemach de Pyle reuenant
Et tous ses compagnons à terre descendirent,
Replierent le voile & le mast abbatirent,
Ils entrent dans le port, l'ancre à terre est ietté,
De cables le vaisseau fermement arresté
Flotte dessus les eaux: eux à terre se iettent
A prestent le souper, de bons viures se traittent
Et de vins rougissants, quant ils eurent chassé
La soif, & l'appetit de manger fut passé
Telemach leur parla d'une façon courtoise.*

*Enfans poussez la barque & la rengez sans noise
Sous les murs à l'abry, tandis ie m'en iray
Aux champs, vers le Porcher & le visiteray
Pour voir comme tout va, ie n'arrestteray guerre,
Car des que le soleil panchera sa carriere
Ie m'en retourneray & puis au point du iour
Si tost que le soleil dorera son retour,
Nous nous conuiron de nostre heureux voyage,
Ie vous festoyeray, & viures ne benuage
Ne seront espargnez. Disant ces mots ioyeux
Le bon Theoclimen grand prophete des Dieux
S'en vint parler à luy ô mon cher Telemaque
Où m'en iray-ie moy? qui de la rude Ithaque*

Des hommes qui y ont quelque commandement
Me pourra recevoir chez luy fidelement?
M'en iray-ie tout droit me rendre ches ta mere
Et dedans ta maison? Telemaque au contraire.
Certe il y a long-temps que ie t'eusse sommé
D'aller où tu me dis, où tu n'eusses chommé
De tres-bon traitement, voire en toute abondance,
N'eust esté que ie crain que pendant mon absence
Tu ne fusses pas bien. Car tu n'eusses pas veu
Penelopé ma mere, elle frequente peu
Avec ces courtisans, mais elle est retiree
En une chambre en haut de toute separee
A faire son ouvrage, à tistre & à filer
Mais ie t'enseigneray où tu pouras aller:
C'est ches Eurimachus fils de Polybe, habile
Et autant genereux que nul autre de l'isle:
Sa reputation est cogneue en ce lieu,
Tous ceux de la cité l'honorent comme un Dieu,
Et certe il est galand. Or il se desespera
D'estre le successeur des honneurs de mon pere
Et ma mere épouser. Mais le grand Iupiter
Qu'on scait dessus le ciel de tout temps habiter,
Scait s'ils rencontreront avant ceste iournee
Autant luy que tout autre un infauste hymence.

Comme il parloit encor, voicy le messager
De Titan l'espernier, oyseau noble & leger
A main droite volant, qui tenoit en sa serre
Un pigeon, & iettoit son plumage par terre,
Il passa iustement entre Telemachus
Et entre son vaisseau. Lors Theoclymenus
Le prenant par la main de ses gens le retire
Et l'augure exposant se prit ainsi a dire

LE XV. LIVRE

*Certes cest oyseau là ne vole nullement
Sans le vouloir des Dieux & leur commandement.
J'ay fort bien remarqué son vol, ô Telemaque.
Nul sang n'est si royal que le vostre en Ithaque,
Nulle race si noble, & vostre autorité
Y sera reconnu à perpetuité.*

*Auquel Telemachus. Certe amy, ie souhaite
Que l'augure soit tel comme tu l'interprete
Et nous succede ainsi : tu receurois un iour
Tant de presens de moy, avec mon ferme amour,
Que qui te trouueroit te venant à l'encontre
Diroit certainement heureuse ta rencontre.
Puis regardant Peyree il luy parla ainsi.*

*Fils de Clytus, dit il, en ce voyage icy
Entre tous ceux qui m'ont accompagné à Pyle
Tu t'es en mon endroit tousiours montré docile
Et fort obeissant. Or pour l'amour de moy
Je te pry pren cest homme & le mene chez toy,
Fay luy le mesme honneur, la mesme bonne chere,
Le mesme traitement que tu me voudrois faire,
Iusques à mon retour. Auquel soudain Peyré,
A la pique luy sante, au fer bien acéré.*

*Sois dehors longuement si ton envie est telle,
Il prendra s'il luy plaist ma maison paternelle;
Rien ne luy defaudra ie le feray traicter
Et tant qu'un hôte peut son hôte respecer
Il sera respecté. Ce faict, il se retire
Et commande à ses gens de monter au nauire,
De deslier le cable & ramer viftement.
Eux prompts à obeir, montent hâtivement
Sur les bancs. Lors en mer maint auiron se hausse
Et Telemaque prend ses souliers, & se chauffe,*

*Car il auoit desir du vaisseau retiré
Son puissant iaelot au bont bien aceré.
Ses gens auoient aussi ia coupé le cordage,
A puissance ramoient le long du haut riuage,
Et hachans de la mer le bouillon irrité
En liesse gaignoient les murs de la Cité,
Comme leur auoit dit le fils du fort Nerite.
Lequel laisse le port son pié robuste & viste
Le porte all'aigrement : & tant qu'il arriva
Aux champs vers le porcher. Sous lequel il trouua
De truyes & des porcs quantité innombrable,
Que gardoit Eumaüs vigilant & feable,
Passant la nuit es champs, & onc ne se lassant
De faire bon seruice à son Prince puissant.*

Fin du Quinziemes liure.



LE SEIZIESME LIVRE DE
L'ODYSSEE D'HOMERE.

ARGUMENT.

Telemachus étant arriué aux champs enuoye Eumæus en ville, aduertir Penelopé de son retour. Par le conseil de Pallas Ulysses se decouvre & se donne à connoistre à son fils. Ceux qui estoient allez guetter Telemachus sur mer pour le tuer, reuiennent en Ithaque.

AUTRE SOMMAIRE.

*Ulysses se decouvre, & declare à son fils
Comme seront par eux les amants deconfis.*

DErechefle porcher & le diuin Ulysses
En la borde attendât que l'aurore rougisse
Aprestoient à disner & le feu rallumoient
Et les pastres aux champs & les porcs en-
noient.

*Et les chiens abbayans à l'aprocher sentirent
Telemachus venir, autour de luy se mirent
Flattans & blandissans, & si ne iappoient pas:
Le diuin Ulysses ouyt le bruit des pas,
Et sentit que dehors les chiens faisoient caresse
A quelqu'un qui venoit: aussi tost il s'adresse*

A Eumæe le porcher, & luy parla ainsi.

Quelque amy de ceans sera bien tost icy,
Les chiens ne iappent point, plustost ils luy blandissent
Et d'un fort bruit de pieds mes oreilles fremissent.
Comme il parloit encor le preux fils d'Ulysses
Se monstra sur la porte. Alors de grand excez
De ioye, le porcher se leue de sa place,
Surpris se precipite, & le vin & la tasse
Luy tumberent des mains. Puis courant vistement
Au deuant de son Roy, le baise tendrement
Le front, les yeux, les mains, & d'amour affolee
De ses yeux ruisselans mainte larme est coulee
Et sa barbe & son sein de pleurs sont enfondus,

Comme vn pere tremblant court les bras estendus
Embrasser son enfant, sa chere nourriture
Qu'il auoit esleuee avec extrême cure
Pour consolation de sa vielleſſe, ayant
Esté long temps dehors errant & fouruoyant
Et courant les hazards de maintes destinees,
Et puis reuiet en fin au bout de dix annees
De la mesme façon on pouuoit alors voir
Le fidelle porcher son maistre receuoir
Il luy court au deuant, & ravi de grand ayse
L'honore, le bien-veigne, & l'embrasse & le baise
Comme s'il reschappoit du glaive violent,
Pleurant le congratule, & puis luy va parlant.

En fin estu venu ma tres-douce lumiere
Mon cher Telemachus, que ie disois naguere
N'esperer iamais plus de reuoir, ent'estant
Ainsi mis au hazard sur le flot inconstant
Allant à Pyle, or sus ma nourriture chere
Entre dans la maison dans les biens de ton pere,

LE XVI. LIVRE

Afin que ie me soule à te voir, que ie sois
Resiony de ta venue, ô trois & quatre fois
Le tres-bien retourné, le reschappé des ondes
Le sauvé du fier glaive & des vagues profondes:
Ce n'est guerre souvent que tu t'en viens icy
Visiter ton Eumæ, ne tes pastres aussi:

Tu cours & tu t'enfuis, ainsi ton ame enite
Des cruels poursuivans la pratique maudite.

Amy, ie la fuiray. Car ie l'espere ainsi,
Luy dit Telemachus, & ce que me voicy,
C'est assés de te voir, que ie sache & m'enquiere
De ce qu'on faict ches nous: & si toujours ma mere
Demeure en la maison: où si ne seroit point
Depuis par mariage vn autre à elle ioint.
Certes le liét d'Ulysse est par les destinees
A faute de maris tout couuert d'araignees.

Ta mere ne dechet de resolution,
Luy respondit Eumæ, mais en affliction
Elle passe les iours, les nuits toutes entieres
A gemir ses malheurs, à pleurer ses miseres:
C'est pitié de la voir, & son sein tendrement
Nage aux eaux qu'elle espad continuellement:

Ce disant il luy prend sa partuisane forte,
Et luy entre dedans sans plus estre à la porte.
Ulysses luy cedant place & siege laissa,
Mais Telemach courut, & son pere embrassa,
Le retint & luy dit. Ne bouge, mon bon hoste,
A ton ayse demeure, & de ton lieu ne t'oste,
Prou de sieges ceans pour moy se trouueront,
Il y a force gens qui m'en apporteront.

Ayant dit: Ulysses se remet en sa place,
Et le bon Eumæus force feuillage entasse,

Vert &

Vert & frais & mollet, puis dessus estendit
Mainte douillete peau, sur lesquelles se mit
Le preux fils d'Ulysses. Lors Eumée leur apreste
À manger, & leur met dans les plats tout le reste
Du soupper de devant : puis tire vistement
Le pain de la corbeille, & verse abondamment
Pour boire, le doux vin dans une grande tasse.
Cela fait vis à vis d'Ulysses il se place,
Et eux iettent les mains sur les plats à plaisir.

Quand ils eurent mangé & beu à leur desir
Telemaque au porcher se prend ainsi à dire
Dy moy, nostre hoste icy d'où vient il? quel navire
L'a conduit en ce lieu? d'où sont les mariniers
Qui se vante l'avoir passé en ces cartiers?
Car d'y venir à pié n'y a nulle apparence.

Lors le pastre. Crete est le lieu de sa naissance,
Et à ce qu'il m'a dit il a fort veu, il va
Agité du malheur errant par cy par là:
Dieu luy a donné tel le destin de sa vie.
Un vaisseau la conduit des gens de Thesprotie
Duquel s'estant sauvé ceans il s'est ietté.
Or le voila, fais en selon ta volonté,
Tres-humble suppliant ton secours il implore
Auquel Telemachus respondant dit encore,
Tu m'attristes beaucoup de me parler ainsi,
Ceste requeste, Eumée, me met en grand soucy,
Quel moyen puis-je avoir de recevoir, de prendre
Un estranger ches moy, ne me pouvant deffendre
D'un tas de forcenez, n'oster de ma maison
Ceux qui me vont mangeans contre toute raison?
Si ieune que ie suis? d'avantage ma mere
Est en doute bien grand de ce qu'elle doit faire,

LE XVI. LIVRE

Son ame est en balance, & son cœur en esmoy
 Si elle doit tousiours demeurer avec moy,
 Garder son premier liēt, & porter reuerance
 A mon pere, à son nom, soignant de sa puissance
 Sa court & sa maison, ayant tant emporté
 De reputation de sa pudicité.
 Ou, se laissant conduire à vn desir volage,
 S'elle doit conuoler en second mariage
 Prenant le riche dot de celuy qui sera
 De plus noble maison, & luy apportera
 Plus de commoditez, de bien & de cheuance.
 Quant à nostre hoste icy, puis que pour assurance
 Il s'est sauué ceans, ie le reuestiray,
 D'habits & de manteau present ie luy feray,
 Luy douroy une espee afin de se defendre,
 Le feray bien chauffer : & où il voudra prendre
 Son chemin, le feray conduire sur ma foy.
 Si tu veux toutesfois, retien l'icy ches toy,
 Et ie luy enuoyray robes à suffisance
 Et viures, qu'il ne soit en charge & en despence
 A toy & à tes gens. Car de permettre aussi
 Qu'il se vienne fourrer parmy ces gens icy,
 Ie ne le feray pas, de peur qu'ils ne luy fissent
 Quelque outrage ou affront, ou qu'ils ne le batissent.
 Car ils sont insolens & pleins de leur plaisir,
 Et i'en aurois pour luy regret & deplaisir.
 Il est bien mal aysé d'auoir de l'aduantage
 A vn seul, sur plusieurs, bien, qu'il ayt du courage.
 Le tolerant Vlysse adonc ainsi luy dit.
 Amy, s'il m'est permis de parler vn petit,
 Certes ie te diray que le cœur me dechire
 De deuil & de pitie, quant i'entens ainsi dire

L'outrage & le degast que ces gens sans raison
 Commettent outrageux en ta propre maison,
 Estant tel que tu es. Mais d'y moy, ie te prie,
 Est-ce de ton bon gré que ceste fascherie
 T'est faite, où si tu es à ton peuple odieux
 Te hayssans ainsi par le vouloir des Dieux.
 Ou bien en blasmes tu ceux de ta parentelle
 Qu'on a persuadez, si tu a vois querelle,
 De ne te secourir ? eussay-ie la roideur
 La force & la ieunesse ainsi que i' ay le cœur,
 Et que le brave fils d'Ulysse, où bien luy mesme
 Retournaist maintenant par le vouloir supresme,
 (Et ie l'espere encor) ie voudrois qu'on me fist
 Mourir que le premier la teste m'abbatist,
 Si ie ne leur donnois & malencontre & perte,
 Pouruen que d'Ulysses la cour me fust ouuerte.
 Que si ie succumbois, & que dessous l'effort
 De plusieurs, seul ie vinse à estre mis à mort,
 I'aymerois mieux en fin chez moy perdre la vie
 Que d'endurer tousiours telle coyonnerie:
 Voir par des estrangers ma maison malmener,
 Mes seruantes chez moy souiller & vilener,
 Gourmander tout mon bien, voir tant d'iurogneries
 Tant d'indiscretions, & de forceneries,
 Fureter tous mes vins, manger mon bled en vert,
 Somme de ma maison faire un piteux desert.

Auquel Telemachus. Amy, ceux de la ville
 Ne me hayssent pas, le vulgaire imbecille
 Ne me veut point de mal contre moy irrité.
 Et ie ne puis blasmer ceux de ma parenté,
 Qu'on a persuadez, bien que i'eusse querelle
 De ne me secourir de force mutuelle.

LE XVI. LIVRE

*Car Iupiter sous qui tout l'Olympe est soumis
 N'a toujours qu'un enfant en nostre race mis
 Le fort Arceius n'eut d'enfant que Laërte,
 Laërte n'eut qu'Ulysse, en sa maison deserte
 Il m'a laissé tout seul, aydèny assisté
 De personne du monde, ains plus tost tourmenté,
 Mesme dans ma maison d'ennemis innombrables
 Car les hommes plus forts & les plus honorables
 Des isles d'alentour, de Samos icy pres,
 De celle de Zacynthe obscure de forests,
 De Dulichie, aussi, mesmement de ceste isle
 De la propre Ithacha, rude, aspre difficile,
 Tous ceux là sont ches nous, desirent d'espouser
 Ma mere, & cependant ne cessent d'espuiser
 Nos biens, nos reuenus. Elle ne les refuse
 Et si ie ne les accepte, ains toujours les amuse
 Et ne les resolt point, & eux cetempendant
 Vont nos biens sans respect rongeant & gourmandant.
 Et possible bien tost me turent ils moy mesme.
 Mais tout cela despend de la force supresme
 Des grands Dieux tout puissans. Mais toy va vistement
 Trouuer Penelope, aduertyl la comment
 Me voicy de retour sain & sauue de Pyle,
 Jet'attendray icy, n'arreste guere en ville:
 Mais ne le d'y qu'à elle, & que nul poursuiuant
 N'en aye dessus tout ne nouuelle ne vent:
 Car ils ont coninré ma perte & mon dommage.
 Auquel respond ainsi Eumæ le pastre sage.
 J'entend, ie le feray. Mais ne pourrois- ie aller
 Le dire à Laërtes, affin de consoler
 Le bon homme affligé, qui combien que l'absence
 D'Ulysse l'accablast, il prenoit patience*

Pourtant tant qu'il pouuoit, me snageoit, tracassoit,
Et au trauers des champs le temps ainsi passoit
Auec les seruiteurs, & substantoit sa vie
En mangeant & beuant quand luy prenoit l'enuye,
Mais depuis ton depart, & qu'il a sceu comment
Tu t'en estois allé, on dit certainement
Qu'il ne boit, & ne prend viure quel qu'il puisse estre
Et ne prend plus plaisir à nul labeur champestre,
Mais il demeure là sans cesse soupirant
Et de son estomac tousiours soupirs tirant,
Les forces de son corps entierement le laissent,
Et ses os de douleur se mattent & s'abaissent.

I'en porte vn grand ennuy, mais ie presse au dedans,
Luy dit Telemachus, la peine que i'en sens.

Mais laissons Laertes & ses plaintes funestes,
S'il falloit souhaitter, & que les Dieux celestes
Me missent à choisir, Vlysses reniendroit.

Mais va t'en vistement Eumæ, va t'en tout droit
Au lieu où ie t'ay dit, il n'est pas necessaire
D'aller à Laertes, trop bien, dy à ma mere
Que quelque chambriere aille à l'en aduertir
En secret. Ce disant le presse de partir.

Il court, chausse soudain ses souliers, & habile
Il prend droit son chemin vers les murs de la ville.

Mais son depart ne peut à Pallas se cacher,
Qui fit qu'incontinent elle vint s'aprocher
De la maison d'Eumæe, elle se fit semblable
A quelque grande Nymphé, & graue & venerable
De taille & de beauté, scachant excellement
Trauailer au mestier, & broder richement.
Estant dessus la porte elle se fit paroistre
Au fin Grec, mais son fils ne la put recognoistre.

LE XVI. LIVRE

Car la grand maiesté des hauts Dieux immortels
Ne se laisse pas voir ainsi à tous mortels.
Ulysses seulement la vit, aussi la virent
Les chiens & nuls abbois pour elle en l'air ne firent
Ils fuyent gemissans, fremissent tremblotans,
Se retirent delà, & des flancs haletans,
Pismans tacitement se cachent en l'estable,
Car Pallas leur faisoit un signe epouvantable:
Ulysses s'en douta, sortit de la maison,
Passa & la muraille & la grande cloyson
Du logis vers les champs, il se renga vers elle:
Adonc ainsi luy dit la deesse immortelle.

Du vieillard Laertes braue fils & vaillant,
Race de Iupiter, prudemment conseillant,
Il faut que maintenant à clair tu te reveles
Et parles à ton fils, que plus tu ne te celes:
Il vous faut consulter comme d'un braue effort
Vous pourrez à ces gens donner cruelle mort.
Il vous faudra delà tirer droit à la ville,
Pren cœur, ie vous seray favorable & facile,
Ie seray pres de vous, ie vous assisteray,
Combatray avec vous, & ne vous laisseray.

Elle dit, puis toucha de sa verge doree
Ulysses, luy changea sa robe dechiree,
Et mit autour de luy un bel accoustrement:
Puis sa taille elle acrent de grace & d'ornement,
Ses ionues elle unit, osta son hasle extresme,
Ses cheueux rebrunit & sa barbe de mesme,
Puis s'estant retiree il r'entre vistement:
Mais son fils fut saisi d'un grand estonnement,
Et la peur le surprit. Ce changement estrange
Fait qu'il baisse les yeux & son visage change:

Il le pense estre un Dieu qui fit que my-transi
Il luy tint ce langage & luy parla ainsi.

Tu n'es plus celuy là que tu estois naguere
Mon hoste, tes habits & ta taille premiere
Sont grandement changez, tu es quelqu'un des Dieux
Qui vivent eternels sur le trosne des Cieux:
Sois nous doux, & subuiens à nos grandes miseres,
Enten nous pitoyable & reçois nos prieres:
Et dessus nos autels nous te sacrifirons
Agréable victime, & te presenterons
Dons grands & precieux, hélas! soy nous propice.
Auquel respond ainsi le patient Ulysse.

Je ne suis pas un Dieu, pourquoy donc me veux tu
Accomparer aux Dieux excellens en vertu?
Regarde me voicy Ulysses ton cher pere,
Pour qui tu souffres tant de peine & de misere,
Pour qui tu gemis tant, endurent à grand tort
Par ces presomptueux cas pires que la mort.

Ce disant, d'un amour ardent plus que la braise
Il luy ouure les bras & tendrement le baise:
Mainte larme le long de ses ioues luy pend,
Un grand fleuve de pleur sur le sein luy descend,
Il le tient sans cesser, & collé sur sa face,
De ses bras il l'estreint, il le serre, il l'embrasse.

Mais Telemach, qu'il fust son pere ne scauoit,
Et se le faire accroire encores ne pouuoit,
Si luy dit, tu n'es pas Ulysses, n'y mon pere,
Mais un Dieu me surprend, qui veut que ma misere
Se rengrege tant plus. Certe un miracle tel
Ne se fera iamais par un homme mortel
Et n'estant pas un Dieu il n'aura la puissance
De remettre un vieillard en son adolescence.

LE XVI. LIVRE

Vieil naguiere, & couuert d'un habit pieceté
Tu semble ores un Dieu de l'Olympe vouté.

Il ne faut pas mon fils, luy respondit Vlysse,
Que ton ceur s'emerveille & moins qu'il seruisse
D'un tel estonnement, de voir ton pere icy.
Car un autre Vlysses que celui que voicy
Ne reniendra versty. Mais me voicy le mesme
Que iet'ay desia dit, qui reniens l'an vintiesme
Dedans mon cher pais, apres auoir esté
D'infinité de maux batu & tourmenté.

Ce que tu, me vois tel, ce n'est que l'œuvre estrange
De la forte Pallas, qui me faict, qui me change
Tout ainsi qu'il luy plaist, car elle a le pouuoir
De me changer en gueux, & puis me faire voir
Un ieune homme, vestu de robe riche & belle.
Il est facile aux Dieux de nature immortelle
De rendre les humains heureux ieunes & beaux,
Ou bien les renuersans les accabler de maux.

Ce disant il s'assit & Telemach plein d'ayse
Se fond entre ses bras, luy pend au col, le baise
Iette un haut & grand cry, & se fond tout en pleurs
Alors ils exhalloient ensemble leurs douleurs,
Jettans plus de regrets, que l'aigle à la main forte,
Ou le vautour ne geind & ne se deconforte
Lors que le paysant emporte leurs petits,
Qui bequetoient encor sans plume dans leurs nids
Ains que pouuoir estendre en l'air leurs ayles fraîches.
Les pauvres desolez voletent sur les branches
Et y font retentir leurs plaintifs lamenteux.
De la mesme façon lamentoient ils tous deux,
Et le Soleil se fut caché dans l'onde amere
Sur leurs pleurs, si le fils n'en eust tiré le pere

Il luy dit donc ainsi : Quelles gens, quels vaisseaux,
O mon pere tres-cher, t'ont conduit sur les eaux,
Et rendu en Ithaque? Estant inaccessible
D'y aborder à pié, & du tout impossible?

Iet'en diray, mon fils, toute la verité.
Sont les Phaaciens pleins de fidelité,
Luy dit lors Ulysses, gens experts dessus l'onde,
Pilotes excellens s'il y en a au monde:
Qui ont accoustumé sur les flots hazardeux
D'en mener tout autant qu'il s'en adresse à eux.
Frappé d'un fort sommeil sur le hault du navire
Ils m'en ont enlevé, & m'ont sans m'en rien dire
Posé sur le rivage avec de grands presens
Qu'ils m'ont fait en partant. Or, habits reluisans,
Et choses de grand prix, que j'ay toutes mussees
Et par l'advis des Dieux sonz le roc entassees.
Or suis-je icy venu par l'advis de Pallas,
Pour resoudre avec toy sur le sanglant trépas,
Ou faut faire tomber ces faiseurs de desordre.

Par ainsi ie te pry conte les moy par ordre,
Je veux sçavoir leurs noms, combien propres ils sont
Aux armes, & quel nombre & quelles gens ils sont.
Pour mieux pourvoir à tout: si nous pourrons combattre,
Nous tous seuls tant de gens, & sans secours les battre,
Ou bien si nous devons des gens ailleurs chercher.

Auquel Telemachus. J'ay tousiours, pere cher,
Ouy parler de toy. & de ton grand courage
Quand il falloit combattre. & de ton advis sage
S'il falloit conseiller. Mais ton cœur entreprend
Maintenant un exploit émerueillable & grand,
I'en suis hors de moy-mesme, & n'y a d'apparence
Que contre force gens, forts & pleins de vaillance

LE XVI. LIVRE

Deux s'aillent attaquer presomptueusement.
 Ne t' imagine pas qu'ils soient tant seulement
 Vne simple dixaine, ou bien vne vingtaine,
 Ils sont bien plus, le tout surpasse la centaine.
 Je les vay donc conter. Ils sont cinquante & deux
 Du bord Dulichien, braues & hazardeux,
 Ils ont six seruiteurs qui ne se lairront battre.
 De l'isle de Samos on en met six fois quatre:
 L'ombrageuse Zacynthe en armes deux fois dix,
 Et ceste isle d'Ithaque en fournit deux fois six
 Tous braues & vaillans. Puis Medon le trompete
 Ne bouge d' avec eux, & vn diuin Poëte
 Qui tres-excellemment scait iouer & chanter:
 Et puis deux seruiteurs qui scauent apprestier
 A boire & à manger. Si tu veux entreprendre
 D'attaquer tout cela, voy de ne te meffrendre,
 Et ne te hazarder si temerairement,
 Que tu ne vienne en fin acheter chèrement
 L'honneur que tu auois conceu en esperance.
 Mais si tu as ailleurs prattique & cognoissance
 Dont tu puisses des gens à ton ayse employer,
 Deuant que passer outre il y faut enuoyer.
 Voicy que ie te dy, respond alors Ulysse:
 Si le hault Iupiter & Minerue propice
 Combattent avec nous, pourray-ie auoir besoin
 De gens pour m'assister, ou me fault-il au loin
 Aller chercher secours? A ces mots Telemaque:
 Certes tu me produits, ô prudent Roy d'Ithaque,
 De braues protecteurs, qui seent residens
 Sur les nues du Ciel, & les Astres ardens,
 Qui sur les autres Dieux leur grand empire estendent,
 Et puissans & hautains sur les hommes se rendent.

Lors Ulysses luy dit : Ils auront de nous soin,
Et du mortel estour ne se tiendront pas loin,
Dès que nous entrerons contre eux à main ouverte,
Et Mars se fera voir dans les tours de Laërte.

Doncques, dès que Titan haussera son beau chef
Retourne t'en, mon fils, & hante derechef
Au festin de ces gens, pry' les & les appelle,
Incontinent apres nostre pastre fidelle
Me menera vers eux, ainsi qu'un mendiant
Qui demande son pain, & qui se va pliant
De vieillesse courbé. Que si ceste canaille
Me fait quelque rudesse, & quelque coup me baille,
Endure tout d'un cœur patient & constant,
Voire quand ils m'iroient contre terre iettant,
Me fouleroient aux pieds, traineroient par la rue,
Mesmes me blefferoient. Pour cela que ta venue
Ne s'en esmeuve point, voy le benignement,
Tolere l'en ton cœur, mais pry' les doucement
De desister un peu de leur forcenerie.
Ils en feront refus, pource que leur furie
Est venue à son feste, à son poinct limité,
Et le iour est escheu de leur fatalité.

Or retien bien cecy. Quand Minerve la sage
A leur malheur m'aura inspiré le courage,
Je feray de la teste un signal. Sois discret,
Et sur tout pren bien garde à ce signe secret.
Toutes les armes lors & les bastons de guerre
Qui seront en la salle, oste les & les serre,
Emporte tout de là. Si quelqu'un plus rasé
En ne les voyant plus, demandoit aduisé
Que c'est qu'on en a fait, de parole courtoise
Et de mots blandissans, parle à luy & l'appaise:

LE XVI. LIVRE

*Que c'est pour la fumee, & qu'ayant apperceu
 Ses armes se gaster à la vapeur du feu,
 Et que certainement elles n'estoient pas telles
 Qu'Ulysses les laissa, si claires ne si belles
 Comme quand il partit, tu les as faict oster.
 A ce faire qu'aussi t'a poussé Iupiter
 Pour preuenir un mal: de peur qu'apres bien boire,
 Et Bacchus ayant eu sur leurs cerueaux victoire,
 Prenans quelque dispute, ils ne vinssent en fin
 L'un l'autre à se tuer, polluant le festin
 De fureur deshonneste, & par lourdes batailles
 Troubler les saints apprests des proches épousailles:
 Car les armes souuent tirent à question
 L'homme, de son humeur plein de contention.
 Pour nous deux seulement tu lairras deux épées,
 Deux boucliers & deux dards aux pointes bien trépoës,
 Et rien plus. Car Pallas au poinct de contester
 Les circonuiendra tous, & le grand Iupiter
 Vains rendra leurs conseils. Voicy vne autre chose
 Qu'il faut que tu retienne, & que ie te propose.
 Si tu es mon vray fils, & si tu es sorty
 Vrayement de mon sang, sois sur tout aduertty
 Que nul, qui que ce soit, n'oye nommer Ulysse,
 Qu'en quelque part que soit ce mot ne retentisse:
 Non mesmes Laërtes, non mesmes le porcher,
 Non nul de là dedans, quelque fidelle & cher
 Qu'il te puisse estre, non Fenelope ta mere,
 Mais Telemachus seul vny avec son pere.
 Nous considererons les façons & les mœurs,
 Et les deportemens de tous tes seruiteurs,
 Comme l'on se comporte & comme l'on se traite,
 Qui se gouuerne bien, & qui c'est qui regrette*

*La perte de nos biens: Bref qui finalement
Ne s'en souciant point se porte arrogamment,
Qui nous tient à mespris, & qui nous deshonore.
Et son illustre fils luy respondit encore.
Mon pere, tu verras mon cœur & ma vertu,
Ie n'ay point le courage abiect ny abbatu:
Mais ie ne pense pas que soit à l'aduantage
De pas vn de nous deux, mais à nostre dommage:
Et ie te pry bien fort de le considerer,
Le temps te donnera prou loisir d'explorer
Les façons de nos gens: tandis les autres brisent,
Deuorent tout ton bien, & ta maison détruisent,
Sans moderation en leurs débordemens.
Tu pourras obseruer les ords comportemens,
Les Salles voluptez de la plus part des femmes,
Leur luxe, leur ordure, & leurs actes infames,
Diffamans ta maison par leurs trains deshontez.
Mais quant aux seruiteurs qu'ils soient si tost tentez,
Ie n'en suis pas d'aduis, mais avec patience
Ils viendront à sortir en fin en euidence.
Si tu attends sur tout le miracle brillant
Du pere Iupiter son Agide branlant.
Ils deuisoient ainsi, quand on vit en Ithaque
Aborder le vaisseau qui porta Telemaque,
Ils touchoient le riuage & entroient dans le port,
Le nauire prend terre: adoncques chacun sort,
Et tous les espalliers remportent l'equipage.
Et les dons au logis de Clytius le sage.
Puis à Penelope dépeschent viftement
Luy dire, que son fils retourné seurement,
S'en estoit allé voir aux champs le pastre Eumée,
Mais qu'il auoit enioint la barque estre amenee*

LE XVI. LIVRE

*Alabry souz les murs, de peur que de frayeur
La Reyne n'affligeast par trop son tendre cœur,
Et ne plongeast en pleurs son sein & son visage.
Le Pastre & le Herault portans mesme message
Arriuoient par hazard ensemblement tous deux,
Pour à la Reyne dire un propos si ioyeux.*

*Adoncque le Herault au milieu de la trope
Des femmes dit ainsi: O chaste Penelope,
Ton cher Telemachus est venu. D'autre part
Eumaus plus discret en la prenant à part,
Luy dit secrettement & tout au long sa charge,
Et de son ambassade à elle se descharge:
Ce faict, il prend congé, sort vistement dehors,
Et s'en va retrouver diligemment ses porcs.*

*Mais des competeurs la cohorte cruelle
Fut tres-fort contristee oyant ceste nouuelle,
Ils sortent du chasteau pleins d'ire & de dedain,
S'assemblent vistement, & se trouuent soudain
Hors la porte au conseil. Eurymachus commence,
Le fils de Polybus, à dire à l'assistance.*

*Amis, braue ieunesse & fidelle à l'effect,
Quel voyage est-ce cy que Telemaque a faict?
Que d'honneur, que de los, de bruit e. toute sorte,
Ceste entreprise icy luy acquiert & apporte!
Bien que nous pensissions, pauvres d'entendement,
Qu'il n'en viendroit à bout, & si heureusement
Ne luy reüssiroit. Or il faut tout asteure
Enuoyer à nos gens vne barque bien seure,
Qu'ils sortent d'embuscade, & sans plus s'y tenir
Qu'ils ayent sur les flots soudain à reuenir.*

*A peine auoit-il dit, que de sur la leuee
Amphinome apperçoit vne barque arrinée*

Fraichement dans le port, ceux qui estoient dedans
Les uns plians le voile, & les autres tenans
Perches & avirons. Alors d'un doux sourire
Il va trouver ses gens, & leur commence à dire:
Il n'est ja de besoin d'envoyer de vaisseau
Pour faire revenir nos gens qui sont sur l'eau,
Ils sont desja au port: s'ils ont sceu la nouvelle
Aduertis par quelqu'un de la troupe immortelle,
Ou s'ils ont apperceu d'eux mesmes s'eschapper
Sur l'eau le galion qu'ils n'ont peu attrapper.
Il dit, & ce-pendant du rinage ils approchent,
Ils poussent contre terre, & leurs bastons accrochent.
A terre ils font porter les armes viftement,
Puis pour tenir conseil ils vont diligemment.
Ils ne permettent pas que personne qui vive
Ou soit ieune ou soit vieil, les approche ou les suive:
Mais les competeurs s'y trouvent seulement,
Auxquels Antinoüs harangua promptement.
Compagnons, la faueur de la troupe celeste
Nous a par trop esté defaillante & moleste,
Retirans ce garson du danger de nos mains.
Nous auions sur les ments & rochers plus hautains
Posé de toutes parts guettes & sentinelles,
Et demeurâmes là, tant que ses tresses belles
Titan eust submergé dans les eaux d'Occident.
Tant que dura la nuit au manteau morfondant
Jamais dessus nos yeux le sommeil ne s'abbaisse,
Nous courons çà & là, nous tracassons sans cesse,
Nous faisons sans repos maint tour & maint retour
Attendans & l'Aurore & le flambeau du iour:
Embuschez, resolu de tuer Telemaque,
Et d'esteindre le nom du madré Roy d'Itaque.

LE XVI. LIVRE

Et le voicy pourtant par ie ne sçay quel Dieu
 Eschappé de nos mains & sauvé en ce lieu.
 Il ne faut toutesfois que nous perdions courage,
 Il faut qu'il meure icy, il faut qu'on le saccage,
 Qu'il tombe souz nos mains. Car tandis qu'il viura
 Ceste nostre entreprise onc ne reüssira:
 Il est prudent & fin, plein de ruse & malice,
 Et qui decouurira tousiours nostre artifice.
 Le peuple outre cela desormais l'aimera
 Et ce qu'entreprenons du tout n'approuuera.
 Par quoy mes compagnons, concluons tous ensemble,
 Resoluons ceste mort, parauant qu'il assemble
 Le peuple & le conseil, il ne dormira point,
 Mais à tout tant qu'ils sont dira de point en point
 Ce qu'auons voulu faire, & qu'auons eu enuie
 Embuschez sur la mer de luy oster la vie,
 Où nous auons esté long temps pour l'attrapper,
 Et qu'à peine il a peu de nos mains eschapper.
 Le peuple, les bourgeois entendans cet affaire
 En seront mal contens, entreront en calere,
 Muables, inconstans, sur nous soudain courront:
 Et s'ils ne nous font pis, d'icy nous chasseront,
 Nous rennoiront chez nous, si plus inexorables
 Ne nous forcent d'aller autre part, miserables,
 Errans, & vagabonds. Si doncques vous auez
 Quelque fiance en moy, croire vous me deuez.
 Il est chez son porcher, allons y tout asteure
 Deuant qu'il en reuienne, attaquons l', & qu'il meure:
 Ou bien si vous voulez attendons le au chemin
 Embuschez, & ce coup qu'il sente nostre main.
 Puis tenons bon icy, prenons la iouyssance
 Des grands biens que sçauons y estre en abondance,
 Vsurpons

*V*surpons le Royaume, entre nous partageons
Les tresors, la maison, & i'amaïs n'en bougeons.
Pour la Reyne, il luy faut donner vne demeure,
Des biens, des reuenus, que fort bien on l'asseure,
Qu'on la contente bien, & qui l'esponsera
Auec elle, du tout paisible iouyra.
Mais s'il est arresté, que personne ne suyue
Mon conseil salutaire, & que vouliez qu'il viue?
Non seulement qu'il viue, ains qu'il succede encor
Au regne de son pere, à son bien, à son or,
Legitime heritier: qu'en repos il iouysse
D'un si grand reuenue que possedoit *V*lysse.
Sortons doncques d'icy, & plus ne ravageons
Son bien, son reuenue, plus ceans ne mangeons,
Mais que chacun chez luy doucement se retire,
Que pour femme, de là, si tant on la desire,
On l'enuoye en ce lieu chercher & demander,
Et amiablement de son doüaire accorder:
Et qui plus donnera, obtienne en mariage,
Si le sort luy dit bien, *Penelope* la sage.

Il mit fin à son dire. Et tout tant qu'ils estoient
Resterent sans parler, & silence prestoient.
Alors *Antinomus*, fils illustre & splendide
D'un Prince du pays, de *Nisus* l'*Aretide*,
Estant comme le chef & principal amant
Venu de la *Dulichie* abondante en froment
Et riche en pasturage, & qui à *Penelope*
Agreoit & plaisoit plus que nul de la trope,
Pour ses propos courtois & son honnesteté:
Car il estoit affable, orné de probité,
Et de bon iugement. En se leuant commence
A tenir ce langage avec grande prudence.

LE XVI. LIVRE

Je ne trouue point bon que l'on mette la main
 Dessus Telemachus, cet acte est inhumain,
 Car il est fils d'un Roy : ie suis d'aduis qu'on prenne
 L'aduis de Iupiter, qu'on le suyue & sytienne.
 Si c'est sa volonté, le premier ie courray
 Aux armes, cela mesme à tous conseilleray,
 Le renuerseray mort : mais aussi, si n'est telle
 La sainte volonté de la troupe immortelle,
 Quittez ceste entreprise. Aussitost qu'il eut dit,
 Chacun conclud de mesme, & son aduis suiuit.
 Ils se leuent adonc, puis leur route reprirent
 Au chasteau d'Ulysses, & sur les bancs s'assirent.

La Reyne cependant voulut se faire voir
 A ceux qui consumoient son bien & son auoir,
 Car elle auoit bien sceu l'entreprise maudite,
 La resolution luy auoit esté ditte
 Par le Herault Medon, des traistres poursuuans.
 Elle vint donc à eux ses filles la suiuan,
 Et comme elle fut pres de la bande cruelle,
 De son voile courant l'air de sa face belle:
 Au fier Antinoüs elle dit en courroux.

Méchant Antinoüs, cruel par dessus tous,
 Plein d'iniure & de tort, conseiller tres-inique,
 Est-ce toy que l'on nomme à haute voix publique
 Par la ville d'Ithaque, entre tous tes pareils
 Le meilleur à bien dire, & le prime en conseil ?
 Certes, tu n'es point tel. Et qu'est-ce, ô plein de rage,
 Que tu vas machinant la mort & le carnage,
 Sur mon Telemachus ? As-tu point redouté
 D'encourir le supplice aux meurtriers appresté,
 Pour leurs méchancetez ? Desquels Iupiter mesme
 Est tesmoin du plus hault de sa voulte supresme ;

Quoy? quelle sainteté d'ainsi s'entretuer,
 Et miserablement sur le sang se ruer?
 Nete souuient-il point comme autresfois ton pere
 S'enfuit en ce lieu, euitant la colere
 Du peuple, contre luy grandement irrité,
 A cause qu'il auoit, plein de temerité,
 Couru & rauagé sur ceux de Thesprotie,
 En suiuant les larrons pyrates de Taphie?
 Or les Thesprotiens estoient lors nos amis,
 Ils l'eussent massacré, eussent en pieces mis
 Son cœur, eussent destruit ses biens avec sa vie,
 N'eust esté qu'Ulysses appaisa leur furie,
 Dont tu manges le bien, dont, ô méchanceté,
 Tu recherches la femme & sa pudicité,
 Dont tu poursuis l'enfant par trahison amere,
 Ammoncelant, méchant, à sa dolente mere
 Tristesse sur tristesse, esmoy dessus esmoy.
 Mais regarde moy bien, ie te commande à toy,
 De desister en fin de ta folie infeste,
 Et si feras fort bien de contenir le reste.

A Eurymaque apres de dire est eschappé:
 O fille d'Icarus, sage Penelopé,
 Assure ton esprit, chasse toute ta crainte,
 Et iette au loing la peur dont ton ame est atteinte.
 Personne n'est icy si hardy poursuiuant
 Que de ietter les mains sur ton fils, moy viuant,
 Car ie te veux bien dire, & pour toute assurance,
 Que le sang coulera sur le fer de ma lance
 De celuy qui voudra luy faire nul excès.
 Car, i'en ay souuenance, autresfois Ulysses
 M'a faict, & fort souuent, cet honneur de me prendre
 Petit sur ses genoux, & de sa main me tendre

LE XVI. LIVRE

Quelque chose à manger, & seant en son sein
De doux vin me bailler son grand verre tout plein.
A ceste occasion dessus tous ceux d'Ithaque,
Et plus qu'homme vivant i' aimeray Telemaque:
Qu'il se repose en moy, qu'il assure son cœur,
Et de tous ces seigneurs qu'il n'aye point de peur,
Je le garenty d'eux: au reste, nul n'eute
Ce qui prouient de Dieu, & n'y a point de fuite.

Il luy disoit ainsi, & l'alloit exhortant
De s'assurer de luy. Le traistre nonobstant
Au dedans de son cœur premedite & machine
Au Prince Telemach' trahison & ruine.

Mais la Reyne, au plus haut & au plus eminent
Du superbe chasteau soudain s'en retournant
Se retire en sa chambre, & pleine de tristesse
Déplore en sousspirant son Ulysses sans cesse,
Jusqu'à tant que Pallas la Deesse aux yeux vers
Luy eut ses yeux pesans d'un doux sommeil conuers.

Or se faisoit-il tard, quand le porcher champestre
Arriua vers le fils, & le pere, son maistre,
Qui dedans la maison apprestoient à manger,
D'un porc aagé d'un an qu'ils venoient d'égorger.
Au mesme instant Pallas la belliqueuse vierge
Revint vers Ulysses, le toucha de sa verge,
En sa forme senile à l'instant le remit,
Et ses haillons rompus à l'entour de luy mit,
De peur que le porcher ne vint à le cognoistre,
Et à Penelopé n'allast faire apparostre
Son retour. Lors à luy Telemachus accourt:
Te voicy donc, dit-il, quelle nouvelle court?
Ceste belle embuscade est elle renennüe?
Ou, sont-ils là tousiours dessus mon aduennüe

*M'aguetans au retour? Auquel ainsi Enné.
Ie ne me suis point trop de ce fait informé,
I'ay eu soin seulement de faire mon message,
Et d'informer de toy Penelopé la sage,
Et puis m'en reuenir. Mais plustost que de moy
Elle auoit desia en des nouvelles de toy,
A cause que de tes gens si tost qu'ils arriuerent
Un trompette soudain à ta mere ennoyerent.
Mais voicy bien un fait que i'ay veu de mes yeux,
Ie m'assis en allant dessus un tertre vieux
Au dessus de la ville, on l'appelle Hermee,
D'où ie vy arriuer vne fregate armee,
Toute pleine de gens, chargee pesamment
D'armes & de bastons luisans extremement:
C'estoient eux, que ie pense, & si n'en puis que dire.
Il dit, & Telemaque alors se prit à rire,
Son pere regardant, mais le porcher ne sceut
Onques y prendre garde, & ne s'en appercent.
Eux tousiours trauiillans le soupper apprestèrent,
Puis quand ils eurent fait à l'aise banquetèrent,
A plein rassasians leur estomac pressé,
D'un repas suffisant, mais l'appetit cessé,
Et la soif appaisée, alors ils s'endormirent,
Et les dons gracieux du doux sommeil ils prirent.*

Fin du seiziesme Liure.



LE DIXSEPTIESME LIVRE DE L'ODYSSEE D'HOMERE.

ARGUMENT.

Elemachus reuient en la ville, il narre à sa mere les principaux poincts de son voyage. Eumæus amene Vlysses à la ville. Il est iniurié par le chemin, & frappé par son maistre Cheurier. Il entre où les poursuyuans banquettoient: vn vieux chien le recognoist, & puis meurt. Vn des poursuyuans le frappe. Eumæus retourne aux champs, & Vlysses demeure en la ville.

AUTRE SOMMAIRE.

*Entrant chez luy son chien le recognoist encore,
Mais vn fier poursuyuant l'outrage & deshonore.*

Ainsi que la belle aube au Ciel apparoissoit,
Le cher fils d'Vlysses Telemaque, agençoit
Ses souliers à ses pieds, sa lance fort agile
S'accommodoit en main, prest d'aller à la
Puis dit à son porcher: Je m'en vay de ce pas (ville,
Voir ma mere au chasteau: car ie ne pense pas
Qu'elle puisse iamais mettre fin à sa plainte
Qu'elle ne m'ait reueu, tant elle est en grand' crainte.
Or pour nostre hoste icy, ce pauvre malheureux
Qui s'est fourré ceans, voicy ce que ie veux:

Ameine l'en la ville, afin qu'il y mendie,
Qu'il y cherche son pain & demande sa vie,
Qui enuie en aura luy pourra subuenir,
Pour moy ie ne scaurois à tant de gens fournir,
Ayant tant de soucy, plein de tant de misere,
D'affaires accablé s'il s'en met en colere
A son dam, i'aime mieux dire la verité.

A cela Ulysses. Amy, de mon costé
Ce n'est pas mon desir, i'y serois inutile,
Puis il faict bien meilleur chercher en vne ville
Son pain, que par les champs : qui enuie en aura,
Selon ses facultez, à manger me donra,
Car ce n'est point mon faict de hanter aux villages,
Ne pouuant m'acquitter de ces charges sauvages.
Va donc quand tu voudras, & ie suivray bien tost
Le guide que i'auray, tout souchain que le chant
M'aura desengourdy, & l'air sera paisible.
Bien que ces haillons cy me pesent au possible,
Mais de peur qu'au matin ie ne gelle transi
Ie les porte, & la ville est vn peu loing d'icy.

Il parloit, & son fils à grands pas s'achemine,
Sorty qu'il fut delà, machinant & ruine
Et mort aux poursuyuans. Quand il fut arriué
Au superbe palais richement eslené,
Contre vne grand colonne il appuye sa lance,
Passe le seuil de l'huis, dans la maison s'aduance.
Sa nourrice Euryclee en entrant l'apperçoit
La premiere de tous, des peaux elle agençoit
Sur des sieges diuers. En larmes ruisselante
Elle va droit à luy, & mainte autre seruante
Le vient enuironner, & toutes à l'enny
Corrent pleines de pleurs tout à l'entour de luy,

LE XVII. LIVRE

L'embrassent de grand' ioye, & de façon honnestè
Luy baisent mille fois & les mains & la teste.

La Reyne de sa chambre accourt hastiuement,
A Diane, à Venus semblable entierement,
Embrasse son cher fils, toute surprise d'aise
Et le front & les yeux & la teste luy baise,
Puis pleurant tendrement elle luy dit ainsi.

Te voicy donc en fin mon fils, mon cher soucy,
Ma tresdouce lumiere, & ma seule fiance,
Qui te pensoit iamais reuoir, mon esperance,
Depuis que tu osas de ce lieu déloger
Pour t'en aller à Pyle, & par maint grand danger
Dessus la mer, chercher nouuelles de ton pere?
Mais dy moy, comme est tu reuenu voir ta mere?

A qui Telemachus. Ma mere, ie te pry'
Ne me vien dauantage attrister de ton cry,
Qui ay la dure mort eschappee à grand' peine,
Mais plustost laue toy de pure eau de fontaine,
Prentes plus beaux habits, pare toy comme il fault,
Et t'en retourne avec tes seruantes là hault.
Là, aux Dieux tout-puissans, pour les rendre propices
Vouë de cent Toreaux solennels sacrifices,
Si Iupiter nous donne vn iour de nous venger
De ceux qui sans raison nous viennent outrager.
Ie m'en vay à la ville, afin que ie retire
Vn mien amy venu avec moy au nauire,
Et qu'avec mes amis sur le port i'enuoyay
Quand ie voulu partir, & Peyree en chargeay
De le mener chez luy, de luy faire grand chere,
Et luy porter honneur. Il disoit, & sa mere
N'y faillit nullement. Adonc elle tira
Ses precieux habits dont elle se para,

S'estant premier luee. Et souleuant sa face
Aux puissans Dieux voua, s'ils luy faisoient la grace
De se venger vn iour de ses mechants hayneux,
De leur sacriffier offrande de cent bœufs.
Lors Telemachus sort de sa maison muree
Son ianelot en main à la pointe ferree,
Deux grands dogues puissans ses pas legers pressoient
L'accompagnoient suiuants, & point ne le laissoient.
Pallas soufla sur luy vne majesté grane,
Vn port respectueux, vne demarche braue,
Les yeux de tout le peuple à soy il attiroit,
Et sa belle façon tout le monde admiroit.
Mesmes les poursuiuans autour de luy se pressent,
Bien veignent son retour, le flattent, le caressent,
Mais dedans leur courage ils l'alloient menacant
Mais luy sans s'arrester va plus outre passant
A ceux qui luy portoient vne amitié entiere
Et qui estoient amis de tousiours de son pere:
Tels qu'estoient Antiphus, Mentor, Alitherses.
Tout ioignant d'eux s'assit le preux fils d'Ulysses,
Eux s'enqueroient de luy, quand deuers eux s'aduance
Par la ville marchant, Peyra, braue à la lance
Et son hoste amenant. Telemachus le vit
Se tournant, & Peyra le preuenant luy dit.

Telemaque, enuoy moy en diligence grande
Les filles du logis, affin que ie te rende
Les dons que te donna le Roy Menelaus.
Auquel le fils d'Ulysse. ô loyal Peyreus
Nous ne scauons encor quelle fin pourront prendre
Nos affaires presents, il faut vn peu attendre.
Que si les poursuiuans d'un violent effort
Seruant dessus moy me venoient metre à mort,

LE XVII. LIVRE

Et partageoient entre eux mes hardes paternelles,
 J'ayme bien mieux à toy ces commoditez belles
 Qu'à ces cruelles gens. Mais si i'en viens à bout
 Et les fais tous mourir, raporte moy le tout
 En ioye en ma maison. Il acheue le dire,
 Et le pauvre estranger de ses mains il retire
 Et le mene au chasteau, eux estans arrivez
 Au palais somptueux richement esleuez,
 Soudain de dessus eux leur manteaux ils osterent,
 Et sur les riches lits leurs vestemens ietterent,
 Puis entrerent au bain aux bien-polis carreaux,
 Se lauerent au pur des nettoyantes eaux:
 Quand ils furent lauez par les nymphes gentilles,
 Oints des douces liqueurs des odorantes huyles,
 Ils prennent leurs manteaux, & iettent dessus eux
 En sortant hors de l'eau des habits precieux.
 Ayants laisse le bain pour s'asseoir ils se rendent
 Sur les sieges luisants, & les filles leur tendent
 De l'eau pour se lauer, leur main va suportant
 La riche aiguierre d'or, d'où l'eau claire sortant
 Tombe dessus les mains, & delà coule l'onde
 Dans le bassin d'argent à l'entourneure ronde,
 Apres, dressans la table on aporte le pain
 Qu'on pose deuant eux, & puis on sert soudain
 Viures en quantité & grande & abondante
 De ce qui se trouua prest pour l'heure presente.
 Et la Reyne à la porte estant assise bas
 A l'opposite d'eux, de ses doigts delicats
 Sa laine retordoit. Eux cependant se iettent
 Sur les viures fumans, & de bon vin se traittent.
 Quand la soif fust esteinte, & l'appetit passé,
 Penelopé a son fils à dire a commencé

*Il vaudra mieux, mon fils, qu'en haut ie me retire
Me iettant sur mon liect où sans fin ie souspire,
Et qu'ont mouillé mes yeux continuellement
Depuis le triste iour, que trop cruellement
Vlysses s'en alla dessus les flots humides
Faire la guerre à Troye avec les deux Atrides:
Puis que tu ne veux pas encor m'acertener,
Avant que ces fascheux viennent m'importuner
De ce que tu as sceu du retour de ton pere.*

*A qui Telemachus: Ie te diray, ma mere,
Tout ce que i'en ay sceu selon la verité,
I'ay esté vers Nestor à Pyle sa cité,
Où ce Roy me receut d'un aussi franc courage
Qu'un sien fils reuenant de quelque long voyage,
Après un bien long-temps. Telle reception
Me fit il me monstrant pareille affection
Qu'à ses propres enfans de louange immortelle
Et d'honneur glorieux. Mais d'auoir sceu nouvelle
Si mon pere estoit mort, ou s'il estoit encor
Sur la terre viuant, le bon homme Nestor
N'en auoit rien appris, bien me donna til guide
Affin de me mener deuers le ieune Atride
Qui auoit combatu deuant Troye antresfois,
Me fournissant de char, de cheuaux, de harnois
Ie vy là de ces yeux ceste Helene tant belle
Pour laquelle on alla à Troye, pour laquelle
Les Troyens & les Grecs ont souffert tant de mal.
Ont souuent combatu sous un destin fatal,
Ont eu tant de trauaux. Ce Roy me fit demande
Pourquoy ie venois voir Lacedemon la grande:
Ie luy en dy la cause, & en ces mots suiuans
Dessus l'heure il me dit. Las! que ces poursuiuans*

LE XVII. LIVRE

Effeminez qu'ils sont, lasches de cœur en somme
Ont desir de monter dessus le lit d'un homme
Braue fort genereux, plein d'actes triumpans!

Comme une biche ayant nourry ses petits fans
Qu'elle auoit enfantez dessous les frais ombrages
D'une verte forest, sous les feuillus ramages,
Et s'en voulant aller pasturer dans le fonds
D'une herbeuse vallee, ou sur le haut des monts
Laisse inconsiderée au fond de l'ancre horrible
D'un farrousche lyon, monstrueux & terrible
Ses fans s'entreiouns, qui reuenant en fin
De queste, ayant perdu sa peyne, & mort de faim
Rencontre ces tendrons, aguise alors sa rage,
Se iette dessus eux, les brise, les saccage
Eux foibles, luy trop fort. Ainsi en aduiendra
De ces beaux poursuiuans. Ulysses reuiendra,
Plein de iuste dedain, & du fer de sa lance
Les iettant roides morts prendra sur eux vengeance.

Que voulussent Phæbus, Iupiter l'immortel,
Et Pallas, qu'Ulysses maintenant reuint tel
Qu'il estoit en Lesbos, lors que de longue alêne
Et de force de bras il ietta sur l'arène
Un Philometides, encontre luy luctant
Et de peyne & sueur brauement resistant:
Il le renuersa bas de vertueuse adresse,
Dont le louerent fort tous les princes de Grece,
Et en eurent plaisir les Rois ses compagnons.
Qu'astreure fust il tel, parmi ces beaux mignons
L'espee dans la main. Ceste troupe effreneë,
Les nopces mandiroit & l'infauite Hymeneë
Car tous sur les carreaux il les renuerseroit.
Et leur ame & leur sang ensemble verseroit,

Or voicy la responce & feable & certaine.
Sur ce que tu desire & dont tu es en peine,
Ny deçà ny delà ie ne declineray
Et rien qui soit du faict ne te deguiseray:
Mais ce que i'en apry du vieillard Dieu Prothee,
Dont la responce en fin veritable est ietee,
Tu le scauras au vray. Dessus la haute mer
Qui furieusement faict les flots escumer,
Dans vne isle à l'entour dequ'il l'onde se glisse,
Le vieillard me disoit auoir veu ton Vlysse
Endurant mille ennuis sous le toict ombrageux
De Calypso la Nymphe aux blondoyans cheueux,
Qui là le retenoit, & ne vouloit trop fiere
Luy donner son retour en son Ithaque chere.
Il n'auoit là n'y gens, ny rames, ny vaisseau
Auec lesquels il pust se remettre sur l'eau.

C'est tout ce que m'en dit l'Atride, braue aux armes,
Bon à la lance, & fort entre tous les gendarmes.
Cela faict, ie repry mon chemin vistement,
Et m'en renins icy par mer heureusement,
Car les Dieux immortels le bon vent me donnerent
Et dans mon doux pais soudain me ramenerent.

Quand il eut achené, vne forte douleur
Saisit de Penelope & l'esprit & le cœur.
Lors Theoclymenus le prophete honorable,
L'augure non menteur, & deuin veritable
Se prit à luy parler, Femme du tolerant
Ulysses, celuy là est encor ignorant
De l'aduenir caché, mais entends ma parole,
Ie ne te diray rien de faux ny de frinole,
Mais toute verité. Et i'en vay attester
Le premier des hants Dieux le puissant Iupiter

LE XVII. LIVRE

Et ceste table apres sainte & hospitaliere
 Où vous m'avez recen d'amitié singuliere;
 Et la maison encor du diuin Vlysses
 Où vous m'avez donné si favorable acces
 Et m'avez recueilly: Asteure mesme Vlysse
 On est dans son pais, ou se rampe & se glisse
 Espiant finement le mal qu'ont proietté
 De faire ces amans, & leur indignité:
 A l'heure que ie parle il resuasse, il medite
 Comme il se vangerá de ceste gent mandite
 Et les pourra conduire á leur dernier destin.
 l'en ay veu de mes yeux le presage certain
 Estant dessus la nau. Tu le vis Telemaque.

Auquel ainsi parla la femme au Roy d'Ithaque.
 Ainsi fust, ô mon hoste, & le bon Iupiter
 Voulust de ce bon-heur mes deux yeux contenter:
 Certes tu receurois & de mon franc courage
 Et de mon amitié vn digne & riche gage,
 Tant de dons, tant de biens, que qui te trouueroit
 Par voye ou par chemin bien-heureux te diroit.

Ils deuisoient ainsi, & toute la cohorte
 Des amans, cependant iouoit deuant la porte,
 A ietter le palet, à l'espien esbranler,
 Ou à faire sifler les flesches parmy l'air,
 C'estoit au mesme lieu où deuant ils ietterent
 Leur malheureux dessein & traistres comploterent.

Le souper s'aprochoit & les pastres venoient
 Qui des lieux d'alentour les montons amenoient
 Comme les autres iours: quand Medon le trompette
 Le plus aymé de tous, de façon plus discrete,
 Qui faisoit la despence, & le tout conduisoit,
 S'aprochoit des ioueurs & ainsi leur disoit:

Princes qui esbatez icy vostre ieunesse
A iouer, à tirer, il s'en va temps qu'on cesse
Et qu'on vienne au chasteau pour entendre au manger.
Sus donques leuez vous. Il n'y a pas danger
Quand le temps est venu de s'aller metre a table,
Et des aller remplir d'un repas profitable.
Il finissoit, & eux vistement se leuoient
Et prenans son chemin au chasteau le suiuoient.
Comme ils furent entrez dans les maisons royales,
Sus les planchers hautains des plantureuses sales,
Dessus les riches lits, ils posent leurs manteaux,
Commencent de plus beau à iouer des cousteaux,
Tuent les gras montons aux cornes mal dressees,
Les camuses brebis, les cheures engressees,
Ils ne pardonnent point aux pourceaux herissez
De soyes & setons, & si n'en ont assez,
Ils tuent un toreau suiuant la grande troupe,
Et chacun en morceaux & en pieces le coupe.

Cependant qu'ils faisoient ces dissolus excès
Eumaus le porcher, & le gueux d'Ulysses
Commencent leur chemin pour venir à la ville.
Si luy dit Eumaus, pastre sage & habile.

Amy, puis que tu veux t'aller donc promener
Iusques en la cité, ie m'en vay t'y mener,
Comme on m'a commandé. Combien que mon enuie
Fust de te voir long temps en nostre compagnie,
Te voulant ordonner garde sur mes troupeaux
Et l'un des compagnons qui touchent mes pourceaux.
Mais i'ay creint que le Roy ne m'en fist pire chere
Et ne s'en courroucast. Car l'ire, la colere
Des maistres est tousiours à craindre, & leur fureur
Doit à leurs seruiteurs causer de la terreur,

LE XVII. LIVRE

Mais mettōs nous aux chāps: car la plus grā d partīe
Du iour, descend de sia, hors du midy sortie.

Et dedans peu de temps le seraint tumbera
Qui frais & morfondant du froid nous donnera.

A luy le Neritin, dont la grande sagesse
Fleurit en bon conseil, ceste responce adresse.

I'enten ce que tu dīs & fort bien le concoy,
Mettons nous en chemin, & marche deuant toy,
Ten moy quelque baston: si tu n'en as, ebranche
De quelque arbre bien droit vistement vne branche
Pour m'appuier dessus: car sous mes pieds ie sens,
Ces chemins raboteux, malaisez & glissans.

Il dit, puis sur son dos il ietta sa besace,
Vilaine dechiree, apietetee & grace,
Qu'une vieille couroye & quelque usé cordon
Soustenoient, & Eumæ luy tendit vn baston.
Ils se mettent aux champs, les pastres demeurerent
Avec les chiens veillans & les troupeaux garderent.

Mais le pasteur Eumæ menoit alaigrement
Le Roy en sa cité, semblant entierement
A vn pauvre, à vn gueux: deschiré, miserable,
Courbé sur vn baston, ridé, vieux efroyable.

Ils s'aduanceoient toujours tirans à la cité
Et ià touchoient des pieds le canal argenté
De la belle fontaine, où tous ceux de la ville
Venoient puiser de l'eau qui clairement distile
Qu'autresfois Ithacus, & Neritus encor
Auoient edifiee avecques Polyctor:

A l'entour de la source vne forest hautaine
D'aulnes grands se haussait, & la fresche fontaine
D'un roc iettoit sans fin son surion perennel.
Dessus estoit construit vn autel solennel

Consacré

Consacré à l'honneur des nymphes fontanieres
Sur qui les pelerins & passans ordinaires
Pour leur voyage heureux les deesses prioient,
Faisoient effusion & leur sacrifioient.
En ce lieu iustement les trouua Melanthee
Le fils de Dolius, à la mode usitee,
A la ville touchant deux meres de cheureaux
Pour traiter les amans : deux autres pastureaux
Venoient apres aussi. Si tost qu'à l'impourueue
Sur ces deux pauvres gens il eut ietté sa veue,
Cent mille maudissons encontre eux il ietta,
Et bouillans de courroux iniures eclata
De son cœur forcené. Si dit à voix hautaine:

Vraymant un malheureux maintenant nous amene
Un autre malheureux & coustumierement
Iupiter a parie, & ioint ensemblement
Le pareil au pareil. Mais, ô porcher indigne,
Enfin on pense tu mener ce gueux insigne
Ce ventre mort de faim, qui nous destruira tout,
Et qui de porte en porte, & d'huis en huis, debout,
Aura de force coups les espauls confites,
Et en vain fripera les plats & lechefrites.
Mais si tu as vouloir de m'en accommoder
Pour demeurer aux champs & le bestail garder,
Pour porter à mes boucs quelquesfois du fourage,
Au moins boiroit il là tout son soul de laitage,
Et ses membres deffaits, bien nourry qu'il seroit,
Aux champs en travaillant soudain raffermiroit.
Mais trop accoustumé à sa queste vilaine
Je voy bien qu'il n'est pas pour prendre tant de peyne,
Il ne fera iamaïs que gueuser, qu'aymander,
Et bribes & morceaux d'huis en huis demander.

LE XVII. LIVRE

Mais ie te iure bien que si ie le rencontre
A la porte du Roy, il aura malencontre,
Sieges, bancs escabeaux à sa teste courront,
Et dru par le chasteau dessus luy voleront.

Ce disant il s'aproche & dessus luy s'eslance,
Et de grands coups de pieds indignement l'offence
Mais Ulysses tint ferme & point ne s'esbranla,
N'en quitta le chemin, & long-temps vacilla
Si d'un coup de baston il luy fendrait la teste
Et l'estendrait tout mort. Là dessus il s'arreste,
Patient, & retient son esprit irrité.

Mais le porcher esmeu de telle indignité
Le reprend aigrement. Se tourmente, l'accuse,
Et s'adressant aux Dieux de ces parolles use,
Leuant les mains en haut. Fille de Iupiter
Naiades, qui daignez ces sources frequenter,
Si iamais Vlysses offrit souefue offrande
A vos diuinitez, soit petite, soit grande,
Bruslant sur vostre autel les gresses des toreaux,
Les tendres agnelets, les folastres cheureaux
Dont le parfun montoit iusques dans vos narines,
Exaucez ma demande, ô pucelles diuines,
Ramenez nous bien tost Vlysses en ce lieu
Sous l'auspice ioyeux d'un favorable Dieu,
Qui le conduise plein de force & d'assurance,
Afin de t'abaisser ceste fiere arrogance,
Et ce cœur orgueilleux te rompre & dissiper,
Cruel & violent que tu es, de fraper
Sans raison ce pauvre homme, & de telle furie.
Et tu ne pense pas qu'on scait si bien ta vie,
Tu ne bouges iamais de la ville, & fondant
En plaisirs, perds le temps. Aux champs oetempendāt

Tes larrons de garçons, peste contagieuse
Du bétail, mettent tout en ruine honteuse.

Auquel ainsi respond le cheurier Melanthé.
O Dieux, qu'a dit ce chien impudent, eshonté?
Si ie l'empogne un coup, sur une barque agile
Ie le feray mener bien loing hors de ceste isle,
Et tireray de luy force commodité.

Qu'aussi bien Apollon au bel arc argenté
Veille des aujourdhuy, dans sa propre demeure
Tuer Telemachus, ou que plustost il meure
Dessous les poursuiuans, que pour certain c'est fait
Du retour d'Ulysses. Ce disant, il se met
Acheminer & eux le suiuoient à la trace.

Il arrine au chasteau le premier, & prend place
Entre les poursuiuans: & s'assied iustement
Aupres d'Eurymachus, qui l'aymoit grandement
Aussi tost un chacun à manger luy presente
L'escuyer la viande & le pain la seruante.

Mais le Dulichien & le pastre aprochoient
Du palais, & desia leur oreilles touchoient
Les sons harmonieux de la lire amoureuse,
Qu'aux accents, aux accords de sa voix douce reuse
Phemius marioit, les esprits rauissant
Et de son art diuin les cœurs esiouissant.

Lors Ulysses prenant le pastre par la dextre
Luy dit en la serrant. Eumæ, porcher champestre,
Voicy un beau palais, ie pense que ce soit
La maison d'Ulysses, assez on l'apperçoit
Et le peut on iuger sans nulle controuerse:
Des autres elle est fort dissemblable & diuerse.
Vne grande muraille, & mainte haute tour
Auec de forts barreaux l'environnent autour,

Hh ij

LE XVII. LIVRE

Qui outre sa beauté la rendent bien plus forte
Elle se va fermant de double forte porte,
Et de doubles verroux, digne de résister
Contre un effort de guerre & de le supporter.
Je croy que là dedans on banquette, on festine,
J'en sens monter l'odeur iusques dans ma narine,
J'entens outre cela la musique & le son
D'une lire accordée au miel d'une chanson,
Musique, lire, son, que les Dieux délectables
Ont sacrez aux plaisirs des agréables tables.

A ces mots Eumæus. Tu n'es pas imprudent,
Et vas bien à propos ces choses regardant.
Mais aduison un peu comme nous devons faire,
Veux tu faire au chasteau la pointe la première
Parmy ces poursuiuans, & ie demeureray.
Ou, veux tu demeurer, & ainsi i'entreray,
Mais vien, bien tost apres, que quelqu'un ne t'attrappe
Quand tu seras dehors, ne te pousse & te frappe.
Auquel dit Vlysses, ce que tu dis est vray,
Et ie t'entens fort bien, va tost, ie te suiuray:
Je ne suis aprentif aux coups ny aux iniures,
I'ay paty, i'ay souffert maintes fortunes dures
En guerre, en terre, en mer, & de tout attaqué
Le courage, le cœur ne m'a iamais manqué.
Viens ce qui pourra, car il est impossible
De pouuoir résister au ventre irrémissibile,
Et de le faire taire, il donne trau aux maints
Et tourments infinis aux mal-heureux humains:
Il excite aux combats les nauires armées,
Les batailles esment dessous Mars animées
Les barques porte-bancs pousse avec tout effort
Portans aux ennemis & la guerre & la mort.

Eumæe & Ulysses contoient ainsi merueilles
Quand un vieux chien haussa la teste & les oreilles
Couché là de son long. Argus estoit son nom,
Il estoit à Ulysse au glorieux renom:
Il le nourrit petit, mais il n'en iouyt guiere
Qu'il luy fallut aller à la guerre estrangiere.
Mais certains ieunes gens le dresserent tandis
Pour lieures, pour cheuriels & pour cerfs peu hardis
Et pour lors il gisoit chetif & miserable
Sur le fiens qu'on iettoit deuant l'huis de l'estable,
Et que les charretiers denoient bien oster,
Et sur les champs d'Ulysse en apres le porter.
Là donc gisoit Argus, chassé pour sa vieillesse
De mouche tout couuert qui le piquoient sans cesse,
Il recogneut pourtant son maistre, & blandissant
Bellement de la queue & l'oreille baissant
Semble le bien-ueigner: Mais il n'eut pas la force
De se trainner à luy. Il n'auoit que l'ecorce
Et la peau sur le dos. Il le recogneut bien,
En pleura, mais Eumæe toutesfois n'en vit rien.
Si luy dit Ulysses. Voila vn cas estrange,
De voir vn si beau chien sur le fiens, dans la fange.
Ie voudrois bien scauoir s'il auroit point esté
Quelque chien de courage & de legereté,
Ou si on l'a nourry comme beste inutile
A quelque ceuvre que soit impropre & malhabile,
Comme on en voit aux cours des grands souuentefois
Qui ne seruent de rien, que de plaisir aux Rois.
Ce chien la fut à un, luy respondit Eumæe,
Dont l'ame est maintenant de la mort consumée.
Que s'il auoit encor l'agilité du corps
La force & la beauté comme il auoit alors,

LE XVII. LIVRE

Que le fort *V*lysses le prudent *Laërte*
 Marcha sous les drapeaux du magnanime *Atride*
 Tu t'esmerueillerois de sa legereté,
 De sa force de corps & plus de sa beauté.
 Nulle beste aux forests ne fuyoit sa vitesse,
 N'eschappoit deuant luy, tant eust elle d'adresse.
 Or il est mesprisé & son maistre bien loin
 S'en est allé mourir. Lon n'en a point de soin,
 Les femmes n'en font cas, & les vallets n'ont cure
 De faire leur deuoir, si par cas d'aduanture
 Le maistre n'y est pas & ne commande plus.
 Car le grand *Iupiter* qui habite là sus
 Oste à qui que ce soit la moitié du courage
 Quand il est abbaisé sous le ioug du seruage,
 Ce disant il entra dans la sale, où mangeoient
 Alors les poursuiuans, & les biens rauageoient.
 Et *Argus* tumba mort deffous la *Parque* fiere
 Voyant son maistre, au bout de la vintaine entiere.
 Mais le fils d'*Vlysses* le, premier appercent
 Entrer le pastre *Eumæe*, accort faire luy scent,
 Le signal du clin d'œil, & tout bas il l'appelle,
 Luy s'aproche, leuant de terre vne escabelle.
 Alors le cuisinier sur la table depart
 La viande aux poursuiuans, puis il en porte à part
 Où mangeoit *Telemaque*: aupres de luy prend place
Eumæe, & le heraud tranche vne piece grasse
 Et la met, & le pain deuant luy proprement.
 Mais *Ulysses* s'en vint apres luy bellement
 Contrefaisant le gueux, & cassé de vieillesse,
 Courbé sur vn baston, & ses haillons de piece
 Sales l'enuelopoient. Il s'assit tout aupres
 De l'allée de fresne & du seuil de cypres

Au dedans de la porte, où le menuisier sage
Le dressant à la regle, avoit poly l'ouvrage.

Alors Telemachus au pastre dit ainsi.
Empogne à pleines mains de ces viures icy
Et de ce pain mollet quantité suffisante
Et le porte à nostre hoste & puis qu'il se presente
De rang aux poursuiuans, implore leur secours,
Leur demande du pain. La honte nuit toujours
A tout homme indigent. Eumaluy obtempere
Et luy va dire ainsi. Telemachus, (mon pere)
M'a dit de t'aporter tous ces presens icy
Qu'il te donne & t'enuoye, il te commande aussi
Que tu ailles de rang à chacun de la bande
De tous ces messieurs là, & que tu leur demande.
A tout homme indigent la honte tousiours nuit.
Et le sage Ulysses ainsi luy respondit,

Le bon Roy Iupiter veille rendre prosperes
Au gentil Telemach à iamais ses affaires,
Soit il tousiours heureux, & luy vienne à plaisir
Tout ce qu'aura pensé son cœur & son desir.
Ce disant il prend tout, & d'une main & d'autre
Le met en son bissac, & par terre se veautre
Quand le chantre diuin à chanter commença
Il se mit à manger, & son repas cessa
Quand le chantre finit & demonta sa lire.
Les poursuiuans soudain commencerent à bruire
Faisans par la maison les continus excès,
Quand Pallas mit au cœur du prudent Ulysses
De s'adresser à eux & leur faire demande
D'une piece d'argent, où de quelque viande,
Pour voir, lesquels auroient le plus d'honnesteté
Qui plus seroient touchez de bien & d'équité,
H b iij

LE XVII. LIVRE

Bien que nul d'eux pourtant ne deust de l'iniustice
 Qu'ils faisoient, euit la peyne & le suplice,
 Donques il s'aduançoit & leur tendoit la main
 De propos suppliant pitoyable & humain.
 Garry de sa besace orde, sale, & immunde
 Comme s'il eust esté le plus grand gueux du monde,
 Et toute sa vie eust ce mestier pratiqué.
 Son miserable estat leur cœur a prononcé
 A la compassion, si bien qu'ils luy donnerent,
 Tindrent propos de luy, & fort s'emerveillerent
 Quel homme il pouuoit estre & d'où c'est qu'il sortoit
 Lors que Melantheus qui les cheures traittoit,
 Oyez, dit-il, amans qui recherchez la Reyne
 Touchant cest estranger, & que ie vous aprenne
 Ce que i'en puis scauoir, l'ayant veu seulement
 Depuis bien peu en ca. Euma certainement
 L'a ceans amené, mais ie n'ay cognoissance
 Plus que vous en auez du lieu de sa naissance:
 Antinous l'oyant tres-asprement reprit
 Le porcher Eumaus, & à dire se prit.
 Dy malheureux porcher, qui te ment, qui t'incite
 D'amener deuers nous ceste eniance maudite?
 Par les rues d'icy ne voit on pas assez
 Fourmiller de ces gueux deschirez, despecez
 Coureurs, écornifleurs, mangeurs insatiables
 Qui ne seruent de rien que d'affamer les tables?
 Ne te suffit il pas que tant de gens, & moy
 Ne bougions de ceans, mangions les biens du Roy
 Que pour surcroist encor ce gueux tu nous amenes.
 Auquel dit Eumaus en paroles sondaines.
 Certes Antinous, bien que tu sois prudent,
 Tu n'es pas toutesfois en prudent respondant,

Car qui est amené d'une terre estrangere
Pour venir habiter autre part, & s'ingere
D'en introduire vn autre? hors mis de ceux qui sont
Pour servir de leur art en tous lieux où ils vont,
Poëtes, Medecins des griefues maladies,
Musiciens, de qui les douces melodies
Egayent vn chacun au sucré de leur voix,
Charpentiers, & tous ceux qui travaillent en bois?
Car les professions de ces gens là excellent
Sur la terre infinie, & les autres precellent.
Mais tu es de tousiours de difficile acces,
Et rude, aux seruiteurs du diuin Ulysses
Plus que nul de ceux cy, & ta mordante enuie
En vent sur tout à moy: mais ie ne m'en soucie
Tant que Penelopé ceans residera,
Et que Telemachus reconnu y sera.

Auquel Telemachus dont la sagesse insigne
De celle d'Ulysses ne se rendoit indigne:
Tai-toy, que plus auant ie ne t'entende pas
Encontre cestui-cy contester en debats,
Car c'est d'Antinoüs la coustume mauuaise
En quelque lieu qu'il soit, d'engendrer trouble & noise.
Puis se tournant luy dit: Certes ont apperçoit
Faire bien le deuoir de pere en mon endroit,
Et comme enuers ton fils vn grand soin te pourchasse,
De commander ainsi que de ceans on chasse
Un hoste, vn estrangere. Mais plustost, donne luy,
Ie le veux, tant s'en faut que i'en recoine ennuy:
Ce n'est pas chose encor pour laquelle tu doine
Avoir peur de ma mere, ou bien que l'appercoine
Quelqu'un des seruiteurs, ou d'autres, dont l'acces
Est dedans la maison du diuin Ulysses.

LE XVII. LIVRE

*Mais ce que ie te dy n'a garde de te plaire,
 Car tu aimes bien mienx manger tout, que d'en faire
 Part à qui que ce soit. A ces mots respondit
 Encor Antinoüs : Telemach', qu'as tu dit,
 De langage hautain & de cœur indomptable?
 Si vn chacun de ceux qui sont icy à table
 Luy en donnoit autant, de trois mois tous entiers
 Il n'auroit nul besoin d'entrer en ces quartiers.
 Il acheuoit de dire, & de mine cruelle
 Il prit, en luy monstrant, vne basse escabelle
 Qui supportoit ses pieds au pris qu'il les baissoit.
 Or chacun luy donnoit, & son sac remplissoit
 De viures & de pain : & c'estoit la finesse
 D'Vlysses d'observer les poursuiuans de Grece,
 Faisant le mendiant. Doncques il s'en alla
 Deuers Antinoüs, & ainsi luy parla:
 Donne moy, donne moy, tu ne sembles point estre
 Le pire des Gregois, mais le prince & le maistre,
 Tu ressembles vn Roy, qui te doit inciter
 A estre liberal, te plaire & delecter
 Plus que nul, d'élargir les restes de la table,
 Et ie te publieray par la terre habitable.
 I'ay aussi quelquefois (& sans comparaison)
 Esté bien à mon aise en ma douce maison:
 I'ay donné volontiers, & i'ay ouuert ma dextre
 A tout pauvre passant, tant chetif peust il estre.
 I'ay eu des seruiteurs, & ce qu'il fault auoir
 Pour viure doucement, & riche homme se voir,
 Mais le Saturnien deffouz qui le Ciel tonne
 A réduit tout à rien. C'est sa volonté bonne,
 De voleurs, de larrons il me fit accoster
 Pour aller en Egypte, & m'y precipiter.*

Arrivé en Egypte, & entré dans le fleuve
Qui de ses grasses eaux les campagnes abreuve,
Je my ma flotte à l'ancre, & tant qu'il fut en moy
Priay mes compagnons de rester à recoy
Sans bouger des vaisseaux, seulement i'en appelle
En terre quelques uns pour estre en sentinelle
Et pour faire le guet, mais eux intemperans,
Et selon leur plaisir deçà delà courans,
Ne se peurent tenir de faire des ravages
De piller, fourrager bourgades & villages,
Trainner femmes, enfans, voire cruellement
Tuer les hommes faicts. Le bruit soudainement
En court à la cité, & si tost qu'apparurent
Les rayons du Soleil, à la foule coururent
Les habitans armez, les champs furent couvers
D'armes & de cheuaux, & de brillans éclairs.
Et du grand Iupiter la colere depite
Mit malheureusement mes compagnons en fuite,
Personne ne soustint, nous estions tous espars,
Assaillis & battus du mal de toutes parts.
Alors à leur plaisir sur nous ils se ietterent,
De la plus part des miens la terre ensanglanterent,
Les autres furent pris & emmenez tous vifs
Afin de leur servir d'esclaves & captifs.
Pour moy ie fu donné au fils d'un Iasie
Qu'on appelloit Dmetor, qui me sauua la vie
S'estant là rencontré comme ils iettoient au lot
Ceux qu'on auoit sauuez. Il estoit Cypriot,
En Cypre commandant. Ainsi à la renuerse
En ce lieu m'a ietté la fortune peruerse.
Auquel Antinoüs derechef dit ainsi:
Mais de quel Dieu nous vient ce trouble-feste icy,

LE XVII. LIVRE

Et ce porte-malheur? Demeure, homme batable,
Et ne t'approche point si pres de ceste table,
Que tu ne trouue icy Egypte à ton malheur,
Et Cypre encor' un coup: Impudent, affronteur,
Et qu'aymant que tu es, Va t'en & te presente
Aux autres, qu'un chacun te donne & te contente,
Mais c'est du bien perdu, & l'on nomme tres-mal
Aumosnier celuy là qui faiët le liberal
De ce qui n'est à luy, & qu'on n'empesche en somme:
Car force portions remplissent bien un homme.

Si luy dit Ulysses: Amy, certainement
Tu monstres que tu n'as sens ny entendement,
Non mesme en apparence. Estant en ton domaine
Si quelqu'un t'en venoit demander, à grand peine
Luy donnois-tu du sel, que tu ne peux souffrir
Mangeant le bien d'autrui, que l'on me vienne offrir
Quelque chose à manger de la surabondance.

Antinoüs alors plus aigrement s'offence
De trauers le regarde, & puis luy dit ainsi:
Ce n'est pas commencer à desloger d'icy
Que de m'iniurier. Comme il disoit, il guette
Un tabouret à bas, il le prend & luy tette,
Et sur l'espaule droite il l'atteint iustement
Vers le milieu du dos. Le coup aucunement
N'ébranla Ulysses, mais ainsi qu'une roche
Immobile il restoit, tant seulement il hoche
Secrettement la teste, en soy le menaçant
D'en auoir la raison. Et puis recommençant
Son train, il se rassied, son sac & sa pitance
Pose sur les carreaux, puis dit à l'assistance:

Amoureux de la Reyne excellente en honneur,
EseouteZ ie vous pry' ce que i'ay dans le cœur,

Ce ne peut estre à l'homme & regret & tristesse,
Ny douleur en son cœur, lors que quelqu'un le blesse
Combattant pour son bien, ses brebis & ses bœufs:
Mais ce qu'Antinoüs m'a par trop outrageux
Frappé, n'a pas long temps, c'est à cause du ventre
Méchant, pernicieux, & le tour & le centre
Des maux qu'ont les humains. Mais s'il y a des Dieux
Encor en quelque part, vengeurs des souffreteux,
Que la fiere Erynnis & la mort inhumaine
Avant que faire nopce Antinoüs emmeine.

Et le fils d'Epeithee encores luy parla.
Nostre hôte, parle bas, assieds toy, mange là,
On te retire ailleurs, que nos gens ne te tirent
Par les mains, par les pieds, & la peau te déchirent
Te trainans par la place: & apres qu'il eut dit,
Vn chacun d'eux conceut un merueilleux dépit
De ce qu'il avoit faict, & l'un prit la parole.
Ce que tu viens de faire est chose indigne & folle
Antinoüs, d'avoir outragé ce passant,
Si quelque Dieu habite au Ciel resplendissant,
Cet acte est malheureux: & les Dieux venerables
Se font souventes fois aux estrangers semblables,
Conuersent parmy nous, marchent par les citez
Spectateurs des bien-faicts & des méchancetez.

Il l'entendit parler, & n'en fit pas grand conte:
Mais à Telemachus le dépit au cœur monte
De le voir outragé, s'abstenant prudemment
D'en ietter aucun pleur, trop bien secrettement
Lateste il en branla, songeant à la vengeance.

Mais quand Penelopee eut ouy quelle offence
On avoit faict là bas à un pauvre estranger,
A ses femmes ainsi son cœur vint décharger.

LE XVII. LIVRE

Que Phœbus puisse ainsi frapper ce méchant homme,
Phœbus l'insigne archer. A laquelle Eurynome:

Si selon nos souhaits toute chose tiroit
Le beau iour de demain pas un d'eux ne verroit.

A qui la chaste femme au patient Ulysse.

Tous sont en general mes ennemis, nourrice,
Tous me font de l'ennuy, mais principalement

Ce fier d'Antinoüs, qui m'est entierement

Comme la noire mort. Vn pauvre homme mendie

Là bas par la maison, leur demande sa vie,

Contraint par la misere & la necessité,

Chacun luy a donne de bonne volonté:

Et ce fier outrageux plein de rage cruelle

Luy a contre le dos ietté une escabelle.

A ses femmes, ces mots sur son lit elle tint,

Et le fort Ulysse sa refection print.

Puis faisant appeller le porcher de la salle,

Va ie te prie, Eumæ, luy dit elle, deualle,

Et fay venir vers moy ce pauvre plein d'ennuy,

Afin que ie le voye, & m'enquerre de luy

Si en quelque cartier de la terre habitable

Il auroit point ouy parler du miserable

Ulysse, ou plustost l'auroit ven de ses yeux,

Car il peut bien auoir couru beaucoup de lieux:

Et le Pastre en ces mots respondit à la Reyne:

Sage Penelopé, à la volonté mienne

Que se teussent les Grecs lors que cet homme dit,

Car il te rauiroit de ioye tout l'esprit.

Ie l'ay logé trois nuits dedans la mestairie,

Et trois iours tous entiers (sauué de la furie

De ceux qui dans leur nef le vouloient égorger,

Chez moy tout le premier il s'est venu ranger:)

Mais ce temps ne luy put à grand peine suffire
A faire fin finale à ce qu'il vouloit dire
De ses calamitez. Comme quand on entend
Un bon musicien ses poëmes chantant
Que luy ont departis les Dieux à qui nous sommes,
Afin de les porter & faire entendre aux hommes,
On ne se peut lasser tant il dit doucement
De l'esconter tousiours: ainsi pareillement
Il me ranissoit tout me contant sa misere.
Or il se disoit estre à cause de son pere,
Grand amy d'Ulysses, Crete est sa nation,
Où Minos ent iadis sa domination,
Après auoir couru par regions diuerses
Il s'est conduit icy souffrant mille trauerses.
Il dit auoir ouy nouuelles cy deuant
Chez les Thesprotiens qu'Ulysses est viuant,
Et qu'il doit bien tost estre au lieu de sa naissance
Chargé de grands tresors & de grande cheuance.

A qui la chaste femme au Dulichien Roy.
Va, fay le moy venir afin qu'il parle à moy.
Eux, qu'ils passent le temps s'ils veulent à la porte,
On dedans la maison, aisees en toute sorte,
Leur bien, leur reuenu est fort bien conserué
Chez eux en leur maison, leur bled est reserué,
Leur vin semblablement, & leurs gens seuls en viuent:
Et eux, tant que les iours & les nuits s'entresuiuent
Ne bougent de ceans, tuent iournellement
Beufs, cheures, & brebis, mangent incessamment,
Et boient tous nos vins, & sans qu'on les reprenne
Frippent le reuenu de tout nostre domaine.
Car ie n'ay homme aucun qui de nostre maison
Bannisse ceste peste & cestetrahison

LE XVII. LIVRE

Tel que fut Ulysses. Que s'il venoit asteure,
Qu'on le vist arriuer en sa douce demeure,
Il seroit suffisant, & son fils seulement
De tirer de ces gens le digne chastiment.

Comme elle luy parloit Telemaque eternuë
Si hault que la maison & toute l'estendue
En retentit tresfort. Penelopee en rit,
Et ces mots à Eumæe aussi tost elle dit.

Va tost, fay moy venir en presence cet homme,
Vois tu pas que mon fils, ainsi que ie le nomme,
Esternuë aussi tost: Tient donc pour tout certain
Que tous ces poursuiuans sont pres de leur destin,
Sont proches de leur mort: Certe elle les talonne,
Et sera mal-aisé qu'il s'en sauue personne.
Voicy vn autre faiët dont ie t'asseure aussi,
Si ie sçay pour certain que ce passant icy
Die la verité, il aura pour estreine
Chemises, & habits de bonne & fine laine.

Comme elle eut dit, Eumæe accourut vistement
Le trouuer, & luy dit ainsi sommairement:
Penelope la Reyne, & la tant sage mere
Du bon Telemachus, m'enuoye à toy, mon pere,
Car elle te veut voir, touchée dans son cœur
De s'enquerir de toy (bien qu'en grande douleur)
Touchant son Ulysses: si elle ne te trouue
Menteur, ains tes propos veritables esprouue,
Elle t'abillera d'un bon accoustrement,
Dont tu as grand besoing, & pourras librement
Aller parmy le peuple, y demander ta vie,
Et te pourra donner qui en aura enuie.

Lors le sage Ulysses qui tant a supporté
D'ennuis & de trauaux: l'en sçay la verité

Ie n'en

Je n'en celeray rien à la fille d'Icare
La sage Pénélope, & sans que ie m'esgare
Luy diray tout le faict : ie sçay tous ses erreurs
Car nous auons couru de semblables malheurs.
Mais ie redoute & crain l'iniurieuse bande
Des mutins poursuuans, dont la superbe grande
A monté iusqu'au Ciel. Car cet homme enragé,
Comme tu l'as peu voir, m'a ceans outragé,
Sans auoir en de moy iniure ny offence,
Sans que Telemachus luy ayt faict resistance,
Ny personne pour moy. V at'en donc de ma part
Dire à Penelopé, que i'iray sur le tart,
Mais que le Soleil tombe, & qu'elle patiente,
Bien qu'elle soit pressée, & l'en fasche l'attente:
Alors elle pourra contentant son desir
Du retour d'Ulysses m'enquerir à loisir
Nous chauffans pres du feu. Car certes ie frissonne
Et ma robe n'est pas, comme tu sçais, trop bonne
Tu le sçais, i'ay cheſ toy quelque temps seiourné.
Eumæ, l'ayant ouy s'en est tost retourné:
Et la Reyne luy dit pleine d'impatience,
Tu ne l'amenes point Eumæ, qu'est-ce qu'il pense?
Craint-il quelque danger, ou bien s'il est honteux?
La honte ne vaut rien au passant souffreteux.
Il respond sagement, luy dit le Pastre Eumæ,
Comme feroit tout autre, il craint l'ire animée
De ces superbes gens, & te prie instamment
D'attendre que le soir approche seulement
Cet temps là, vous sera plus à propos, & l'heure
Serapour tous les deux plus commode & meilleure
Cet homme n'est point sot, mais sage & attrempé,
Et parle comme il faut (luy dit Penelopé)

LE XVII. LIVRE DE L'ODYSSEE.

*Celuy que le mesdire & le blasmer emporte
N'a pas accoustumé de parler de la sorte.*

*Elle disoit ainsi, & le porcher descend
En bas, où les amans estoient, & s'adressant
Au preux Telemachus, d'une ardeur n'ompareille,
De peur qu'on ne l'entende, il luy dit à l'oreille:
Le m'en retourne aux champs: pour conseruer le tien
Aussi soigneusement que ie ferois le mien:
Toy, pren bien garde icy, & sur tout ie te prie
De n'estre nonchalant de pourvoir à ta vie,
Qu'il ne t'aduienne mal, car ils ont proieté
De faire contre toy quelque mechanceté.
Que Iupiter plustost les perde & les destruisse,
Qu'en rien d'oresnauant leur malice nous nuise.*

*Auquel Telemachus. Il en sera ainsi,
Mais va t'en boire encor, puis oste toy d'icy,
Et t'en reuiens demain, & d'amener n'oublie
Quelque chose de beau de quoy ie sacrifie.
Je prendray garde à tout, & les Dieux immortels
En auront soin aussi. Il tenoit propos tels
Et luy saisit vn siege & s'alla metre à table,
S'emplissant de bon pain & de vin delectable.
Puis se mit en chemin, laissant pleine maison
De mangeurs, de beueurs, & de gens sans raison,
Qui chantoient, qui dansoient en toute esiouyffance,
Et la moitié du iour s'achemine & s'aduançe.*

Fin du dixseptiesme Liure.



LE DIXHVITIESME LIVRE
DE L'ODYSSEE D'HOMERE.

ARGUMENT.

E combat d'Ulysses & du gueux Irus. Penelopé se montre aux poursuivans, tanse Telemachus de ce qu'on auoit outragé leur hôte. Les poursuivans luy font des presens, qu'elle reçoit. Les paroles qui se tindrent entre Ulysses & Eurymachus, l'un des principaux poursuivans.

AUTRE SOMMAIRE.

*Ulysses est vainqueur, Irus est malheureux:
Penelope reçoit les dons des amoureux.*

Rsuruint de la ville un vulgaire quaymād,
Mendiant ordinaire, & celebre gourmād,
Beuvant, mangeant sans fin, mais sans force
Et toutesfois estant de grande corpulence.
Arnae fut son nom, dès ses plus ieunes ans
Par sa mere nommé, mais les petits enfans
L'appellerent Irus, pource qu'il sçauoit faire
Les messages, soudain qu'on en auoit affaire:
Lequel voyant Ulysse, il le chassoit aussi
De sa propre maison, & luy disoit ainsi.

LE XVIII. LIVRE

Retire toy d'icy vieillard, & ne t'arreste,
 Vois tu comme vn chacun me hoche de la teste?
 Ils me commandent tous de te trainer dehors.
 I'en ay honte pourtant, mais leue toy, & sors
 Que ne venions aux mains, & que n'ayons querelle.
 Ulysse luy vsa de remonstrance telle
 Le guettant de trauers. Malheureux que tu es
 Que te dis-ie? quel mal est-ce que ie te fais?
 Ie ne t'enuie point, pource que tu demande,
 Et qu'on te donne fort, la place est assez grande
 Pour nous tenir tous deux, il n'y a pas de quoy
 Me deuoir enuier estant gueux comme moy,
 L'abondance prouient des Dieux & de leur grace.
 Quant à venir aux mains n'vse point de menace
 Et ne m'échauffe pas : que tout vieux & tremblant
 Que ie suis, de ces poingts ie ne rende sanglant
 Ton poitral & ton groin, te faisant vne charge.
 Et puis ie n'ay pas peur que ie ne sois au large.
 Tout le reste du iour, & plus encor demain,
 Car ie ne pense pas qu'eschappé de ma main
 Tu puisses iamais plus auoir tant de courage
 Que de r'entrer ceans chez Ulysses le sage.

Mais le coquin d'Irus ainsi luy respondit,
 Qu'est-ce qu'en tournoyant ce glorieux a dit?
 Ceste vieille enfumee? Hé, que si ie l'empogne
 Comme ie luy donray brauement sur sa grogne,
 Et à grands coups de poing luy feray choir les dents
 Des machoires à terre, ainsi qu'à porcs grondans.
 Ca, vien, appreste toy, qu'à l'esprenue on cognoisse
 Qui combattra le mieux, & ton orgueil paroisse
 D'en attaquer vn ieune estant vieux & cassé.
 Ainsi disputoient-ils d'esprit fort courroucé.

Sur le pavé luisant, droit devant la grand porte.

Antinoüs les oyt, puis dit en ceste sorte

A tous ses compagnons sousriant doucement.

Vous n'eustes iamaïs plus vn tel contentement,
Ny vn si grand plaisir que Dieu nous en presente

Tout maintenant ceans, & sans qu'on s'en tourmente,

Voilà l'hoste & Irus qui ont bien grand desir

De se frotter l'un l'autre, ayons en le plaisir.

Les autres en riant tout soudain se leuerent,

Autour des pauvres gueux haillonneux s'assemblerēt.

Ausquels Antinoüs. Amis voyons vn peu

Les tripailles de Chieure estans dessus le feu,

Mettons les pour le prix de la force & l'adresse

De celuy qui vaincra, pleines de sang & gresse,

Et qui sera des deux le plus fort pour frapper

Les aille hardiment prendre pour son soupper.

Dauantage, s'il vent desormais qu'il se mette

A table parmy nous, & que l'on ne permette

Qu'autre pauvre que luy reuienne plus icy

Pour demander son pain. Antinoüs ainsi.

Et nul à ses propos ne voulut contredire.

Mais le fin Ulysses se prit lors à leur dire:

Messieurs, certainement il n'y a nul propos

D'attaquer au combat vn ieune homme, & dispos

Contre vn vieux & cassé, mais ce malheureux ventre,

Ce mauuais conseiller me force que i'y entre,

Et sois brisé de coups. Mais tout premierement

Iurez moy tous icy vostre plus grand serment,

Qu'on ne me fera point dol ne supercherie

En la faueur d'Irus, n'aucune tromperie

Me donnant quelque coup : mais que de loyaute

Le combat se fera, suiuant sa volonte.

LE XVIII. LIVRE

*Ils firent le serment. Telemachus à l'heure,
Estranger, luy dit il, si de tant tu t'asseure
Es forces de ton cœur, d'emporter brauement
Le dessus du combat, ne tremble nullement,
Ne crain qui que ce soit : car qui te voudra faire
Deplaisir il aura contre plusieurs affaire:
Tousiours hospitalier sera Telemachus.
Que donc Antinoüs avec Eurymachus,
Tous deux Princes puissans, tous deux pleins de sagesse
Viennent fortifier mon dire & ma promesse.*

*Il dit, & chacun d'eux le promit & iura.
Adoncques Ulysses sa chemise tira,
Brida de ses haillons ses parties honteuses,
Ses cuisses fit paroistre & fortes & nerueuses,
Ses espauls monstra larges extremement,
Sa poitrine & ses bras puissans infiniment:
Pallas aupres de luy assistant en personne,
Accroissement & force à tous ses membres donne.
Chacun des poursuiuans grandement l'admiroit,
Et l'un d'eux à un autre aupres de luy disoit:*

*Certainement Irus receura malencontre,
Voy un peu ce vieillard, & quel iarret il monstre.
Ils deuisoient ainsi, mais Irus estonné
Trembloit de malle peur. Si fut-il amené
Lié par les valets, de force & de contrainte,
De membres tressaillant & fremissant de crainte.*

*Auquel Antinoüs. Ton profit eust esté
De n'estre iamais né, ou ne t'estre vanté:
De craindre tant un homme agrué de vieillesse,
Attenué de mal qui le poursuit sans cesse.
Mais ie te dy un mot, & tien-le pour tout faict.
Si ton homme est plus fort, s'il te vaine & desfaict,*

*Je pennoiray sur mer lié dans vn nauire,
 Au tyran Echetus, de tous hommes le pire,
 Qui oreilles, nareaux, tesmoins te couppera,
 Et le tout à manger à ses chiens iettera.*

*A ces mots, les frayeurs plus fortes le saisirent,
 Eux le tirerent lors & en place le mirent.
 Chacun des combatans adonc les mains haussa,
 Et le fort Ulysses en soy-mesme pensa
 S'il le deuoit frapper du premier coup, de sorte
 Que l'ame s'enuolast de sa charongne morte:
 Ou bien s'il le deuoit assener bellement,
 Et le renuerseroit par terre seulement.
 Et ce dernier aduis luy plut mieux en son ame,
 De peur des poursuiuans, & d'en encourir blasme.*

*Or comme ils furent pres. Le coquin l'assenna
 Dessus l'espaule droite, & l'autre luy donna
 Sur le chaimon du col, au dessou^r de l'oreille,
 Et le sang rendit tost sa maschoire vermeille.
 Il chet en la poussiere, & braillant & hurlant
 Crache les dents dehors, & des pieds va branlant.
 Et lors les poursuiuans se mouroient tous de rire,
 Leuans les mains en hault. Et Ulysses le tire,
 Le traine par le pied, tant qu'il fust arriué }
 Sur le seuil de la porte, & que sur le paue
 L'eust laissé renuersé. Adoncques il luy iette
 Un baston en la main, & ainsi l'admoneste.*

*Tien-te là, & les chiens & les porcs va chassant,
 Et ne m'esprise plus le pauvre & le passant,
 Ven que tu ne vaux rien, que punition pire
 Ne t'aduienne à la fin. Il acheua de dire
 Puis ietta sur son dos son bissac sale & gras,
 Le tenant par la sangle, & tira de ce pas*

LE XVIII. LIVRE

*S'asseoir sur les carreaux. Lors les autres entrèrent
Rians tant qu'ils pouuoient, & ainsi luy parlerent.*

*Iupiter, ô nostre hôte, & les immortels Dieux
Te vueillent t'enuoyer ce que tu aymes mieux
Et desires le plus, d'auoir & nostre table
Et la ville, desfaits de cet insatiable,
Car deuers Echetus bien tost nous l'enuoirons,
Le pire homme du monde, & nous en defferons.*

*Ils luy disoient ainsi. Et la ioye se glisse,
Pour cet honneur acquis, dedans l'ame d'Ulysse.*

*Alors Antinoüs luy presente en son rang
Un grand ventre remply & de graisse & de sang.
Amphinomus apres tira de la corbeille
Deux pains, & luy donna, remplit de la bouteille
Une grande coupe d'or, & l'honorant, luy dit:
Mon pere, mon amy, sois ioyeux vn petit.
Puisses-tu recouurer ta fortune premiere:
Car tu es maintenant battu de grand misere.*

*Lors le sage Ulysses. Tu semble en verité,
Amy, estre doué de prudence & bonté.
Tu es d'un pere aussi de bonne renommee,
La bonté de Nisus est beaucoup estimee
En l'isle Dulichie, & il y est tenu
Pour homme de moyens. Tu es de luy venu
A ce que l'on m'a dit, & tu as l'apparence
De n'estre depourueu de sens & de prudence.
C'est pourquoy ie te veux plus volontairement
Attaquer de propos. Oy moy patiemment.*

*De tout ce qui prend air sur la terre fertile,
Et qui rampe dessus, rien n'est tant imbecille
Que l'homme audacieux, il ne scauroit tomber
En son entendement, qu'il puisse succomber*

*Iamais en nul malheur, tant que les Dieux assemblent
Sur luy leur grand pouuoir, & ses genoux ne tremblent.
Mais depuis que les Dieux luy donnent du tourment,
Il porte tout cela fort impatiemment.
Toutesfois nous mortelz à telle loy nés sommes
Que nous donne le pere & des Dieux & des hommes.
I'ay esté me sembloit, plus heureux autresfois
Que nul homme viuant. Sur cela ie faisois
Mille mechancetez, n'ayant peu de puissance,
Et ayant sur mon pere & mes freres fiance
Nul doncque pour le bien n'aille trop fierement,
Et ce qui vient des Dieux soit pris moderement.
Ie voy ces poursuiuans mener vn train infame,
Manger le reuenu, solliciter la femme
D'un, que i'auertirois mes amis volontiers,
N'estre plus guerre loing d'entrer en ces quartiers:
Il ne tardera pas. Le bon ange te veille
Bien tost oster d'icy, & ie le te conseille,
Qu'il ne trouue pas quand il arriuera.
Car cest affaire icy ne se desmelera
Entre ces gens & luy sans meurtre & sans carnage,
Des qu'il mettra le pied dans son doux heritage.
Il goust a le doux vin, & beut, quand il eut dit,
Et puis au conducteur des peuples, il rendit
La coupe dans la main. Qui l'oyant, se promene
Affligé, par la sale & la teste demene.
Car desia en son cœur il deuinoit son mal,
Mais il ne put fuir son desastre fatal:
Minerue l'empescha. Mais c'est afin qu'il tombe
Dessous Telemachus, & que mort il succombe
Sous salance & son bras. Apres il se remit
En sa premiere place, & son siege reprit.*

LE XVIII. LIVRE

*Mais Minerve aux yeux pers mit dedās le cour.
De la fille d'Icar, Penelopé la sage
De voir les poursuiuans, pour croistre leur ardeur
Et de son cher espoux augmenter plus l'honneur,
De son fils, d'elle aussi. Se prenant donc à rire,
Fort contre sa coustume, elle commence à dire.
Eurynome, le cœur me dit d'aller la bas
Visiter ces messieurs, bien que ie n'aye pas
Coustume de le faire, & soit contre l'attente
Possible qu'ils en ont. Mais pour chose importante,
Dont ie veux aduertir mon fils doresnauant,
Qui est qu'il ne faut pas qu'il hante trop souuent
Auec ces poursuiuans, qui luy font bonne mine
Par deuant, mais leur cœur machine sa ruine.
Qu'il se garde donc d'eux, & pour les euter
Ne s'accoustume pas à les trop frequenter.*

*A qui Eurynomé fil d'elle despensiere.
C'est tres-bien dit à toy ô ma fille tres-chere:
Va donc & aduerty ton fils de tout cecy,
Et ne luy cache rien. Mais l'auue toy aussi
Plustost que d'y aller, fay ta face luyfante
Et ne te monstre point ainsi triste & dolente,
Et les yeux pleins de pleurs. Rien ne ruynet tant
Que de pleurer toujours, & s'aller tourmentant.
Et puis, voila ton fils d'aage & de force telle
Que tu l'auois requis à la troupe immortelle.*

*A qui Penelopé respondit en ce point.
Ma chere Eurynomé, non, ne me parle point
Ny de lauer mon corps ny d'agencer ma face
Si triste que ie suis. Les Dieux, dessus l'espace
De l'Olympe habitans, m'osterent rigoureux
Mon lustre & ma splendeur, des le iour mal-heureux*

*Qu'il s'en alla sur mer. Mais fay moy ie te prie
Venir Antonoe avec Hippodamie*

*Pour venir avec moy. Je rougirois d'aller
Seule & sans compagnie à des hommes parler.*

*Elle disoit ainsi: la vieille en diligence
Pour les faire venir vers les filles s'aduança
Mais de rechef Pallas vn autre faict pensa.
Sur la fille d'Icare vn doux sommeil poussa,
Qui la charme, l'endort, & au repos la plonge.
Alors elle s'encline & doucement allonge
Ses membres sur le liect. Puis Pallas luy souffla,
Pour la faire admirer aux Grecs qui estoient là
Ses dons ambrosiens: luy decora la face
D'immortelle beauté & d'attrayante grace.*

*Telle qu'une Venus, quand elle veut aller,
Coronnée de fleurs, aux danses pour baller,
La fit plus que deuant & grande & grasse, voire
Plus blanche de beaucoup que ne seroit l'inoire
Puis elle se partit, & les filles apres*

*Arriuerent vers elle, aux bras & blancs & frais,
Suiuant son mandement. Lors le sommeil la laisse,
Elle frotte ses yeux, & s'escrie en tristesse.*

*Certes le doux sommeil m'a surprise en mes pleurs
Si mes veus auoient lieu. Diane en mes douleurs
Dessus moy decochant vn des traits de sa trouffe
Me donneroit bien tost vne mort ainsi douce,
Pour ne plus m'affliger: mon esprit tourmentant
Sans cesse de douleurs, pleurant & regrettant
Mon espoux bien aymé, dont, par toute la Grece
Fait courir son renom, la vertu, la sagesse.*

*Ce faict, elle descend non seule, mais ayant
Ses filles apres elle, & d'elles s'appuyant.*

LE XVIII. LIVRE

*Sitost qu'elle aprocha la sale bien meublee
Où des amans estoit la superbe assemblee,
Sur le seuil de la porte elle arresta ses pieds,
Sur sa face iettant ses voiles delies.
Or à chaque costé ses deux filles se mirent
Mais lors des poursuiuans les genoux tressaillirent
Leur cœur saisi d'amour de tieffe sautoit,
Et chacun de dormir pres d'elle souhaittoit
Lors appellant son fils elle tint ce langage.*

*Certes Telemachus, tu n'as plus de courage
Ny de ressentiment. Quand tu n'estois qu'enfant
Ton courage s'alloit d'auantage eschauffant.
Mais or que tu es grand, fort, & plein d'esperance,
Et qu'on te iugeroit à ta seule apparence
Estre certainement fils d'un homme de bien,
Et si grand & si beau, certes tu ne vaux rien.
Tu ne te ressens point, tu perds tout le courage.
Quoy, quelle indignité, quel forfait, quel outrage
As-tu souffert ceans, laissant impunement
Frapper un estranger si miserablement?
Que dira ton de toy? Si desormais on traite
Ainsi les estrangers qui viendront à retraicte
Dedans nostre maison, en toy seul en sera
La honte, & le diffame, & l'on t'en blasmera.*

*Adonc Telemachus, Je confesse, ma mere,
Qu'à iuste occasion tu te mets en colere,
Mais ie regarde à tout. Et si ie scay fort bien
Discerner comme il faut le mal d'avec le bien,
Ne me ressentant plus de ma premiere enfance.
Mais ie n'ay pas assez de force & de prudence
Pour resister à tous: ie suis intimidé
Par ces gens, ie ne suis secouru ny ayde*

De personne du monde, ils trament, ils machinent
Je voy comme en leur cœur desia ils m'exterminent.
Mais pour te dire aussi de ce qu'ont faict ces deux
S'estans entre-frottez, cela ne vient point d'eux,
L'hoste a eu le dessus. Que nous fut si prospere
Pallas, tel fust Phabus & Iupiter le pere
Enuers nous, qu'aujourdhuy nous pussions voir ces gens
Aussi malacoustrez, comme est l'autre ceans,
Que les uns là dehors les iarrests estendissent,
Les autres cy dedans aux abbois se rendissent,
Comme ce pauvre Irus, & teste & corps branlant
Là dehors, un yurogne en tout point ressemblant,
Ne se pouuant leuer ny faire sa retraicte,
Moulu, brisé quil est & de corps & de teste.

Ainsi qu'ils deuisoient, leur propos fut couppé,
Par ce qu'Eurymachus dit à Penelopé.

Sage Penelopé, belle fille d'Icare,
Si tous les Grecs voyoient ceste beauté tant rare,
D'Iasie & d'Argos, tous ceans demourroient,
Bien plus de gens ches toy ta beauté requerroient,
Car infailliblement ton bon esprit, ta grace,
Ta taille & ta beauté, toutes femmes surpasse.

Auquel Penelopé. Les Dieux en verité,
Eurymach, ont perdu ma grace & ma beauté
Des le iour que les Grecs dessus la mer monterent,
Et pour mon grand malheur mon Vlysses m'osterent
S'il estoit de retour en vis il me rendroit,
Rameneroit mon lustre, & bien mieux m'en prendroit
Mais certes maintenant le chagrin me deuore.
Un mauuais Dieu le vent. Il me souuient encore
Que quand il s'en alla par la main il me print
Me retirant à part, & ces propos me tint

LE XVIII. LIVRE

Femme, le cœur me dit que i'amaïs sans grand perte
 Les Grecs ne reuiendront de ceste guerre ouuerte.
 Car on tient les Troyens pour belliqueuses gens,
 Bons tireurs, bons archers, legers & diligens
 Bons dresseurs de cheuaux plus qu' autres de la terre,
 Et qui iugent fort bien des progres de la guerre.
 Par ainsi ie ne scay si Dieu me renuoirra,
 Ou si ie seray pris. Mais vienne qui pourra:
 Fay le deuoir ceans, & de pere & de mere
 Ayes le soing, qu' allant en contree estrangere
 Ie te laisse si vieux mais des que tu verras
 Nostre fils estre grand, lors tu te mariras
 Selon ton bon plaisir, quittant au prealable
 Ta maison à ton fils. Son propos fut semblable
 Et tout en reuient là: mais le iour defaudra
 Si tost que ceste nopce odieuse aduiendra,
 Nopce pernitiense, ennemie, importune,
 Iupiter m' arrachant mon bien & ma fortune
 Mais l'ennuy, le depit me ronge & me deffait:
 Et ie n'ay i'amaïs veu pratiquer vn tel faict,
 Que ces messieurs icy. Ils recerchent en somme
 Une femme de bien & fille d'vn riche homme.
 Sont toujours en debat & ne s'accordent pas
 Ce temp pendant ils font icy maint bon repas:
 Aux despens neantmoins de celle qu'ils courtisent,
 Tuent vaches, brebis & tout son bien destruisent
 Ceux qui veulent aymer donnent abondamment
 Festoyent leur amye, & violement
 Ne consomment son bien possedeZ d'auarice.
 Elle disoit ainsi: & le fameux Vlysse
 En son ame ressent vn plaisir merueilleux
 Que ne refusant pas de ces fols orgueilleux

Les dons elle tenoit leur ame balancee,
Mais auoit toutesfois toute autre sa pensee.

A qui Antinous fils du riche Epithé.
O fille d'Icarus sage & de grand beaulté,
Plaise toy accepter les dons en allegresse
Que te veulent donner tous ces princes de Grece,
Et ne reiette point ce que nous t'ofrirons.
Car tien pour tout certain que nous ne sortirons
De ceans, pour aller chacun à son affaire
Ny en lieu que ce soit, que ne t'ayons veu faire
Choix de celuy de nous qui le plus te plaira,
Et que pour ton mary ton ame choisira.

Si dit Antinous, & eux tous l'aprouuerent
Alors vn chacun deux vn heraut enuoyerent
Pour querir les presens. A luy premierement
Vne robe on porta faicte mignonnement
De diuerses couleurs & de riche parure.
Douze grands boucles d'or agraffoient la iointure
De fort propre facon. On porta quand & quant
Au bel Eurymachus vn tres-riche carquant
Garny de pierrerie en lueur eclat ante
Ainsi que le soleil: au fort Eu ylamante
Porterent deux uallets deux precieux pendans
Pour porter à l'oreille, & qui aux regardans
Grande admiration pour leur pris pouuoient rendre
Puis il prouint du fils de Polyctor, Pisandre
Vne tres-riche bague, excellent parement,
Et vn chacun des Grecs portoit consequemment
Ce qu'il auoit de beau, dont il faisoit plus conte.

Ce faict Penelopé en sa chambre remonte
Et ses filles apres, & les presents portoient
Mais eux restez en bas & chantoient & s'antoient

LE XVIII. LIVRE

Espris de grand plaisir: iusqu'au soir que l'estoile
De vesper se monstra: mais si tost que le voile
Du soir fut estendu, on courut allumer
Trois flambeaux en la sale, & les fit on flammer
Pour eclairer par tout force allumettes seches
On mit à l'environ brulantes comme meches,
D'un bois aride, dur, & coupé de long-temps
Les femmes de leans les lampe aprest ans
Eclairaient tour à tour, à qui le prince sage
Le prudent Ulysses vint tenir ce langage.

Servantes d'Ulysses que lon n'a veu ceans
Tant de temps il y a, allez vous en leans
Avec Penelopé la venerable Reyne,
Filez vostre quenouille, ou retordez la laine,
Assises au pres d'elle, & vous resionissez
Faisant vostre besogne, il y aura assez
De moy pour eclairer: soit qu'ils ne sommeillassent
Et iusqu'au point du iour toute la nuit veillassent
Ils ne me vanicront point. Car ie suis endurcy
A la peyne & au mal. Il leur disoit ainsi:
Mais elles se rioit, se regardans entre elles
Lors vne Melantho ayant les ioues belles,
Fille de Dolius, fierement le brauoit.
Penelopé la Reyne eleuee l'auoit
Comme sa propre fille, & souuent prenoit elle
Plaisir & passetemps en ceste damoiselle.
Mais elle n'auoit pas l'œil de larmes trampé,
Ny le cœur affligé comme Penelopé.
Eurymachus l'aymoit & l'auoit debauchee:
Elle se montra donc estre mal embouchee,
A son maistre disant, tu es en verité
Bien hors de ton bon sens, ô vieillard rassoté,

Que te

Que tu ne fais point cas d'aller prendre le somme
En quelque coin à part. Mais veux tu, ô pauvre hōme,
Babillier toute nuit, rompre la teste à tous,
Parlant confidemment, & sans creindre les coups?
Ou tu as sans failir du vin dans la cervelle
Parlant si sottement: ou ton humeur est ielle
Et ne te laisse point, malotru, penses tu
T'exalter, pour auoir cest Irus combatu?
Garde qu'un autre Irus, plus fort que luy ne vienne
Quite rompe la teste & dehors ne te traine
Tout gassouille de sang & couché à l'enuers.

Vlysses luy iettant un regard de trauers.

Chienne, i' aduertiray de ton fait. Telemaque
Des qu'il sera venu, en quels mots tu m'attaque
Pour te faire couper les iambes & les bras.
Les autres eurent peur & parlerent plus bas
Tremblantes des genoux, elles se retirerent
Disans qu'il disoit vray, & dans la chambre entrerent
Mais il leur eclairoit à tous de bout en bout,
Touours pres des flambeaux, & prenoit garde à tout
Les considerant tous. Il faignoit vne chose,
Mais en son cœur pourtant le contraire il propose,
Afin qu'il ny retrouve à redire un seul point
Pour eux de son costé Pallas ne permet point
Qu'ils s'abstiennent du tout d'iniure & de conuice,
Pour plus encor contre eux faire irriter Vlysse
Ainsi Eurymachus se moquant l'attaquoit
Et les autres à rire en ces mots prouoquoit.

Oyez moy ie vous pry vous qui seruez la Reyne
Que i' ouure le propos où mon desir m'entrenne
Croyez que pour certain nostre hoste que voicy
Sans le vouloir des Dieux n'est point venu icy

LE XIX. LIVRE

Car il me semble aduis que la lueur eclaire
Sur sa teste qu'il a si peice & si claire,
Qu'elle est comme un flambeau: & ses mots recitez,
Il dit à Ulysses le razeur de citez.

Amy me voudrois tu servir si ie t'enmene.
Ie te payeray bien, & n'en sois pas en peyne,
Ie t'enuoiray aux champs, où tu redresseras
Les bouchures de haye, & arbres planteras
Tu y auras du pain prou pour ta nourriture,
Et t'y feray donner vestemens & chaussure.
Mais i'ay peur que tu sois par trop accoustumé
A fair le vaurien (te voila bien nommé)
Et ne vueilles rien faire, aymant mieux par les rues
Trotter en mendiant, aux huis les mains tendues,
Pour entasser sans fin dans ton ventre gourmand.

A ces mots Ulysses respondit librement.
Eurymach, qui me dis un fayneant, un lasche,
Si nous auions tous deux entrepris une tasche
Au printemps que les iours sont desia longs & chauts,
Et que i'eusse à mon gré en ma main une faus
Et toy une autre aussi, en un pré où lon treuve
De l'herbe en quantité, nous verrions à l'espreuue
Qui trauiilleroit mieux sans auoir desienné
Depuis le fin matin iusqu'au iour terminé.
Tu verrois de quel cœur au traual ie me rue.
S'on me mettoit apres à tenir la charrue
Auecques de bons beufs, puissans, bien ramassez,
Bien pareils pour tirer, gras & point harassé;
On verroit quel rayon ie scay faire dans terre.
Puis, si Dieu allumoit en quelque part la guerre
Et que lon me donnast auourd'huy ou demain
Un rondache en mon bras, deux ianelots en main,

Vn morion bien fort & bien faict en ma teste,
Tu verrois de quel bras vn iavelot ie iette,
Et comme ie me mesle entre les combatans,
(Sans trembler pour les coups) il ne seroit plus temps
Lors de me reprocher mon ventre ny ma pance.
Mais tu me fais grand tort tu es cruel, & pense
Estre quelque braue homme, à cause que tu es
Auec ce peu de gens insolens & mauuais.
Si Ulysses venoit & te fist vne charge,
Voy ceste porte là & bien grande & bien large,
Elle seroit alors trop estrouee pour toy.

Eurymachus eut lors suffisamment de quoy
Prendre querelle à luy: de trauers le regarde,
Et luy dit. Malheureux, rien plus ne me retarde
Que ie n'aye raison de ta presumption.
Tu veux faire du libre, & à ton option
Offencer vn chacun. Est tu lassé de viure?
As tu point de remors? as tu peur? es tu yuré?
Es tu toujours ainsi? que distu? pense tu
T'exalter pour auoir cest Irus combatu?

Ce disant, il saisit vn tabouret, Vlysse
Court vers Amphinomus, sous ses genoux se glisse
De peur d'Eurymachus. Le coup prit vn garson
De la sommellerie, & seruant d'eschançon,
Le frapa au bras droit. Il laissa choir le verre,
Et le verre en tombant fit vn son contre terre.
Luy tumba renuersé, pleurant & lamentant
Sur la poudre estendu. Les amans à l'instant
Furent fort mutinez, & la maison remplirent
De murmure & de bruit, & l'un l'autre se dirent:

Que ce maudit vieillard fust mort bien loin d'icy
Sans nous voir. Car il est cause de tout cecy,

LE XVIII. LIVRE

Et de tout ce desordre, il est bien necessaire
De parler tant d'un gueux, qu'en auons nous que faire?
Quel plaisir à plus boire, & plus nous frequenter
Puis que les plus meschans le doiuent emporter?

Alors Telemachus leur dit plein de franchise:
Malheureux, forcenez, remplis de gourmandise
Qui n'avez pas l'esprit de courir, de cacher,
Le vin qu'aués trop pris: allez vous en coucher
Quelque Dieu pour le vray vous agite & estonne
Allez y si voulez ie ne force personne.

L'oyans ainsi parler tout bas ils vont grondant,
Et se mordent la leure: estonnez cependant
De son parler si libre & de son franc courage.

A donc Amphinomus fils de Nisus, fort sage,
Leur dit, ô mes amis ne soyons nullement
Indignez contre luy, il parle iustement,
Et nul ny scauroit mordre, & qui se dira nostre
Netafche d'outrager cest estranger, ny autre
Qui soit en la maison d'Ulysses le diuin.

Mais que le sommelier nous aporte du vin,
Afin que nous buuions, & puis qu'on se retire
Chacun en son logis: ie vous veux encor dire,
Laissez à Telemach, comme c'est la raison,
Cest estranger en garde, il est en sa maison.

Il dit, & son parler plut à toute la troupe.
Ausi tost Mulinus emplit vne grand coupe,
Et c'estoit le heraut d'Amphinomus, estant
Venu de Dulichie, adonques l'aportant (ils burent
A tous comme il failloit, versans aux Dieux (eurent
Après qu'ils eurent beu, & qu'aux grāds Dieux ils
Faiēt les effusions, pour leur ire appaiser
Chacun se retirant s'en alla reposer.

Fin du dixhuietiemes liure.



LE DIX NEUVIÈME LIVRE
DE L'ODYSSÉE D'HOMÈRE.

ARGUMENT.

Ulysses fait offrir de la sale toutes les armes par son fils. Il discourt & parle à Penelopée, se déguisant, & se disant estre de Candie où il auoit veu Ulysses. Il est recogneu par Euryclea sa nourrice, comme elle luy lauoit les iambes, à vne cicatrice qu'il auoit. Il l'empêche de le decouvrir. La narration comme il fut blessé par vn sanglier allant à la chasse sur le mont Parnasse.

AUTRE SOMMAIRE.

*A tous, mesme à sa femme il se cèle & se couure
Mais la vieille, à sa playe à la fin le decouure.*

Mais le cault Ulysses ailleurs ne se retire,
Conseillé de Pallas. Il complotte & cōspire
La mort des poursuivants: estât en ce soucy
Il vint à Telemaque. Il faut que hors d'icy
Ces armes, ces bastons vistement on emporte.
Puis te faudra parler à eux de bonne sorte
S'ils s'enquierent pourquoy. Je lay faiet, diras tu
Pour ce qu'entièrement leur lustre est abbatu,
Et qu'elles ne sont plus telles qu'alors, qu'Ulysses
S'en alla deuant Troye aux Grecs faire seruice,
Kk ij

LE XIX. LIVRE

Et la fumee encor tous les iours les destruit
 Puis quel que bon demon me semble m'a induit
 De les oster delà, i'ay crains, qu'ayans querelle,
 Si possible le vin troubloit vostre cernelle,
 Ne vous entreblessiez, contaminans ainsi
 La grace du festin, & des nopces aussi
 Car le fer mesme à soy le cœur de l'homme attire.

Telemachus fut prompt d'exécuter son dire,
 Sa nourrice Euryclee appella promptement,
 Nourrice, luy dit il, chasse moy vistement
 Ces femmes de là hant, iusqu'à ce que ie puisse
 Enfermer ces bastons & ces armes d'Ulysse,
 Et les oster d'icy, la fumee & le feu
 Qu'on allume sans fin les gastent peu à peu,
 Pource qu'on les neglige, & qu'on n'en a sceu faire
 Aucun conte, depuis l'absence de mon pere,
 I'estois petit pour lors, mais ie veux maintenant
 En faire plus de cas du feu les destournant.

Puisses tu à la fin, ô mon fils, luy dit elle,
 Prendre dorenavant le soin & la tutelle
 De ta pauvre maison, conseruer & garder
 Soigneusement ton bien. Mais il faut regarder
 Qui reclairera donc, puis que tu veux qu'on oste
 Les femmes de leans? Sera cestuy nostre hôte,
 Luy dit Telemachus, oisif ne demourra
 Si ie puis, d'où qu'il soit qui mon pain mangera.

Cela fut resolu: puis de barres bien fortes
 Il s'en alla par tout fermer toutes les portes
 Adonc sans plus tarder ils se prirent tous deux
 A porter vistement rondaches & espieux,
 Lances & morions. Et Pallas la premiere
 Deuant eux cheminoit, & leur faisoit lumiere

Dans une lampe d'or. Lors à son pere ainsi
Parla Telemachus: Quel miracle est cecy
Mon pere, que ie voy ces colonnes dorees
Ces poutres, ces parois, tellement eclairees
Que si c'estoit d'un feu bien ardent. Certe il faut
Qu'il soit entré ceans quelque Dieu de là haut
Auquel dit Vlysses, reprime ton langage,
Et ne t'informe pas de cecy davantage.
La faueur que tu sens vient des grāds Dieux pour vray
Mais va t'en reposer. Pour moy, ie demouray
Afin que ie m'enquiere, & que ie considere
Les femmes de ceans, & ie scay que ta mere
En la peyne où elle est de moy s'informera.

Ainsi Telemachus en haut se retira,
En sa chambre, où estoit mainte lampe allumee,
Luyssant extremement, sa chambre acoustumee,
Ou lors il s'endormit le matin attendant,
Mais en bas Vlysses demeura ce pendant
Tramant aux poursuiuans une mort fort cruelle
Par l'aduis de Pallas. Penelopé la belle
Sort de sa chambre adonc, semblable entierement
A Diane ou Venus. On porte viftement
Sa chaire pour l'assoir, pres du feu l'ont rangee,
Elle estoit & d'iuoire & d'argent ouuragee.
Icmalius la fit. On met un escabeau
Pour soustenir ses pieds, couuert d'une grand peau.
Là la Reyne s'assied, ses femmes sans demeure,
La reuiennent trouuer: elles venoient pour l'heure
De remporter les pots ou beuuoient les amants,
Les tables, & les pains qu'ils alloient consumants
Hors des lampes le feu à terre elles ietterent,
Et force autre bois sec dessus elles porterent

LE XIX. LIVRE

Pour luire & éclairer. Melantho attaquâ
Encore vne fois Vlysses, & le piqua.

Vieillard, tu veux encor demeurer que ie pense
Avec nous toute nuit, grande est ton impudence,
Sors dehors malheureux, & lon t'y donnera.
Ou à coups de tisons sortir on te fera.

Mechante que tu es, luy respondit Vlysse,
Pourquoy m'en veux tu tant? estrange est ta malice.
Te suisie si puant? où est-ce que ie sois
Trop mal vestu pour toy, ou bien que tu me vois
Et pauvre & mandiant? l'indigence en est cause
Et les pauvres passans n'ont iamais autre chose.
I'ay esté quelques fois heureux, riche, & puissant,
Et i'ay tousiours donné à l'estranger passant,
I'ay eu des seruiteurs en quantité bien grande:
Et ce qu'il faut auoir, & ce que l'on demande
Pour estre appellé riche, & viure heureusement.
Mais le haut Iupiter a mis entierement
Aneant tout cela. C'est sa volonté bonne
Ainsi prend garde à toy, qu'un iour ne t'abandonne
Ce grand contentement, que tu prens, que tu sens,
Sur toutes celles cy qui demeurent ceans.
De peur que ta maistresse en fin ne te punisse
Iustement courroucée, ou ne reuienne Vlysse
Comme on l'espere encor. Mais s'il est tout à fait
Perdu, s'il n'y a plus desespérance en son fait,
Son fils Telemachus iustement luy succede:
Il est tel qu'Appollon le fauorise & l'ayde.
Toutes celles ceans qui se gouvernent mal
Croy moy, n'eschapperont son chastiment final,
Car il n'est plus enfant, il aperçoit sans doute
Toutes leurs actions. La Reyne qui l'esconte

Appelle Melantho, & luy dit en ce point:
O chienne audaceuse, & qui ne tremble point,
Je ne cognois que trop toute ta vilenie,
Que tu me payeras aux despens de ta vie.
Tu ne peux ignorer, l'ayant dit deuant toy,
Que i'auois commandé qu'on fist parler à moy
Ceans cest estranger, afin que ie m'enquisse
S'il n'auroit point ony des nouuelles d'Ulysse,
Pour qui i'ay tant de peine. Elle parloit ainsi,
Puis dit, Eurynomé fay moy porter icy
Vne chaire, & dessus vne peaux: qu'il s'assie,
Pour parler, & ouyr ceste pauvre angoissee:
Car ie veux l'enquerir. Penelopé se tint.
Soudain Eurynomé courut tant qu'elle peut,
Une chaire apporta bien fourbie & bien lisse
Mit vne peau dessus: Adonc s'assit Ulysse
Le fort, le tolerant, le sage l'attrempé.
Auquel en tels propos parla Penelopé.

Je voudrois bien sçauoir premierement, mon pere,
Qui tu es, d'où tu es, & ton pere & ta mere:
Lors le sage Ulysse. Certes, Reine honorable
Qui que ce soit viuant sur la terre habitable
N'oseroit s'esgaller à toy aucunement:
Ta reputation, ton bon entendement,
Ton honneur monte au ciel: pareil qu'il pourroit estre
A quelque puissant Roy de beaucoup de gens maistre,
Qui d'autant qu'il craint Dieu & son empire estend
Sur beaucoup d'hommes forts, bon iusticier il rend
Le droit à tout le monde: aussi la terre forte
Abondamment & orge & froment luy raporte,
Ses arbres vont rompants de force fruits diuers,
Ses pastis de bestail, & de poisson ses mers.

LE XIX. LIVRE

Car iuste & droicturier est tout ce qu'il manie:
 Et son peuple souz luy meine vne heureuse vie.
 Mais fay moy, ie te pry, vne autre question,
 Ne me demande point mon habitation,
 Ma race, ny mon nom, que tu ne me rengrege
 Mon mal, te le contant: car la douleur m'assiege,
 Et ne me puis tenir dés que ie m'en souuiens
 De ietter force pleurs. Or il ne sied pas bien
 De monstrer chez autruy son pleur & sa tristesse,
 Et rien n'est pire encor' que de pleurer sans cesse.
 Dauantage, i'ay peur que tes femmes en fin
 Ne se faschent à moy, ne dient que le vin
 Me faict ietter ces pleurs en si grande abondance.
 A qui Penelopé celebree en prudence.
 Certes, amy, touchant la beauté que tu dis,
 Les grands Dieux immortels me l'osterent iadis:
 Dés le iour que les Grecs dessus la mer monterent
 Pour s'en aller à Troye, & mon mary m'osterent:
 S'il estoit de retour en vie il me rendroit,
 Rameneroit mon lustre, & bien mieux m'en prendroit.
 Mais ie n'ay maintenant qu'ennuy & que tristesse,
 Car les plus grands seigneurs en race & en richesse
 D'alentour de Zacynthe, & Duliche & Samos,
 D'Ithaque mesmement, me tiennent tous propos
 De me remarier. Ie suis importunee,
 Et ma maison s'en va perdue & ruinee:
 Et plus il ne me chauld des estrangers, de passans,
 Ne mesmes des Heraults, en public paroissans:
 Mais tousiours desirant mon mary, mon Vlysse,
 Ie ne puis que beaucoup ie ne me definisse.
 Ces gens sans me lascher me vont importunant,
 Me pressent d'espouser. Ie les vay affinant

Aussi, tant que ie puis, & de nouvelle ruse
Tousiours ie les repais, les trompe, les amuse.
Les Dieux mirent un iour en mon entendement
Certaine inuention, de tixtre proprement
Une certaine toile & deliée & grande
Dedans ma chambre à part : aussi tost ie les mande
Et leur tins ces propos. Vous qui me pretendez
Puis qu'Ulysses est mort ie vous prie attendez,
Et differez un peu, tant que i'aye à fin mise
Vne toile que i'ay cy deuant entreprise,
(Malaine se perdroit) pour servir de linceuil
Au Heros Laërtes, & de couuert de deuil.
Quand la Parque qui sçait souz le sepulcre estendre
Tous les viuans, viendra le bon homme surprendre,
Que quelqu'une venant contre moy se fascher
Des femmes des Gregeois, ne me vint reprocher
Qu'on l'auroit sans linceuil posé dessouz la tombe,
Ayant si bien de quoy. l'en dit, & chacun tombe
De mon opinion. Ainsi donc i'aduançois
Ma besongne de iour, mais ie la dépesois
De nuit à la chandelle, & avec ceste ruse
Par trois ans tous entiers ie les trompe & abuse:
Mais sur le quatriesme an les heures à la fois
Ayans parfaict les iours, & puis les iours, les mois,
Ie fu surprise d'eux. Mes chiennes de seruantes,
Ces femmes, de mon pain en ma maison viuantes,
Ne faisans pas bon guet. Ils entrent donc ceans,
Ils m'intimident fort, & me vont menaçans,
Tant que contre mon gré la toile fut parfaicte.
Or voicy maintenant, ie n'ay plus de deffaicte,
Ie ne sçay plus que faire, & à qui m'adresser.
En premier, mes parens ne font que me presser

LE XIX. LIVRE

De me remariier: Apres mon fils s'ennuye
 De voir perdre son bien, & las de ceste vie:
 Car il s'en va tout grand. Il a sens & raison
 Pour dresser comme il faut son train & sa maison,
 Et Dieu luy donne encor & apparence & grace,
 Or conte moy aussi ta maison & ta race,
 Car tu n'es pas venu ny d'un roc endurcy,
 Ny d'un chesne ancien. A qui respond ainsi
 Le prudent Ulysses. O femme venerable
 Du fils de Laertes, Ulysses l'admirable,
 Ne cesseras tu point de vouloir t'enquister
 De quel pays ie suis? Mais pour te contenter.
 Ie te diray le tout. Encor' que davantage
 S'en augmente mon mal. On n'a que tout dommage
 Quand on est si long temps de son pays absent,
 Ainsi que i'ay esté, souffrant & patissant
 Infinité de maux, cependant que ie tire,
 Courant par le pays. Or ie commence à dire.
 Vne Isle est au milieu de la profonde mer,
 Belle & fertile, Crete on la voulut nommer,
 Force peuple y habite, & maintes grands familles,
 Il y a quatre vingts & dix fort belles villes,
 Les langages y sont meslez diuement,
 Les Achiues icy parlent separement
 D'avec les belliqueux & forts Eteocretes.
 Là des Cidoniens les langues sont discrettes
 Des Tricayciens Doriens, d'autre part
 Les diuins Pelasgois ont leur langage à part.
 Parmy eux est Gnosos cité pleine d'estime,
 Où regna par neuf ans Minos, l'amy intime
 Du tresgrand Iupiter, & qui fut pere heureux
 Du grand Deucalion, mon pere genereux,

Et puis Deucalion eut pour toute lignee
Moy que voicy, avec le Roy Idomenee
Qui s'en alla à Troye avec Agamemnon
Sur les vaisseaux courbez. Or Eihon est mon nom;
Plus ieune d'ans que luy, car il eut l'avantage
Et d'estre mon ayné, & meilleur & plus sage.
Là ie vy Ulysses, pour hospitalité
Luy fis force presens, car il y fut ietté
Du vent qui luy fit perdre & sa route & sa voye
Vers le cap de Mala, comme il alloit à Troye.
Il encra dans l'Amnyse, où se voit l'ancre creux
De la grande Lucine, & d'abord dangereux.
A peine eschapa il de l'onde mutinee:
Il s'enquist aussi tost du Roy Idomenee
Estant en la cité, car il estoit de faict
Son hoste de tout temps, & son amy par faict.
Or c'estoit la iournee ou dixiesme, au vnziesme,
Qu'il auoit nauigé avec danger extreme,
Tendant à Ilion. Alors humainement
J'allay le recueillir, logeay commodement
Le premier dessus tous, & d'allaisresse grande
Je fy la bienvenue à tous ceux de la bande:
Vin, farines, & chairs ie luy fis élargir,
Pour faire bonne chere & pour se resiouyr:
Ils furent douze iours, tant leur estoit contraire
Le vent, qu'ils ne tiroient ny auant ny arriere.
Quelque mauuais Démon leur fit ce mauuais tour;
Mais la tempeste chut sur le treiziesme iour,
Eux se mirent en mer, & ainsi il prolonge
Ses discours controuuez, & mesle le mensonge
Avec le vray-semblable. Elle qui l'escontoit
Larmes en quantité de ses beaux yeux iettoit,

LE XIX. LIVRE

Et son corps se fendoit, comme vne grosse boule
De neige sur les monts, & se fond & s'escoule
Souz le vent de Midy, quand celui d'Occident
A faict pleuvoir dessus, l'eau qui en va fondant
Des riuieres en forme aux grandes mers egales,
Tout ainsi se fendoient ses ionès belles, pastes,
Au prix qu'elle pleuroit, & de pleurs se baignoit
Pour son mary, pres d'elle. Ulysses la plaignoit
Grandement en son cœur, mais fixes les paupieres
Ainsi que fer, ou corne, & ne s'esmouuoit gueres
Au dehors, deuant elle, ains fort couuertement
Il retenoit ses pleurs. Quand elle eut longuement
Pleuré, & eut versé larmes à suffisance,
Elle retourne encore, & ainsi recommence.

Je veux à ceste fois t'esprouuer & tenter
Si tu as veu, ainsi que tu viens de conter
Mon mary & ses gens arrinéz en Candie,
Logéz en ta maison, dy moy, ie te supplie,
Comme il estoit vestu, quel homme estoit-ce alors?
Et quels estoient ces gens de visage & de corps?

Et le sage Ulysses. Il est bien difficile
Qu'on n'ait depuis vingt ans la memoire labile,
Ayant tant tracassé, car il y a autant
Qu'il partit de chez moy, i'en parleray pourtant
Au mieux que ie pourray. De couleur purpurinè
Estoit, ce me sembloit, sa robe, belle, fine,
Double, & bien estoffee, or elle se pressoit
Par vne agraffe d'or qu'un double tron perçoit.

Elle estoit par deuant fort diuersement peinte,
Un chien y attrapoit un Cerf tremblant de craintè
Des pattes de deuant, chacun s'émerueilloit,
Ils estoient d'or aussi, & le chien, ce sembloit,

Le vouloit estrangler, la beste qui palpite
Vouloit se demenant se sauuer à la fuite.
La camifete dont pour lors il se vestoit,
Sembloit tant deliée & subtile elle estoit,
A la peau d'un oignon, & sèche & transparente,
Et comme le Soleil elle estoit éclairante.
Les femmes du pays l'admiroient grandement,
Mais pour te dire vray, ie ne sçay pas comment
Il l'auoit recourue, ou bien s'il l'auoit mise
Sur luy dès sa maison, ou bien s'il l'auoit prise
En présent sur la nef de quelque hôte ancien,
Ou de l'un de ses gens, car le Dulichien
Auoit beaucoup d'amis, & des Grecs honorables
De tout tant qu'ils estoient peu estoient ses semblables.
Ie luy fy don. ainsi qu'il voulut déloger,
D'une fort belle espee, & pour le rechanger
D'une double, fort riche & belle manteline,
Longue iusqu'aux talons de couleur purpurine,
Et puis le conduisyt fort honorablement
Iusques dans un vaisseau, en grand contentement.
Il auoit un Herault, si i'ay bonne memoire,
Un peu plus vieux que luy, sa couleur estoit noire,
Un peu courbé du dos, les cheueux crespelés,
Eurybates de nom. Ulysses au surplus
Sur tous ses compagnons l'estimoit à merueille,
Car il auoit à luy la prudence pareille.

Une enuie à ces mots plus grande encor la prit
De rengreger son deuil, songeant en son esprit
Que ces marques estoient certaines d'assurance:
Puis voyant qu'elle auoit pleuré sa suffisance
Elle redit encor. Amy, d'oresuuant,
Autant que l'on t'auoit méprisé cy deuant,

LE XIX. LIVRE

Autant tu me seras & cher & venerable,
 Et amy de ceans. Rien n'est plus veritable
 Que c'est moy qui luy fis don de ce vestement,
 Tel que tu me l'as dit, le pliant proprement
 Dedans ma chambre à part, & en la mesme place
 L'agraffe y attachay pour luy donner la grace.
 Or iamaïs plus mon œil, las, ne le reuerra,
 Et chez luy iamaïs plus il ne retournera:
 C'est donc au grand malheur de moy & de ma ioye
 Qu'il alla iamaïs voir la non nomable Troye
 A laquelle Vlysses le sage & le sçauant
 Reyne pleine d'honneur, cesse d'oresnauant
 De te destruire plus, de gaster d'auantage
 Ton corps, & ton esprit, en pleurant le dommage
 De ton mary perdu. Non que ta passion
 Soit digne nullement de reprehension:
 Car s'il est mesmement permis à toute femme
 De regretter celuy qui possedoit son ame
 Quand il estoit viuant, que la mort sans pitié
 Luy est venu rair, & à qui l'amitié
 Reciproque a laissé mainte belle lignee,
 A plus forte raison a toy infortunee
 De pleurer Vlysses, estimé en tous lieux
 En vertu & prudence, comparable aux Dieux.
 Mais modere tes pleurs, ie te prie, & m'esconte,
 Et puis ie te diray la verité sans doute,
 Et ne te tairay rien de tout ce que i'ay peu
 Apprendre d'Vlysses ton mary, car i'ay sçeu
 Des nouuelles de luy estant en Thesprotie,
 Pays gras & fertile. Or il est plein de vie
 Et reuiendra bien tost, plein de biens, plein de dons,
 Dont il a faict amas, innombrables & bons.

Mais

Mais il a fait naufrage, & sa flotte est perie
Et ses gens submergez, partant de Trinacrie,
Et tout pour le courroux du puissant Iupiter
Et du Soleil, qu'he las, ne peurent respecter
Ses gens mal-aduisez: Car ses vaches ils mirent
A mort, & pour cela souz les eaux ils perirent
Pour luy, il se sauua vers les Phæaciens
(Peuple iadis venu des grands Dieux anciens)
Tellement, quellement, qui beaucoup l'honorèrent
Comme si c'eust esté vn Dieu, & luy donnerent
Quantité de thresors. Sans hazard, sans danger,
Ils le vouloient icy long temps a, renuoyer,
Et ja il y seroit, sans que plein de prudence
Il vouloit ramasser or, tresor, & cheuance
Auant que retourner, & voir ce-temps pendant
Force diners pays. Ainsi sage & prudent
Il a veu & appris, courant la terre & l'onde,
Et ne s'égaleroit à luy, homme du monde.
De tout ce que ie dy Phædon m'en assura,
Le Roy de Thesprotie, en outre me iura
Comme il sacrifioit & faisoit vne feste,
Que toute son escorte & sa flotte estoit presté,
Et luy, deuoit bien tost mettre la voile au vent
Pour s'en venir icy: mais ie me my deuant
Parce que ie trouuay des gens de Thesprotie
A propos, pour passer deçà en Dulichie.
Ce Roy me fit monstrier les dons & les presens
Qu'il auoit ramassez, dignes & suffisans,
De nourrir sa maison sagement gouuernée
Iusques en la neufiesme & dixiesme lignée:
Tout cela luy estoit seurement emballé
Dans le chasteau du Roy: car il estoit allé,

LE XIX. LIVRE

*Me dit il, en Dodone, au chesne, afin de prendre
L'aduis de Iupiter, & de l'oracle apprendre
Comme il s'en reuiendrait : si manifestement,
Ou bien s'il le deuoit faire couuertement.*

*Ainsi vivant est-il, & ne scauroit plus guere
Tarder, qu'il ne retourne & dans sa maison chere
Et parmy ses amis. Croy le sur mon serment,
Par le hault Iupiter vivant, premierement,
Et puis, par la maison d'Ulysses l'innuincible,
Ou l'on m'a bien-veigné tout ce qu'il est possible,
Ulysses reuiendra, ains que l'an soit passé,
Voire dedans ce mois, ou l'autre commencee
Croy-le, & tu ne seras aucunement trompee.
A cet mots respondit encor Penelopee.*

*Ainsi fust-il mon hoste, & certes tu verrois
Quelle grande amitié, quels biens ie te ferois,
Si que qui te viendrait deormais à l'encontre,
Diroit à tout iamaïs heureuse ta rencontre.
Mais, ainsi que ie croy, de mesme m'aduiendra.
Car iamaïs Ulysses chez luy ne reuiendra,
Et tu ne receuras l'honneur, la recompense
Que tu as esperé. Car depuis son absence
Nul n'est paru ceans tel qu'estoit Ulysses
Pour recevoir le monde, & pour donner acces
Chez luy aux estrangers, ny d'un si bon visage
S'ils s'en vouloient aller, prier pour leur voyage.*

*Or filles, lavez luy les pieds bien nettement,
Puis menez-le coucher & dormir mollement,
Faites-le bien chauffer, donnez luy couuerture
Et tout ce qu'il luy faut encontre la froidure,
Attendant le matin, car lors plus à loisir
On le fera baigner & oindre à son plaisir,*

Afin qu'il mange & boive avecques Telemaque.
Que si, qui que ce soit estrange, ou d'Ithaque,
Luy faict du déplaisir, certe il delogera;
Et plus en ma maison il ne conuersera:
S'en fasche qui voudra. Car comment, ô mon pere,
Diras-tu que ie suis courtoise & debonnaire
Plus que nulle autre femme? Et comment verras-tu
Telle que tu la dis ma prudence & vertu,
Si sans te reuestir d'habit plus honorable
Ie te laisse aller soir, si déchiré à table
Et qu'on t'ait à mépris? Or la vie & les iours
Des hommes sont fuyards, peu durables & courts;
Et quiconc ne sera piteux & secourable
Il sera en sa vie à chacun execrable,
Malheur & malencontre on luy souhaittera;
Et quand il sera mort chacun le mandira.
Mais qui sera benin, courtois, & debonnaire,
Ceux de loing, ceux de pres hōneur luy viendront faire,
Diront tout bien de luy, & ne se laisseront
De l'aymer, quelque part qu'ils se rencontreront.

A quoy le Laërtide au genereux courage.
O du grand Ulysses femme prudente & sage,
Pour te dire le vray, tous ces bons traitemens,
Ces lodiers precieux, ces beaux accoustremens
Me sont à contre-cœur, ie les hay, depuis l'heure
Que Crete ie laissay ma tresdouce demeure,
Et ses costaux negeux, pour me mettre sur mer,
Frequenter les vaisseaux, & courir & ramer:
Et ie ne passe point les nuits d'autre maniere
Que i'ay faict cy deuant, ne fermant la paupiere.
Las, tant i'en ay veillé deffouz maint toict obscur
Ayant la larme à l'œil & la tristesse au cœur;

Ll ij

LE XIX. LIVRE

*Attendant le retour de l'aube matiniere.
Il ne me chault point donc de bassin ne chaudiere,
Et nulle femme encor mes pieds ne touchera
De tant que tu en as, & ne me lavera,
Si ce n'est quelque vieille, & telle que moy d'aage,
Et qui ayt eu du mal, qui soit discrete & sage:
Passe, pour celle là, si elle veut toucher.
Mes pieds pour les laver, ie ne m'en puis fascher.*

*Certes, mon cher amy, luy respondit la Reyne,
Ie n'ay point veu ceans, de region loingtaine
Un homme comme toy aduise & prudent,
Car tres-discret, tu vas pesant & regardant
Tout ce que tu veux dire. Or voicy ma seruante
Vieille non seulement, mais sage & fort prudente:
C'est celle qui premiere a traité, a nourry,
Qui recent en ses mains mon pauvre de mary
Des l'heure qu'il sortit du ventre de sa mere:
Elle te lavera, elle est propre à ce faire,
Combien qu'elle soit foible. Or sus, Euryclea,
Leue toy vistement, laue-le, le voila
Tout semblable à ton maistre. Vlysses est asture
De tel aage que luy, ses mains par auenture
Sont comme celles cy, la peine & le tourment
Font l'homme, quel qu'il soit, veiller bien vistement.*

*C'est ce que luy disoit la Reyne chaste & sage,
Et la vieille, portant les mains à son visage,
Et pleurant chaudement se lamentoit ainsi.*

*Mon fils, que i'ay pour toy d'angoisse & de soucy,
O le plus malheureux des siecles où nous sommes,
Et que Iupiter hait sur tous les autres hommes,
Bien que tu craignes Dieu: car ie ne pense pas
Que de tous les mortels qui vivent icy bas,*

Un autre ayt tant que toy faict de saintes offrandes,
Parfumé les autels d'Hecatombes si grandes,
Brulant les gras cuissots au puissant Iupiter
Qui se sçait aux éclats du foudre delecter,
Pour impetrer de luy sans plus que tu paruinsses
A un bon & iuste aage, & que visses ce prince
Esleué de ta main. Mais las, il t'a osté
Le iour de ton retour, telle est sa volonté.
Ainsi en quelque coin d'une loingtaine terre
Moqué & méprisé par aventure il erre,
Les seruantes aussi possible vont causant
Dessus ce miserable, & le vont méprisant,
Comme ores te faisoient ces chiennes malheureuses,
O mon pauvre vieillard, leurs iniures honteuses
Tu fuyois prudemment, quand tu ne permettois
Qu'ils te vinssent toucher seulement de leurs doigts.
Or la fille d'Icar, la sage Penelope,
A mon gré m'a choisie en toute la trope.
Ie te lauieray donc tres-volontiers, croy moy,
Pour l'amour de la Reyne & pour l'amour de toy:
Car i'ay compassion de ta grande tristesse,
Mais ie te diray bien, que depuis ma vieillesse
I'ay veu venir ceans force gens estrangers,
Et qui auoient couru, disoient-ils, grands dangers,
Mais ie n'en vy iamais vn qui fust si semblable
A Vlysses que toy, tant, ô cas admirable,
Tu es pareil à luy du corps & de la voix,
Et des pieds mesmement. Vlysses à ceste fois
Ainsi luy respondit: Ainsi, ma bonne amie,
Disent pareille à luy ma phisionomie
Tous ceux qui nous ont veu: & c'est sans contredit
Qu'il me ressemble fort, ainsi que tu as dit.

LE XIX. LIVRE

Il disoit, & la vieille alors prend la chaudiere
 Pour luy laver les pieds, puis avec vne aiguiere,
 Verse premierement de l'eau froide, & apres
 De la chaude dessus, le feu estoit aupres,
 Et Ulysses s'assit, sa face ayant dressée
 Deuers l'obscurité, craignant en sa pensée
 Que la vieille en lavant de pres garde ne prist
 A sa vieille blesseure, & ne le déconurist,
 Elle s'approche alors, & à laver commence
 Les deux pieds à son Roy: mais comme elle s'aduançe
 De laver, & frotter, soigneuse, de la main,
 La voicy tout à coup qu'elle cognoist soudain
 Et sent deffouz ses doigts la dure cicatrice
 Qu'auoit faicte autresfois vn Sanglier à Ulysse
 Sur le mont de Parnasse, en allant visiter
 Un iour Antolychus, & voulant s'acquitter
 Du deuoir d'un bon fils. Antolychus le pere
 Hardy & renommé, d'Anticlea sa mere.
 Doncques Antolychus, pour lors il visitoit
 Et ses filles aussi, qui le prix emportoit
 Sur les hommes d'alors, de viure de rapine,
 De se seruir de ruse & de prudence fine,
 Et de fort bien tromper. Mercure luy donna
 Ceste prerogative, à cela l'adonna,
 Pource qu'il luy faisoit parfuns & sacrifices,
 Les graisses luy bruloient des plus belles premices,
 Et d'agneaux & de boucs qu'en ses parcs il auoit,
 Et tousiours la faueur de ce Dieu le suynoit.
 Or cheminant tousiours il vint en fin en l'isle
 D'Ithaque, populeuse, abondante, & fertile,
 Où ioyeux il trouua que sa fille auoit faict
 Fraischement vn beau fils. Euryclea le met

Soudain sur ses genoux, & dit en ceste sorte,
Dy le nom que tu veux que ton petit fils porte,
O Roy Antolychus, on en est en soucy,
Et fort on le desire. Alors respond ainsi
Antolychus parlant. O ma fille chérie,
Et vous mon gendre aussi, donnez luy ie vous prie
Le nom que ie diray : I'ay beaucoup tracassé
De terre & de pays, ains que d'estre passé
Par mer iusques à vous, i'ay eu force querelle,
Femmes, hommes, i'ay tout range par mort cruelle,
Son nom soit Vlysses : mais si tost qu'il sera
Un peu grand, & courir par le monde pourra,
Qu'il s'en vienne en Parnasse au bien de sa grand mere.
Là sont tous mes tresors, & là ie luy veux faire
Vn honnestes present, ie l'en honoreray,
Et ioyeux & content icy le renuoiray.
Le desir de ces biens donna cœur & audace
Pour lors à Vlysses de venir en Parnasse,
Où par Antolychus il fut fort caressé,
Fut de tous ses enfans tendrement embrassé,
Et receu de propos courtois & amiable,
Mais plus d'Amphithea sa grand mere honorable,
Qui se iettant sur luy, d'accueil tres-gracieux
Luy baisa mille fois & la teste & les yeux.

Antolychus soudain à ses enfans commande
D'apprester à soupper. Eux d'allaisresse grande
Font son commandement, & s'en vont diligens
D'entre les troupeaux prèdre vn Torean de cinq ans,
Qu'ils écorchent soudain, autour de luy se iettent,
Le tranchent en morceaux & en broche le mettent,
Puis le font bien rostir, apres font leur deuoir
De tresbien se remplir du matin iusqu'au soir.

Lluy

LE XIX. LIVRE

Et leur faim ne chomma de repas conuenable,
 Mais quand le Soleil mit ses cheuaux en l'estable
 Ils s'allèrent coucher, dormans iusques au iour.
 Mais si tost que l'Aurore eut monstré son retour,
 Soudain Antolychus & ses fils se leuerent,
 Firent venir les chiens, & au bois s'en allerent,
 Et le diuin Ulysse à la chasse avec eux.
 Tous ensemble ils grimpoient par les sentiers montueux
 De la grande montagne espaisse de bocages,
 Et touchoient le sommet des cauernes sauvages
 Et des rochers venteux. Or desia le Soleil
 Sortant hors de la mer son chariot vermeil
 Les campagnes frappeoit, lors que voicy la chasse
 Arrivee au sommet du bocageux Parnasse:
 Les chiens alloient deuant aux voyes, & apres
 Les fils d'Antolychus les suiuiuent de bien pres:
 Et Ulysse avec eux, est tousiours à leur trouffe
 Ebranlant en sa main vn dard de grand secousse,
 Au fonds d'un grand buisson, où la force des vents
 Ne penetroient iamais, où les rais violents
 Du Soleil ne donnoient, que la pluye & l'orage
 Ne pouuoient transpercer, tant estoit le feuillage
 Et le ramage espais de l'ombrageux hallier.
 D'auenture pour lors bangeoit vn sang sanglier
 Qui si tost que le bruit à ses oreilles touche,
 Et des chiens & des pieds, se réueille farouche,
 Dresse sa grosse hure, eschumeux & bauant,
 Les yeux ardans de feu, & leur vient au deuant:
 Ulysse l'apperçoit, & de grand violence
 Doulant le renuerser son fort dard luy esclance,
 Et l'autre en mesme temps vient à luy, l'atteignant
 A l'endroit du genouil: le genouil va saignant,

Et du cruel crochet la piece est emportee.
Mais l'os n'est offencé, car la beste irritée
Donna obliquement. Mais le coup qu'eslancea
Le fort bras d'Ulysses le sanglier transpercea.
Il le prit iustement dedans l'épaule dextre
Et de l'autre costé on vid le fer parestre.
Soubs le pesant du coup l'animal fit le saut,
En sanglant à la poudre, & tumba de son haut,
Et l'ame s'enuola. Alors toute la troupe
Court deuers Ulysses, & le sang luy estouppe,
Les fils d'Autolychus sont bien embesognez:
On leur auoit des vers autresfois enseigner
Pour estancher le sang, ils prononcent des carmes,
Et le sang noir s'arreste au murmure des charmes.
Puis ils bandent la playe & s'en vont vistement
Pour gagner le logis, où tres-sogneusement
Le pere & les enfans sa blesseure penseront
Tant qu'il fust tout guery, puis le recompenserent
De tres-riches presens dont ils luy firent don
Le renuoyant ioyeux iusques dans sa maison.
Lors son pere & sa mere à grand plaisir le virent
De retour en Ithaque, & fort se reiouirent
De le voir reschappé, s'enquerans instamment
Comment il fut blessé: Luy fort pertinemment
Leur rend conte de tout, & qu'allant à la chasse
Auec les fils du Roy sur le mont de Parnasse,
Après qu'il eut sur luy son espieu eslancé
Le porc de son crochet l'auoit ainsi blessé.

La vieille donc lauant & nettoyant Ulysses
Taste dessous ses doigts la dure cicatrice,
Et la recognoissant le pié luy eschappa
Qu'elle tenoit pour lors. Le pié cheut, & frappa

LE XIX. LIVRE

La chaudiere en tumbant, qui du grand coup resonne
L'eau s'espand par terre, & elle qui s'estonne
Chet de l'autre costé: la pitié, le plaisir
Luy sautent lors au cœur, & la viennent saisir,
Ses yeux sont tous en pleur: lors la barbe & la face
Luy touche doucement, luy va dire en vois basse
Par ce qu'elle craignoit encor de le toucher,
Et desiroit de luy au plus pres s'aprocher.

Pour vray, mon cher enfant, tu es mon maistre Ulysse,
Et ie n'ay peu de toy plustost auoir notice,
Que ie n'aye mon Roy manié tout par tout.
Puis regardant la Reyne estant vers l'autre bout
Assise dans sa chaire, elle luy faisoit signe,
Que chez elle elle auoit son Roy, son prince insigne,
Son mary, désiré. Mais elle ne put pas
Iamais s'en aduiser, à cause que Pallas
Ailleurs luy destourna les yeux & la pensée
Sur elle Ulysse court, d'une main aduancee
La saisit au gozier, de l'autre rudement
La tire deuers luy & luy dit bassement.

Me veux tu ruyner, ô nourrice fidelle?
C'est toy qui m'as donné autresfois la mammelle
Voicy ton nourrisson qui a tant eu de maux,
Patit tant de douleurs, courut tant de travaux:
Me voicy de retour sur la vintiesme année
En ma douce maison: or puis que fortunée
Tu as ce bien des Dieux de m'auoir recogneu,
Que nul ne scache icy que ie suis reuenu,
Encor de quelque temps, tay toy ie te supplie
Et ne mets en danger par ta faute ma vie.
Aussi ie te promets, & ie te le tiendray,
Lors qu'assisté de Dieu mon glain ie tiendray

Au sang des poursuiuans, & mes mains vangeresses
Feront le chastiment des seruantes traistresses
Qui gastent ma maison, tu ne tumberas pas
(Car tu es ma nourrice) au violent trepas
Où les autres cherront. Et la nourrice sage.

O mon fils, qu'as tu dit? & quel est ce langage
Quit'eschappe des dents? Tu scais que de tout temps
Mes esprits ont esté solides & constans
Et nont point vacillé. N'ayes doute ne crainte,
Ie tiendray dans mon cœur ton entreprise empreinte,
Plus ferme que le roc, plus forte que le fer
Alors que Dieu aussi te donnent d'estouffer
Ces mechans poursuiuans sous tes mains vengeresses,
Ie te declareray les folles & traistresses
Des femmes de ceans, & dont la trahison
Salit honteusement l'honneur de ta maison.

Sur ce luy respondit le tres-prudent Ulysse,
Il n'est pas de besoin, ma fidelle nourrice
Que tu faces cela, ie les scauray fort bien
Cognoistre & remarquer toutes en moins de rien,
Mais t'ay toy seulement, & laisse tout le reste
Conduire & gouverner à la troupe celeste.

Il dit & la nourrice accourt diligemment
Pour rapporter de l'eau, car l'autre entierement
Estoit tumbée abas: l'ayant donques habile
Laué & nettoyé, & de preieuse huile
Oint pour le raffermir, Ulysse peu à peu
Tire une chaire à soy, & s'aproche du feu
Afin de se chauffer, couurant sa cicatrice.

Cela faict Penelope attaque encor Ulysse
Ie veux encore un peu, mon hoste, te parler,
Car l'heure aprouchera bien tost de s'en aller

LE XIX. LIVRE

Reposer, pour ceux là qui en auront enuie,
 Et qui peuvent dormir. Mais, las! la fascherie,
 Les ennuis, les tourmens, que me donnent les Dieux,
 Ne me laissent iamaïs clorre au sommeil les yeux
 Pour le iour i'ay encor quelque peu de relasche
 De l'ennuy, qui toujours me poursuit & me fasche,
 Regardant mon ménage, & m'occupant à voir
 Si mes femmes ceans font toutes leur deuoir
 Mais mon mal est la nuit lors que chacun sommeille,
 Car ie suis en mon lit où ie resue, ie veille,
 Ruynant mon esprit de cogitations
 Qui redoublent tant plus mes persecutions,
 Ie me pers en regrets où mon ame s'egare,
 De la mesme façon que la fille à Pandare
 Lamente son destin, rememore ses pleurs,
 Lors que le renouveau espanoit les fleurs,
 Et peint les beaux iardins de violettes franches,
 La pauurete appuyee au ramage des branches
 Pleure son cher Ityl, fils de l'acouplement
 D'elle & du Roy Zethes, qu'helas trop follement
 Elle mit à la mort. Ainsi mes pleints i'eslance,
 Continuellement, & mon ame balance
 Sans resolution: ie ne scay si ie doy
 Tousiours viure ceans, & mon fils avec moy
 Sans me remarier, gouvernant mon mesnage
 Mes femmes & mon train, gardant mon lit, seul gaige
 De mon pauare mary, ne donnant à parler
 A ce peuple de moy, où bien de m'en aller,
 Et de prendre à mary de ces princes de Grece
 Celuy qui plus aura de biens & de richesse
 Qui plus croistra mon dot, comme il y en a tant
 Qui me vont de grans biens offrant & promettant

Or quand mon fils estoit encor ieune & volage
Ne me vouloit ouir parler de mariage
En facon que ce fust, ne laisser la maison,
Mais asteure qu'il a plus d'aage & de raison
Il seroit bien content que ie me mariasse,
Sa volonte seroit que ie me retirasse,
Irrité, que ces gens si desordonnement
Vont tout son reuenu perdant & consumant.

Mais ie te prie encor qu'un songe ie te die
Que i'ay faict, si ton cœur scait ce qu'il signifie.
Vingt oyes que i'auois mangeoit mon beau forment
Puis beuuoient à souhait. I'auois extremement
Du plaisir à les voir, lors que de la montagne
Voicy venir un aigle & fondre en la campagne,
Et de son bec crochu donner de si grands coups
A ces pauvres oyseaux, qu'il les massacra tous.
Ie les voyois épars ça & là par la place
Et blessés & sanglants : l'aigle de grande audace
Refit sa pointe en l'air. Ie me deconfortois
Ce me sembloit en songe, & fort me lamentois
Et tout autour de moy des princesses de Grece
Aux blonds dorez cheueux, consoloient ma tristesse
Quand voicy reuenir l'aigle aux cerceaux dispoits
Qui sur le toit se perche & metint ces propos.

Noble fille d'Icare, esconte, & pren courage,
Tout ce que tu as veu n'est qu'à ton aduantage
Ces songes ne sont point n'y vains n'y deceuans,
Car ces oyes ne sont rien que les poursuiuans,
Et moy que tu as veu estre aigle, suis asteure
Ton mary de retour, qui dou ray sans demeure
La mort à tous ces gens, ayant dit, il cessa
Et tout incontinent le songe me laissa.

LE XIX. LIVRE

Puis regardant soudain, ie vy mes oyes boire,
Et comme au parauant manger à la mangeoire.

A laquelle Vlysses, il ne faut nullement
Ton songe deguiser, ny le tordre autrement
Qu'à ce qu'il signifie, Vlysses sans mensonge,
O Reyne, t'a luy mesme interpreté ton songe,
Car tous ces poursuiuans à mort il frapera
Et nul de tant qu'ils sont ses mains n'eschappera.

Mais mon hoste tres-cher, luy dit Penelopee,
Souuent nostre pensee aux songes est trompee,
On n'en peut que iuger fort incertainement,
Et tousiours leurs effects viennent douteusement
Deux portes il ya, comme on nous fait acroire,
Aux songes incertains, d'elles l'une est d'inoire
L'autre de corne claire, or le songe qui sort
Par la porte d'inoire onc ne vient à bon port,
Et toujours son issue est frustratoire & morne.
Mais celuy qui prouient de la porte de corne,
Tout ce que l'homme a peu partant de luy songer
Est tousiours veritable & iamais mensonger.
Mais le mien que ie croy n'est pas de ceste sorte,
Dieu vueille qu'à mon fils & à moy il aporte
Allegeance à nos maux. Mais ie te veux à toy
Dire encor vne chose, & ie te prie oy moy.
Quand le funeste iour & noircy de tristesse
Infame aprochera, quil faudra que ie laisse
La maison d'Vlysses, voicy que ie feray
Vn certain exercice en auant ie metray
Douze haches ceans mon mary m'a laissees
Qu'il auoit iustement par la hampe percees
Fort pres les arrangeant, puis son arc enfonceant
Par les trous il alloit droit les fleches passant

Or il faut que ce ieu en auant ie leur mette,
Qui pourra bander l'arc & passer la saiette
Des boucles au trauers, c'est celuy qui m'aura;
C'est luy que ie suiuray, & qui m'espousera,
C'est celuy pour lequel il faudra que ie laisse
Ceste douce maison, où ie vins en ieunesse
Belle, & pleine de biens plus ie vay en auant
Me semble que ie songe & que ie vay resuant.

O femme luy dit il, du Laërtide Vlysse
Non ne differe plus ce ieu, cest exercice,
Car tu veras plustost ton mary de retour
Qu'ils n'auront bandé l'arc, & passé par le iour
Des pertuis arrangez, la volante saiette.

A qui Penelopé, de parole discrète,
Iamais ne me viendroit desir de sommeiller,
Si c'estoit ton plaisir en parlant, de vieillir,
Mon hoste, tant ie prens vn plaisir indicible
A t'ouir discourir: mais il est impossible
Au mortel, de vieillir continuellement
Il n'y pourroit suffir: & les Dieux mesmement
Ont ce soulagement donné aux pauvres hommes:
Coupons donques icy le discours où nous sommes,
Ie m'en vois en mon lit là haut me retirer:
Où certes ie ne fais que tousiours soupirer
Et rengreger mes pleurs, des le iour lamentable
Qu'Vlysses s'en alla à Troye non nommable,
Pour toy demeure icy, dors comme il te plaira,
A terre, où si tu veux vn lit on te fera.

Ce disant, elle monte en sa chambre tres-belle,
Et mainte belle fille en hant marche apres elle
Comme elle fut montee aussi tost se coucha,
Et soudain le regret d'Vlysses la toucha

LE XIX. LIVRE DE L'ODYSSÉE.

*Si qu'elle se sent fondre en une mer de larmes,
Pleurant, tant que Pallas la deesse des armes
Prenant d'elle pitié, le sommeil enuoya,
Et les yeux de la Reyne en son charme noya.*

Fin du dixneuvième liure.

LE VINGTIESME.



LE VINGTIESME LIVRE DE L'ODYSSEE D'HOMERE.

ARGUMENT.

Ulysses est en doute s'il doit tuer sur le champ les servantes qui ribaudoient avec les poursuivans. Il se retient. Jupiter le confirme en sa résolution de mettre à mort les poursuivans & ce par le tonnerre. Les propos de luy avec Eumæus & Philætius son maître bouvier. Les poursuivans redeliberent de tuer Telemachus. Ils en sont destournez par Amphinomus. Theoclymenus leur predit leur mort.

AUTRE SOMMAIRE.

*Jupiter le confirme en tonnant quand il sort.
Theoclymen predit aux poursuivans leur mort.*

Mais le sage Ulysses se couche sur la porte,
Se iette sur le cuir d'un bœuf qu'on luy apporte,
Puis se couvre des peaux des montons que les Grecs

*Qui pourchassoient sa femme avoient tuez de frais
Et Eurynome encor de peur de la froidure
Mit sur luy force robe & force couverture*

M m

LE XX. LIVRE

Là gisoit Ulysses machinant en son cœur
 Sans pouuoir fermer l'œil, & vengeance & malheur.
 Or comme il reuassoit il vid sortir les femmes
 Qui dedans sa maison faisoient actes infames
 Avec les poursuiuans, qui ça & la trottoient,
 Se donnoient du bon temps & de rire eclatoient.
 Il pensa forcener, & estoit sa pensee
 De cogitations estranges balancee,
 Si s'eleuant dela, il les estrangleroit
 Toutes l'une apres l'autre, ou s'il les laisseroit
 Achener iusqu'au bout leur saleté immonde.
 Et son cœur la dedans, fremit, grommelle, gronde
 De la mesme façon va la chienne iappant
 A l'entour de ses chiens, quand le bruit va frappant
 Ses oreilles au guet, car la craintive beste
 De peur qu'on ne les prenne, à combattre s'apreste:
 Ainsi sent il dans soy bourdonner son courroux
 Pour ces actes mechants, puis frapant de grands coups
 Contre son estomac, il se reprend luy mesme.
 Patient, Ulysses, domte ton ire extremes,
 Ton cœur plus que cecy autresfois endura
 Quand le cruel Cyclopes tes amis deuora:
 Bien te fit mal au cœur sa sanglante arrogance,
 Mais tu patientas, tant que par ta prudence
 Tu sortis du danger, qui sans doute t'alloit
 Exposer à la mort. Ainsi donc il parloit
 Reprenant son courroux, toutesfois le courage
 Sans cesse la dedans luy bouillonne de rage.
 Comme vn qui veut griller sur les charbons ardans
 Vn boyau plein de gresse & de sang au dedans
 Le tourne incessamment & de costé & d'autre,
 Luy tardant qu'il soit cuit, Ulysses ainsi se veautre

Tantost ça tantost là, rumine dessus tout
Le moyen quil tiendra pour seul venir à bout
De tous ses ennemis. Estant en ceste peine
Minerve descendit de la voute hautaine
Et se presente à luy, de face & vestement
Quelque femme d'alors semblant entierement,
Puis pres de son cheuet luy parle favorable.

Que t'affliges tu tant, ô le plus miserable
De tous les malheureux ? la maison que voicy
N'est elle pas à toy ? N'est-ce ta femme aussi
Celle qui est ceans ? & ton fils tel en somme
Que le pourroit iamaïs souhaitter aucun homme ?

A laquelle Ulysses, ô diuine Pallas
Ce que tu dis est vray : mais ie ne laisse pas
D'estre en peine pourtant, comme il sera possible
Que ie combatte seul ceste trouppennuisible
D'impudens poursuiuans, & qui sont mesmement
Tous ensemble toujours. Ie songe encor comment
Et où i'eschapperay, si contre ton enuie
Et du grand Iupiter ie leur oste la vie,
Di-le moy ie te pry. Chetif & malheureux,
Luy respond brusquement la deesse aux vers yeux,
L'amy pour son amy continuellement veille,
Et bien qu'il ne le vaille encore le conseille,
Et moy qui suis deesse, ay ordinairement
Soin de tes actions, n'auray le iugement,
De te bien conseiller ? Or si cinquante armées
De langage diuers contre nous animees
Nous venoient assaillir pour nous donner la mort,
Toutesfois avec moy tu serois assez fort
Pour leur donner la chasse, & maugré eux encores
Enleuer leur brebis & leurs beufs & leurs stores

LE XX. LIVRE

Dors donc tant seulement & chasse toute peur.
Tu sortiras bien tost de tout ta douleur.

Elle dit, & soudain vne pesanteur douce,
Luy donne de dormir, puis dans le ciel se pousse.
Ainsi donc Ulysses doucement sommeilloit,
Mais de l'autre costé Penelopé veilloit
Son mary regrettant, & regrettant sans cesse.
Mais lasse de pleurer, voicy qu'elle s'adresse
A Diane soudain fille de Iupiter,
Dit elle, te pleust il presentement m'oster
La vie avec ton arc, fichant dans mes mammelles
Les coups plus dangereux de tes fleches mortelles,
Ou bien qu'un tourbillon soufflant cruellement
Me brandisse dans l'air, me pousse viftement
Et sans nulle pitié, dans les bouches hideuses,
Et parmy les courants des grands mers écumeuses,
Comme firent iadis les torrents furieux
Les filles de Pandare & noyerent les Dieux
Et leur pere & leur mere es creux des eaux marines.
Les pauvretes, helas resterent orfelines.
Venus finalement compassion en prit,
Et de lait & de miel & de vin les nourrit,
Et Iunon les voulut douer par excellence
Sur les femmes d'alors de beauté & prudence,
Diane la grandeur, la taille leur donna,
Et Pallas au mestier d'ouurer les façonna
Toute sorte d'ouurage. Apres Venus la blonde
Vole vers Iupiter, dont le foudre qui gronde
Arme la forte main, voulant les marier
Et selon leur merite & gloire apparier,
Et de faict grandement son pere en importune,
(Luy qui cognoist la bonne & mauuaise fortune

Et ce qui doit venir aux malheureux humains)
 Mais comme elle estoit là, les odieuses mains
 Des harpies desia les luy auoient rauies,
 Les donnans pour seruir aux infames furies
 Me puisse perdre ainsi le plaisir des grands Dieux,
 Ou Diane la belle aux ondoyans cheueux
 Tire sur moy son arc, & sa fleche m'enferme,
 Afin que tant plustost ie descende sous terre
 Pour voir mon Vlysses, & qu'ô cruel ennuy,
 Je ne sois mariee à un pire que luy,
 Et ie ne reiouisse un homme haïssable.

Encor est ce à quelcun un malheur suportable
 Quand il n'a que le iour pour ses yeux arroser,
 Et que la nuit au moins il se peut reposer
 Quand le sommeil le prend, sommeil qui rend passées
 Les incommoditez aux humains pensees
 Et leur faict oublier le bien semblablement.

Mais ie ne puis dormir la nuit aucunement,
 Et quelque mauuais ange encor ma tourmentee,
 Ceste nuit en songeant, quand il m'a presentee
 L'Image d'Ulysses mon espoux & mon Roy,
 Et si là faict coucher me semble aupres de moy,
 Tel qu'il estoit au temps quil alla contre Troye.
 Mon ame ce pendant en a eu quelque ioye,
 Et n'eusse iamais dit que c'eust esté le vain
 D'un songe deceuable, ains l'effect tout certain.

Elle acheuoit de dire, & l'aube matiniere
 Dessus le mesme instant commença sa carriere,
 Et le diuin Vlysse ouyt d'où il estoit
 De sa femme la vois, comme elle l'amentoit
 Laquelle il recogneut, & la pensa si preste
 Qu'il la cuydoit ouir au dessus de sa teste.

LE XX. LIVRE

Lors il prend sa couuerte & tout ensemblement
Les peaux où il dormoit, les pose bellement
Sur un siege au dedans, sort dehors, & emporte
La peau de beuf, puis prie au ciel en ceste sorte.

O pere Iupiter, si ie suis raporté
En ma chere maison par vostre volonté
Si vostre deité me ramene & me guide
Dessus ce mien terroir & aride & humide
Après m'auoir batu de beaucoup d'accidens,
Je vous pry que quelcun de mes gens au dedans
M'enuoye maintenant un mot à la rencontre
Et Iupiter dehors quelque signe me monstre.

Il dit, & Iupiter favorable l'ouit,
Et d'un signe du ciel soudain le reioit,
Tonnant de la nuee & transparente & haute
Du costé de dedans n'y eut non plus de fante,
Car il ouyt la voix d'une femme meulant,
Sur le froment & l'orge incessamment roulant
La pierre écrase grains (car le grand capitaine
Les gens, & leur pasteur, auoit une douzaine
De femmes la dedans qui sans repos rouloient
La meule sur le grain, & le froment meuloient
Qui les hommes nourrit de la moëlle douce)
Les autres s'endormoient, elle qui toujours pousse
A l'espaule le roc, n'auoit encor laissé
La besogne pour tant, mais son bras fut lassé
Et deuint foible en fin, si bien qu'elle s'arreste
Et pour signe à son Roy eut la parole preste.

Iupiter, ce dit elle, ayant absolument
Sur les hommes & Dieux entier commandement,
I'ay ouy de ton ciel bourdonner ton tonnerre,
Et ne voy nulle nue, or accompli en terre

Ce signe de là haut, exauce quand & quand
 Cela dont ie te vois miserable inuoquant
 Que ce soit auiourdhuy la derniere iournee
 Que la bande insolente & trop desordonnee
 De ces fiers poursuiuans, continue l'exces
 De leurs debordemens au palais d'Vlysses:
 A leur occasion & genoux & iointures
 Me sont tous delouez, tournant ces meules dures,
 Que donques auiourdhuy soit leur dernier repas.

Elle dit, & Vlysse en fit vn fort grand cas,
 Et du tonnerre aussi, car ce fut du carnage
 Qu'il deuoit faire d'eux le signe & le presage,
 Des seruantes le reste aussi tost accouroit
 Et rallumoit par tout le feu qui se mouroit,
 Qui fit que Telemaque & se leue & s'abilie,
 En iettant dessus luy sa vesture gentille,
 Son espee au costé puis apres il pendit,
 Mit ses souliers aux pieds, dedans sa main brandit
 Son puissant iauelot à la pointe affilee,
 Puis descendu à bas il dit à Euriclee.

Nourrice, a t'on eu soing de ce pauvre estrange
 La t'on accommodé, là ton bien faict manger,
 Luy a t'on faict vn lict? on tient fort peu de conte
 De luy s'ay ie grand peur, on denst mourir de honte:
 Ma mere, bien que sage en ce pendant n'a pas
 Consideration, car elle fera cas
 Du premier malotru, qui se dit & se nomme
 Estre venu de loing, & de cest honnestes homme
 Qui vaut mieux luy tout seul, que mille qui viendront
 Ils le laisseront là & conte n'en tiendront.

Auquel Euryclea sage & discrete femme
 Ie n'en scaurois donner à ta mere aucun blasme,

LE XX. LIVRE

On la faict à son gré bien boire & bien manger,
Et puis on l'a voulu nettement rechanger
Et d'abits & de liect, par le mandement mesme
De ta mere, mais luy en son malheur extremes
Comme estant de tout point pauvre & infortuné
N'a point voulu de liect, mais on luy a donné
Pour liect un cuir de beuf, & pour sa couverture
Force peaux de brebis pour chasser la froidure:
Il a voulu coucher sur la porte au surplus,
Et on luy a ietté des vestemens dessus.

Quand elle eut acheué, Telemachus sort viste
Dehors, son dard en main, ses chiens suivent sa piste,
Et luy s'en va soudain le conseil assembler.
Euryclea se mit de rechef à parler
Et leur disoit ainsi: femmes, que l'on s'avance,
Les vnes baloyez la sale en diligence,
Et toute la maison, nettoyez, fourbissez,
Et les riches tapis sur le siege dressez:
Les autres frotez bien des sponges les tables,
Escurez bien les pots & tasses delectables:
D'autres allez à l'eau, courez diligemment
Iusques à la fontaine, & faictes vistement.
Car les beaux poursuiuans ne tarderont plus guere
De se trouuer icy pour faire bonne chere,
On leur faict aujourdhuy le general festin.

Elle n'auoit pas dit qu'elles font tout soudain
Ce qu'elle commandoit, vingt vont à la fontaine
Pour apporter de l'eau, les autres prennent peine
D'accommoder bien tout. Les poursuiuans apres
S'en viennent à la file & se suivent de pres:
Les vallets aussi tost vont au bois & le fendent,
Et les femmes de l'eau en la maison se rendent,

Le porcher vient aussi, amenant trois pourceaux
De tous ceux qu'il gardoit les plus gras & plus beaux
Et voyant Ulysses doucement luy demande:
Et bien, mon cher amy, ceste arrogante bande
De poursuiuans cruels, te void elle toujours
D'un regard de trauers, & fascheux & rebours?
Te disent ils toujours & reproche & conuice.

Que ie prie aux bons Dieux, luy respondit Ulysse,
Eumæe mon amy, qu'ils vengent vistement
L'outrage que ces gens font tant insollement
En la maison d'autrui, leur facent rendre conte
Des rauages qu'ils font sans respect & sans honte
Ils disoient, & quasi ne faisoient qu'acheuer,
Qu'ils virent le cheurier Melanthie arriuer,
Amenant avec soy des cheures des plus belles,
Et en gresse & valeur surpassants toutes celles
Qu'il eust en ses troupeaux, deux garçons le suiuan
Les touchoient, pour tuer, & que les poursuiuan
En peussent ce iour là souler leur faim gloutonne.
Il les attache donc au portal qui resonne,
Et voyant Ulysses en colere il se mit,
Et mots iniurieux & reproches luy dit,
Te voicy donc encore ô coureur miserable,
Ne cesseras tu point d'importuner la table
Des seigneurs que voicy, & troubler leur repas.
Ne nous lairras tu point? ne sortiras tu pas?
Nous ne serons long temps sans user de main mise
Si nous ne nous laissons: grande est ta gourmandise,
Et tu vas demandant trop irreuerement.
On donne ailleurs qu'icy, on mange abondamment
Chez les autres de Grece. A ceste outre-cuidance
Ulysses ne dit mot, & garda le silence:

LE XX. LIVRE

Il hochoit seulement la teste. & réuassoit
 Comme il s'en vengeroit. Alors qu'il apperçoit
 Venir pour le troisieme un homme venerable
 C'estoit Philatius le bouvier amiable.
 Une tore sterile il auoit faiet charger,
 Et des Cheures encor, c'estoit pour le manger
 Des poursuinans aussi: (les gens du pautonnage
 Qui donnent sur les eaux aux autres le passage
 Les amenerent là,) il attach'a aussi
 Son bestail au portal, & puis s'enquit ainsi
 Au porcher d'Ulysses. Eumæ, qui est cet hoste
 Qui a nouuellement pris pied en ceste coste,
 Et est logé ceans? De quelle nation,
 Dit-il, estre, & où est son habitation?
 De quelle race est-il? Certes tout miserable
 Qu'on le void, si a-t'il d'un Prince venerable
 Le port & la façon. Mais les Dieux tout puissans
 Vont souz de grands malheurs les hommes terrassans,
 Renuersent les humains, & n'espargnent pas mesmes
 Les Rois, leur ourdissans des miseres extremes.
 Si dit Philatius, puis luy tendant la main
 Et le vint saluer d'un parler fort humain.
 Tu sois le bien venu, Dieu te gard ô bon pere,
 Te soit d'oresnauant la fortune prospere
 Auec plus de moyens, pource que maintenant
 La misere & le mal te vont fort talonnant.
 Certes, ô Iupiter, ie suis contrainct de dire
 Que tu regnes là hault de tous les Dieu le pere:
 Tu n'as nulle pitié des debiles humains
 Que tu as engendrez, leur versant de tes mains
 Miseres & douleurs. Quand ie te considere
 Ie ne me puis tenir de respandre, mon pere,

*Infinité de pleurs, en me ressouvenant
De mon Prince Ulysses. Peut estre maintenant
Est-il ainsi que toy vagabond, miserable,
Et portant dessus soy un vestement semblable,
S'il vit encore, au moins, du Soleil iouyssant:
Mais s'il est descendu souz l'enfer passissant,
Helas, moy malheureux de viure apres Ulysse,
Luy qui petit enfant me prit, à son seruice
Me tira du pays des Cephaliens,
Me commit sur ses bœufs, & sur ses autres biens,
Dont le tout tant prospere & en telle abondance
Ses troupeaux large front viennent en accroissance
Que l'on ne les scauroit ailleurs mieux desirer.
Mais d'autres maintenant les viennent deuorer,
Me forcent d'emmener mes bestes d'ordinaire
Pour leur couper la gorge, & leurs banquets en faire:
Ils méprisent son fils, & les audacieux
Mesmes ne craignent point les puissances des Cieux,
Mangeans iournellement & destruisant sans cesse
D'un Roy, long temps absent le bien & la richesse.
I'ay resué fort long temps en mon entendement
Si ie deuois d'icy m'oster entierement,
Et cherchant autre part condition meilleure
Abandonner ma charge auant que son fils meure,
Bien que ce fust malfaiet, & ailleurs me ranger
Où ie ne peusse point courir vn tel danger
En gardant les troupeaux en lieu plus fauorable.
Car ie voy ceste Court du tout intollerable,
Et l'eusse desia faiet, n'estoit que i'ay tousiours
Espoir qu'il reuiendra encores quelque iour,
Qu'il fera de ces gens exemplaire vengeance,
Et se ressentira de leur outrecuidance.*

LE XX LIVRE

*Ulysses à ces mots. Je cognois que tu n'es
Mal aduisé d'esprit ny de propos mauuais,
Mais plustost que tu as iugement & prudence.
C'est pourquoy ie te dy & te iure, en presence
Du puissant Iupiter le principal des Dieux,
La table hospitaliere & les propices lieux,
La maison d'Ulysses, son palais tutelaire,
Auquel on m'a receu d'accueil si debonnaire,
Certes en ta presence Ulysses reuiendra,
Dans le sang de ces gens son espee il teindra,
De tes yeux, si tu veux, tu le verras toy-mesme:
Croy-le, ie le te iure en mon serment supresme.*

*Alors Philatius: Dieu te vneille exaucer
Mon hoste mon amy, certes tu peux penser
Comme tout s'ensuiuroit de cœur & d'assurance,
En ce qui dependroit de mon peu de puissance.
Le porcher promettoit qu'il feroit son deuoir,
Prians Dieu que bien tost Ulysses pust reuoir
Sa maison en bonheur. Et tandis qu'ils deuinent
Les poursuyuans ailleurs conspirent & machinent
La mort à Telemaque, & sur ce pensement
Un Aigle vint à eux volant hastiuement
A gauche dans le Ciel, & l'oiseau du tonnerre
Tenoit estroittement un pigeon en sa serre.*

*Alors Amphinomus. Ce que vous conspirez
Nereussira pas, soyeZ en assureZ.
Laissons donc ce dessein, & nous en allons boire.*

*Il dit, & un chacun fut d'aduis de le croire
Et suiure son conseil. S'estans doncques leueZ
Ils viennent au chasteau, où estans arriveZ
Ils iettent vistemment leurs manteaux sur les chaises,
Et sur les riches lits se mettent à leurs aises,*

Puis s'en vont égorger & Cheures & pourceaux,
La tore & les montons, leur dépouillent les peaux,
Grillent sur les charbons par pieces la ventraille,
Versent le vin és pots, que le porcher leur baille,
Sur la table seruoit le pain Philétius,
Et le vin puis apres versoit Melanthius.
Eux se sont mis à table, & les mains ont iettees
Sur les plats, où estoient les viandes apprestees:
Lors que Telemachus à part soy meditant
Moyen de les surprendre, & leur mort complotant,
Fit asseoir Ulysses au dedans de la salle,
Mais dessus les carreaux & sur vn siege sale:
Puis il luy fit porter sur vne table à part
Petite, & pour luy seul sa portion, sa part
De ce qui estoit cuit, & d'or vne grand' coupe
Luy fit emplir de vin, deuant toute la troupe,
Et luy parla ainsi: Or va t'asseoir, & boy
Auec la compagnie, & t'assure sur moy
Que qui entreprendra de t'outrager, & faire
Ne tort ne deplaisir m'aura pour aduersaire,
Ie m'y opposeray: Cecy n'est nullement
Une maison publique, elle est entierement
A mon pere Ulysses, & il me l'a bastie.
Vous doncques, poursuiuans, retenez, ie vous prie,
Vos langues & vos mains, que nous n'ayons icy
Question entre nous. Il leur parloit ainsi.
Eux se mordoient la leure, & fremissoient de rage
Dequoy Telemachus parloit d'un tel courage,
Et s'en estonnoient fort, en leur cœur dépité
Alors Antinoüs qui fut fils d'Epithé.
Tolerons, leur dit-il, ô Princes de la Grece,
Ce beau Telemachus, & ses mots de rudesse,

LE XX. LIVRE

Vous oyez, vous voyez qu'il nous menace fort,
 Mais il y a long temps qu'il deuroit estre mort,
 Pas ne nous l'a permis le hault fils de Saturne.
 Il est beau harangueur, mais il nous importune:
 Si dit Antinous, mais le prince gentil
 Ne se soucia pas beaucoup de son babil,
 Et desia les Heraults conduisoient par la ville
 L'hecatombe sacree, & l'assemblee habile
 Des Grecs aux longs cheueux s'assembloit ce-pendant
 Dedans le bois sacré d'Apollon loing-dardant:
 Où apres que les chairs furent tresbien rosties,
 Et qu'ils les eurent bien en pieces departies.
 Le conuine fut fait fort magnifiquement,
 Et ceux qui les seruoient porterent gentiment
 A Ulysses sa part, & semblable & egale
 Aux autres portions de la troupe Royale;
 Car Telemach' ainsi leur auoit commandé.
 Or Pallas ne vouloit que leur train débordé
 En rien diminuast, que plus sages deuinsent,
 Et non plus que deuant leurs outrages retinsent,
 Afin de tant plus fort irriter Ulysses,
 Et rendre de tant plus odieux leurs excès.
 Entr'eux donc conuersoit vne homme incompatible;
 Hautain, ontrecuidé, & superbe au possible,
 Ctesippe estoit son nom, de Samos il venoit,
 Et pource que son pere estoit riche, il tenoit
 Tant de luy, qu'il osa entrer en la poursuite
 De la femme d'Ulyse estant pour lors en fuite,
 Et depuis tant de temps. Il leur dit donc ainsi.
 Oyez moy Princes Grecs qui banquetez icy,
 Desia cet honneste homme a eu sa part egale
 Aux autres portions de la troupe Royale;

De l'en aller frustrer ce n'est pas la raison,
Ny de rien arracher à ceux qu'en sa maison
Telemaque a receus : c'est chose intollerable.
Or luy veux-ie enuoyer un present honorable
Et d'hospitalité, qui viendra de ma main,
Pour donner au garson qui appreste le bain,
Ou auquel qu'il voudra de ceux qui font seruice,
Et qui sont demeurans en la maison d'Ulysse.

Il prit un pied de bœuf, ce disant, qu'i losta
De dedans le panier, tant qu'il put, luy ietta,
Ulysses appercent venir ceste tempeste,
Et le coup euit a baissant un peu la teste:
Riant ce-temps pendant d'un ris sardonien,
Le pied de bœuf, frappa le paroy ancien.

A donc Telemachus luy parla de menace:
Bient'a pris Ctesippus, Dieu t'a fait belle grace
Que tu ne l'as atteint, que ton coup a passé,
Ie t'eusse sans faillir de mon dard transpercé,
La nopce t'eust esté fort triste & fort amere,
Au lieu d'elle, un tombeau ceans t'eust fait mon pere.
Qu'on ne me face plus ces insolences là,
Ie veux bien qu'on le sçache, & tous ceux que voila
Ceans en ma maison. I'ay aage & cognoissance,
Ie ne suis plus enfant, i'ay prou de suffisance
Pour sçauoir discerner le mal d'auéc le bien.
Ie me lasse de voir ainsi manger mon bien,
I'ay souffert iusque icy, comme à la boucherie
Escorcher mes troupeaux, i'ay veu la mangerie
Qu'on a fait de mes bleds, on a ben tout mon vin,
Car un seul contretant resisteroit en vain.
Mais faites mieux pour moy, n'usez plus de menace,
Et ne me brauez plus. Que si quelqu'un pourchasse

LE XX. LIVRE

Ma mort, donnez la moy, desia ie le voudrois;
Et me seroit meilleur de mourir vne fois
Que de voir plus chez moy ces actes tant infames;
Oustrager mes amis, & villener les femmes
D'une honneste maison. Ces propos il disoit
De grande affection, & chacun se taisoit.
En fin Agelaüs vint rompre le silence.

Que personne, messieurs ie vous pri', ne s'offence
De ce qu'il nous a dit, il a quelque raison:
Il faut certes porter respect à sa maison,
N'oustrager ny ses gens, ny quiconq' se retire
Chez luy à seureté. Mais ie te veux bien dire
À ta mere & à toy vne parole à part,
Prenez la s'il vous plaist de moy en bonne part:
Tandis que vous estiez encor' en esperance
Qu'Ulysses reuerroit sa douce demeure,
Et qu'il retourneroit encor' un iour icy,
N'y auoit nul propos que tous ceux que voicy
S'arrestassent ceans, (estant plus honorable
Qu'il trouuast sa maison en estat conuenable.)
Mais puis que c'est vn poinct certain & assuré
Que son retour s'en va du tout desespéré,
Vat'en trouuer ta mere, & dy luy ie te prie,
Qu'elle sorte de trouble, & qu'elle se marie
À celui d'entre nous qui le plus luy plaira,
Et qui plus de presens & de biens luy fera:
Ce faisant te voila sans fascherie aucune,
Sans quel'on te moleste & quel'on t'importune;
Tu seras seul chez toy, boiras & mangeras
Ton bien, ton reuenu, & te resiouyras,
Et elle s'en ira faire ailleurs le meynage
De celui qui l'aura. A qui le Prince sage.

Je iure,

Je iure, Agelaüs, ô fils de Damnaſtor,
Par le grand Iupiter, par les travaux encor
De mon pere Vlyſſes qui eſt mort, ou qui erre
Aſteure en quel que endroit, loing d'Ithaque ſa terre,
Ie n'empeschera y point de ſe remarier
Ma mere à qui voudra, mais ie l'en vay prier,
Luy dire, & l'en preſſer de toute ma puiffance,
Et meſmes luy feray preſens en abondance.
Mais de l'aller chaffer contre ſa volonté
Ie ne l'oſerois pas, c'eſt un poinct arreſté,
Et Dieu m'en gard' auſſi. Ayant finy de dire
Ils ſe prirent ſoudain tant qu'ils eſtoient à rire,
Si démeſurement qu'ils en eſtoient tous las,
Et hors de leur bon ſens. La Deeſſe Pallas
Les pouſſoit à cela, les mettoit en dérouté,
Et leur troubloit l'eſprit: on euſt penſé ſans doute
A les voir eſclater, qu'ils rioient proprement
Des machoires d'autray, les chairs que goulument
Ils mangeoient, diſtilloient ſur leurs leures ſanglantes,
Leurs yeux eſtoient enſlez de larmes decoulantes,
Semblans prognostiquer leur malheur aduenir.

Lors Theoclymenus ne ſe put plus tenir
Qu'il ne leur diſt ainſi: O pauvres miſerables
Qu'allez vous deuenir? Signes eſpouuentables
D'une funebre nuit vos teſtes vont poiſſant,
Vous ennublent vos yeux, ſonx eux vont tremouſſant
Vos iarreſts, vos genoux, gemiſſemens horribles,
Eſpouuentables cris, & hurlemens terribles
S'entaffent l'un ſur l'autre, & pleurs comme un eſtang
Tombent ſur voſtre barbe, & ja voit-on le ſang
Humeeter les parois & les cloiſons des ſalles:
On ne void ſur le ſeuil que ſimulacres paſſes

LE XX LIVRE

Des ombres de la mort, Erebe noircissant
Et le Soleil du Ciel tombant & ternissant,
Un brouillas plus espais que l'on ne scauroit dire.
Il disoit, & chacun se prit tresfort à rire,
Tenans ce qu'il disoit pour mensonge & abus.
Alors Eurymachus le fils de Polybus,
Ce venu de nouveau radotte, qu'on le prenne,
Qu'on le iette dehors, qu'il voise & se promene
Un peu sur le marché: il parle obscurément,
Et on ne l'entend point, auquel consequemment
Dit Theoclymenus. Pour sortir par la porte,
Non ie n'ay nul besoin que tu me donne escorte,
I'ay bon pied & bon œil, i'ay bonne oreille, & si
Ie ne manque d'esprit pour sortir hors d'icy:
De faict i'en sortiray, car ie voy, ie deuine
Sur tant que vous voicy & malheur & ruine,
Un seul n'eschappera qui face trahison,
Et qui commette excez dedans ceste maison.

Ce disant il s'en sort de la maison muree,
Et s'en alla trouuer incontinent Peiræe,
Qui fort bien le receut. Eux s'entre-regardoient,
Morguoient Telemachus, se rioient, & lardoient
Et ses hostes & luy. Lors vn se prit à dire,
O bon hospitalier, certes voicy le pire
Que tu eusses iamais chez toy pu heberger,
Ce n'est qu'un mort de faim, il ne faict que manger
Et ne se saoule point, sans fin, sans interualle,
Sur le pain, sur le vin il deuore, il aualle,
Poids de terre inutile, vn trotteur, vn coureur,
Et qui ne s'entremet de faire nullabeur.

L'autre contrefaisant l'entendu & le sage:
Si tu me voulois croire, & tel fust ton courage,

Nous les saisissons tous, nous les attacherions
Liez sur une barque, & puis les ennoirions
En Sicile par mer, pource qu'ils le meritent.

Tant qu'ils peuvent, ainsi Telemaque ils irritent,
Mais il n'en faisoit cas, sans plus il regardoit
Attentif à son pere, & tousiours attendoit
Qu'il luy fist le signal de l'heure conuenable
Qu'il se faudroit ruer sur la troupe damnable:

Mais la fille d'Icar pres de la salle estoit,
Et tous ces beaux discours aysement escoutoit
Sur un tres-riche siege. Or ils recommencerent
D'apprester à soupper, & leurs ris rehaussèrent,
Puis se mirent à table, & soulans leur desir
Se mirent à manger, pleins d'extresme plaisir.

Mais onc soupper ne fut de digestion telle
Que leur en apprest la guerriere pucelle:
Et le fort combatant, le diuin Vlysses,
Car ils auoient premiers commencé les excès.

Fin du vingtiesme Liure.



LE VINGT-VNIESME LIVRE
DE L'ODYSSEE D'HOMERE.

ARGUMENT.

Enelopé propose l'exercice de l'arc aux poursuivans, & promet d'espouser celuy qui le parfera. Ils s'y essayent, & n'en peuvent venir a bout. Contention suruiant sur ce qu'Ulysses le demande pour l'essayer. Ce que les poursuivans empeschent, & le menacēt. Telemachus commande à Eumæus de luy porter, Ulysses le prend, le bande, tire & passe la fleche par les trous.

AUTRE SOMMAIRE.

*L'arc est mis en auant à l'amoureuse bande,
Ils y faillent trestous, mais Ulysses le bande.*

R Pallas mit au cœur de la fille d'Icare
La sage Penelope en pudicité rare
D'exposer en auant le rude passe-temps
Du fer clair, & de l'arc mort & perte portās
*Aux Princes amoureux. Elle ne faiēt donc faute
De monter vistement dedans sa chambre haute.
La clef toute d'airain belle & bien faiēte prend,
Dont l'yuoire ouuragé l'agneau plus riche rend:
Ouure le cabinet plus caché, plus derriere,
Où suiure elle se faiēt de mainte chambriere.*

Là du Roy son espoux-estoit tout le tresor,
Le fer elabouré, l'airain, l'argent, & l'or,
Et avec l'arc courbé, le carquois & ses armes
Qui tousiours ont porté douleurs, souspirs, & larmes,
Dons qu'en Lacedemon luy fit auparauant
Par hospitalité luy venant au deuant
L'Emrytide Iphitus aux Dieux d'enhault semblable.
Ils se trouuerent lors par rencontre agreable
En Messene tous deux, tous deux ayans acces
Chez le fort Ortiloch' : Au regard d'Ulysses
Il y estoit allé pourr' auoir vne prise
Dessus vn peuple entier qu'on auoit sur luy prise.
Car les Messeniens dessus les Ithaquois
En courant sur la mer auoient pris vne fois
Quelques trois cens brebis, & les auoient iettees
Auecques les bergers dessus leurs nauys voutees.
Ulysses par son pere & les autres plus vieux,
Auoit pour lors esté delegué deuers eux,
Et tout au mesme instant Iphitus par la pleine
Cerchoit douze iuments dont il estoit en peine,
Et perdues pour luy, avec quelques mulets,
Qui le firent depuis tomber dans les filets
D'une cruelle mort, dès que le miserable
Eut trouué Hercules, le fort, l'inimitable,
Le fils de Iupiter, qui dedans sa maison,
Bien qu'il y fust logé, le tua sans raison.
Miserable qui n'eut en reuerence aucune
Ny la crainte des Dieux, ny la table commune
Où ils auoient mangé tous deux ensemblement,
Qu'il ne le fist pourtant mourir cruellement,
Retenant les iuments, qu'il eut par iniustice.
Ce fut en les cherchant qu'il rencontra Ulysse,

LE XXI. LIVRE

Et luy fit don de l'arc, que le grand Eurytus
 Auparavant porta, & son fils Iphitus
 Luy mort en herita, Ulysse en recompense
 Luy donna une espee & une belle lance,
 Triste commencement d'hospitalier amour
 Commencé entre eux deux, car onc depuis ce iour
 Ensemble ils n'ont mangé: la cause en fut, qu'Alcide
 Le prenint, en tuant Iphitus l'Eurytide,
 Accomparable aux Dieux, qui en Lacedemon
 Au fils de Laërtes de l'arc auoit faict don.
 Le diuin Ulysse en allant à la guerre
 Ne le voulut iamaïs porter hors de sa terre
 Sur ses vaisseaux peïssez, mais il le reseruoit
 Chez luy, pour l'amitié si chere, qu'il auoit
 Portee à son amy. Or la Reyne diuine
 Deuers ce cabinet pour l'auoir s'achemine,
 Monte les escaliers de chesne, que iadis
 Le charpentier expert auoit faits, & polis
 Et tirez à la ligne, auoit taillé l'entree
 Et le seuil, & dedans la porte auoit encree.
 La boucle du cordon délia promptement,
 Mit la clef dans le trou, & branlant bellement
 La forte porte ouurit, qui fremit & qui crie
 De mesme qu'un Toreau paissant par la prairie.
 De la mesme façon la porte resonna,
 Aussi tost que la clef dans le ressort tourna,
 Et fut soudain ouuerte, & la Reyne fut prompte
 D'y entrer aussi tost, & quant & quant s'en monte
 Sur les entablemens, où maints coffres estoient,
 Et dedans les habits qui le musque sentoient.
 Puis estendant la main du rattelier arrache
 Le bel arc, & d'aupres la trouffe elle détache

Luisante extremement, & s'asseant tout doux
Pleurant amerement, les mit sur ses genoux.
Quand elle vid qu'elle eut pleuré sa suffisance
Elle prit l'arc du Roy & le reste, & s'aduança
Deuers les poursuiuans, entre ses mains tenant
Et l'arc & le carquois les fleches contenant
En grande quantité, & portoient apres elle
Les femmes du logis la cassete bien belle,
Où le cuyure luisant, & le clair fer estoit
Et les haches encor, où le Roy s'esbatoit
Et prenoit son plaisir. Quand la Reyne des femmes
Fut venue où estoient les poursuiuans infames,
Sur le seuil de la porte elle arresta ses piedz,
Contre sa face mit ses voiles deliez,
Ses femmes se tenans tousiours à l'entour d'elle,
Puis fit à l'assistance vne harangue telle.

Escoutez mon dessein vous qui me demandez,
Et superbes & fiers mangez & gourmandez
Depuis long temps le bien d'un homme en son absence
Sans moderation, sans honte & continence,
Tant estes transportez du desir de m'auoir:
C'est que presentement ie vous veux faire voir
Une espreuue, un combat, & le ieu d'exercice
Où souuent s'esbatoit le magnanime Vlysse.
C'est cet arc grand & fort, qui bander le pourra,
Et par ces douze aneaux la fleche passera:
Ie suiuray celuy là, ceste maison ornee
Laisseray, où ie fus en ieunesse amenee:
Helas, où i'ay vsé mon temps & ma beauté,
De richesses comblee & de felicité.
La memoire à iamais m'en sera eternelle,
Mesmes en y songeant. Ce disant elle appelle

LE XXI. LIVRE

Eumee le porcher, luy faict commandement
 De leur porter à tous l'arc, & l'ébatement
 Du fer clair & fourby. Il le prend & leur porte,
 Non que de ses deux yeux mainte larme ne sorte:
 Et le maistre bouvier d'autre part à part soy
 Souspiroit grandement voyant l'arc de son Roy.
 Qui faict qu'Antinoüs les reprend & les tance,
 Et leur tint ces propos de grande outre-cuidance.
 Badins de paysants qui n'estes soucieux
 Que de ce qui parroît tous les iours à vos yeux,
 Malheureux, qui vous faict espandre tant de larmes?
 Pour quelle occasion donnez vous tant d'alarmes
 A ceste pauvre femme, ayant assez d'ailleurs
 De sujet de se fondre en souspirs & en pleurs,
 Depuis le iour qu'elle a perdu toute esperance
 De reuoir son mary perdu pour assurance?
 Mais sçavez vous que c'est, mangez si vous voulez
 Sans bruit & sans rumeur, ou sortez & allez
 Lamentez là dehors, laissant au plus habile
 De nous de s'esprouuer à cet arc difficile.
 Mais ie ne pense pas que l'on le puisse ainsi
 Bander & manier: personne n'est icy
 Tel qu'estoit Ulysses en force & en puissance,
 Je l'ay veu, & i'en ay tresbonne souuenance,
 Tout enfant que i'estois. Ces propos il disoit,
 Ce pendant en son cœur à croire il se faisoit
 Qu'il pourroit bander l'arc, & passer les sagettes
 Si tost qu'il tireroit, par les trous des boucletes.
 Mais c'estoit bien plustost qu'il deuoit, sans mentir,
 La fleche d'Ulysses le premier ressentir,
 Dont il deshonoroit par son outre-cuidance
 Letrosne & la maison, & poussoit à la dance

Ses autres compagnons. Telemachus alors
La parolle prenant mit ces propos dehors
O panure, pour le vray Iupiter m'a fait naistre
Sans grand entendement, ie le fay bien paroistre,
Car ma mere que i'ayme & que i'honore tant
Bonne & sage qu'elle est, me laisse nonobstant
Son fils, & sa maison quite, se remarier,
Et depourueu d'esprit il faut que ie m'en rie.
Mais puis qu'il est ainsi, & que voicy le point
D'acquiescer une femme, à qui certes n'est point
Sa semblable en valeur en toute la contree
D'Achaïe, en Argos, en Pyle, en Saree,
En Micene en Epire, & sans aller si loin
Non pas mesme en Ithaque, & qu'est il de besoin
De chanter le merite & la louange extremes
De ma mere en ce lieu? vous le scauez vous mesme:
Puis qu'il est donc ainsi, venez & commencez
Ne vous excusez point, & ne tergiversez,
Voions qui seront ceux qui auront le courage
D'entrer en cest esbat, sans tarder davantage:
Moy i'en veux estre aussi: si ie le puis bander
Et au trauers des ronds la sagete darder,
Ie n'auray mal au cœur que ma mere me laisse,
Ie n'auray pas regret qu'ailleurs elle s'adresse,
Quand i'en suivray mon pere & que ie seray seur
De n'estre de ses faits indigne successeur.

Ce disant il se leue & dispolement saute.
Son manteau de dessus ses espaulles il oste,
Son espee au costé pendit superbement,
Puis commença le ieu, donc tout premierement
Il renga les aneaux, & creusit une place
Pour les loger trestous, & dedans cest espace

LE XXI. LIVRE

À la ligne les renga, un esbahissement
 Les saisit, le voyans faire si proprement
 Vne chose à leurs yeux, qu'il n'auoit iamais faicte
 Ayant accoustré tout, lors en place il se iette,
 Commence à prendre l'arc. Trois fois il l'enfoncea
 Comme prest à tirer, trois fois il le laissa
 À fin de prendre aleyne, ayant grande esperance
 De tirer, & passer les fers. Il recommence
 Pour la quatriesme fois, & de faict eust atteint,
 Sans qu'Ulysses luy fit un signe & le retint.

À donques il leur dit, hélas! quelle infortune,
 Quel grand malheur me suit? faut de deux chose l'une,
 Ou que ie ne vaudray cy apres du tout rien,
 Que ie seray vn lasche, vn delicat, ou bien
 Que ie suis ieune encore, & n'ay pas assez seure
 La main pour repousser qui me feroit iniure:
 Mais vous qui en roideur & force me passez,
 Tendez l'arc, & les traits dedans les ronds poussez.

Quand il eut dit ainsi, doucement il se baisse,
 Sur les beaux aiz colez pose l'arc, & y laisse
 La fleche viste & belle: & sa place reprend
 D'où il estoit party. Lors à dire se prend
 Alors Antinous. Or compagnons, de grace
 Que donc chacun de nous se leue de sa place
 Par ordre, en commençant par celui iustement
 À qui on à versé du vin premierement.

On fut de son aduis. Alors le fils d'Oenope
 Leodes se leua le premier de la trope,
 Il estoit leur deuin, & toujours il estoit
 Au bas bout, & plus pres du buffet se mettoit,
 Ennemy tout afaict de leurs façons de faire,
 Toujours fasché contre eux, & toujours en colere

Il prit l'arc le premier, sur le pavé se mit,
Atteint a la saiette, & de tant se promet
Qu'il le pourroit bander, mais luy fallut se rendre,
Car son bras se lassa trop delicat & tendre.
Si dit aux poursuivans : ie me rends quant à moy
Qu'un autre vienne icy : cest arc ie le prenoy,
En priuera plusieurs & de vie & d'enuie,
Et seroit bien meilleur de perdre un coup la vie
Que de faillir vivans celle pour qui sans fin
Nous demourons icy, & l'esperons en vain
Mais si quelcun pourtant se sent fort, & espere
D'espouser d'Ulysses la femme chaste & chere
Qu'il s'en vienne à cet arc, mais qu'il y ait esté
Quelque temps, & qu'il vienne à voir d'autre costé
Quelque princesse Greque entre les mieux vestues,
Qu'il quite ceste cy, & ses peines perdues,
Demande l'autre à femme, & la Reine au surplus
Prenne le fortuné qui luy दौरa le plus.

Il quitta ce disant le fort arc admirable,
Et se baissant un peu le posa sur la table,
Et la vire au beau fer, puis la place reprit
D'où il s'estoit leué. Lors à dire se prit
Encor Antinous, & griefuement le touche.

Liodes, quel proposit est sorty de la bouche?
L'en suis fort irrité, que cet arc ce dis-tu,
En priuera plusieurs de vie & de vertu?
Pour ce que tu n'as peu à ton plaisir en faire?
Mais ce n'est pas cela. C'est plustost que ta mere
Faillit à te donner la force & la bonté
De pouvoir à propos bander cet arc vouté,
Et d'en lascher le trait, c'est chose toute uraye,
Mais que quelque autre vienne apres luy, & l'essaye

LE XXI. LIVRE

Puis au maistre cheurier il tint ces propos cy.

Or sus Melanthius aporte nous icy
Force bois, fay bon feu, mets nous force escabelles,
Et les couure de peaux & douillettes & belles,
Donne ordre puis apres qu'il nous soit aporté
De l'onguent de ceans en bonne quantité,
Afin que bien chauffeZ & oints à toute force,
Nous voyons qui aura plus d'adresse & de force
Ceste ieunesse & moy, qu'on estime si peu,
A manier cest arc & parfaire le ieu.

Dit qu'il eut, le cheurier faict en grand diligence
Bon feu, sieges apporte & dessus eux agence
Les delicates peaux. Apres il apportoit
De l'exquis oignement qui là dedans estoit
Vne tres-bonne masse: eux chauffeZ, s'en frotterent
Et s'en allans à l'arc l'exercice tenterent,
Mais ils ne peurent pas le courber seulement
Tant lasches ils manquoient de force entierement.

Antinous pourtant n'entroit point en carriere
Mais fin & cauteleux se tiroit en arriere
De mesme Eurymachus les principaux tous deux
D'entre les poursuivans & les plus bazardeux.

Or comme ils s'essayoient à ce rude exercice,
Le bouvier bellement & le porcher d'Ulysse
Se suivirent, sortans de la sale, où les Grecs
Prenoient leurs passe-temps, & Ulysses apres
Prenant occasion les suit en diligence.

Quand il les tint dehors, alors il leur commence
Ces propos gratieux. A vous seuls que voicy
Vous doi-ie dire un mot? mais me tairay-ie aussi?
Le cœur me dit pourtant que ie ne me doy taire.
Aimez vous Ulysses? ça, & de quel affaire

Series vous avec luy, si fortuitement
Il suruenoit asteure, & que presentement
Un Dieu vous l'enuoyast ? Series vous au service
Ou de ces poursuinans, où du diuin Vlysse ?
Quel party prendriez vous ? que vous en dit le cœur ?
Dites ouuertement. Car cest bien le meilleur.

Lors le bouvier des beufs. Le Dieu du haut empire
Parfit presentement ce que tu viens de dire :
Vint il, cest homme là : un Dieu benin & doux
L'amenast maintenant au beau milieu de nous
Tu verrois à leffect, comme & de quel courage
J'aurois la force au cœur & la main à l'ouurage
Autant en dit Eumæe, inuquant ardamment
Les Dieux de ramener Vlysses promptement.

Quand Vlysses cogneut auoir à suffisance
Sondé leur loyauté, de rechef il commence
A leur dire en ces mots. Or donques me voicy
Qui apres mille maux suis de retour icy
Me voicy rechappé des eaux & de la guerre,
Et dans le vingtiesme an reuenu dans ma terre,
Dedans mon cher pais : & i'ay eu le loisir
D'esprouuer que vous seuls auez ioye & plaisir
De tous mes seruiteurs de reuoir ma presence.
I'en en ay veu pas un regretter mon absence,
Ne prier qu'Vlysses reuint finalement
Sur le seuil de son huis, que vous deux seulement.
Mais ie vous iure aussi chose tres veritable
Si Dieu met en ma main la bande detestable
De ces gens, & permet que i'en aye raison :
Ie vous mariray bien, vous donneray maison,
Grandes possessions vous seront départis,
Et vos maisons seront pres des miennes basties

LE XXI. LIVRE

Et n'aurons à iamaïs moy ny mon enfant doux
 Ny freres, ny amis si respectez que vous
 Mais, ça, pour vous oster de toute incertitude,
 Pour ne vous laisser plus en nulle inquietude,
 Et me faire cognoistre à vous ouuertement,
 Que ie vous face voir icy presentement
 Une marque sur moy, & vous monstre la place
 De la playe que i eus sur le mont de Parnasse
 Que me fit vn sanglier, quand avecques les fils
 Du fort Antolychus chassant ie le deffis.
 Ce faict, il leur fit voir à plein sa cicatrice.
 Eux regardans de pres recogneurent Vlysse,
 Luy baisèrent la face, & les bras estendans
 Autour de luy serrez alloient en pleurs fondans:
 Tout de mesme Vlysses & de tendreur & d'ayse
 Et la teste & le corps leur embrassant les baise
 Sur eux pleurans toujours Titan se fust couché
 Si le sage Vlysses leurs pleurs n'eust empesché,
 Cessez dit il, vos pleurs, que quelqu'un ne nous sorte,
 Et vous voyant pleurer leans ne le raporte:
 Mais remettez vous bien, & r'entrons bellement
 Non pas tous à la fois i'iray premierement
 Et vous viendrez apres: voicy vn signe au reste
 Qui sera entre nous Quand la troupe moleste
 Des superbes amans d'opiniaistre vois
 Deffendra qu'on me baille & l'arc & le quarquois,
 Tu le prendras Eume. nonobstant leur deffence,
 En main me le metras contre leur resistance,
 Puis tu t'en iras dire aux femmes de la haut
 D'aller soudain fermer les portes comme il faut
 Par toute la maison, que si dedans la sale
 Elles oyent du bruit, que nulle ne deualé

Et ne sorte dehors: entendent seulement
A faire leur besogne & toy semblablement
Loyal Philatius, pren bien garde à la porte
De la sale, & la ferme avec la barre forte
Qu'on ne puisse sortir. Ce disant, il r'entra.
En son siege se mit que vuyde il rencontra:
Et ses gens apres luy. En ce temps Eurymaque
Tenoit entre ses mains l'arc du fort Roy d'Ithaque,
Le chauffant, le tournant à la splendeur du feu
Il le vouloit courber & bander peu à peu,
Mais il ne put iamaïs. Dont son ame orgueilleuse
Vne plainte en iettoit & grande & merueilleuse,
Si dit en soupirant à tous ses compagnons.

Amis, certes en vain nous nous embesognons,
Vous & moy en aurons & vergogne & tristesse
Ces nopces ie ne pleins, car par toute la Grece
Et à l'entour d'Ithaque assez se trouvera
De femmes pour nous tous, mais ie crain qu'on dira
Que nous aurons manqué de force, à l'exercice
Mis en auant de l'arc du magnanime Ulysse.
Auquel Antinous. Certe il n'en sera rien,
Gentil Eurymachus, toy mesmes le scais bien.
Aujourd'hui est la feste ordinaire
De l'archer Apollon, qui donc si temeraire
Pense bander cet arc? que donc? tout doucement
On le remette là, les traits semblablement
Avecques les aneaux, personne que ie pense
D'où on les aura mis n'aura l'oultre-cuidance
De les en enleuer, de ceux qui ont acces
Et viennent d'ordinaire au chasteau d'Ulysses
Or que le sommelier à boire nous apporte,
Quites pour ce iourd'hui de ceste iouste forte:

LE XXI. LIVRE

Demain Melantius en diligence ira
Aux champs à son bestail, & nous amenera
D'entre tous ses troupeaux les cheures les plus grasses
Afin qu'ayans rendu à Phœbus vœux & graces
Bruler sur son autel cuissots en quantité
Venions à bon escient au ieu de l'arc vouté,
Et mettions une fin a ce rude exercice.

Il discourroit ainsi dans la maison d'Ulysse,
Et son opinion vn chacun approuua,
On apporta de l'eau, les mains on se lava,
Et les iennes garçons le bon vin departirent
A tous les assistans & les tasse remplirent
Après qu'ils eurent beu selon leur volonté
Le prudent Ulysse qui auoit medité
En son entendement ceste derniere ruse,
En se tournant vers eux de ces propos leur vse.

Amoureux de la Reyne, oyez patiemment
Ce que ie viens de metre en mon entendement
Mais principalement i'en supplie Eurymaque
Et toy Antinous, puissant prince en Ithaque,
Qui certes viens de dire vn propos vertueux,
Qu'il failloit laisser l'arc & respecter les Dieux,
Et qu'Apollon demain pourroit sa force estendre
Sur qui il luy plairoit pour l'arc courber & tendre
Mais si vous le voulez ie voudrois bien aussi
Le manier vn peu, pour éprouuer icy
Deuant vous, si i'aurois la vigueur & la force
Que i'ay eue autresfois, sous ceste vieille ecorce,
Ou si avec le temps pour ne m'estre exercé
Ceste roideur de nerfs ne m'auroit point laissé.

Il disoit, & chacun se mit en grand colere,
De crainte qu'ils auoient qu'il ne vint à le faire,

Sur tous

Sur tous Antinous grandement le reprit,
Tresfort le menacea, & à dire se prit.

Miserable passant, tu n'as pas peu d'audace
Quoy? n'estimes tu rien qu'on t'ay fait tant de grace
De te laisser icy avec nous banqueter,
Qu'on t'ay daigné de tout servir & presenter,
Qu'ayes participé à nos propos de table,
Que nul autre que toy ne m'ait eu si traittable
Que de venir s'asseoir & manger avec nous
Et nos discours ouyr? Pour le vray, ce vin doux
Ta blessé le cerneau, comme certe il offense
Tout homme qui en prend avec intemperance
Le Centaure vaillant Eurytion le fort
Du vin iadis sentit le ruyneur & fort
Quand ches Pirithous allant voir les Lapithes
Il s'enyura par trop, & sortit des limites
Et des gonds de raison, temeraire, insolent,
Et sans nulle vergogne. Un courroux violent
Ces princes embrasa, dessus luy se ietterent,
Les oreilles ensemble & le nez luy couperent,
Puis le mirent dehors: il sortit tout troublé
De vin & de misere, & de honte accablé
Grand deuil & grand depit les Centaures en prirent,
Et la guerre asprement aux Lapithes en firent
Mais le premier malheur sortit d'Eurition,
La seule cause en fut son indiscretion,
Et le vin par trop pris: ainsi t'en pourra prendre,
Si de ce que tu veux maintenant entreprendre.
Tu veux venir about tu trouveras, ie croy,
Un qui aura la teste aussi folle que toy
En vain tu nous feras & priere & requeste:
Car pour te metre en mer la barque est desja preste,

LE XXI. LIVRE

Qui au Roy Echeius tout droit te conduira
 Qui t'ayant en ses mains tout vif t'escorchera.
 Mais croy moy seulement, boy, mange & te repose,
 Ne veilles ie te pry te mesler d'autre chose,
 Et n'entre point encor en dispute avec ceux
 Qui plus ieunes que toy ne sont moins vertueux.
 Auquel Penelopé la princesse honorable
 Il n'est, Antinous iuste ne raisonnable
 De menacer ainsi & chasser sans raison
 Ceux que Telemachus reçoit en sa maison.
 Mais voudrois tu penser, bien que cest hôte nostre
 Vint à bander cest arc, & fist plus que tout autre
 Qu'il m'espousast pour tant & m'emmenast d'icy
 Non, ostez de vos cœurs la crainte & le soucy
 Qui s'y pourroient loger, n'en faites pire chere,
 Il ne m'aura iamaïs pour son epouse chere,
 Ce seroit indecence à moy, à luy abus
 Alors Eurymachus le fils de Polybus.
 O fille d'Icarus, Reyne de grand'prudence,
 Nous n'auons iamaïs eu si sotte la creance,
 Qu'il fust pour t'espouser : nous ne craignons sinon
 Qu'on en vienne à parler, blasmant nostre renom.
 Nous craignons le caquet des hommes & des femmes,
 Et que quelcun des Grecs, mesmes des plus infames
 Et qui vallent le moins ne parlent de cecy,
 Nous tienne sur les rancs, & ne se moque ainsi.
 Ces gens ont le corps foible, & imbecille l'ame,
 Sont moindres que celuy dont ils veulent la femme,
 Ils ont tenté son arc & bander ne l'ont peu.
 Mais vn pauvre passant qu'on n'auoit iamaïs veu
 Ay sement l'a bandé, a passé les saiettes
 Au trauers des pertuis, a franchi les bouclettes.

Voila ce qu'ils diront chacun s'en moquera,
Et honte & des-honneur sur nous en tumbera.

Lequel Penelope de ce propos vint suivre
Certes Eurymachus, ce n'est nullement viure
En gens aymans l'honneur, qui ont affection
Des'acquerir bon bruit & reputation
Parmy un menu peuple & dans vne prouince,
Que de des-honorer la maison d'un grand prince
Et consumer son bien. Que n'estes vous aussi
Ialoux de vostre honneur, vous comportans ainsi?
Pour nostre hoste, qu'à til? n'a til la force belle
La taille comme il faut, la vigueur naturelle?
Il est de bonne race & venu de bon lieu.
Donc, qu'on luy porte l'arc, & qu'il se mette en ieu,
Afin que nous voyons au moins ce qu'il peut faire
Ie le veux, & que nul ne me chante au contraire
Sil le faict, qu'Apollon veille luy accorder
La grace & la faueur de le tendre & bander,
Ie luy feray present d'une manteline,
Et d'un bon haubergeon, & d'une robe fine,
De force habis en somme, outre plus il prendra
Un iauelot de moy, dont il se deffendra
Des hommes & des chiens: i'ay encore un espee
Tranchant des deux costez, bien forte bien trampee
Que ie luy donneray, courriray ses talons
Et ses pieds ainsi nuds de souliers forts & bons,
En tous lieux qu'il voudra ie le feray conduire
Et l'accommoderay d'une bonne nauire.

A qui Telemachus respondit puis apres.
Mamere, ie ne scay nul d'entre tous les Grecs
Qui ayt dessus cest arc plus de droit & puissance
Que ie scay en anoir, qui voudra s'en offance,

LE XXI. LIVRE

Des ceste heure ie puis le donner & l'oster
 A qui il me plaira, ie dy sans excepter
 Tous les plus grāds d'Ithaque, & les plus forts d'Elide
 Propre à nourrir cheuaux qu'on manie à la bride:
 Nul d'eux ne me scauroit empescher, qu'apresent
 Si mon plaisir est tel ie n'en face un present
 A ce bon homme icy: mais ie vous pry, ma mere,
 Retirez vous là haut, songez à vostre affaire,
 Et à vostre besogne, ayez tant seulement
 Soin de vostre quenouille, & mettez gentiment
 Vos femmes au travail. Car le temps où nous sommes
 Donne de manier ces affaires aux hommes,
 Et à moy dessus tous, qui ay & veux aussi
 Avoir entier pouuoir sur ceste maison cy,
 Sa mere l'entendant bellement se retire
 Raue, & ruminant ce qu'il venoit de dire,
 Monte en haut en sa chambre, & ses femmes apres
 Où elle se remit à faire ses regrets
 Sur son pauvre mary, & tant que la guerriere
 Pallas, luy vint fermer l'une & l'autre paupiere
 D'un gracieux sommeil, mais le braue porcher
 Alla diligemment le bel arc destacher,
 Et desia le portoit à son Roy, d'un grand ayse,
 Quand les fiers poursuinans firent vne grand noise,
 Et crians hautement menoient un fort grand bruit
 Lors un presomptueux d'entre eux, parla & dit.
 Où portes tu cest arc vilain porcher infame?
 Pendart, si ie te prensie t'arracheray l'ame,
 Et donneray ta chair à tes chiens par morceaux
 Qui te deuoreront mort entre tes pourceaux
 Tu auras le loyer de tous tes malefices,
 Si Phabus, si les Dieux au moins nous sont propices.

Il dit & le porcher, remit tout bellement
L'arc d'où il l'auoit pris, craignant extremement.
Car plusieurs contre luy vsoient de grand menace.
Telemachus d'ailleurs luy crioit de sa place
Et le menaçoit fort. Eumæ, dit il, hola,
Reporte moy cest arc à l'hoste que voila,
Fay ce que ie te dy. Il n'est en ta puissance
De rendre à tant de gens semblable obeissance.
Autrement, ie t'asseure aux champs ie rennoiray
Bien que ie sois fort ieune & te lapideray,
Croy moy, ie suis encor assez fort pour le faire.
Que pussay-ie aussi bien sous ma force deffaire
Ces poursuiuans icy, tel eussay-ie le bras
Qu'il les pust surmonter, ie ne tarderois pas
A les metre dehors, ils ont trop d'arrogance
Et ie me sens par trop las de leur insolence.

Il disoit, & ces gens ne s'en estomaquoient,
Mais plutost se prenoient à rire & s'en moquoient
Donc Eumæ prenant l'arc que luy dit Telemachus
Le mit entre les mains du fort prince d'Ithaque
Puis sortant de la sale accourt hatiuement,
Faiet venir Euryclee & luy dit bellement.

Telemachus par moy te mande que tu barres
Les portes & de clef & de tres-forte barres,
Que si vous entendez du bruit, de la rumeur,
Ne sortez nullement, faietes vostre labeur.

Il dit, elle soudain alla fermer les portes,
Les serra de la clef & de barres tres-fortes.
Philatius d'ailleurs tacitement s'encourt,
Ferme diligemment la porte de la court.

Or sous le porche estoit vn grand bois par fortune
Que l'on auoit tiré des pieces d'une hune,

LE XXI. LIVRE

La porte il en barra, puis revint viftement
 Se voir d'où il estoit party premierement,
 Regardant Ulysses s'il luy feroit point signe:
 Qui tient l'arc en sa main, le vire, tourne & guigne
 Si les vers n'auroient point l'encornement rongé,
 Ou s'il ne seroit point ailleurs endommagé,
 Tandis qu'il fut absent. Lors l'un d'eux voulant rire
 Se tourna vers un autre & se prit à luy dire:
 Voicy quelque madré, quelque bien entendu
 A cognoistre les arcs, maistre il s'en est rendu.
 O qu'il en a chez luy bien d'autres tous semblables,
 Ou bien en veut polir d'autres plus admirables,
 Voyez comme il le va en ses mains maniant,
 Le resola qu'il est, l'assuré mendiant,
 De bourdes controuneur: l'autre vint à l'encontre:
 Que toujours ce dit-il, il ayt telle rencontre
 Pour ses commoditez, comme presentement
 Il pourra se iouer de cest arc aysement.
 Ainsi deuisoient ils, mais Ulysses à l'heure
 L'ayant bien visité, desormais s'en assure.
 Comme un ioueur de lut bien experimenté
 Accorde sans travail son instrument vouté
 L'appuyant à son sein, & au chant de ses leures
 Marie les boyaux des brebis & des cheures,
 Ainsi sans se peiner Ulysses l'arc tendit
 Et de sa droite main la corde il estendit.
 Vne strideur s'ouyt du son qui prouint d'elle,
 Qui sembloit rapporter là vois de l'hirondelle,
 Cela fâcha tres-fort les orgueilleux amans,
 Leur visage en changea: & sur ces errements
 Iupiter fit ouir en l'air force tonnerre,
 Et fit voir quant & quand des prodiges sur terre.

*Cela resjouit fort le Cephalenien
Le diuin Ulysses, que le saturnien
Pour le fortifier ses foudres ainsi iette.
Si print soudainement vne viste sagette
Qui estoit sur la table & toute à decouvert:
Car les autres estoient dans le carquois couuert,
Dont il denoit bien tost les Grecs à mort estendre.
Lors deployant les bras il vint la corde tendre
La tirant, & courbant son arc des deux costez
Le faisoit enluner en ses concauitéz.*

*Puis placé à propos il met hors de la coche
Le nerf qui tient la fleche, & en l'air la decoche
Visant si iustement que droit il la poussa
Dans les trous des aneaux & les haches passa
Puis il dit à son fils, Ton hoste, ô Telemaque,
Ne te faict des-honneur logé en ton Ithaque,
Il a visé bien droit, il n'a point longuement
Tourné, viré ton arc, ny inutilement.
I'ay encores de l'homme, & ne suis pas si proche
De réuer, que ces gens m'en ont faict de reproche.
Mais il faut vistement leur soupper aprestier
Aux torches, puis iouer sur le lut & chanter
Pour leur donner plaisir & toute esjouissance
C'est cela des festins toute là bien seance.*

*Il tenoit ces propos, puis fronceant les sourcils
Comme disant c'est l'heure, il fit signe à son fils,
Qui ceignant son espee affilee & luyssante,
Prend vne partuisane en sa main bien-duisante
Armé d'un corselet qui iette vn fier eclat,
S'aproche de son pere & s'apreste au combat.*

Fin du vingt vniesme liure.

Oo iiii



LE VINGTDEVXIESME LIVRE
DE L'ODYSSEE D'HOMERE.

ARGUMENT.

Vlysses de la premiere fleche tue Antinoüs. Les pour-
suiuans se deffendent. Grand combat est faict entre
eux, & Vlysses. Son fils, Eumæus & Philætius. Tous
les poursuiuans sont mis à mort. Phæmus le chantre &
Medon le heraut sont sauez. Il faict estrangler les seruan-
tes ribaudes, & mourrir cruellement Melanthius.

AUTRE SOMMAIRE.

*Vlysses les amans met à mort sans mercy,
Mais il sauue le chantre & le heraut aussi:*

Lors le fort Vlysses ses vieux penaillos iette,
Sante sur le paue, ayant plein de saiette
Leresonât carquois, & l'arc, qu'il enfonça,
Et soudain à ses pieds les fleches il versa:
Puis dit aux poursuiuans. Le ieu s'est faict sans nuire
Iusqu'icy à personne, or ie vous veux bien dire
Qu'il en faut inuenter d'autres dorefnauant
Et ie l'essayeray: Tels que par cy deuant
Nul autre que ce soit n'a trié coups semblables
Voyons si ie scauray les rendre conuenables

Comme ie me promets. Apollon dessus tout
Me face auoir l'honneur d'en venir bien à bout.

Ce disant, il atteinte vne sagette dure
Encontre Antinoüs, qui vouloit d'auenture
Lener un vase alors d'or massif, qu'on tenoit
Par l'anse aux deux costez: de faict il le prenoit
Pour boire entre ses mains, n'ayant en sa pensee
Nulle apprehension de ceste mort forcee.
Car qui eust iamais creu qu'un homme tant rusé,
Et tant braue fust-il, estant seul, eust osé
Sur tant d'hommes vaillās qui s'assembloïēt pour boire
Hazarder un massacre. & vne mort si noire?
Or droit dans le gosier Ulysses le blessa,
Et derriere le col la pointe outre passa:
Lors la teste luy panche, & sur son sein succombe,
Hors des mains le hanap luy eschappe & luy tombe.
Une bouteille grosse & espaisse de sang
Luy grenouille aux nareaux, il chet dessus le banc,
Et demenant des pieds tombant à la renuerse
Il pousse ce qu'il trouue & la table rennerse.
Les morceaux il vomit qu'il auoit aualez,
Et le pain & la chair ensemblement meslez
La terre salissant. Au bruit de ceste cheute
La troupe des beueurs faict vne grande esmeute,
Fremissant fierement: d'horreur & de dédain
Chacun quitte son siege & se leue soudain,
Regardent les parois, & n'y voyent ny hache,
Ny pique, ny espieu, ny casque ny rondache,
Alors contre Ulysses crians, & l'outrageans:
Méchant, luy disoient-ils, tires tu donc aux gens?
Iamais n'emporteras l'honneur de ton adresse.
Voicy tu as tué le meilleur de la Grece,

LE XXII. LIVRE

Tu mourras méchamment, les Vautours mangeront
Ta vilaine charongne & te déchireront.

Ils s'abstiennent pourtant : car personne ne pense
Que volontairement il ayt fait ceste offence,
Et à son escient. Sots qui ne voyoient pas
Qu'ils estoient arriuez à leur dernier trespas,
Qu'il falloit tous mourir. Alors le Roy d'Ithaque
Les guignant de trauers en ces mots les attaque.

Chiens, vous ne pensiez pas que iamais Ulysses
Deust reuenir de Troye, en faisant ces excès
Icy dans ma maison, menans ce train infame,
Ruinans tous mes biens, voulans auoir la femme
D'un homme encor viuant, arrogans, insolens,
Les femmes de ceans souillans & violans,
N'ayans crainte des Dieux dessus lesquels nous sommes,
Et ne vous soucians des reproches des hommes,
Mais vous mourrez aussi tant que vous estes-là.

Il dit, & chacun d'eux en son ame trembla,
Vne frayeur les prit, iettent deçà leur veüe,
Et delà pour fuir ceste mort non preuenüe
Le seul Eurymachus ce mot luy a tenu.

Puis donc, ô Ulysses, que te voila venu,
Tout ce que tu as dit, certes, est equitable,
On s'est mal comporté, c'est chose veritable,
On a fait des excès & dedans & dehors
En grande quantité. Mais tu vois cy le corps
De celui qui de tout estoit la seule cause.
Ce n'estoit pas ta femme, il vouloit autre chose
Que le grand Iupiter n'a voulu terminer;
Son desir, son dessein, son but fut de regner
Icy dans ta maison, de gouverner Ithaque,
Et de donner la mort à ton fils Telemaque.

Ores le voila mort. Recey nous en pitié,
Et te reconcilie à nous par amitié,
Nous qui sommes ton peuple, & sur ton assurance
Nous nous assemblerons, te donnons recompense
De tout ce qu'on t'a pris. Ce qu'on t'a dépendu
Te sera remboursé, tout te sera rendu,
Nous te ferons mener vingt bœufs pour chacun hōme,
D'airain, d'argent & d'or te païrons si grand somme
Que ton cœur en sera tout content & ioyeux,
Appaise seulement ton courroux ennuyeux.

Auquel respond ainsi le vaillant Roy d'Ithaque
Regardant de traucers: Quand mesme, ô Eurymaque,
Tous vos biens paternels me viendriez presenter,
Et avec eux voudriez d'autres y adiouster:
Je ne retireray mes mains de la vengeance,
Que ie suis resolu de prendre, pour l'offence
Que i'ay receu de vous, maintenant c'est à vous
Ou de vous bien defendre, ou de parer aux coups,
Eschappe qui pourra, mais ie croy qu'à grand peine
Vn seul se sauuera de la mort inhumaine.

Il dit, & les genoux leur alloient tremblotant.
Alors Eurymachus leur dit, les irritant.

Amis, puis qu'il a pris ces fleches malheureuses
Il ne retiendra plus ses mains malencontreuses,
Tant qu'il nous ayt trestous tueZ & terrasseZ:
Mais pensons à nous battre, & serrez & pressez
Allons donner à luy, tirons tous nos espees,
Et mettons au deuant de ses fleches trempées
Ces tables & ces bancs: Soyons vaillans & forts,
Si nous le pouuons ioindre & le pousser dehors
Tant seulement d'icy, sortons tous de furie,
Et par la ville allons leuer vne cririe,

LE XXII. LIVRE

Tout le monde accourra au cry de nostre voix.
Et de l'arc il ioura pour la derniere fois.

Ce disant, son espee hors du fourreau il tire,
Iette un cry furieux, & plein de rage & d'ire
Sautte vers Ulysses, bruyant horriblement:
Ulysses le suiuit de l'arc tout bellement,
Luy décoche vne fleche, & droit souz la mammelle
En l'atteignant luy fit vne playe cruelle
Qui donna iusqu'au foye. A ce coup inhumain
L'espee qu'il tenoit luy tomba de la main,
La table cheut à bas, l'eau, de la violence
Fut épanchée à terre, & le vase à double anse
A sa cheute versa. Luy tombant & panchant
La terre de son front heurta en trebuchant,
Iettant un grand soupir, & de son pié qui tremble
Secouant le iarret, il faict tomber ensemble
Et siege & marche pié: un brouillas nuageux
Se vint finalement espandre sur ses yeux.

Alors Amphinomus dégaine son espee,
S'en vient contre Ulysses, & la voye occupee
Se veut faciliter, pour sortir vistement,
Sans que Telemachus le preuint fierement,
Il luy tire un grand coup, & de grand violence
Dans le milieu des reins il luy fourre sa lance.
Il chut, & un grand cry en cheant il ietta,
Et contre les carreaux de son front il hurta.
Mais le fils d'Ulysses d'aupres de luy se tire,
Au corps d'Amphinomus qui contre terre expire
Laisse son ianelot, il craint qu'en l'arrachant
Quelqu'un prenne le temps, de son estoc trenchant
Ne le vienne percer, ou d'en hault ne luy iette
Comme il se baisteroit un grand coup sur la teste.

Courant donc viftement vers son pere il reuint
Afin d'estre plus forts & pres de luy se tint.
A doncques il luy dit : Mon pere, que te semble,
Si ie montois là hault & t'apportasse ensemble
Un couple de bons dards, un rondache luisant,
Et un casque bien-faiët à ta teste duisant,
Que ie m'armasse aussi d'une cuirasse dure,
Et fisse à ces deux cy prendre une bonne armure,
Au bouvier, au porcher, ne vaudroit-il pas mieux
Combattre bien conuerts? Ulysses tout ioyeux:
Va viftement, mon fils, parauant que me faillent
Ces fleches en la main, de peur qu'ils ne m'assailent
Me voyans desarmé, & restans les plus forts
Ne me forcent en fin & me iettent dehors.

Ce disant Ulysses, Telemach' ne faiët faiët faute
D'obeir viftement, monte en la salle haute
Où les armes estoient : oste des rateliers
Huit puissans iauelots, prend quatre grands boucliers,
Et tout autant d'armets dont la splendeur éclaire:
Il prend tout, les apporte, & se rend à son pere:
Il s'arme le premier, & les pastres apres
Se couurent viftement des puissans halecrets,
Se rengent pres du Roy, qui autant que ses fleches
Luy durent en la main, autant faiët-il de breches
Aux Grecs, iusqu'à la mort. Au prix qu'il choisissoit
Son homme avec son arc, au prix il le perçoit
Et le renuersoit mort. Mais dès que luy faillirent
Les fleches, & les traits entre ses mains tarirent,
Soudain il appuya son arc contre le mur,
Et pendit à son col son grand rondache dur
Conuert de quatre cuirs, accommode en sa teste
L'esponuentable armet à l'effroyable creste,

LE XXII. LIVRE

Vn pennache au dessus faiect ondoyer ses flots,
Puis il prend en sa main deux puissans ianelots
De fer tres-reluisant & de pointe tres-forte.

Or là dedans auoit vne certaine porte
Bastie dans le mur, & dans le pied estoit
Vne issue, par où quelquesfois on sortoit
Pour aller à la ville, elle estoit d'auenture
Rembarree pour lors de mainte table dure.
Ulysses au porcher la deffence en donna,
Car on pouuoit sortir tant seulement par là.

Adonc Agelaus. Compagnons, ie vous prie
Qu'on gaigne ceste porte, & qu'au peuple on crie:
Car à nostre clameur tout le monde accourra,
Et pour le dernier coup cestuy cy tirera.

Auquel Melanthius. Las, il est impossible,
Vaillant Agelaus, tant est inaccessible
La porte que tu dis, elle est en vn destroit
Si serré, qu'aysement vn seul la defendroit,
Tant eust-il peu de cœur. Plustost, si ie m'aduançe
Et que ie vous apporte armes en diligence,
Vaut-il pas mieux s'armer, esprouuant le bazarde?
Ie vay monter là hault, car c'est en ceste part
Qu'Ulysses & son fils leurs armes ont soustraittes.
Il leur disoit ainsi, & en ces entrefaittes
Il monte viftement par les grands escaliers:
Douze rondaches forts dépend des rasteliers,
Autant de forts espieux, autant d'armets de teste,
Dont les pennaches grands ondoyoient sur la creste.
Chargé qu'il fut, soudain en bas il descendit,
Et aux fiers poursuiuans pour s'armer les tendit.

Ulysses le voyant, tous ses sens luy troublerent,
Tout le cœur luy faillit, les genoux luy tremblerent,

Ces espieux qu'ils prenoient, ces armes qu'ils vestoient,
Une grande besoigne encor' luy apprestoient.

Si dit à Telemach'. Mon fils, c'est chose seure
Que là hault contre nous quelque femme coniore,
Et d'armes & bastons, nos ennemis fournit,
Ou bien Melanthius. A ces mots respondit
Soudain Telemachus: Mon pere i'en suis cause,
Moy seul ay faict le mal, il n'y a autre chose,
N'ayant l'huis apres moy tant seulement fermé
De haste que i'auois. Mais, ô gentil Eumæ,
Va mettre ordre à ce mal, & ferme bien la porte,
Et pren garde si c'est quelque femme qui sorte
Et nous trahisse ainsi, ou bien Melanthius
(Comme mieux ie le croy) le fils de Dolus.

Comme ils parloient encor', le cheurier ne faict faute
De remonter soudain, & de la salle haute
Tiner d'autres bastons ainsi qu'auparauant,
Et les descendre en bas: Eumæ l'apperceuant
S'en courut vistement le monstrier à son maistre,
Et luy dit en ces mots: Voilâ le méchant traistre
Qui nous cause le mal. Mais dy moy si tu veux
Que ie l'aie tuer, ou si tu aymes mieux
Que ie l'amene icy, pour prendre en ta presence
De ses méchanceté une horrible vengeance,
Car il a faict ceans infinité d'exces.

A ces mots respondit le prudent Ulysses:
Telemachus & moy pour un temps ferons teste,
Et nous opposerons à ceste troupe infeste:
Vous deux allez à luy,prenez-le, & luy liez
Les mains dessus le dos, & contremont les piez,
Puis le iettez en bas, & qu'une chaisne forte
Le prenant par le corps le suspende & supporte,

LE XXII. LIVRE

Lice à vn pilier pour soustenir le faix.
 Qu'il ayt contre le dos encores vn grand ais,
 Que sans pouuoir mourir vn long temps il endure
 Le tourment excessif d'une peine tresdure.
 Comme il eut acheué, ils courent viftement
 Où il estoit allé, montent soudainement
 Afin de l'attrapper. Luy qui ne se repose
 Armes cherche par tout ne pense à autre chose.
 Chacun d'eux aux costez de la porte attendant
 Demeure là tout coy, & luy sort ce- pendant
 Vn casque en vne main, en l'autre vne grand targe
 A la vieille façon, mais puissante & fort large,
 Que iadis Laërtes estant ieune portoit,
 Mais on n'en faisoit conte, & par terre elle estoit
 Pleine de salleté, les courroyes brulees
 Et les peaux de dessus par les bords decolees.
 Ils se lancent sur luy, le prennent furieux,
 Le tirent au dedans, le trainnent aux cheueux,
 Le iettent contre terre, & sur le dos luy lient
 Et les mains & les pieds, & tout le corps luy plient
 De cordes sans pitié: selon le mandement
 Du diuin Ulysses ils font entierement:
 Luy mettent au trauers vne cruelle chaisne,
 Le pendent, & luy font souffrir horrible gesne.
 Lors Eumæle gaussant luy haranguoit ainsi:
 Tu peux Melanthius, passer la nuit icy,
 Dedans ce lit molet, certes tu le merites.
 Et quand l'aube du iour sortira des limites
 Du profond Ocean, lassé de sommeiller,
 Tu pourras si tu veux soudain te réveiller:
 Prenant de tes troupeaux les Cheures les plus belles
 Pour faire des festins à tes amis fidelles.

Lors

Lors ils laisserent là Melanthius pendant
A une chaîne forte: & eux ce temps-pendant
S'estans tresbien arméz, la porte refermerent,
Coururent secourir Vlysses, qu'ils trouverent
Braument resistant. Ces quatre seulement
A la porte rangez combattoient vaillamment,
Les autres sont dedans, en grand nombre au possible,
Braves & hardieux, & de force invincible.
Lors Pallas vint à eux, de voix, de face encor;
Et de taille du tout ressemblant à Mentor.

Vlysses la voyant s'esioynt & luy crie:
Aide nous à chasser ces méchans, ie te prie,
Mentor, vien secourir ton amy ancien:
Ressouvien toy de luy, quantes fois & combien
Nous auons faict aux Dieux d'offertes agreables,
Et nous sommes encor tous deux d'aage semblables.

Ce disoit-il, croyant estre certainement
La Deesse Pallas, qui garde seuurement
Les peuples de tout mal. Mais de dedans la place
Les assiegez, d'ailleurs luy vsoient de menace:
Entre eux Agelaüs le fils de Damastor:
Qu'il ne t'aduienne pas, disoit-il, ô Mentor,
D'aider à cestuy cy, & que son beau langage
N'attire point sur toy ta perte & ton dommage.
Car si nous par faisons ceste entreprise icy,
(Comme ie suis certain qu'il aduiendra ainsi.)
Quand nous aurons tué & le fils & le pere,
Nous te ferons souffrir mort cruelle & amere:
Voy bien ce que tu fais, car tu le payeras
Aux despens de ta teste, & te ruineras,
Car dès que nous aurons rabatu vos courages
Par le fer, nous irons piller les heritages

LE XXII. LIVRE

Tant dehors que dedans, nous les assemblerons
Avec ceux d'Ulysses, & de tout iouyrans:
Nous ne permettrons pas que ton fils ne ta fille
Viuent en ta maison, ta femme & ta famille
Seront soudain par nous mis hors de la cité.
Il disoit & Pallas eut le cœur irrité
Plus fort pour ces propos. A donc elle s'aduanee
Soudain vers Ulysses, le reprend & le tance:
Tu n'es plus Ulysses, de ces forts & hardis,
Tu n'es plus celui-là qui combatois iadis
Souz les murs d'Ilion pour Helene la belle,
Portant neuf ans entiers peine continuelle:
Où tu as mesmement de tes mains mis à mort
Infinis combatans, tombez souz ton effort:
En fin par ton conseil & par ton entreprise
La cité de Priam a esté arse & prise:
Et or' que te voicy de retour sur tes champs,
Quoy? tu fais le restif d'assommer ces méchans,
Or' que tu as le pié dessus ton heritage
Pour des effeminez tu manques de courage?
Mais ça, approche toy, vien pres de ton amy,
Et voy comme il faict bien contre ton ennemy,
Voy comme Mentor sçait rendre le benefice
Qu'il a iadis receu de son amy Ulysse.
Elle l'accourageoit ainsi, mais tellement
Qu'elle ne luy donnoit la force entierement
De vaincre tout d'un coup: mais la Deesse sage
Du pere & de l'enfant esprouuoit le courage.
Puis tout soudainement se changeant en oyseau,
Elle s'alla percher dessus vn solineau,
De la belle maison, telle qu'une hyrondelle.
Alors Agelaüs excitoit de plus belle

Les autres poursuivans, avec Eurynomus,
Pysandre, Amphimedon, & Demoptolemus,
Et Polybus le sage. Ils estoient de la bande
Qui encores restoit, la force la plus grande.
Ceux qui vivoient encor pour l'ame combatoient
Et pour sauver leur vie : & les autres estoient
Succombez dessous l'arc, & les fleches mortelles,
A eux Agelaüs disoit parotes telles.

Mes amis, son effort s'arrestera en fin,
Et tout ce que Mentor luy a dit sera vain,
Car les voila tous seuls restez entre les portes.
Parquoy n'esbranlons point sur luy nos piques fortes
Tous ensemble à la fois. Six doncques d'entre nous
Dressent premierement la fureur de leurs coups.
Si le bon Iupiter de tant nous favorise
Que nous puissions avoir dessus luy quelque prise,
Et acquérir l'honneur de le ruer à bas,
Des autres puis apres ce sera peu de cas,
Il ne nous faut que luy. A ces mots ils haussèrent
Les bras, & dessus luy tous leurs coups ils dresserent,
Mais Pallas les rendit inutiles & vains.
Car l'un d'eux fit tomber la force de ses mains
Contre le seuil de l'huis, l'autre contre la porte
Vainement reboucha sa partuisane forte,
L'autre de son espieu la muraille frappa.
Ainsi chacun des quatre à leurs coups eschappa,
Ausquels Ulysses dit : Amis, il faut asteure
Que nous dressions nos coups de fortune meilleure
Dessus nos ennemis, qui ont faict leur effort
De nous mettre aujour d'huy les premiers à la mort.
Il dit, & eux soudain les autres regarderent
Et leurs forts ianelots tout à la fois darderent.

LE XXII. LIVRE

Là Demoptolemus d'Ulysses fut persé,
 Et par Telemachus Euryades blessé:
 On vit par le porcher Elatus mort estendre,
 Et par Philatius fut renuersé Pisandre.
 Ces pauvres amoureux le froid paué mordans
 Secouans le iarret, tomberent sur les dents.
 Les autres, de la salle au fonds se retirerent:
 Le Roy donnant sur eux avec les trois, tirerent
 Leurs bastōs des corps morts: puis d'un effort nouveau
 Les autres poursuuans darderent de plus beau
 Leurs iauelots contre eux, que rendit inutiles
 La Deesse aux yeux pers, dompteresse des villes.
 L'un d'eux frappa le seuil, l'autre son dard ficha
 Contre la forte porte, & l'autre deslacha
 Son coup contre le mur. Amphimedon s'adresse
 Contre Telemachus, & à la main le blesse
 L'effleurant, & sans plus le cuir est entamé.
 Ctesippus atteignit sur le bouclier Euma,
 Et un peu le blessa sur le haut de l'espaule:
 Mais le dard outre-passe, & legerement volle,
 Puis chet à terre à bas. Puis les trois compagnons
 D'Ulysses vont encor assaillir les mignons,
 Minerne leur donnoit le courage & l'adresse
 Pour choisir les plus beaux au trauers de la presse.
 Là fut Eurydamas d'Ulysses renuersé,
 Le fort Amphimedon par son fils transpersé,
 Polybus par Euma, & de sa iaueline
 Le bouuier, Ctesippus frappa par la poitrine,
 Puis tout fier de ce coup il luy parla ainsi:
 Audacieux chanteur d'iniures, te voicy:
 Te chastiras-tu point de tes pensees folles?
 Or dy nous maintenant magnifiques parolles

Laisant l'effect aux Dieux, qui sont, comme ie voy,
Plus forts, plus belliqueux, & plus puissans que toy.
Cecy te soit rendu pour digne recompense
Du pié, que de ta grace en ta magnificence
Tu donnas à Vlysses alors qu'il mendoit
En sa propre maison, & qu'il te supplioit.
Il insultoit ainsi sur le Polyther side,
Mais Ulysses encor sur le Damastoride
Un ianelot branla, & le renuersa mort.
Telemachus apres tua par grand effort
Le preux Leocritus, son dard penetre & entre,
Tant le coup fut bien pris, dans le milieu du ventre.
Il chet dessus la face, & en tombant à bas
Du front heurte la terre. Au mesme temps Pallas,
La fille à Iupiter, la guerriere homicide
D'enhault où elle estoit ébranle son Egide.
Leur esprit fut trouble à sa grand resplendeur,
Fuyans par la maison, tous glacez de froideur.
De la mesme façon qu'une troupe farouche
De vaches par les champs, que va piquant la mouche,
En la saison d'Esté vers le temps des longs iours.
Ou, comme on void des monts les Faulcons, les Autours
Fondre sur les oyseaux, descendre à tire d'aisles,
Et sur eux se ietter de leurs serres cruelles,
Des pauvrets poursuiuis les troupeaux éperdus
Fuyans deçà delà par les champs épandus,
Des nues mesme ont peur. L'ennemy ne les quitte,
Les poursuit & les perd, la force ne la fuite
Ne leur seruent de rien, qu'ils n'aillent repaissans
Aumoins pour la plus part le ventre des passans
Qui ont part à la proye: Ulysses en la sorte
Et ses gens se iettoient sur la triste cohorte

LE XXII. LIVRE

Des pauvres poursuivans. Par pieces les hachotent,
Et par tous les endroits du chasteau les cerchoient.
Ils iettoient de grands cris souz les grāds coups d'espee,
Et de leur sang estoit la salle dētrempee.

Lors Liodes l'un d'eux faisant l'humble & le doux,
S'en vint à Ulysses, & tenant ses genoux,
Ie te prie, Ulysses, par tes pieds que i'embrasse,
Disoit-il en criant, fay moy mercy & grace,
Ayes égard à moy: car nulle ne sera
Des femmes de ceans, qui me condamnera
D'avoir commis chez toy desordre ou insolence,
Te s'noignera plus tost que i'ay de ma puissance
Tasche de moderer leurs folles actions,
Mais ils ont méprisé mes admonitions,
Vne vie menans que i'ay fort detestee,
Aussi ont-ils la mort qu'ils ont bien meritee.
Moy donc qui n'ay rien faict, n'estant que seulement
Leur augure & deuin, mourray-je pauvrement?
N'y a-t'il point pour moy de pitié ny de grace?
Fault-il que leur forfait mon innocence efface?
Ulysse, apres l'avoir longuement escouté,
D'un regard de travers, puis que tu as esté
Leur augure, dit-il, il ne se scauroit faire
Que tu n'ayes porté faueur à leur affaire,
Leur disant que iamais ie ne retournerois,
Te flattant en ton cœur que tu débaucherois
Ma femme bien-aimée, & en aurois lignee.
Doncques dedans ton sang ma main sera baignee,
Tu ne chapperas point. Ce disant, il saisit
Une espee aussi tost, que contre terre il vit,
Qu'Agelaius mourant laissa choir par la salle:
Il la hausse sur luy, & du coup qui deuale

Luy fend la teste en deux, comme encore il parloit
Il tombe sur la place, & son sang se mesloit
Versé par les carreaux, avecques la poussiere.

Le chantre Phamius fuit sa main meurtriere,
Luy qui parmy ces gens auoit tousiours chanté,
Mais c'estoit par contrainte, & de necessité.

Pres la porte il tenoit sa douce reuse lire
En grand' perplexité, & ne scauoit que dire,

Ou s'il deuoit sortir & gagner vistement

L'autel de sa maison, sacré deuotement

Au puissant Iupiter, où Laërte & Ulysse

Auoient accoustumé de faire sacrifice

Et bruler les bœufs gras : ou s'il se ietteroit

Aux genoux d'Ulysses, & luy demanderoit

La vie. En cet estat il craint, il doute, il tremble :

Mais le dernier aduis plus à propos luy semble.

Il pose incontinent en bas son lut vulté,

Entre les vases d'or gentiment l'a bouté,

Et le buffet cloué de marques argentees.

Puis ayant les deux mains à ses genoux iettees,

Il le prioit, disant : Ie te prie, ô grand Roy,

Fay moy misericorde, & ne pren garde à moy,

Car si tu mets à mort vn chantre en ta furie

Tu en auras vn iour regret & fascherie :

Ie chante pour les Dieux, & au contentement

Des hommes d'icy bas : Ie suis aucunement

En la musique expert, i'ay assez de science,

Et Dieu a mis en moy en tresgrande abondance

Toute sorte de vers, mesme asteure, ie croy

Chanter deuant vn Dieu en parlant deuant toy :

Ne me tue donc pas. A tesmoin i'en appelle

Ton fils Telemachus, que dans ta maison belle

LE XXII. LIVRE

Je ne suis point venu de bonne volonté
 Pour y manger ton bien, ne pour nécessité,
 Mais pour donner plaisir, & d'un air delectable
 Resjouyr ces messieurs quand ils estoient à table:
 Lesquels m'ont faict venir par contrainte chez toy,
 Car ils estoient plus forts & plus puissans que moy.
 Telemachus oyant luy tenir ce langage,
 A son pere rendit pour luy ce tesmoignage.
 Retient a main, mon pere, & ne la iette point
 Sur le sang de cet homme innocent de tout poinct:
 Sauuons aussi Medon le Heraut honorable,
 Qui m'a tousiours aymé, m'a esté fauorable,
 A eu tout soin de moy dès que i'estois enfant.
 Si d'auenture au moins Eumæus en tuant,
 Ou bien Philetijs, ne l'ont par malencontre
 Adans cerchans par tout trouue à la rencontre,
 Ou peut estre toy-mesme. En ces termes il dit,
 Et le sage Medon clairement l'entendit.
 Or s'estoit il caché en vn bout de la salle,
 Souz vn banc, effroyé blesme, tremblant & pasle,
 S'estant enueloppe tellement-quellement
 Dedans la peau d'un bœuf écorché fraischement.
 Aussi tost il se leue & iette en diligence
 La peau de iessus luy, aux genoux il se lance
 Du Roy Telemachus, puis le prioit ainsi.
 O mon fidelle amy, retien les, me voicy,
 Je me vien rendre à toy. Helas, dy à ton pere
 Qu'il ne me vueille point tuer en sa colere,
 Debile que ie suis, irrité iustement
 Contre ces gens icy, qui trop insollement
 Ont ruiné son bien, ne t'ont en son absence
 Porté comme ils deuoient honneur & reuerence.

Lors en se souriant le Roy luy dit ainsi.
Assure toy, Medon, ne crain point, cestuicy
T'a sauue pour le coup: seulement pour t'apprendre,
Et qu'aux autres aussi tu le face entendre,
Qu'il vaut mienx faire bien que mal: mais quād à vous
Sortez vn peu dehors & vous tirez des coups:
Tant Phæmius que toy, attendant que i'acheue
Ce qu'il faut que ie face. A ces mots il se leue
Et le chantre avec luy, sortent sans s'arrester,
Et courans embrasser l'autel de Iupiter,
Ils s'asseent aupres. Regardent en grand creinte
N'attendent que la mort: tant ils ont l'ame atteinte
De frayeur & d'horreur. Ulysses cependant
Alloit par la maison visitant, regardant,
Si quelqu'un seroit point dessous quelque escabelle
Musse, pour rechapper son espee cruelle.
Mais il les voyoit tous dedans leur sang veantrez
Couchez par la poussiere, & de grands coups outreZ
Estendus par la place & de façon semblable,
Que quelquesfois on voit les poissons sur le sable
Hors de la mer tireZ, & ça & là espars
Par le pescheur, iettant ses reZ de toutes pars,
Ils ne voudroient que l'eau, car c'est leur auantage,
Mais le pescheur les à ietteZ sur le riuage,
Et le soleil les à dessecheZ tellement
Qu'il les à deponilleZ de vie entierement.
Ils estoient tout ainsi. Quand tout fut fait, Vlysse
Dit à Telemachus, fait venir la nourrice,
Ie luy veux dire vn mot. Il n'eut pas si tost dit,
Que le fils aussi tost à son pere obeit,
Deuerrouille la porte, & Euryclee appelle,
Descen tost, luy dit il, ô nourrice fidele,

LE XXII. LIVRE

Qui as bien observé les femmes de ceans,
 Sur elles as eu l'oeil, car mon pere est leans
 Qui veut parler à roy. La parole estant ditte
 Qu'elle ouyt clairement, elle deloge viste,
 Descend, ayant ouvert la porte au paravant.
 Mais son Telemachus alloit tousiours deuant.
 Quand elle fut venue, elle voit par la sale
 Ulysses, & de sang & de poussiere sale
 Environné de morts, semblable entierement
 A un lion cruel, qui vient expressement
 Pour rencontrer sa proye, & de sa furie
 Sur un gras beuf, passant de nuit par la prairie
 On luy voit haleter superbement le flanc
 Sa moustache, ses dents se rougissent de sang,
 Ses pieds, son estomac sont sanglans au possible,
 Et son regard hydeux est encor plus terrible:
 Tel estoit Ulysses des pieds des mains sali
 Du sang qui regorgeant estoit sur luy ialy.

Quand la nourrice vit ce massacre effroyable.
 Ce sang par tout espars, & le nombre admirable
 Des corps morts estenduz, elle ne peut parler
 Et ne put seulement que se prendre à hurler.
 Mais Ulysses la prend, la retient, la console,
 Et en la reprenant luy dit ceste parolle.

Resiouy toy plustost ma mere, ie te pry
 Ne pleure davantage, ains modereton cry
 Car ce n'est pas bien faict, de lamenter, de pleindre,
 Des homes que les Dieux (lesquels ils n'ot peu craindre)
 La parque iusticiere & leur mechaneetez
 Ont au dernier trepas, de droict, precipitez
 Ils ne portoient respect, honneur ny reuerance
 A bons n'y à meschans, & leur intemperance

Est cause de leur mal, & tu les vois icy
Accoutrez comme il faut. Or monstre moy aussi
Les femmes de ceans, qui trop desordonnees
Auecques ces vilains se sont mal gouuernees,
M'ayans des-honoré par leur train eshonté.
Certes ie te diray la pure verité
Respond Euryclea Cinquante chambrieres
Sont dedans ta maison toutes bonnes ouvrieres
Car ie leur ay monstré comme il faut traiailler,
Souffrir la seruitude, & filer, & veiller,
Douze de celles là se sont mal gouuernees,
Se sont aux poursuiuans salement adonnees,
M'ont faict du des-honneur, mon espoir ont trompé,
N'ont respecté aucun, non pas Penelopé
Ton fils Telemachus s'est faict depuis naguere
Vertueux & puissant, mais toutesfois sa mere
N'a iamais trouué bon qu'en rien il se meslast
De ses femmes ceans, ne quil leur commandast.
A propos permets moy, ô magnanime Ulysse
Que ie te monte la haut & que ie l'aduertisse:
Car elle est endormie, & ie croy qu'un des Dieux
Benin luy à transmis ce sommeil gracieux.

Non, ne l'eueille pas, mais fay venir les femmes
Luy dit il, qui ont faict ces saletez infames.

La vieille incontinent s'en alla les chercher,
Et pour reuenir tost se hasty de marcher.

Mais luy s'en retournant à ses amis feables,
Et à Telemachus, leur tint propos semblables
Commencez moy d'oster ces charognes d'icy
Aux femmes de ceans faictes le faire aussi
Enuoyez les à l'eau, & qu'elles me nettoient
Cestables & ces bancs, toutes qu'elles s'employent

LE XXII. LIVRE

Des sponges des mains, tant que tout soit lavé.
 Puis si tost que cela sera parachevé
 Qu'on me tire dehors ces chiennes detestables
 Et entre le donion, & la court des estables
 Baillez leur tant de coups que vous leur arrachiez
 La vie à coups d'espee, & ainsi estanchiez
 Leurs ribaudes chaleurs, de leur incontenance
 Leur ôstent pour jamais l'entiere souvenance.
 Il n'eust pas achevé, qu'on voit ensemblement
 Ces femmes arriuer criants amerement,
 Faisans de grands regrets, iettans force pleur tendre.
 Elles vont ces corps morts tout premierement prendre,
 Les emportent dehors, les mettent en un tas
 Au dessous du portail, aupres d'un galetas,
 S'entraydans l'une l'autre. Vlysses fort les presse,
 Elles font son vouloir de crainte & de detresse,
 Portent apres force eau: vont frottans, vont lavans
 Des mains & de l'esponge, escabelles & bancs
 Et tables & tresteaux, & du tout les nettoient.
 Le porcher, le bouvier, & Telemach balayent
 Les ordures apres & elles les portoient,
 Et hors de la maison en un coin les iettoient.
 Apres que tout fut net: soudainement ils prennent
 Les femmes, & dehors du logis les entraînent,
 Et entre le logis & le donion vont é
 Les serrent pres à pres, comme il auoit esté
 Enioint par Vlysses, leur estant impossible
 D'en sortir nullement. Lors d'une voix terrible
 Telemachus leur dit, ie ne vous turay pas
 D'une mort honorable, & si mon coutelas
 Ne boira vostre sang, qui m'avez, orgueilleuses,
 Si fort d'eshonore, qui n'avez malheureuses

A ma mere porte l'honneur que vous deuiez,

Mais avec ces mechans trop d'acointance auiez.

Quand il eut dict, il prend des cordes de nauire
Et leur met dans le col, & les guinde & les tire
En haut aux solineaux, tant qu'elles n'auoient pas
Le moyen de toucher des pieds en terre à bas
De la mesme façon qu'on void les tourterelles
Les ramiers, les bisets, se debastre des ayles,
Et dedans les rameaux des boccages pendus
Se demener aux lacs qu'on leur auoit tendus:

Ainsi les voyoit on, les cordes effroyables

Attachees au col, pendiller miserables,

Secouer le iarret, & pauurement mourir.

Cela faict, ils s'en vont Melanthius querir,

Luy coupent d'un cousteau le nez & les oreilles,

Et luy font endurer des douleurs nonpareilles.

Luy arrachent apres les parties d'embas

Tout viuant qu'il estoit, les iettent pour repas

Aux chiens et aux mastins, par morceaux les decompēt

Et bras & pieds & mains de colere luy couppent,

Auant que de mourir. Apres s'en vont lauer

Et les mains & les pieds, puis viennent retrouver

Ayant tout acheuē, dedans la sale Vlysse,

Lequel les ayant veus, appelle la nourrice.

Aporte moy du soufre & de l'ardant braZier,

Afin, ce luy dit il, d'oster le mauuais air,

Et parfumer la sale, & puis apres appelle

Soudain Penelopē, mon esponse fidelle,

Qu'elle descende en bas & les femmes aussi

Qui sont en la maison: fay venir tout icy.

C'est tres-bien dit, mon fils. Le vay querir au reste

Vn vestement qui soit vn petit plus honnestē

LE XXII. LIVRE DE L'ODYSSEE.

Que ceux cy que tu as. Car de te voir seant
Chestoy, en ces haillons, il n'est pas bien seant
Mais Ulysses luy dit. Avant cela, ma mere
Ayons plustot du feu. Adonc elle obtempere,
Aporte soufre & feu & Ulysses alors
Parfume la maison & dedans & dehors.
La vieille de rechef, la nourrice fidelle
Monte aux chambres en haut, & les femmes appelle
Elles incontinent en haste descendoient,
Portans flambeaux en main qui grand clarté rendoiēt.
Lors autour d'Ulysses en foule elles s'amassent,
L'environnent par tout, le baisent & l'embrassent,
Et teste, & corps, & mains. Alors un doux plaisir
De souspirs & de pleurs embraza son desir,
Et ne se put tenir de le faire paroistre
Dans le mesme moment qu'il les put recognoistre.

Fin du vingtdeuxiesme liure.



LE VINGTTROISIEME LIVRE DE L'ODYSSEE D'HOMERE.

ARGUMENT.

EN fin apres avoir longuement dilayé, & l'auoir esprouué, Penelopé recognoist Vlysses. Les discours d'eux deux. Vlysses luy faict vne recapitulation de tous ses erreurs. Il couche avec Penelopé: luy dit les traueses qu'il luy conuient encor souffrir. Le iour aprochant il se leue, s'arme, & avec Telemachus, Eumæe & Philetijs, sort de la maison & va trouuer aux champs son pere Laërtes.

AUTRE SOMMAIRE.

*Vlysse est recogneu de sa Penelopée,
Ayant bien delayé, craignant d'estre trompée.*

LA vieille cependant se hastoit de monter
Tressaillant de plaisir: afin de rapporter
A sa Penelopé les premieres nouvelles
De son mary venu: ses pieds auoiēt des ayles,
Et d'ayse, ses genoux ne trembloient nullement,
Estant à son cheuet, Leue toy vistement,
Ma fille, & t'en vien voir la nouvelle assurée
Que tu auois le plus au monde desirée,

LE XXIII. LIVRE

Ulysses est venu, le voila de retour
 Ches luy, tout tard qu'il est, il a faict un bon tour
 A tes bons amoureux, dont l'insolence extreme
 Ne respectoit personne, & non pas ton fils mesme,
 Qui mangeoient tout ton bien, ruynoient ta maison,
 Sans cesse t'atristoient, il en a eu raison,
 Il les a tous tuez. Lors la femme d'Ulysse:
 Certes les Dieux t'ont mise, ô ma bonne nourrice
 Hors de ton bon esprit: ils peuvent aysement
 Mesmes aux plus prudents, oster l'entendement
 Et a qui radoient donner sens & prudence
 Comme toy qui auois sagesse en abondance,
 Et as presentement le cerueau renuersé
 Pourquoi me troubles tu l'esprit, ià trop pressé
 D'ennuis & de douleurs, me paissant de mensonges
 Et me viens destourner de mes gratieux songes,
 Et d'un si doux sommeil, dont le paisible effort
 Aux yeux m'auoit colé les paupieres si fort,
 Que ie n'auois depuis le iour tant lamentable
 Qu'Ulysses s'en alla contre le non nommable
 Il ion guerroyer, dormy si fermement
 Mais oste toy d'icy, redescen vistement,
 Si vne autre que toy auoit esté si folle
 Que de m'entretenir de si sotte parolle
 Et de me reueiller, ie luy ferois sentir
 Que c'est, de me venir effrontement mentir:
 Mais toy pour ceste fois la vieillesse t'excuse:
 A qui Euryclea certes ie ne t'abuse
 Ma fille, ie dy vray, Ulysses est venu,
 Et pour te dire plus, c'est cest homme incognu
 Quel'on mesprisoit tant, nul n'auoit cognoissance
 De luy, que ton fils seul, qui de grande prudence

Onc ne

Onc ne la decouvert, mais comme ils pretendoient
De punir ces galants, eux seuls en attendoient
Et le temps & le point. Lors de grande allegresse
Du liect | aut la Reyne, embrasse, estreint & presse
En ses bras la nourrice, & de ioye pleurant
Luy alloit à plaisir ces propos proferant.

Le te pry, dy moy vray, ô ma chere nourrice,
Dist tu la verite, est il venu, Ulysse?

Helas ! comme a til peu tuer tous ces mechans
Luy seul, ven qu'ils estoient infinité de gens?

Je n'ay point veu comment, respondit Euryclee,
I'ay seulement ouy comme vne voix troublee
De gens qui souspiroient comme s'on les tuoit:
Nous ne pouvions rien voir, pour ce qu'on nous avoit
Enfermees deuant qu'on fit ce sacrifice:

Ton fils me vint apres appeller, car Ulysse
Luy avoit commandé. Sortant donques dehors
Je le voy là debout entre tous ces corps morts
Et eux autour de luy estendus par la place,
Dedans leur sang veantrez & couchez sur la face:

Tu eusses pris plaisir emerueillable, si
Tu l'eusses veu de sang tout degoutant, ainsi
Qu'un genereux lion. Ceste pauvre ieunesse
Est dehors en un tas, & luy plein d'allegresse
Parfume la maison pour purifier l'air,
Et m'enuoye deuant afin de t'appeller,
Vient'en donc vistement, que tu te reiouisse
A la fin à ton ayse avec ton cher Ulysse,

Et luy avecques toy, & vous recompensez.
Du passé, vous avez eu des ennuis assez
Or les voila finis, vos souhaits sont asteure
De tout point accomplis: il est à la bonne heure

LE XXIII. LIVRE

Vif de retour chez luy, contant & triumpbant
Il vous a trouvez vifs & toy & ton enfant,
Et de tes poursuivans qui enfle d'arrogance
Te faisoient mille ennuis, il a fait la vengeance.

Et Penelope encor. Ne me dy point cecy
Ie te pry, ma nourrice, & ne te moque ainsi:
Car, & tu le sçais bien, la verité est telle
Qu'il peut venir toujours en son Ithaque belle
Bien recueilly de tous, & principalement
De moy & de son fils qu'il ayme uniquement
Et nostre enfant commun, mais qu'il soit veritable
Qu'il ayt tué ces gens, c'est vne pure fable,
C'est plustost quelque Dieu d'entre es immortels
Prouoque iustement de leurs actes cruels,
Esmeu de la douleur des maux & des iniures
Que nous faisoient ceans ces lasches creatures:
Car ils n'auoient respect a quelconque estranger
Soit bon, ou soit mauuais qui vint ceans loger
Il les a donc payez de toute leur malice,
Ils ont eu le loyer merité: mais qu'Ulysse
Soit venu, c'est à toy certes mal entendant,
Il ne peut reuenir pour ce qu'il est perdu.

Lors elle. Qu'as-tu dit, chere Penelopée,
Quelle parolle t'est de tes dents eschappée?
Que dis tu d'Ulysses? Qu'il ne reuiendra pas,
Qu'il est mort, & perdu? & le voila la bas
Assis auprès du feu, ou de l'encens il brule:
Tu as certainement l'ame trop incredule,
Que si ie t'en disois signe tres-euident?
N'a til pas dessus luy vne marque de dent
De sanglier? l'autre nuit ie l'auois recognue
En luy lavant les pieds. S'il ne m'eust retenu

Tu l'eusses sceu deslors, mais soudain il me mit
Les deux mains sur la bouche, & iamaïs ne permit
Que ie disse vn seul mot, tant fut sa preuoyance
Extresme à se celer. Or vien en diligence,
Et si ie ne dy vray, ie seray avec toy
Pren moy, fay moy mourir, fay en somme de moy
Tout ce qu'il te plaira. Lors la femme d'Ulysse,
Il t'est fort malaysé, ô ma chere nourrice
Que des Dieux immortels qui n'ont commencement
Tu scaches les secrets, fust ton entendement
Cent fois encor meilleur. Allons à la bonne heure
Toutesfois voir mon fils, & si c'est chose seure
Que ces mechans soient morts, nous les verrons aussi
Et qui les a tue. Parle qu'elle eut ainsi,
Elle descend en bas: mais sa douce pensée
Est merueilleusement de troubles balancee,
Si se tenant de loïn elle interrogeroit
Celuy qu'elle aymoit tant, ou si elle courroit
A luy les bras ouuerts, & sur la mesme place
Elle luy baiseroit & les mains & la face.

Estant entree, ayant passé entierement
La porte, elle s'en vint metre oppositement
Vis à vis d'Ulysse, vers le paroy contraire
Où le feu allumé iettoit sa splendeur claire.
Ainsi Penelopé bonnement ne scauoit
Ce qu'elle deuoit faire, & vn grand trouble auoit:
Et luy contre vn pilier deuers la cheminee
Se tenoit appuyé, la veue en bas, tournée
Encontre les carreaux, pour voir ce que feroit
Son épouse fidelle, & s'elle parleroit
Sans rien dire, vn long temps elle se tint assise
De grand rauissement son ame estoit surprise,

LE XXIII. LIVRE

Et en le regardant tantost elle pensoit
 Le recognoistre bien, puis cela la laissoit
 Regardant ses haillons, & ne scauou que faire
 Adonc son fils luy dit : mere, facheuse mere,
 Tant tu as le cœur dur, te veux tu reculler
 De mon pere tousiours ? ne veux tu point aller,
 Le recevoir en fin ? qu'est-ce que tu ne sonde
 Pour le moins si c'est luy. Je ne scay femme au monde
 Qui fist cela que toy, qui se pust abstenir
 D'aller a son mary, le voyant reuenir,
 Après auoir sauné sa vye demenee
 De mille aduersitez dans la vintiesme annee.
 Mais pour certain ton cœur est plus dur qu'un rocher.
 A qui Penelope. Helas ! mon fils tres-cher,
 J'ay le cœur si perplex, & ie sens ma pensee
 Si merueilleusement de doubte trauessee
 Que ie ne puis parler, ne me puis hazarder
 De m'enquerir de luy, non pas le regarder.
 Mais s'il est Ulysses, & que tel il te semble,
 Nous nous cognoistrōs bien quād nous serons ensemble,
 Et si sera meilleur, par ce que nous auons
 Des signes entre nous, & des marques scauons
 Que personne ne scait. Elle acheua de dire,
 Et Ulysses se prit en soy mesme à sourire,
 Puis à Telemachus : mon fils donne congé
 De venir à ta mere, affin qu'ayant songé
 Comme il me faut sonder elle me recognoisse.
 C'est pour ce que ie suis couuert de crasse espesse,
 Rompu & déchiré, qu'elle faict peu de cas
 De son pauvre mary, & presques ne peut pas
 Confesser que c'est moy : mais auant tout affaire
 Aduisons entre nous ce que nous deuons faire,

Et conseillons nous bien: car il est apparent,
 Si quelqu'un tue un autre en quelque different
 Encore qu'il ne soit de bien grand parentage,
 Ses amis soient petis, & nul ne le soulage,
 Qu'il faut que le meurtrier s'en fuye du pais,
 S'absente de chez luy, delaisse ses amis:
 Et nous auons tué la force de la ville,
 La fleur de la iunesse & les premiers de l'isle
 Je suis d'opinion d'aduiser quant à moy
 De nous resoudre bien. Mon pere, c'est à toy
 Respond Telemachus, & à ta diligence,
 D'y bien remedier: tu passes en prudence,
 En aduis, en conseil le reste des humains:
 Les bons expediens tu les tiens en tes mains.
 Tu scais pouruoir à tout c'est le bruit qu'on te donne
 Et c'est à tres-bon droit. Partant, commande, ordonne
 Nous executerons brauement, & verras
 Que nous ne manquerons à ce que tu diras.

Orie te diray donc, luy respondit son pere,
 Tout cela qu'il me semble estre meilleur de faire.
 En premier lauez vous, & vous parez aussi
 De vos plus beaux habits, faictes en faire ainsi
 Aux femmes de ceans, puis que l'on voise dire
 Au chantre Phemius de iouer de sa lire
 Et qu'on chante, & qu'on danse, & au feu qui reluit
 En sautant, en courant on face force bruit,
 Afin que les voisins, ou ceux qui d'auanture
 Passeront pres d'icy entendans ce murmure
 Presument que lon faict quelques nopces ceans,
 Et qu'on ne sache point qu'on a tué ces gens
 Qu'on n'oye rien de nous, ny de ceste deffaite,
 Que n'ayons faict premier aux champs nostre retraite:

LE XXIII. LIVRE

Puis quant nous y serons on se conseillera
Selon l'expedient que Lien nous donnera.

Eux tout incontinent son aduis aprouuerent
Et luy obeissans, soudain ils se lauerent,
Prirent leurs beaux habits, & les femmes aussi
Scachants sa volonte, en firent tout ainsi.
Puis le chantre diuin prit sa lire voutee,
Mainte chanson dessus à iouee & chantee
Et chacun d'eux sautant au feu qui reluysoit
Des pieds & de la voix grande rumeur faisoit
Hommes, enfans, garçons, tout estoit à la danse
Si que quelcun passant, oyant la resonnance
De dehors, dit ainsi: à ce coup pour le seur,
De la Reyne quelqu'un se rend le possesseur,
Quelqu'un s'en va iouir du tresor desirable
Que tant de gens cherchoient: Chetifue & miserable,
Qui n'a pas eu le cœur d'acheuer tout à faict
Le beau commencement qu'elle auoit si bien faict:
De garder la maison & la mesnagerie
De son premier mary tant qu'il seroit en vie.

C'est ainsi qu'il parloit, de colere poussé
Mais il ne scauoit pas ce qui s'estoit passé.

Tandis Eurynomé la gouuernante habile
Laua d'eau Vlysses, & de precieuse huyle
Luy delassa le corps: puis sur luy vistement
Letta vn magnifique & riche vestement
La deesse Pallas luy rendit lors la face
Plus pleine de beauté, plus tendue & plus grasse,
Sur sa teste friza ses cheueux blon-dorez,
Comme les belles fleurs par les prez peinturez:
Ne plus moins qu'on voit l'industriex orfeure
Qui met l'or precieux avec l'argent en œuvre,

Que Vulcan, que Pallas ont instruit tout à fait
Pour rendre de tout point un ouvrage parfait:
De la mesme façon Pallas donna la grace
Au maintien d'Ulysses, & versa sur sa face
Et ieunesse & beauté, en equippage tel
Il sort du bain, semblable à un Dieu immortel,
Et rentrant dans la sale il retourne reprendre
Sa place, & vis à vis de sa femme se rendre.

Pauvre femme, dit il, certes les puissants Dieux
Qui d'un estre eternal habitent sur les Cieux,
T'ont bien formé le cœur plus dur plus intraitable,
Qu'autre femme qui viue en la terre habitable.
Ie n'en sçache que toy qui se pust abstenir
D'aller voir son mary le voyant reuenir
Après auoir sauué sa vie, pour menée
Par mille aduersitez, dans la vingtiesme année.
Nourrice fay mon liét, que ie m'aille coucher,
Le cœur de ceste cy est plus dur qu'un rocher.
Pauvre homme que tu es, ie ne suis si legere,
Luy dit elle, d'aller si viste faire chere
Ny caresser un homme, aussi ne suis-ie pas
Si pleine de dedain, que de ne faire cas
Des hommes de respect. Mais i'ay bonne memoire
Quel homme tu estois, quand dessus l'onde noire
Tu montas pour aller à Troye guerroyer,
Abandonnant Ithaque & ton propre foyer,
Toutefois, Euryclée, accour tost & t'aduançe,
Va luy dresser son lit en toute diligence
Hors la chambre la haut, que luy mesmes a fait,
L'ayant dehors dressé, iettez coïste & cheuet
Et des linceux dessus, & force couuerture,
Qu'il ne puisse sentir nullement la froidure.

LE XXIII. LIVRE

Par ces mots, son mary prudente elle tentoit
 Mais luy, prompt à ce coup, grandement s'irritoit
 Et crioit, luy disant. Quelle triste nouvelle
 Est-ce que tu me dis? qui auroit force telle
 Que de pouuoir oster mon lit hors de son lieu?
 Non pas le plus expert, non pas mesmes un Dieu
 S'il l'auoit entrepris, n'en auroit pas l'adresse,
 Homme tant fust il plein de force & de ieunesse
 N'en pourroit pas venir à bout facilement.
 Pour ce que i'y ay faict moy mesme expressement
 Les marques qui y sont. Vne branche espendue
 De feuilles d'olinier y estoit estendue
 Florissant, verdissant grosse comme un pilier
 Je mys mon chalit contre, & le voulus lier
 Industriusement au contrefaict branchage,
 Tant que i'eusse parfaict entierement l'ouurage
 Puis ie l'environnay de cartiers bien polis,
 Le couury par dessus, l'enfermay de bons huis
 Apres grauy dessus comme vne rame vine
 De feuillars recourbez de verdissant oline,
 Et le tronc entaillé proprement au ci & eau
 Poli mignonement, rabotay au niveau
 Tout le bois du chalit, perçay chasque mortaise,
 Afin que les tenons entrassent à leur ayse.
 Le lit fut par moy seul non par autre graué
 Ne le laissant, que tout ne fust paracheué,
 Le diuersifiant d'or, d'argent, & d'inoire
 D'art si industrieux que lon ne scauroit croire
 Puis, le tout fut par moy d'un cuir de beuf encoint
 Paré, resplendissant, en ecarlatta teinte.
 Voicy, iet en ay dit l'indice sans fallace,
 Et ne scay si mon liect est encor en sa place,

Ou si quelqu'un pourroit l'en auoir arraché,
L'auroit porté ailleurs, & l'olurier tranché
Embas par la racine. A ces propos la Reyne
Sentit troubler son cœur d'emotion soudaine,
Les genoux luy craquoient. C'estoit la verité
Tout cela qu'Ulysses luy auoit raconté.

A donc fondant en pleurs, de io, e transportee,
Elle court l'embrasser, chaque main a ietee
A l'entour de son col, luy baise mille fois
Et la bouche & les yeux, puis de tremblante voix:

Ne te courrouce point, Ulysses, tu abonde
En sagesse & prudence autant qu'homme du monde,
Tu as du iugement. Or les tout-puissans Dieux
Ne nous ont pas permis, sur nostre aise ennieux,
De demeurer ensemble en nostre grand' ieunesse,
Mais nous ont trauersé & iusqu'en nostre vieillesse.
Ne te fasche donc point, & ne m'accuse pas
De ce que ie n'ay faict en premier vn tel cas
De toy que ie deuois, que ie ne suis couruë
Vers toy pour t'embrasser dès la premiere veuë,
Pource que i'ay ioussours merueilleusement craint
Que l'on ne me trompast de son & vn semblant feint,
Tant y a de trompeurs & d'affronteurs au monde.
Iamais la belle Helene à la perruque blonde
Son amitié n'eust mise au coursaire Paris,
S'elle eust sceu que les Grecs de cet affront marris
L'eussent deu ramener encor' en sa patrie:
Quelque Dieu luy ément ceste forcenerie,
Ne luy faisant preuoir en son entendement
Les maux qu'en sentirons, elle premierement,
Et nous tous puis apres, par ses malheureux vices.
Mais puis que tu m'as dit les assurez indices

LE XXIII. LIVRE

De nostre liēt commun, qu'au monde nul n'a veus,
 Mais toy tant seulement & moy les auons sceus,
 Et la seule Aētoris la seruante secrette
 Qui garde de tout temps l'huis de nostre chambrette,
 Celle que me donna partant de la maison
 Mon cher pere Icarus, ie suis par la raison
 Amenee à te croire, & force est de me rendre
 Où ma durté n'a peu me faire condescendre.
 Elle disoit ainsi, & un plus fort desir
 De pleurer, tout à fait vint Ulysses saisir:
 Il pleuroit tendrement de ioye en son courage
 De se voir vne femme & si chaste & si sage.
 Comme ceux que Neptune a long temps agitez
 Espars decà delà sur les flots irritez
 A qui les vents cruels ont fait mortelle guerre,
 Ont brisé leur vaisseau, voyent en fin la terre
 De grande auidité, mais peu s'accourageans
 D'entre eux, à la parfin se sauuent en nageans,
 Et viennent au riuage avec grande allairesse
 Couuerts de la salure & de l'escume espaisse:
 Avec vntel plaisir Penelope pressoit
 Ulysses entre ses bras, le serroit, l'embrassoit,
 De tous costez son col, ses mains, sa bouche assiege,
 Et n'en peut pas tirer ses bras blancs comme nege.
 Et l'Aurore les eut trouuez encor pleurans,
 Si Pallas la Deesse aux yeux pers éclairans,
 N'eust pensé à leur fait, retenant dauantage
 La nuit dessus la terre, & fermant son passage,
 Et l'Aurore gardant souz l'Ocean là bas
 De peur qu'elle sortist, & ne permettant pas
 D'atteler à son char ses cheuaux aux pieds vistes
 Lampus & Phaëton, ny sortir de leurs gestis.

Adoncques Vlysses rompant ce doux repos
Vint à Penelopee entamer ces propos.

O femme, ce n'est pas la fin de nos miseres,
Nous aurons bien encor du mal & des affaires,
Il me reste à passer des hazards bien diuers,
Le bon Tiresias me le dit aux enfers
Lors que i'y descendy, pour dessus le passage
De mes gens & de moy entendre son presage.

Mais allons nous coucher, afin que nous passions
Le reste de la nuit, & nous resiouyssions

Souz le plaisant sommeil. Alors l'Icarienne,

Toutes & quantes fois que la volonté tienne

Sera de te coucher, ton lit sera dressé,

Puis que les Dieux beninst'ont si bien adressé

Que de reuoir en fin ta maison desirable,

Et d'estre retourné en ta patrie aymable.

Mais si tu sçais, & Dient' a voulu aduertir

De ce qu'il te conuient par cy apres patir,

Cy auroit danger aussi que ie le sceusse?

Ne seroit-il pas mieux que tu ne me le teusse?

Raconte le moy donc. A ces mots Vlysses.

Pourquoy me presses-tu, pauvrette que tu es,

De te dire cela? Estu si curieuse

Que de vouloir sçauoir ma fortune ennuyeuse?

Ie te la diray donc contentant ton desir,

Encor que toy ny moy n'y aurons grand plaisir.

Le Prophete me dit qu'il falloir que i' allasse

En pays fort loingtains, & que ie me melassse

Parmy peuples diuers, & n'oubliaisse point

Vn airon en main, le portant en ce poinct

Tant que i'eusse attrapé des terres ignorantes

Du faict de la marine, & des barques courantes.

LE XXIII. LIVRE

Sur le profond des eaux, n'ouyrent onc nommer
Ce qui faict les vaisseaux voler dessus la mer,
Cordages, aurons, rames, & voiles belles
Qui poussent le nauiue, & qui luy seruent d'aïles,
Et ne sçauent que c'est que de saller la chair.
Et qu'en continuant, me dit-il, à marcher,
Viendra quelqu'un vers moy, qui dira que ie porte
Un gentil euentail sur ton espaule forte,
Nommant ainsi ma rame : en terre il conuiendrait
Ficher mon airon, & puis il me faudroit
Soudain sacrifier à Neptun fils de Rhee,
Un agneau, un sanglier à la bure miree,
Et en un Toreau encor. Puis il me dit ainsi,
Qu'il me faudroit de là m'en reuenir icy,
Où ie sacrifirois à la troupe immortelle
De tous les Dieux du Ciel, une hecatombe belle.
Et que la mort debile en fin m'attrapperoit
Du costé de la mer, d'un qui me frapperait,
Mais que ce ne seroit qu'en extresme vieillesse,
Et mon peuple viuroit en paix & en liesse.
Voila comme il me dit ma mort & mon destin,
Et ce qui me deuoit aduenir pour certain.

Puis que les puissans Dieux, dit la sage Princesse,
T'asseurent d'arriuer en extresme vieillesse,
Nous deuons esperer que tu te sauueras
Des dangers que tu cours & les eschapperas.

Pareils discours tenoient Penelope & Ulysse.
Tandis Eurynomé & la vieille nourrice
Dressoient le lit en hault, aux rais, à la clarté
Des torches & flambeaux? quand tout fut apresté
La vieille se retire, & l'autre chambriere
En leur chambre les mene & porte la lumiere

Leur éclairant deuant. Entrez dedans qu'ils sont
Elle se retira: & eux soudain s'en vont
Renoueller le droit & reprendre le gage
Des anciennes loix du premier mariage.

La danse au mesme temps commença de cesser,
Eumae & le bouvier quitterent le danser,
Si fit Telemachus, & lassé s'endormirent,
Et le mesme apres eux toutes les femmes firent.

Mais le Roy & sa femme ayans à grand plaisir
De mille embrassemens contenté leur desir,
Se remirent encor' aux discours, aux paroles.
La Reyne luy contoit les insolences folles
Que ces Princes auoient faictes en sa maison,
Consumans tout son bien, égorgeans sans raison
Ses vaches, ses brebis, mettans ses vins en perse.
Vlysses luy narroit sa fortune diuerse,
Comme à beaucoup de gens il auoit apporté
Du mal, de la trauerse, & que de son costé
Il n'en auoit eu faute, & la fille d'Icare
En ses discours prenoit vn contentement rare,
Et son œil ne fut onc de sommeil agraué,
Ne se laissa fermer qu'il n'eust tout acheué.

Son commencement fut, comme au partir de Troye
Il mit quelques citez des Cicones en proye
Comme il vit puis apres estant échappé d'eux
Des Lotophagiens le pays oublieux,
Luy conta du Cyclops, du hideux Polypheme,
Comme il mangea ses gens en sa presence mesme,
Et comme il s'en vengea: de quel bon traitement
Le recent Aeolus, & fauorablement
Son vent luy departit, qui luy fut si propice,
Qu'il estoit de retour sans l'extresme auarice

LE XXIII. LIVRE

De ses gens indiscrets, comme il s'en courrouça,
 Et comme la tourmente en la mer le poussa,
 De la façon qu'il prit terre en Lestrigonie,
 Où il vit submerger toute sa compagnie,
 Sa nef seule eschappa : Les ruses de Circé;
 Et comme il descendit en l'Averne poissé
 Y vid Tiresias, & les Princes de Grece
 Ses chers compagnons, que la Parque traistresse
 Auoit là faict passer : comme en ce pays là
 Il vit sa mere mesme, & à elle parla.
 Il ne mit en oubly les chansons des Syrenes,
 De Scylle & Charybdis les roches inhumaines,
 Comme il les eschappa par hazard nompareil,
 Et le malheur qui vint des vaches du Soleil,
 Qu'à leur occasion Iupiter mit en poudre
 Son malheureux vaisseau des éclats de son foudre,
 Submergeant ses amis, luy nageant se sauua,
 En l'isle d'Ogygie à peine se trouua
 Où il fut retenu de Calypso la belle
 Qui faire le vouloit de nature immortelle;
 S'il vouloit l'espouser : Comme elle le flatta
 Longuement, mais tousiours ferme il luy resista.
 En fin vint en Corfou, où les gens l'honorèrent
 Ainsi que quelque Dieu, escorte luy donnerent
 Pour trauerser la mer, chacun sa nef chargeant
 De presens precieux, d'habits, d'or, & d'argent.
 Comme il fut venu là, le sommeil sur luy tombe
 Et luy serre les yeux, Ulysses y succombe,
 S'endort profondement, & luy font treue ainsi,
 Les pensers, les trauaux, le chagrin, le soucy.
 Mais Pallas aux yeux pers ce-pendant qu'il repose
 A son aise endormy, pense bien autre chose:

Car comme il pensoit estre au comble de son bien,
Plongé dans les plaisirs, voicy qu'en moins de rien
Elle tire des eaux l'Aurore matinere
Pour donner aux mortels le bien de la lumiere.
Ulysse la sentant se leue vistement,
Donne à Penelopé cet aduertissement.

Femme, iusques icy personne ne se treuve
Qui ayt, comme nous deux, esté mis à l'espreuve:
Tu as en m'attendant force ennuy supporté,
D'autre-part, Iupiter & les Dieux m'ont ietté
En beaucoup de tourmens m'ont liuré forte guerre,
Et m'ont fermé long temps le retour en matre.
Or puis que nous voicy, suiuant nostre desir,
En nostre lit reioints avec tresgrand plaisir,
Prensoin dans la maison de la mesnagerie,
Et quant à nos troupeaux, dont extreme turie
Ont faict les poursuiuans, i'ay en moy arreslé
D'en aller prendre ailleurs certaine quantité.
D'autre costé les Grecs, s'ils nous sont equitables,
En fourniront leur part pour remplir nos estables.
Or ie m'en vay aux champs mon pere visiter,
Qui, à ce que l'on dit, ne faict que s'attrister,
Ie te veux ce-pendant faire vne remonstrance,
Bien que tu aye assez d'esprit & de prudence,
Sicost qu'il sera iour sans doute l'on sçaura
Le meurtre de ces gens, & le bruit en courra
Par toute la cité. Tien toy sur toute chose
Et tes femmes & toy dans la maison bien close,
Ne parle, ne respons, ne t'enquiers nullement
A homme que ce soit. Il dit, & vistement
Ses armes endossa de beauté nompareille,
Telemachus appelle, & Eumens réueille

LE XXIII. LIVRE DE L'ODYSSEE.

*Avec Philatus, leur dit de se vestir
De leurs armes soudain, & qu'il falloit sortir:
Ils ne font nul refus, de leurs armes se vestent,
Les portes font ouvrir, en campagne se iettent.
Il faisoit desja clair, mais Minerve tendit
Un nuage autour d'eux, & dehors les rendit.*

Fin du vingt-troiesme Liure.

LE VINGTQVA-



LE VINGT-QUATRIÈME

ET DERNIER LIVRE DE
l'Odyssée d'Homere.

ARGUMENT.

Mercure conduit les ames des poursuivans occis aux enfers. Quelques discours desdites ames. Celle d'Amphimedon raconte à celle d'Agaménon comme Vlysses les a faict mourir. Vlysses se dissimule du commencement à Laertes son pere, puis se dōne à cognoistre. Tumulte s'esleue en Ithaque pour la mort des poursuivans, où Epitheus pere d'Antinoüs se faict chef de la faction, sort avec troupe des habitans pour aller tuer Vlysses chez Laërtes. Ils combattent, est tué par Laërtes. Vlysses les met en route, & voulant poursuiure la victoire Pallas le retient, qui les accorde & faict paix entre luy & ses sujets.

AUTRE SOMMAIRE.

*Le tumulte en Ithaque, on vient aux mains. La paix
Entre Vlysse & les siens est faicte pour iamaïs.*

Mais le Cyllenien touchoit les esprits pasles
Des poursuivans occis aux riuës infernaltes,
Il tenoit en sa main sa belle verge d'or
Dont il endort les uns, & les autres encor
Réveille comme il veut. Il mene ceste bande
Qui le suit, de bruit pleine & d'émotion grande.

Rr

LE XXIII. LIVRE

Tout ainsi que l'on voit dans le creux d'un rocher
 Force Chauue-souris qu'on a faict trebucher,
 Fremir & faire bruit, & au pris qu'on les presse
 C'à & là volter en multitude espaisse:
 De mesmes ces esprits fremissans rauquement
 Apres le fils de Maie alloient confusement,
 Et le Dieu non mauuais marchant deuant, leur mōstre
 La voye & le chemin. Ils vont à la rencontre
 Du flux de l'Ocean, & vont outre passant
 Du roc Leucadien le sommet blanchissant,
 Penetrent du soleil les portes reculees
 Et du sommeil blaffard les nations voilees,
 Puis sur un pré herbu aussi tost sont venus,
 Où les esprits des morts, simulacres menus,
 Leur demeurence font. Là estoient du Pelide,
 De son cher Patroclus, & du preux Nestoride
 Les esprits deliez, celui d'Aiax aupres,
 Qui estoit le plus fort & le plus beau des Grecs,
 Horsmis Achilles seul, avec qui ser'allie
 Celui d'Agamemnon plein de melancolie,
 Et à l'entour de luy tous ceux qui souz l'effort
 Du perfide Egysthus endurerent la mort.

Auquel ainsi premier l'esprit du magnanime
 Achilles: Fils d'Atreus, nous t'auons en estime
 D'estre le plus chery du puissant Iupiter,
 Dessus tous les Heros qu'on scauoit habiter
 Sur la terre pour lors, pource qu'à ta puissance
 Infinité de gens rendoient obeissance:
 Mesmement les plus forts, quand nous estions aupres
 Des portes d'Ilion, où le peuple des Grecs
 Endurat tant de maux, & là le deuoit prendre
 Certainement la mort, dont ne se peut defendre

Nul au monde viuant, & à ma volonté
Que la mort t'eust alors deuant Troye emporté
Comblé de tant d'honneur, dont en toute abondance
Tu auois parmy nous entiere iouissance:
Où tous nous autres Grecs t'eussions fait vn tombeau
Comme à nostre Empereur, & magnifique & beau,
Pour seruir à ton fils de gloire perdurable.
Mais sans doute c'estoit qu'une mort miserable
Te deuoit attrapper. Auquel Agamemnon.

O fils de Peleus d'un immortel renom,
Que ie t'estime heureux d'auoir esté la proye
De la mort qui prend tout deuant les murs de Troye,
Et loing de ton pays, de ce que les plus forts
Des Troyens & des Grecs aupres de toy sont morts
Combattans à l'entour, & tu estois à terre
De ton long estendu, de cheuaux ny de guerre
Nullement soucieux, ce- pendant nous estions
Attaquez au combat: sans cesse combations
Tant que le iour duroit, & nos mains acharnees
Ne se fussent iamais de l'estour destournees,
Sinon que Iupiter, se mettant au deuant
Ne nous eust separez d'un tourbillon de vent:
Nous te prismes alors, aux vaisseaux t'emportasmes
T'ayant tiré des coups, sur vn liét te iettasmes
Après auoir ton corps lauë premierement,
Puis oint & enbaurné d'un tres-riche oignement.
Or à l'entour de toy les Princes Grecs en armes
S'estans coupé le poil fondoient en chaudes larmes:
Quand ta mere accourut au bruit inesperé
De ce triste accident, hors du flot aZuré,
Et les Nymphes des eaux pres d'elle se rendirent.
Un son sort de la mer, les Grecs qui l'entendirent

LE XXIII. LIVRE

En eurent telle peur, qu'en fuite ils se mettoient,
 Et dans leurs creux vaisseaux en foule se iettoient,
 Sans que le vieux Nestor prince d'expérience,
 Et dont auoit tousiours paru la grand' prudence
 Iugeant ce que c'estoit, en ces termes expres
 Les retint sagement. Demeurez fils des Grecs,
 Ne fuyez Argiens, sans doute c'est sa mere
 Que suit mainte Deesse & Nymphes marinieres
 Qui s'en vient voir son fils hors des flots à l'ure.
 Il dit, & tous les Grecs resterent assurez.
 Alors du Dieu marin les filles l'entourerent,
 Et miserablement autour de toy pleurerent,
 De robes qui iamais ne s'usent se vestans,
 Les neuf Muses aussi à ta mere assistans
 Fort pitoyablement de voix alternatiues
 Lamentoient dessus toy leurs querelles plaintiues.
 Nul des Grecs, quel qu'il fust, ne put là demeurer
 Qui se pust retenir de plaindre & de pleurer,
 Tant les auoient émeus les Nymphes immortelles.
 Durant dix & sept nuits tousiours continuelles,
 Et par autant de iours tristes & soncieux
 Nous pleurasmes sur toy autant hommes que Dieux,
 Jusqu'au dix & huitiesme. Alors nous te brulasmes,
 Et dessus le bucher ardent, nous égorgeasmes
 Les vaches au poil noir & les grasses brebis:
 Tu brulois ce-pendant dans les propres habits
 Des Dieux, dans force unguent de prix inestimable,
 Et dans force miel doux. Lors maint prince honorable
 D'entre le peuple Grec se rua tout armé
 Tant à pié qu'à cheual, sur le tas allumé
 Tandis que tu brulois, & au dedans des bandes
 On ouyt retentir lamentations grandes.

Or si tost, Achilles, que l'ardant element
De Vulcan, eust destruit ton corps entierement,
Dés le matin les ostons blancs nous recueillismes,
Et dans un doux unguent & du vin pur les mismes:
L'urne pour les loger ta mere la donna,
C'estoit un vase d'or qu'antresfois façonna
L'industrioux Vulcan, & Denys, disoit elle,
Luy en auoit faiect don. Dans ceste urne si belle
Tes os furent posez, ô Heros renommé,
Et ceux de Patroclus ton amy tant aymé
Furent mesleZ parmy, mais on ne fit le mesme
De ceux d'Antilochus, que d'amour tant extreme
Tu affectionnas durant ta vie, & plus
Que tous les autres Grecs, estant mort Patroclus,
Car on les mit à part. Alor toute l'armee
Des Gregeois belliqueux contre Troye animee,
A l'entour de vos os fit dresser un tombeau,
Honorable, superbe, & magnifique & beau,
Aupres de l'Ellespont sur son haut ain riuage,
Afin que les passans faisans quelque voyage,
Tant de ceux qui sont neZ, que de ceux qui viendroiēt
Le vissent de la mer, au prix qu'ils vogueroient.
Ta mere puis apres requit en ta memoire
A tous les puissans Dieux de beaux prix de victoire,
Afin d'en honorer les principaux des Grecs
Qui combatoient autour. I'en ay veu à plus pres
Des plus beaux de la terre, & où force ieunesse
Est alloit à l'enuy sa valeur & proüesse,
Quand quelque Roy mouroit, mais iamaïs ie n'en vy
De pareils à ceux là, tu eusse esté rauy
Si tu eusses pu voir la grandeur, l'excellence
Des ieux & des combats, & la magnificence

LE XXIII. LIVRE

Que ta mere Thetis au pied d'argent & beau
Fit faire à ton honneur autour de ton tombeau,
Tant tu estois chery de la troupe immortelle.

Ainsi, quoy que tombé souz la parque cruelle,
Tu ne te vois frustré du bien de ton renom:

Ains à iamaïs viura la gloire de ton nom,
O vaillant Achilles. Mais moy, que me profite
D'auoir esté le chef d'un si braue exercite,
Et quelle volupté me reuient d'auoir mis
Troye à sac, & deffait un millier d'eanemis?

Si Iupiter m'auoit tramé en sa colere
Vne si triste fin, qu'une femme adultere,
Un perfide Egysthus dessouz un traistre effort
Tant malheureusement me renuersassent mort?

Ils denisoient ainsi, quand aupres d'eux arrive
Mercure, conduisant dessus la pasle riuie,
Des paures poursuiuans les desolez esprits
Qu'Vlysse auoit deffaits. Eux les voyans, surpris
De grand estonnement, ceste ieunesse admirent,
Et pour scauoir que c'est vers eux vistement tirent.
Dés qu'ils furent aupres, l'ame d'Agamemnon
Reconneut tout soudain celle d'Amphimedon
Le fils de Melanthee: car allant en Ithaque
Il n'auoit point d'autre hoste. Ainsi donc il l'attaque.

Amphimedon, qui faict que descendieZ ainsi
Du regne de là hault en ce triste & noircy.
Tant de beaux ieunes gens, & d'age tout semblable?
Je croy que qui voudroit faire un choïs agreable
D'une belle ieunesse. & d'hommes vertueux
Danstoute vne cité, ne choisiroit pas mieux.
Seroit-ce que Neptun bouleuersant ses ondes
Vous auroit renuersez souz les vagues profondes?

Ou de mauuaises gens vous auroient-ils meurtris
Combattans dessus terre, apres vous auoir pris
Vos brebis & vos bœufs? ou, faisans resistance
Contre vos ennemis, pour la iuste defenee
De vostre cher pays, de vos femmes aussi
Qu'on vouloit enleuer, estes vous morts ainsi?
Satisfais en cela, s'il est en ta puissance,
Ton hoste & ton amy. N'as-tu point souuenance
Que ie logeay chez vous quand i'allay recercher
Le prudent Vlysses avec mon frere cher
Le preux Menelaüs, d'abandonner sa terre
Et de monter sur mer, compaignon de la guerre
Qu'on alloit faire à Troye? Ausquels Amphimedon,
Ie m'en souuiens fort bien, ô grand Agamemnon,
Et te conteray bien la funeste aduenture
Qui nous a faict tomber dessus ceste mort dure.

Tout tant que tu nous vois acoustrez en ce point,
La femme d'Ulysses qui ne reuenoit point
Nous recerchions d'amour, mais la fine & couuerte
Ne nous esconduisoit de façon toute ouuerte,
Ces nopces ne semblant auoir à contre-cœur,
Et ne les paraisant. Nous tramant dans son cœur
Un mortel repentir, & pour pretexte & voile
Deses dilayemens, elle auoit vne toile
Oltre mesure grande, & fine extremement,
Qu'elle auoit commencé de tistre excellemment.
Surquoy elle nous dit: Princes de grand lignage
Qui or' me recerchez de second mariage
Pource qu'Ulysses est mort, ie vous prie attendez,
Ne precipitant point ce que vous pretendez,
Tant que i'aye acheué pour euitier la perte
De ma laine & mon lin, la robe qu'à Laërte

LE XXIII. LIVRE

J'ay entrepris de faire en cet ouvrage icy,
 Afin de l'honorer, lors qu'au tombeau noircy
 Il sera deualé, de ceste conuerture,
 Et vestement de deuil: de peur que d'auenture
 Quelque Dame en courroux ne me donnast le tort
 D'auoir enseuely un si grand prince mort,
 Et si plein de moyens sans un drap honorable.
 Elle nous amusoit de parole semblable,
 Et nous y donnions foy. Ainsi elle tissoit
 Son ouvrage de iour, mais elle en depressoit
 Tant qu'elle en auoit faict de nuit à la chandelle,
 Et par trois ans entiers dura sa grand cautelle.
 Mais sur le quatriesme an, que les temps & les mois,
 Les heures & les iours finirent vne fois:
 Nous fusmes aduertis d'une certaine femme
 Qui scauoit tout le cas, de sa trompeuse trame,
 Et dans sa chambre entrez la prisme sur le faict.
 Ainsi fut à la fin son ouvrage parfaict,
 Ne pouuant plus fuir, qu'elle monstra semblable
 Aux rais esblouyssans du Soleil admirable,
 Ou à ceux de la Lune. En la mesme saison
 Je ne scay quel malheur amene en sa maison
 Son mary Ulysses, qui de prime arriuee
 Voulut se retirer en la maison priuee
 Du pastre de ses porcs, & tout au mesme instant
 Son fils fut de retour sur son vaisseau flottant
 De Pyles, de Nestor. C'est là qu'ils complotterent
 Le malheur, que depuis fiers ils executerent
 Dessus les pouruiuans. Car l'ayans arresté,
 Ils s'en vindrent soudain tous deux en la cité,
 Le fils le beau premier, & apres luy son pere
 Qu'un porcher amena, ce sembloit de misere,

Et d'aage tout courbé, habillé pauvrement
S'appuyant d'un baston tellement quellement
Deffaict & deguisé ce qui se pouuoit estre,
Si bien que nul de nous ne le put recognoistre,
Non mesmes les plus vieux, mais fols que nous estions
Nous luy disions iniure & encor le battons,
Et il enduroit tout, souffrant en patience
Mesme dans sa maison nostre extresme insolence.
Mais quand la sage fille au puissant Iupiter
Le vint à la parfin contre nous exciter,
Et que Telemachus toutes ses armes fortes
Eut osté de la sale, & rembarré les portes,
Au signal que son pere avec luy accorda,
Il vint trouuer sa femme, & luy persuada
De nous metre en auant les fatales sagettes.
Et le ieu du fort arc & des claires bouclettes,
L'introuue premier de nostre proche mort.
Mais personne de nous ne put estre si fort
De pouuoir bander l'arc, tant nos bras imbecilles
Estoient à ce mestier & lasches & debiles.
Or quand ce vint au tour d'Ulysses de l'auoir
Ce qu'il desiroit fort, faisant tout son pouuoir
De l'auoir quoy qui fust : nous usions de menace
Que lon ne luy donnast : mais de force & d'audace
Son fils luy fit porter. Alors tres-aysement
Il vint à bander l'arc, passa facilement
Les fleches par les trous, puis de grande secousse
Il se ietta en place, espandit de la trouffe
Les mortiferes traits, sur l'arc les atteinta,
Et le premier de tous Antinous ietta
En terre roide mort, puis tira sur les autres
Prenant bien sa visee, & la plussart des nostres

LE XXIIII. LIVRE

Tumboient deffous ses coups: Chacun bien se doutoit
 Que quelqu'un des haults Dieux l'aydoit & l'assistoit,
 Pour ce qu'en moins de rien deffous leur vaillantise
 Toute ceste lennesse à dure mort fut mise,
 On n'oyoit que souffirs, leur teste chanceloit
 Deffous les coups mortels, & le sang decouloit
 Par tout sur le paue, spectacle lamentable.
 Voila, Agamemnon, nostre fin miserable,
 Et nos malheureux corps gisent confusement
 Espars par la maison, sans aucun ornement:
 Pource que nos amis desquels chacun ignore
 Ce sinistre accident, ne sont venus encore
 Redemander nos corps, ne les ont enleuez,
 N'ont nettoyé le sang, ne les ont pas lauez,
 Et n'ont versé dessus leur plaintes lamentables,
 Qui est l'honneur dernier des deffuncts miserables.
 Alors Agamemnon: Que bienheureux es tu
 Possedant vne femme accomplie en vertu,
 O prudent Vlyses, Point n'a esté trompee
 Ton amitié premiere en ta Penelopee,
 Elle a gardé son cœur sans reprehension,
 Elle n'a destourné de toy l'affection
 Dont t'auoit espousé sa premiere ieunesse.
 Aussi son beau renom en durera sans cesse,
 L'honneur de sa vertu iamaïs ne perira,
 Et de Penelope un poëme se fera
 A la posterité de duree eternelle.
 Mais de Clytemnestra, iamaïs ne sera telle
 La reputation, ayant osé tramer
 La mort à son mary qu'elle deuoit aymer
 Commettant felonie. Aussi à ceste femme
 Un poëme se fera remply de tout diffame,

Car dessus tout son sexe elle a totalement
Mis un grand des-honneur, aux chastes mesmement
Ils deuisoient ainsi dans l'auerne effroyable
Sous les obscuritez de la terre habitable.

Mais Vlysse & ses gens sortis de la cité
Vindrent tout aussi tost dans le champ habité
Du vieillard Laërtes, qu'avec travail extremes
Il auoit agencé & cultivé luy mesme,
Là sa maison estoit autour d'elle estoient mis
Bancs de tous les costez & sieges infinis,
Sur les uns ses vallets venoient leur repas prendre,
Sur les autres apres ils se venoient estendre
Pour reposer là nuit. Or aupres du vieillard
Vne Sicilienne auoit fort bonne part
Aagée extremement, au reste femme habile,
Qui le traitoit tres-bien, ainsi loing de la ville,
Et avec un grand soing. Estant là paruenus
Ulysse à ses pasteurs ces propos a tenus
Et à son fils aussi. Allez vous en m'attendre
Au logis de mon pere, & ne faillez de prendre
Le meilleur des pourceaux, de soudain l'egorger,
Et de nous aprestez vistement à manger
Quant à moy, ie m'en vois essayer si mon pere
Me recognoistra point: car ie me delibere
De le tenter un peu, auoir le passe-temps
De le faire debatre, & voir si le long-temps
Que i'ay esté absent aura de sa notice
Pu du tout effacer les traits de son Vlysse.

Ce disant, il donna ses armes à ses gens
Et eux vers le logis tournerent diligens
Luy deuers le verger en diligence tire
En dessein d'essayer ce qu'il venoit de dire,

LE XXIII. LIVRE

Il ne rencontra pas descendant, Dolius
 L'ancien iardinier, ny ses enfans non plus,
 Ny pas un de ses gens, aux brossailles voisines
 Ils s'en estoient allez pour couper des espines
 Et boucher le verger, & le vieillard soigneux
 En travaillant toujours, alloit au deuant d'eux
 Dans le plaisant verger, tout le long d'une sente,
 Ulysses le trouua, qu'il nettoyoit vne ante,
 Il estoit habillé pour lors fort pauurement,
 D'un déchiré, fort sale, & vieux accoustrement
 De ses iambes autour il auoit la gamache
 Liee estroittement, faicte de peau de vache,
 Et des gans de cuir fort, afin de destourner
 Les ronces qui pourroient ses mains egratigner:
 Un chapeau d'une peau d'une chieure velue,
 Tesmoins de sa tristesse & peyne continue
 Quand Ulysses le vid si rompu si cassé,
 De vieillesse & de mal si maigre & harassé
 Il ne se put tenir de plorer en soy mesme
 Sous un poirier à part, pour le regret extreme
 Qui luy serroit le cœur. Ne scauoit bonnement
 S'il deuoit accourir à luy hastiuement,
 Le baiser, l'embrasser, & de son arriuee
 Luy conter la façon de premiere abordee,
 Ou bien si parauant il l'interrogeroit
 Et sans se declarer si tost, le tenteroit
 Il luy sembla meilleur d'un peu se contrefaire
 Et de propos couuerts à son dessein l'attirer
 Sur cela resolu à son pere il s'en va
 Tout droit sans plus tarder, en tel point le trouua
 Que le visage en terre il dechaussoit vne ante
 Adonc à l'improuiste à luy il se presente,

Et luy tient ces propos : certes gentil vieillard
Tu entens comme il faut, l'agriculture, & l'art
De bien faire un verger, outre la vigilance
Tu ne manques ie croy de bonne experience:
Ie ne voy plante icy, ne vigne, n'olivier:
Car i'ay pris garde à tout, ne figuier, ne poirier,
Non mesme les careaux de tout ce iardinage,
Que tout ne soit tenu en tresbon labourage,
Et bien entretenu. Mais te disant un cas,
Pren l'en gré ie te prie & ne te fache pas:
Tu n'as comme il faudroit soucy de ta personne,
Ta vie ainsi qu'elle est n'est seante ne bonne,
Tu traines ta vieillesse un peu trop rudement,
Tu es sale & crasseux, & cest acoustrement
N'est pas honorable. Or n'est-ce que ie pense
Que ton maistre ayt de toy trop grande negligence,
Pource qu'à ta façon tu ne me semble point
Un esclave un valet, mais parois de tout point
Ou un Prince, ou un Roy, tel de port, tel de grace
Lors que sorty du bain magistral la face
Il se va mettre à table, & puis donne ses yeux
Au sommeil, comme font la plus part des gens vieux:
Or dy moy, ie te pry, de qui es tu aux gaiges,
Et de qui dresses-tu ces plaisans Iardinages?
Et ne me trompe point, affin qu'asseurement
Ie sçache si ie suis arrivé iustement
Ou ie te diray bien: C'est en Ithaque, comme
J'ay esté aduerty de ie ne sçay quel homme
Que ie viens de trouver, & qui certainement
Comme il me semble aduis n'a grand entendement.
Car presqu'il n'a pas eu l'assurance d'attendre
Que ie parlasse à luy; m'entendant, de comprendre

LE XXIIII. LIVRE DE L'ODYSSEE.

Ce que ie luy disois, ne respondre à demy
 De ce que ie voulois sçavoir d'un mien amy,
 S'il estoit vif ou mort: pour ce que ie desire
 Sçavoir ce qui en est. Car ie te veux bien dire
 S'il te plaist m'escouter, qu'autresfois i'ay logé
 Vn homme en ma maison, qui a fort voyagé,
 Qui m'a esté si cher & si recommandable
 Que ie ne pense point qu'amy tant agreable
 Me visite iamais. Il estoit, ce disoit,
 D'Ithaque, & si son pere appeller se faisoit
 Laërte Arcesides. C'est celuy là, mon pere,
 Que ie menay chez moy, luy fistres bonne chere,
 Le chery, l'embrassay, l'accueillly sur tous ceux
 Qui m'estoient venus voir: Luy fis de precieux
 Et de riches presens, pour gaigne & témoignage
 Et de nostre amitié & de nostre hostelage:
 Comme, de sept talens d'or tres-bien façonné,
 D'un grand vase d'argent, bien gravé, bien tourné,
 De douze beaux manteaux, de douze camisoles,
 Tel nombre de tapis, & tel de tauayoles,
 Quatre femmes aussi exquisés en beauté,
 Telles qu'il les voulut prendre à sa volonté.
 Le vieillard tout esmeu, de pleurs la face pleine,
 Mon bon amy, dit-il, c'est chose tres-certaine
 Que tu es arriné au lieu que l'on t'a dit.
 Mais des hommes mechans asteuire y ont credit,
 S'y sont fortifiez: En vain comme ie pense
 Tu as fait tes presens, n'en atten recompense.
 (Car l'homme que tu dis n'est encor arriné,
 On ne sçait où il est) Si tu l'eusses trouué
 Icy en sa maison d'Ithaque, plein de vie,
 Certes tu n'aurois pas perdu ta courtoisie,

Chargé de riches dons il te renuoyeroit,
 Ne seroit pas ingrat, & recompenseroit
 Ton hospitalité: Car celuy qui commence
 Reçoit de son bien-faict en fin la recompense.
 Mais dy moy verité, y a til longuement
 Que celuy que tu dis aymer si cherement
 Logea en ta maison, ce mien fils miserable
 Si iamais il en fut, que le sort déplorable
 A exposé en proye aux poissons sous les eaux,
 Ou bien dessus la terre aux bestes, aux oyseaux,
 Si loin de ses amis, & de sa terre chere,
 Et n'a esté pleuré de pere ny de mere
 Qui l'ayent engendré, dessus son corps versans
 Pour son dernier honeur le precieux encens:
 Penelopé non plus son espouse amiable
 Ne l'a point lamenté comme il est conuenable,
 N'a ietté sur son liét ses regrets ennuyeux,
 Et comme on faict tousiours, n'a point fermé ses yeux.
 Mais es tu de contree ou proche ou esloignée?
 De quelle ville es tu & quelle est ta lignee?
 La nef qui t'a conduit & tes amis aussi
 Où a-telle pris terre? est-telle loin d'icy?
 Ou bien aurois-tu point entrepris ce voyage
 Pour faire la traffique, en un vaisseau de louage,
 Qui t'ayant dechargé auroit repris le vent?

A ces mots Vlysses d'un parler deceuant,
 Ie te diray le vray, ie suis fils d'Aphidante
 Le Polypemonide, & ie suis d'Alybante,
 Mon pere est Roy de là, i'ay nom Hiperitus,
 Mes vaisseaux ont esté de l'orage batus,
 I'ay failli mon chemin, & contre mon enuie
 Suis abordé icy, venant de Sicanie,

LE XXII. LIVRE

Mon nauire est au bont de ce champ, escarté
 De mes autres vaisseaux, & loin de la ciuë.
 Mais il y a cinq ans que de mon territoire
 Vlysses débarqua, si i'ay bonne memoire,
 Et comme le pauvre se mettoit sur les eaux
 A sa dextre voloit nombre de bons oyseaux
 Desquels il receuoit vne alaigresse extreme
 Car il les reputoit pour bon heur, & moy mesme
 M'en resioissois fort: Car i'esperois vn iour
 Le voir en sa maison d'Ithaque, de retour,
 Ou il me receuroit, ou sans feintise aucune
 De reciproques dons nostre amitié commune
 Seroit renouvellee. Ayant ainsi parlé
 Le bon homme se vit de tristesse accablé,
 Comme s'on l'eust couuert de quelque noire nue,
 Et à terre prenant de la poudre menue
 Ardante du Soleil, sur son chef blanchissant
 A deux mains l'espendoit, griesuement gemissant.
 Vlysses ne peut lors se tenir dauantage,
 Ains il sent là dedans bouillonner son courage
 De pitié de son pere, vn soufle vehement
 Luy monte des nareaux: Il court hastiuement,
 Il le baise, il l'embrasse, & d'une ardeur extremesme.
 Mon pere, me voicy, C'est cest Vlysses mesme
 Que tu desire voir il y a si long temps,
 Me voicy de retour à la fin de vingt ans
 Dans nostre cher pays. Mais ie te suply cesse
 Tes larmes & tes pleurs, tes cris & ta tristesse.
 Ie te dis en vn mot, I'ay mis en la maison
 Les poursuiuans à mort, I'ay tiré la raison
 De leurs méchancetez & de tant d'insolence
 Qu'ils cōmettoient chez nous, i'ay pris digne vengeance.

A ces

A ces mots Laërtes. S'il est comme tu dis
Que tu sois de retour & que tu sois mon fils,
Monstre m'en maintenant quelque marque & indice.
Volontiers, luy dit-il, voy ceste cicatrice
Qu'un grand Sanglier me fit sur Parnasse autresfois,
Comme nous le chassions à force dans les bois.
Ma mere & toy alors m'enuoyastes mon pere,
Deuers Autolychus le pere de ma mere
Tant pour le visiter, que de luy recevoir
Les dons qu'il me promit un iour qu'il vous vint voir.
Mais ie te monstraray encor pour tesmoignage
Certains arbres fruitiers dedans ce Iardinage
Lesquels tu me donnas, petit ie te suivois
Par le iardin par tout, & tu me les nommois.
Ce sont treize poiriers, dix pommiers, & quarante
Figuiers, pour des augeons tu m'en promis cinquante,
Tu les nommois ainsi, chascun d'iceux estoit
De fertile raport, infini fruit iettoit,
Se chargeant de raisins, en la saison d'Autone
Que le ciel les thresors de ses pluyes nous donne.
Il achenoit de dire: A ce souuenir doux
Le vicillard tressaillit du cœur & des genoux,
Reconnoissant fort bien & l'enseigne & l'indice
Que luy auoit donnez le magnanime Ulysse.
Alors à corps perdu il court à son enfant,
Luy ouure les deux bras, le serrant, l'embrassant,
Il pleure de plaisir & de ioye se pisme.
Ulysses le soustient, car presqu'il rendoit l'ame,
Puis quand il eut un peu rappellé ses esprits
Ces mots il prononça de transport tout surpris.
O pere Iuppiter, vous estes certe encore
Des diex dedans le Ciel que maint-bel astre dore,

LE LIVRE XXIII.

Si ces mechant sont morts, s'ils ont esté traittez
Comme il appartenoit à leurs meschancetez.

Mais il y a danger qu'à ces promptes nouvelles
Ne se ruent icy les citadins rebelles,

Et n'enuoyent encor barques & messagers
Par la Cephallenie accourir aux dangers.

A cela Ulysses. Non, vy en assurance,
Repose toy sur moy, & n'entre en deffiance.

Allons en la maison qui est dans le verger,
Là mon fils nous attend, qui apreste à manger

Avec Philatius & le porcher Eumæe,

Ils s'en vont la dessus, & à leur arriuee
Trouuent Telemachus & les deux pastres chers,

Le bouvier le porcher, assaisonnant les chairs,

Et apprestans le vin. Or la Sicilienne

Prendt tandis Laertes, droit vers le bain le mène

Le laue, le nettoye, & l'oint finalement

d'un huille pretieux: luy donne un vestement

Et magnifique & beau. Pallas est là presente

Qui la taille luy croist, la maiesté augmente

Au Roy des nations: finalement l'a faict

Plus disposé & plus gay, plus gras & plus refaict.

Tel il monte du bain, son fils qui le regarde

S'en esmerueille fort, va vers luy, & ne tarde

Le voyant tel qu'un Dieu, de luy parler ainsi.

Mon pere, pour le vray quelque dieu est icy

Quit'a tout raienny, accreu, rendu en somme

Et plus grand & plus fort. A doncques le bon hōme.

Que le bon Iuppiter, Apollon l'immortel,

Et la sage Pallas, ores me fissent tel

Que i'estois quand lie pris la Cité de Nerice

Sur le bord de la mer, superbe en edifice,

Des Cephaliens estant Roy approuvé,
Et que le iour d'hier ie me fusse trouué
Au chasteau avec toy, bien couuert de mes armes:
I'eusse à ces gens donné de si rudes alarmes,
Ie les eusse chargez de tant & tant de coups,
Que ie leur eusse à tous faict plier les genoux.

Ils deuisoient ainsi, les autres aprestèrent
Le disner cependant, puis de rang se ietterent
Sur les lits arrangez: comme ils estoient assis
Le vieillard Dolius arrive avec ses fils
Tous las & trauallez: car la Sicilienne
Les auoit appelez: La vieillotte ancienne
Les auoit tous nourris, & aroit grand soin pris
Du bon homme, si tost que l'aage l'eut surpris.

Or comme ils eurent veu Ulysses en presence,
Et l'eussent recogneu presque de souuenance,
Ils resterent debout, tous quasi hors de soy,
De merueilles ravis. Lors Ulysses le Roy
D'un parler gracieux l'appelle à soy, le nomme
Et ses enfans aussi: sieds toy, sieds toy, bon homme,
Et ne t'estonne plus, nous t'attendons icy
Long temps à pour disner, & tes enfans aussi:

A ces mots Dolius accourt, tressaillant d'ayse,
Luy ouure les deux bras, & l'embrasse & luy baise
Les mains de grand ardeur. Certes amy parfait,
Tu es, dit-il, venu à nostre grand souhait,
Mais tu nous as surpris, les dieux de ta venue
Eux mesmes ont eu soin, donques ie te salue,
Et les prie humblement pour ta prosperité:
Vy donc en tout plaisir, & me dy verité,
Penelope t'a elle encor' veu? Le scait elle?
Enuoirons nous quelqu'un luy dire la nouvelle?

LIVRE XXIIII.

Lors Ulysses le sage, Elle le sçait fort bien,
 Mon pere, luy dit-il, & ne seruiroit rien
 De la faire aduertir: Lors le vieillard Dolie
 Apporte vne escabelle & luy sante & polie,
 Et à table se met, ses fils semblablement
 Viennent à Ulysses, saluent humblement
 Et leur prince & leur Roy, dessus ses mains se iettent,
 Puis aupres de leur pere à la table se mettent
 Ainsi repaissoient ils des viures à foison,
 Et de chairs dechargeoient la champestre maison.

Tandis la renommee & disposte & legere
 Courut par la Cité, annonçant messagere
 Partout deçà delà des poursuiuans meurtris
 Le trepas odieux. Adonc chascun s'est pris
 A courir viftement, bruits & souspirs s'entendent,
 Et deuant le chasteau de tous costez se rendent.
 Lors de chasque maison chascun son mort tira:
 L'emporta du chasteau puis l'ensepultura.
 Mais pour ceux de dehors sur des nauys les chargerent
 Et par diuers pescheurs chez eux les enuoyerent.
 Puis le cœur accablé de tristesse & de deuil
 Ils allerent soudain s'assembler en conseil.
 S'estant tous amassez Eupithemus se leue
 Et parle aux assistants: car beaucoup il luy greue
 De la mort de son fils Antinous le fort,
 Qu'Ulysses le premier auoit renuersé mort:
 Il en ressent son ame estrangement troublée,
 Qui faict que souspirant il dit à l'assemblée.

Certes cest homme icy des long-temps, mes amis,
 D'estranges & grands faits s'est beaucoup entremis,
 Enuers les Achiens: sur les ondes muables
 Il nous a emmenez des troupes innombrables

D'hommes bons & vaillants. Peris sont ses vaisseaux,
Et tant de braves gens submergez sous les eaux:

De retour, il a mis ceux-cy à mort cruelle,
Des Cephaliens la fleur plus leste & belle.

Mais mon opinion est qu'on l'aille saisir
Et que lon le preuienne auant qu'il ait loisir
De fuir ou à Pyle, ou de prendre la route

d'Elyde, aux Epeens, nous en aurions sans doute
Un regret pour iamais, & la posterité

Nous blasmeroit de droit, si nous auions esté
Si lasches, de n'auoir voulu prendre vengeance

D'un homme qui nous tient vne si grande offence
Si nous ne punissions, par le glaiue tranchant,

De nos freres, & fils l'homicide mechant.

Si cela passe ainsi, non, ie ne veux plus viure,

Mais qu'avec les deffunts au sepulchre on me liure.

Mais allons droit à luy ben faire repentir,

Et deuant que quelqu'un coure l'en aduertir.

Ce dit-il en pleurant. Et toute l'assistance
Eut un grand deuil au cœur. Lors deuant leur presence

Medon vient arriuer du chantre accompagné,

Après que le sommeil se fust d'eux eslongné,

Ensemble du logis d'Ulysses ils sortirent,

Et deuant l'assemblée aussi tost se rendirent.

Chascun s'esbahit fort, un grand silence fit,

Lors le prudent Medon à dire ainsi se mit.

Escontez Ithaquois. Ulysses, (chose vraye)

Sans les dieux n'a point faict vne si grande playe:

I'ay veu visiblement un Dieu qui l'assistoit

Semblable de tout point à Mentor il estoit.

Ce dieu là, quelquesfois deuant luy faisoit rage.

Apparoissoit visible, & luy donnoit courage:

LIVRE XXIII.

Quelquesfois çà & là par la sale il alloit,
Et tous les poursuiuans estrangement troubloit,
Qui tomboient roides morts à la premiere atteinte.

A ces propos chascun trembla de grande crainte:
Alors Aliberses sage fils de Mastor
Qui scauoit le present & le futur encor,
Se leua & leur fit ceste harangue sage.

Itaquois mes amis, cest estrange carnage
Prouient de la malice, & faute de vous tous.
Iamais Mentor ne moy n'auons peu dessus vous
Ceste creance auoir, que vos enfans s'abstinsent
De leur outrecuydance, & leur rageretinsent,
Estans trop insolents fols & intemperez:
Ils ont trop hardiment tous les biens deuorez
D'une grande maison, pourchassé le diffame
Tant qu'en eux a esté du lit & de la femme
D'un tres homme de bien, qu'ils pensoient en effect
Ne deuoir reuenir. Or voila, s'en est faict,
Croyez moy à la fin: n'allons point à l'encontre,
Qu'en attirions sur nous quelque autre malencontre.

Il leur disoit ainsi, mais la plus grande part
De tant qu'ils estoient là se leue & se depart
En desordre & en bruit, faisant un grand murmure,
Ils passoient la moitié, la moindre part demeure:
Cest aduis n'estoit pas suiuant leur volonté,
Ils suiuirent plustost le conseil d'Epithé,
Aux armes ils s'en vont, d'impetueuse audace.

Quand chascun fut armé, ils viennent sur la place,
Se mettent en un corps, Eupitheus estoit
Le chef de la folie, à tous il protestoit
Qu'il feroit de son fils vne rude vengeance.
Mais il n'eut du destin vne telle influence,

*Le pauvre ne deuoit iamais en reuenir,
Il y prendra la mort plustost que la punir.*

*Lors la sage Pallas, vers son pere s'aduance,
Pere Saturnien, dont la toute puissance
Surmonte tout pouuoir: ie te suply, dy moy,
Ce que de tout ce-cy tu penses dedans toy.*

*Les lairras tu entrer en bataille cruelle?
Ou les rendras amis appaisant leur querelle?*

*A qui le collecteur du nuage noircy,
Fille, dit-il, pourquoy demandes tu cecy?
N'est-ce de ton conseil qu'est de retour Vlysse,
Qu'il a fait de ces gens le digne sacrifice?*

*Poursuy donc, & fay tout selon ta volonté.
Mais ie te diray bien, puis que tant a esté
Que ces fols se sont veus punis de leur offense
Faisons leur contracter vne bonne alliance:
Qu'il regne quant à luy, & qu'il soit le plus fort,
Nous, donnons à ceux-cy vn oubly de la mort
De leurs freres & fils, & faisons qu'ils s'entrayment,
Ainsi qu'auparauant, que noises ne se sement
Desormais parmy eux, qu'ils ayent désormais
Voire en toute abondance, & richesses & paix.*

*Ce disant, il emeut Pallas la diligente,
Qui du sommet du Ciel fit soudain sa descente.*

*Les autres au verger ayans traittez leurs corps,
Ulysses dit ainsi, quelcun sorte dehors
Pour voir s'il ne vient rien. A lors en diligence
Un fils de Dolius hors la porte s'auance,
Il ne fut pas sorty, qu'il les voit tous marcher
Encontre eux, & desia du verger aprocher.*

*Lors il tourne tout court, & tant qu'il peut s'escrie,
Le voi-cy tout aupres, Armons nous ie vous prie.*

LIVRE XXIIII.

*A ces mots, vn chascun se leue viftement,
S'arme en grand diligence, & sans estonnement,
Quatre avec Ulysses, & six fils de Dolie,
Avec Dolius Laertes se rallie,
Ils prennent la cuirasse, & bien qu'ils fussent vieux
Et tous blancs, ils faisoient des forts & courageux.*

*Quand ils furent conuerts de leur armure forte
(S'entredonnans courage) ils font ouurir la porte,
Commencent à marcher: & Ulysses le fort
Les mene & les conduit. Lors au deuant d'eux sort
La guerriere Pallas, deesse formidable,
A Mentor & de voix & de taille semblable.*

*Ulysses l'apperçoit & fort s'en resiouit,
Lors à Telemachus il se tourne, & luy dit.*

*Donne Telemachus, car tu en as enuie,
Charge sur les plus beaux de ceste compagnie.
Monstre ce que tu scais, fay toy paroistre aux lieux
Où se trouuent tousiours les hommes courageux,
Et ne fay rien qui tourne à honte à nostre race,
Qui a tousiours esté grande en force, en audace,
Et generosité. Tu verras, Monseigneur,
Que ie ne feray rien qui tourne à deshonneur
Dessus nostre maison. Il disoit, & Laerte
Y prit vn grand plaisir, & dit à face ouuerte.
O bons dieux l'heureux iour, quel grād plaisir ie voy,
Mon fils, mon petit fils contendant deuant moy,
Et tout pour la vertu. Lors la forte deesse
En s'approchant de luy ces propos luy adresse.
O fils Arcesius, que i'ayme cherement
Sur tous mes compagnons, prie deuotement
La deesse aux yeux pers & son pere: puis lance
Tant fort que tu pourras sur l'ennemy ta lance.*

Ce dit, elle luy met vne grand' force au bras:
A lors il fit soudain sa priere à Pallas,
Puis sa lance ietta. Elle par l'air portee
Vint tomber instement sur l'armet d'Epitée.
Il ne soustint le coup, mais elle penetra,
Et du fer au trauers dans ses temples entra.
Il tombe & entombant fait vn son efroyable,
Et sous luy raisonna l'armure espouuantable.
Lors Ulysse & son fils seruent promptement
Dessus les ennemis, frappent horriblement,
Et mettent tout à sang. Ils les mettoient en route
Et si les eussent tous exterminiez sans doute
Sans la sage Pallas qui soudain les retint,
Arresta tout ce peuple, & ces propos leur tint.
Laissez ô Ithaquois ceste guerre barbare
Et que sans sang espandre en fin on vous separe.
Ainsi cria Pallas, eux pallissent de crainte
Et d'estonnement grand sentent leur ame atteinte
Les armes hors des mains leur volent à la fois
Et leur tumbent des poings à l'horreur de la voix
De la grande Deesse. Ils reprennent carriere
Et pour sauuer leur vie, ils tournent en arriere,
Regaignans la Cité: sur cest estonnement
Le vaillant Vlysses s'escrie horriblement,
Se iette dessus eux, & legerement saulte,
Comme vn aigle qui prend sa volée, en l'air, haute
A l'instant Iuppiter son foudre delaicha,
Et Vlysses aux pieds de Pallas trebucha.
Qui luy dit: cesse Vlysse, & mets fin au carnage,
Cesse en fin de tuer, ne poursuy dauantage,
De peur que Iuppiter au tonnerre eslançé
Ne soit à la parfin contre toy courroucé.

LIVRE XXIII. DE L'ODYSSEE.

*A ces mots il fait ferme, & preste obeissance,
Fort ayse & fort content. Alors la porte-lance
La fille à Iupiter son Egide branlant,
Et de voix & de taille à Mentor ressemblant,
Entre les deux partis a tant fait que iuree
Se vit pour tout iamaïs une paix asseuree.*

Fin de l'Odysee d'Homere.


DE LOS ME CORONANT.

Extraict du Priuilege du Roy.

PAr grace & priuilege du Roy, il est permis à Abel l'Angelier Libraire iuré en l'Vniuersité de Paris, d'imprimer ou faire imprimer ce present liure intitulé *l'Odysee d'Homere*. Et sont faictes tres-expresses defenses à tous Imprimeurs & Libraires, ou autres de quelle qualité qu'ils soyent d'imprimer ou faire imprimer, vendre ny distribuer en quelque sorte & maniere que ce soit ledit liure, sinon de ceux qu'aura imprimé ledict l'Angelier, & ce iusques au temps & terme de dix ans, à peine de confiscation de tous les liures qui se trouueront imprimez, & d'amende arbitraire, comme plus amplement est déclaré ez lettres donnees à Paris le diziesme Decembre, mil six cens & trois.

Signé, P A R L E R O Y.

R E N O V A R D.



M



INVENTAIRE

Y² 4119







